


# Edolo Bible



Ruth and the New Testament in the Edolo Language of Papua  
New Guinea

**Edolo Bible**  
**Ruth and the New Testament in the Edolo Language of Papua New Guinea**  
**Sampela hap Buk Baibel long tokples Edolo long Niugini**

copyright © 2010-2022 Wycliffe Bible Translators, Inc.

Language: Edolo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-04-26

---

PDF generated using Haiola and XeLaTeX on 26 Apr 2024 from source files dated 26 Apr 2024  
688323a7-0b01-555d-b52f-07c624ea681b

Contents

Uludi . . . . .	1
Madiu . . . . .	6
Maga . . . . .	52
Yone . . . . .	78
Abosolo . . . . .	110
Golosi . . . . .	149
Age Desalonaiga . . . . .	154
Agedu Desalonaiga . . . . .	159
Filimono . . . . .	162
Yamese . . . . .	164
Age Yone . . . . .	170
Agedu Yone . . . . .	175
Osoda Yone . . . . .	176
Yudi . . . . .	177

## Uludi Neala olelo oboba

Beba gowegi sedalu dibe amoda hedabifali dialea. Busa dolō amoli nefolalebegi, e awāla besale galai. Uludi eda Moaba udia Isilale fii sosogo afādēma fii. Neasebegi, ea segea Moaba ami salea egoa amo baagoi. Baagosebegi, ea egoame made digīla awāla sigi nebegi, Naomi e hīle Yuda fii segea obēgēi. Obēgēsebegi eege Naomi bēgēla helegela asi. Uludia Isilaleie Gode neebe amo hawala sulo. Hobeala e dolō elōma filahlā, gini Debidiie yaye sulo. Debidi eda Isilale ilile gini dafidilo hedabi afādē nelo.

Sedalu gowe dia nidela, Uludia hamoi gowe hēdāi nabolōmelē. Dafidida, Uludi e asigi afādē negei made sulo, gasoda, Isilaleie Godemage ie egoame amomage edefademalā boba hamoi sulo. Mala ea hamolo amoda, Isilaleie Godea ilima ado sāla negei i amo, ea dofā bēgēla hamolo sulo. Amase, diliage dilile iso asigiage Gode dofā hamesa namialo. Amalahilā, dilile damelē nefolalebe amoli boba hamomalo. Beba gowea ulufala olesalea, udia dolō wagadi made nefolalebe amolia Godeie galu neala gaulahlā, Godeie udia dolō nefolalebe amolibalā maala baamolō dialea. Mala amala hamoseda, dolō wagadi made nefolalebe amoli afādēa Isilale fii ilia mala hamolo amo baagila moholōmelē.

### Naomia yōi meli

*(Uludi 1)*

*Elimelege idiage efegele āudā amolali Moaba asi*

<sup>1</sup> Isilale udia dolō beaha aligilo gini maadeia, gudi mogelo amoliamu beaha nebegi, Yuda segea ami sege eso edefademalā maala sidē i edefade gelola misi. Amala hamosebegida Bedeleheme ami fii dolō afādē sosogoda Yuda, amilahilā gāheo i odoa sege nāiadodi Moaba namolō asi. Dolō asi amo ie udiage ie dolō malō āudāge ili biyidia asi.

<sup>2</sup> Dolō amōie ēida Elimelege, ie udiada Naomi, malō āudā amolea ēida Malonole Gilionole. Ili sosogoda Efalada, Yuda fiiie gaamu edefade Bedeleheme dibeaa amilahilā Moaba namolō asi. <sup>3-5</sup> Ili gāheo i nabūlasi afādē gadoi ami nelo. Ami nea Elimelege baagoi. Baagosebegida Naomi, ie malō āudā amolali, hilido nelo. Hilido nea efegele āudā amolea Moaba udia amogi nii. Dolisā āudā amolea ēida Obale Uludile. Ele neala ami salea Gilionole Malonole helegela ami baagoi. Egoa efegele āudā amolali baagoibua Naomi hīdo ami sulo.

*Naomi asi amo gadola Uludia bēgēla Bedeleheme obēgēi*

<sup>6</sup> Naomi ami salea nabelebe Dafidilo Geloia ie udia dolō neala obeāgilaslahilā dafidi esoi dilo amo fisilahilā molō naha dialeala sāi nabi. Amo nabalahlilā efege idia didalo āudā amola ili Moaba digīla moholōla daiai. <sup>7</sup> Naomila efege idia didalo āudā amolali segea ami sulo amo digīlahilā, Yuda segea moholō asi. <sup>8</sup> Asi amo awālahilā gaso, idiafa amilahilā Naomia efege idia āudā amolema sāhalea, Alida hali segea diemebalā samolō obēgēmalo. Alia nemage baagoi amolimage mala hedabi hamosa nelo amo gadola Dafidilo Geloiaie alima hedabi hamomolōmelē. <sup>9-10</sup> Dafidilo Geloia ali ugila negemāia. Dolō elōma mosalo. Dafidilo Geloia ali hedabola ugila negemolōmelēla sāla iahagola sāla i. Amala sāla iaha nelolahilā, Naomia udia āudā amole helegela neala mimilahilā, ali samialola sāla i. Amala sāi amole udia āudā amolea diisa nea Naomima gelolafali sāhalea, Alida obēgēmolō made. Di sosogo neebea di awāsego gadola nihilīgila moholōmelēla sāi.

<sup>11</sup> Amala sāsebegi, Naomia sāla obēgēsalea, Nīe nidiwi ali-e, alida dofā wila hali mosōa obēgēmāiala helēsēsamelē. Nebalāda alida edo nea moholō. Ali nimāia na dolō malō elō sogobamolōi gabule. Alida mosōa bahīla obēgēmalo. <sup>12-13</sup> Na walio gasigi dolō fila awāla malō āudā sogobalahilā amea ali nimāiale. Neda sesalebe made gabule. Ali hali segea bahīla obēgēmalo. Malō āudā amea ali nimāialahlilā beaha samolōle. Ele helēsēla ali memalā samolōle. Nīe nidiwi ali-e, Dafidilo Geloia nema edefade baagi i amo gadola alimage amai amogi bobasēsawela sāi. <sup>14</sup> Amo sāi amo nabalahlilā elea bu elō dii. Diisa nelolahilā Obaea egoame Naomi gaula mimilahilā, mosalo, hawiola sālahilā hī segea obēgēi. Uludia egoame salī gaula nea, neda dofā obēgēmolō mademēlā sāi. <sup>15</sup> Amala sāsebegi, Naomia ema sāla obēgēsalea, Die disama amoda e hīle sosogo neebeage hīle gode neebeage obēgēi amo dige amo gadola obēgēmalo sāi. <sup>16</sup> Amala sāsebegi, Uludia sāla obēgēsalea, Dia ne bahīla obēgēmalo sāmbabu. Di awāsego gadola ne moholōmelē. Di fiseba amige ne samolōmelē. Di sosogo neebe amoge ne sosogo namolōmelē. Die Geleiyesali Gode neebe amoge nīe Geleiyesali Gode namolōmelē. <sup>17</sup> Di baagosebea amige ne baagomolōmelē. Baagosebea amida baumāiamelē. Baagoamu ali neala hīdo hīdolasimolōmelē. Na ado walio sāi amo gadola bēgēla made hamoseda, Dafidilo Geloie edefade neebe amea nema yōi imāiamelēla sāla i. <sup>18</sup> Amala sāsebegi, Naomia beahamelebe, Uludia ebalā moholōla gelosebegi, ea

ado sāla made, <sup>19</sup> amilasilahilā udia āudā amole awāla Bedeleheme besela galai. Besela galasebegi, Bedeleheme udia dolō nefolalo amolia fudugilahilā udiāfalī amolia sāhalea, E, goda Naomi gabule ma, nowēla sāi. <sup>20</sup> Amala sāsebegi, Naomia sāla obēgēsalea, Nema Naomila sāmabu. Nema Malala sāmo. (Naomi nilile ado sālada obeāgīsa. Amase, Malada nilile ado sālada Gamogaila sāmola sāi). Gode Edefade Sulubadelaie Geloī neebe amea nema gamogai yafie hamola, nihinege neala gamogalasimelē. <sup>21</sup> Amo gala ne wila awāhaleada ne sosogoma asi gaso, walio Dafidilo Geloia sigi obēgēsaleada ne memalā misimelē. Gode Dafidilo Sulubadelaie Geloī neebe amea yōi amo gadoi ī ameada edoie nīe ēi Naomila sāmōlō gabula sāla ī.

<sup>22</sup> Goweda Naomi efegi idia Uludile Moaba sege dīgila obēgēla misi amoie ado dialea. Ele Bedeleheme ami besela galasolo amo gala eladi gadoi ēida bali dafidi sagai dilo amo mi gāwila damusa nebegi besela galai.

## Uludia Boasaie sagaia molō hogola asi

### 2

(Uludi 2)

*Uludi e Boasaie sagaia hamoi hamosa nelō*

<sup>1</sup> Dolō dafidilo ēi sālo afādē īe ēida Boasa. Eda Naomi īe egoa Elimelege baagoi amoie fii afādēgila sosogo gadoi nelō.

<sup>2</sup> Segeyo afādēgi Uludia Naomima nabahalea, Na eladi gadoi ēida bali sagaia damulo neebe amea damula hamoi hamosa neebea ami damui fisigisisi digafui dibe amo misila audulela nabi. Afādēa īe baagido hobeala misila aligi misialola sāmōlōla helēsēsamelēla sāi. Amala sāsebegi, Naomia sāla obēgēsalea, Nīe nidiwi-e, dia amamalola sāla ī. <sup>3</sup> Amo nabalahlilā Uludi e awāla hamoi hamolo amoli baagido hobeala eladi gadoi bali gāgā neala gagaula awāha nelō. Eladi gadoi bali sagai dilo amoda Elimelege sosogo Boasaie sagai dilo.

<sup>4</sup> Boasa hī e Bedeleheme nelolahilā maala besela galai. E besela galahalea īe hamoi hamosa nefolalo amolima sāhalea, Dafidilo Geloī e dilibalā namiāiamelēla sāi. Amala sāsebegi, īe hamoi hamolo nefolalo amolia emage, dige Dafidilo Geloia ugila negemāiamelēla sāi. <sup>5</sup> Boasaea īe hamoi beaha aligilo nelō amoma nabahalea, Udia dolīsā neebe gagoweda nowēla nabi. <sup>6</sup> Amala nabasebegi, hamoi beaha aligilo amea sāla obēgēsalea, Udia dolīsā goda Moaba segeala Naomibalā wī misi amo gabio. <sup>7</sup> Ea nema nabahalea, Hamoi hamolo dolō nefolalebegi baagido eladi gadoi bali gāgā digafui dibego misila aligi hobeala mudulela nabasio. E yosefali maalahlilā hamoi hamosamu nelō amo gaso, holōfali hele fila awālahilā hamoi hamosa neagola sāi. <sup>8</sup> Amala sāsebegi, Boasaea sāhalea, Udia dolīsā-o, sagai odoagi nofe dabiala ulooe. Guī udia hamoi hamolo nefolalebe go ilibalā eladi gadoi bali gāgā gomu misisa namialo. <sup>9</sup> Dolō ilia hamoi hamosebego abidi hamosebelela fādāla bealahilā udiāfalibalā gegegdola hamoi hahamola awāha namialo. Dolō wī nefolalebe golima, ilia dima nafade hamoloela sāimelē. Di ödā molō halāseda, ilia ödā iigi usi diē himolōmelē amogi mualola sāla ī. <sup>10</sup> Boasaea ado amo sāsebegi, Uludia nagadaia gumusula dia idogolahilā Boasama sāhalea, Dia nema mala hedabi go hamosegoda mī edoie amaha. Neda sege wagadi made fii udia misi saleawela sāi. <sup>11</sup> Amala sāsebegi, Boasaea sāla obēgēsalea, Dīe digua baagolahilā salea mala hedabi, diguamema hamoila sāi amo nabimelē. Dia diē dieme diadoge diē segege dīgila udia dolō dia dawa made beahage dimēlo madebalā namōlō misila sāi amo nabimelē. <sup>12</sup> Dia mala hedabi hamoi amoie Godea dimage amo gadola hamomāia. Isilaleie Dafidilo Geloī Godea dige amo gadola sigi namiāia. īe augia hawa musūgā namōlō misi goīge bidi edefade nimāiamelēla sāla ī. <sup>13</sup> Uludia sāla obēgēsalea, Dolō edefade-e, diē hamoi hamolo udia sefolalebe amolibalā afādēdi made sulo amo dia ado hedabi nebalā sāi ameada ne neala gelolasimelē. Amalahilā dia nema mala hedabi hamomāiala sāla ī.

<sup>14</sup> Molō molō nea Boasaea Uludima bu sāhalea, Wahalo gadoi beledi difolalebe gowegi gelebi ēfē gāgā ödābalā gela molō guwi samōlō misiēla sāi. Amala sāsebegi, Uludi e hamoi hamolo amolibalā maala sebegi, Boasaea eladi gadoi bali gobei odoa amogi Uludi muāia neala ī amo naala bolesalea odoa fea digai. <sup>15</sup> Uludi e molō naha maadelahlilā awāla eladi gadoi bali amo bu misila aligi awāha nelō. Uludi awāse gaalu, Boasaea īe hamoi hamolo dolō amolima sāhalea, Uludia eladi gadoi bali doboi dibeadi gogi nelea maaseda, ema nemomabio. <sup>16</sup> Doboī dibeā ami eladi gadoi bali gogi damusaleada odoā e neala gaumāia damula guī guila mosalo. Amo neala gausegida dīlia ema nimabula sāleoala sāi.

<sup>17</sup> Uludia eladi bali amo neala misisa nebegimu eso digala deadi. Ea amo misila neaha maadelahlilā, eladi gadoi bali amo molō mogela hedefala negei. Molō hedefala negei amoie yōida gilo nabūlasi gadoi. <sup>18</sup> Uludia eladi gadoi bali amo āgūla awāla mosōa egoamema olei. Esoa helesalea molō nahalea fea digai āgūi amoge egoamegali muāia neala ī. <sup>19</sup> Amo

gadola hamoi amo bealahilä Naomia Uludima nabahalea, Dia walio eladi gadoi bali neala misila hamoi hahamola awäha nelogoda dolö nowëa sagaia hamosa nelola nabi. Dolö dima hedabi hamolo gomada Geleiyesali Godeie obeägilasiloea eege obeägilasimäiamelëla säi. Amala sälebe Uludia säla obëgësalea, Na eladi gadoi bali sagaia hamoi hamosa nelo amoda dolö afädë Boasaea sagaia hamosolomelëla säla i. <sup>20</sup> Uludia ado amo säla iäsebegi, Naomia sähalea, Dafidilo Geloie neebe ameadä baagoi amolibaläge sebe welibaläge hamomolomelëla säla negei amoda asialo made neebe ameadä Boasa eege neala obeägilasimäiala sähawela säi. Naomia bu sähalea, Boasa goda dofä nili sosogofali fii afädë neamelë. Ali fidila negemolöge beaha namolöge mala dibe amo gadola dolö goea hamomolomelëla säla i. <sup>21</sup> Amala säsebegi, Uludia sähalea, Eage nema ado afädë gomala säasio. Neda ië hamoi hamolo udia amolibalä hamoi hahamola awäha nea eladi gadoi bali misila modoala agusolo amo gala fisimalaimelëla säla i. <sup>22</sup> Amala sälebe, Naomia Uludima sähalea, Nidiwi-e, go säi go gadolafali Boasaie hamoi hamolo udia nefolalebegobalä gedola ië eladi gadoi bali sagaia guimu hamosa namialo. Dolö elöie eladi gadoi bali sagaido nofe dabiala awäsedä, di neala nafadelasimolö dië bimolomelëla säla i.

<sup>23</sup> Uludia Boasaie hamoi hamolo nefolalo amolibalä eladi gadoi bali gägäge widi gägäge modoala dobola nelegela awäha nelo amo gadola hamola wagalahilä wagala afiase amo gadola modoala wagala asi. Mosó midilöda hile egoame salibalä diahamu nea hamola afufusa nelo.

## Boasaea Uludima mala hedabi hamoi amo

### 3

(Uludi 3)

*Naomia Uludië dolö hogosamelëla säi*

<sup>1</sup> Segeyo afädëgi Naomia Uludima sähalea, Di nimäia. Na dië dolö afädë hogosamelë. Dolöbalä hedabola filo amo gadola di segegi hedabola fodögila fimäiamelëla säla i. <sup>2</sup> Dia helësesebele. Eladi gadoi bali sagaia ië hamoi hamolo udiabalä dilia hamoi hamolasilo dolö amoda Boasamelë. Dolö amoda nili sosogofalimelë. E walio gasigi awäla eladi gadoi bali gägä amo dobisa namolomelë. <sup>3</sup> Dië domalo nigime hëmalö. Nigime hëlahilä weli gafisigäi negemalo. Negelahilä fagulo hedabifali salugamalo. Amalahilä eladi gadoi bali amo gägä dobisa neebea ami awälahilä Boasaea di melëloea musügä awäla namialo. Ea hamoi hamosa maadelahilä molö ödäle muäia fu iala namialo. <sup>4</sup> Naha maadelahilä diasebegoda abododi diasebelela fädäla bimalo. Fädäla bealahilä ië fagulo figi gauia adala emo sëgëa ami midialo. Amala hamosegida gomala hamomalola hi fädäla säla imolomelëla säla i. <sup>5</sup> Amala säsebegi, Uludia säla obëgësalea, Dia säsego gadola na hamomolomelëla säi. <sup>6</sup> Amala sälahilä, Uludia egoame salia hamomalola säi amo gadola hamosa maadelahilä, eladi gadoi bali gägä dobisa neebea ami asi.

<sup>7</sup> Boasa e hamoi hamosa nelolahilä molö ödä mai. Naala asigi dusugala awäla süwiasebegi, eladi gadoi bali hedefala dobi nelegela fedai dilo amo agesugi adi. Amala adi dibegi, Uludi e geleä geleäla awäla Boasaie fagulo figi dibe amo geleä bidi gauia adala ië emo sëgëa ami adi. <sup>8</sup> Gasi mogogi Boasa e fudugila adi besusalea beahamelebe, udia afädë ië emo sëgëa ami maala adi dibe meli. <sup>9</sup> Bealahilä e nabahalea, Di nowëla nabi. Amo nabalahilä, Uludia säla obëgësalea, Neda Uludi, dië hamoi hamolo udia amomelë. Dië fagulo bidia ne gesumäiamelë. Amoie mida, dida Elimelegeie sosogofali gabugi, dia ne sigi aligila ugila negemäiamelëla säi. <sup>10</sup> Boasaea amo nabalahilä Uludima sähalea, Nidiwi, Dafidilo Geloia dima hedabi hamomäia. Dia walio hamoi ameadä dafidi hamosa nelo amo baagila awäla hido elöi hedabi hamoimelë. Malisä yafie nea, odoa nelegei yafie negelo, odoa busadäoi, amoli afädëa di nimäiala made helësei gabu. <sup>11</sup> Nidiwi-e, asigi säosäomabu. Udia dolö wi nefolalebe sulubadelaeadä dida udia hedabifali saleala säha. Dia nema hamomäiala säsebe amoda na hamosa maademolomelë. <sup>12</sup> Dia säi amoda dofä. Neda digua baagoi amoie sosogo. Na di beaha namolö gaso, dolö afädë di beaha namolöi neamelë. Amomadale dafidi fädäla nabulomelë. <sup>13</sup> Waliöda gui wäla midialo. Diala aiyo yosefali ne awäla dolö amea abilia säsebelela fädäla nabulomelë. Ea di sigi namolöla säsedä, amo dofea. Ea haboimelëla säsedä, Dafidilo Geloie ägi nea sähawese sosogoea beaha aligilo mala dibe amo gadola hamomolöda nibe dibe amo gadola hamomolomelë. Waliöda sege yomäia beahalea gui midialola säla i. <sup>14</sup> Amala säsebegi, Uludi e Boasa dibeami adi amo udia dolöea siia melëloea helëselahilä Boasaea musügä fodolofali nowela yosefali mosalola säi amo gadola aabela nowei. Boasaeadä udia dolöea Uludi e, e adi dibeami diala asi gabula made helësemäia amala säi. <sup>15</sup> Nowesebegi, Boasaea ema sähalea, Dia fagulo go idogoi fösimola säi. Amo gadola Uludia fösissebegi, Boasaea eladi gadoi bali gägä amogi adu äudä i, amoie yöida gilo nabulasi äudä gadoi amo ägümalai. Uludia bali gägä amo ägümäia Boasaea nigila ägüsi. Uludi e amo ägüla asi baagido Boasa e Bedeleheme gaamugi asi.

<sup>16</sup> Obëgëla awäla egoame sali mosöa sebea ami besela galasebegi, egoame sali amea nabahalea, Nidiwi, gelola abilia hamoila nabi. Amala nabasebegi, Uludia Boasaea säi amoge hamoi amoge hulu sulubadela säla iaha maadei. <sup>17</sup> Ea säla wagahalea sähalea, Boasaea di sebea obëgësalea memalä ne badumu obëgëmäiala made beasila, eladi gadoi bali gägä adu äüdä i ägüi amo gomelëla säi. <sup>18</sup> Amala säsebegi, Naomia Uludima sähalea, Nafege udia, di holöfalä beaha samialo. Walio Boasaea hamosebego abilia hamola dafogäsebelela bimolömelë. Boasaea abilia hamogimolöi walebelela bimolöie idi hogosamu nea. Beagolese amo gadolada e hele samolömelëla säi.

## Dafidilo Geloia Naomi ugila negei amo

### 4

(Uludi 4)

#### *Boasaea Uludi nii*

<sup>1</sup> Boasa e awäla udia dolö gedolo segea nogila digalo idiafa ami sulo. E fii heleia made Elimelegeie sosogo elö säi amo maasebe meli. Boasaea dolö amoma sähalea, Ae, nedoo, gui samolö misië. Na dima ado holöfalä sädeläla säi. Amala säsebegi, dolö amo maala sulo. <sup>2</sup> Amala maala sebegi, Boasaea segea ami dolö beaha aligilo nabülası nefolalo amoli maala ffigimalola säla i. Amala säsebegi, İli maala sefolalo. <sup>3</sup> Ea İe sosogo amoma sähalea, Naomida Moaba asi nelo amo bahıla misi saleamelë. Eada alİle sosogo Elimelegeie sege nalä amo dolö afädëa nimäiala helësësaleamelë. <sup>4</sup> Amaimo, dia helësëmäia säla İahago. Dia sege amo nimolö helësëseda, beaha aligilo nabülası sefolalebe gowe İlİle İiİgi sämo. Neda di baagia gabugi sege amo dia nimäia. Made nimolö galëda, haboİla sämola säi. Amala säla İasebegi, dolö amea säla obëgësalea, Sege amo na nimolömelëla säi. <sup>5</sup> Amalebe Boasaea ema sähalea, Dia Naomİie sege nimolö galëda, Moaba udia Malonoİe udia didalo Uludige digali nimalo. Amalahilä sege amoda baagoi amoİe sosogoİe İegi dıamİäiala säi. <sup>6</sup> Ado amala sälebe dolö amea sähalea, Sege amo na nimolö gaso, na neaseda, nihİne nelegei negelo made gadoi busadäoi namolö gabugi. Ne haboi. Na made nimolömelë. Dihİ helësëse amo gadola hamomalola säi. <sup>7</sup> (Silba İsilale udia dolö İlİle mala gowe gadola hamolo negei. Udia didaloİe ado sähaleage, amase, sege nalä nimolöİe ado sähaleage amogi bidigi sämolö made säla wagahagola sähaleada emo usılılo gıla bİdi nelo dolö amogali İlo negei.) <sup>8</sup> Dolö amea Boasama sähalea, Dia bidia nimalola säi. Amala sälahilä İe emo usılılo amo dugala Boasagali İ. <sup>9</sup> Amala İasebegi, Boasaea mala gauı busa nabülası sefolalo amolımage udia dolö odo maala sefolalo amolımage sähalea, Dİli sulubadela sebegoİe sidaia sähago. Dafidida Elimelegeie segege nelegei dİlo amoge malö äüdä Malonole Gilionole segege nelegei dİlo amoge Naomia beaha nelo nebeo amoda na neahawe. <sup>10</sup> Amase, Moaba udia Uludida Malono baagoi amoİe udia didalo sulo amoge na neahawe. Amala hamosebeweada baagosalea sege nalä dİbe amoda Malono hİle İegİmu İe sosogoİe dıamİäia. Baagoi amoİe sosogo afädë sebe amoliada İe İi amo helësësa namİäiamelë. Na walio säi amoda dİliage nabala İiİage meli amomelëla säla İ. <sup>11</sup> Amala sälahilä dolö nabülası amoliage udia dolö bea misi sefolalo amoliage sähalea, Ä, niliİage beaha. Udia go dİe mosöa awäsedä, Dafidilo Edefadea ugila negesegi nilİle İsilaleİe naye mäu Eleselole Eleale gadoi samİäiamelë. Elea malö malei ägüi amo gadola udia goweage malö malei ägümäiamelë. Amase, dihİdida Efalada sosogo amoİe İi sälo nea, Bedeleheme udia dolö beaha aligilo dafidilo namolömelë. <sup>12</sup> Dafidilo Geloia dolİsä go alİma aligila malö ägüsebe ameada Yuda Damalalea malö sogobai nilİle mäu Felese sosogo gadoi di sosogo namİäiamelëla säi. <sup>13</sup> Segeyo amo gala Uludi nealahilä Boasaİe udia salea. Dafidilo Edefadea ele neala obeägİlasİlahilä Uludi e fagulo hagui sebe meli. Amalahilä ea dolö malö afädë neegela ägüimelë. <sup>14</sup> Udia sefolalo amolia Naomİma säla İahalea, Dafidilo Edefadeİe İi gauia adadi. Ea di dihİdo samİäiala fısigİsİla made. Dİe dİaye afädë di beaha namİäia İ gabumelë. Malö goeada İsilale udia dolö beaha aligilo dafidilo namolömelë. <sup>15</sup> Dİefege idİaea dİma boba hamosebegoeada dia dolö malö gifalädalİa gadoi sogobai amai galebada, amolİma boba hamolabio amoda nagadaİalahlä dİe dİefege idİaea dİma boba hamoi gabugo. Amaimo, ea malö walio ägüi goeada di gelolasİla sigi aligila beaha alİligi awäha nea, di udia sali hamomolömelëla säla İ.

#### *Boasage İe mäu nelo amoge*

<sup>16</sup> Naomia dolö malö dubo amo sogobala gaula nea obëbësa nelo. Amala hamolahiläda dubo amo Naomia beaha nelo. <sup>17</sup> Udia ga made sefolalo amolia malö amoİe İi Obedi negei. İi amo negelahilä İlia säla sogosalea sähalea, Naomİgali dolö malö afädë sogobala İ gabuwela säi.

Hobealada Obedİie malöda Yesi. Yesiie malöda Debidi.

<sup>18-22</sup> Goweda Felese sosogo awäha nea Debidi besela galai amo dialea. Feleseie malöda Hesolono. Hesolonoie malöda Alama. Alamaie malöda Aminadaba. Aminadabaie malöda Nasono. Nasonoie malöda Salomono. Salomonoie malöda Boasa. Boasaie malöda Obedi. Obediie malöda Yesi. Yesiie malöda Debidi. Amala fifi misi dialea. Hä amo.



## Madiu Neala olelo oboba

Ado Mala Hedabi Madiuie bebagi dödëla negei dibe amogida, gomalä säi dialea. Asialo made ado dafidi säla negei amogida, Godea hamomolömelëlage, ìmolömelëlage säla negei amoda Yesu e misi amoma gausiala digai. Yesueada Yu udia dolömu damula moholö made, udia dolö mogela made, sulubadela damula moholö misi.

Madiuie bebagi ado dödëla negei amogi mi gäwila dödëida, Melia Yesu neegela ägüi amoge, Yonea Yesu ödägi gei amoge, mugabe Saidania Yesu fedogola meli amoge, dödëla negei dialea. Amase, elöda, Yesu e Galili nea, ado mala säla olelela aliligi asi amoge, udia dolö oloi difolalo amoli neala wahila didigila asi amoge, dödëla negei dialea. Yesu e Galili sege dīgīla nawesa namolö awāla Yalusaleme besela galai amoge, salele afādēgi hamosa nelo amoge, e baagola bedefasebegi, Godea e nowela ifosi amoge, amoli dödëla negei dialea.

Ado Mala Hedabi ameada Yesu eda säla olelelo edefademalä nelo amo neala ulufai dialea. Yesueada Godeie ado mala säla negei dibe amoda, geloi iso gäwi gowe gadoi dialeamelëlage, amase, Hebeni Beaha Maadela Sigi Neebea ami gowe gadoi dialeamelëlage, gelolafali ulufadigisa nelo.

Yesuea mala olelesa nelo amoda Madiuea geloi iso gäwi bia amoli gegedola dödëla negei amoda gowe.

Age - Yesu e segebidaia ami fedala salea, udia dolö Hebeni Beaha Maadela Sigi Neebe amo mi hamola nefolalebe amolile asigi hedabola negela namolöge, hamoi hamomolöge, hedabi dibe amomu salugamolöge, hobeia Godebalä namolöge, amoli säla olelesa nelo. (Hogoli 5-7)

Agedu - Yesuie bēgēla aulo nefolalo amoli hamoi hamomolö afufumäia, Yesuea ilima gomalä hamomalola säla i dialea. (Hogoli 10)

Osoda - Yesuea Hebeni Beaha Maadela Sigi Neebea amida gowe gadoi dialeamelëla ado besula yafie säla iaha nelo. (Hogoli 13)

Biyidu - Yesu dofä bēgēla aulo nefolalebe amolida, gowe gadoi namolö dialeamelëla säi. (Hogoli 18)

Bi - Yesuea segeyo aligila wagahalea hamomolö amoge, amase, Hebeni Beaha Maadela Sigi Neebea ami moholö amoge, ado säla negei amo dialea. (Hogoli 24-25)

*Yesu Gelesoie yaua mäulali aliligi misi amolile ei  
(Ulugu 3.23-28)*

<sup>1</sup> Dödëla negei difolalebe golida, Yesu Gelesoie yaua mäulali aliligi misi amolile ei dialea. Yesu Gelesoie yaua mäuda Abalahamale Debidile nelo.

<sup>2</sup> Abalahamaie malöda Aisaga. Aisagaie malöda Yeigaba. Yeigabaie malöda Yuda, ie edoolali nefolalo amoli.\*

<sup>3</sup> Yudaie malöda Felesele Selale. Elele emeda Damala. Amase, Feleseie malöda Hesolono. Hesolonoie malöda Alama.

<sup>4</sup> Alamaie malöda Aminadaba. Aminadabaie malöda Nasono. Nasonoie malöda Salomono.

<sup>5</sup> Amase, Salomonoie malöda Boasa. Boasaie emeda Eleihaba. Boasaie malöda Obedi. Obediie emeda Uludi. Obediie malöda Yesi.

<sup>6</sup> Amase, Yesiie malöda beaha aligilo Gini Debidu.

Debiduie malöda Solomono. Dafidi Solomonoie emeda Uliäie udia sulo.\*

<sup>7</sup> Solomonoie malöda Elehoboama. Elehoboamaie malöda Abia. Abiaie malöda Asa.

<sup>8</sup> Asaie malöda Yehosafada. Yehosafadaie malöda Yeholama. Yeholamaie malöda Usia.

<sup>9</sup> Usiaie malöda Yodama. Yodamaie malöda Ahasa. Ahasaie malöda Hesegia.

<sup>10</sup> Hesegiaie malöda Manasa. Manasaie malöda Amono. Amonoie malöda Yosaea.

<sup>11</sup> Yosaeaie malöda Yehoiagini, ie edoolali nefolalo amoli. Amo gaaluda, Isilale ili sigi awāla Babilonomu gala digi nefolalo amo.

<sup>12</sup> Ili Babilonomu gala digi nefolaloa amilada, Yehoiaginiie malöda Sealadieie. Sealadieieie malöda Selubabele.

<sup>13</sup> Selubabeleie malöda Abiuda. Abiudaie malöda Eliagimi. Eliagimiie malöda Asolo.

\* **1:2:** Yudala ie edoolalida Isilale sosogo giwili besela galai amoie yaua mäuda amoli. \* **1:6:** Dödëla negei dibe adogogi udia odoa ei difolalebegoda fii odoa dili gaso, Isilalema fila misi amolile ei. Damalale Eleihabaleda fiida Gainana. Uludi eda fiida Moaba. Amase, Solomonoie eme Badasiba afādēfali emuda Isilale udia. Gasoda, dafidi eda Hidi sosogo dolö afādē Uliama fila asi.

<sup>14</sup> Asoloie malöda Sadogo. Sadogoie malöda Agima. Agimaie malöda Eliudi.

<sup>15</sup> Eliudie malöda Eleasala. Eleasalaie malöda Madani. Madanie malöda Yeigaba.

<sup>16</sup> Yeigabaie malöda Yosebe. Yosebeda Meliie egoa. Meliada Yesu neegela ägüi. Yesumada Gelesola sälo amo. \* Amala aligili misi.

<sup>17</sup> Ëi amolida Abalahama neloa amila maala Debidi neloa amilada damo silasi nelo. Debidilahilä Isilale udia dolö ili Babilonomu gala digia amilage damo silasi nelo. Oböla Babilono gala digia amila Afädë Memelei e misia amilage damo silasimu nelo.

*Melia Yesu Geleso neegela ägüi  
(Uluu 2.1-7)*

<sup>18</sup> Yesu Geleso ägüla maasolo amo gala, gomalä hamoi. Ìe eme Meli Yosebegali olei sulo. Yosebea, aso, made neala sebegi, Eleloi Gesamia malö dubo i amo, ili sefolalo amolia beagolei. <sup>19</sup> Egoa Yosebe eada dolö mogoi amead, udia dolö nefolalebe amolia Meli e hewalasioea, eada geleä musügä Meli fisimölöla helësäsa nelo.

<sup>20</sup> Amala helësëlahilä, e adi simasia beahaleamelebe, Dafidilo Geloie selesaia fii afädë ulufadigilahilä, Yosebema ado säla iahalea, Debidie malö Yosebe-e, Meli die udia samiäia nimolö amoda bedämabio. E fagulo hagui sebe amoda Eleloi Gesamia negesimelë. <sup>21</sup> Eada dolö malö afädë neegela ägümolömelë. Neegela ägülahilä, ie Ëi Yesu negemalo. Mida, ea ie udia dolö nafade hamoi amoli hëla fisila damula moholömelëla säla i. \*

<sup>22</sup> Dafidi Dafidilo Geloia ie bea säloma aligüla bea säla negei amo gadola gausiala dig-amolöie, nelebo sulubadela amala hamoi. <sup>23</sup> Bea säla negei amoda gowe. Dolisä dolöbalä made nawelo afädëa fagulo hagui sulolahilä, dolö malö neegela ägümolömelë. Malö amoie Ëi Emanuale negemolömelëla säla dëdëla negei dialea. Ëi amoie mida gomalä, Gode nilibalä nea. *Aisaea 7.14*

<sup>24</sup> Yosebe adi nowela awälahilä, Dafidilo Geloie selesaia fiia ema ado säi amo gadola bëgëla, ea Meli nii. <sup>25</sup> Neasebegi, Melia malö made ägüla maala saleada, Yosebebalä made nawela sulo. Giso ägüla maasebegida, Yosebea malö amoie Ëi Yesu negei.

## 2

*Sege wagadi made eso maasidola dawadigi dolöea bea misi*

<sup>1</sup> Heledo eda beaha aligilo gini nelo amo gaalu, Yudia segea gaamu afädë Ëi Bedeleheme ami Melia Yesu neegela ägüi. \* Ägüsebegi, dolö odoa gasumilä melëlo mala dawadigi nefolalo amoli sege wagadi made eso maasidola maala Yalusaleme besela galai. <sup>2</sup> Besela galalahilä, ilia sähalea, Yu udia dolöie beaha aligilo gini namolö malö dubo neegela ägüi amoda, abidi dialea. Ìe gasumilä eso maasido neebe amo bealahilä, nilia ie Ëi gauia adamolö mofiaimelëla säi. <sup>3</sup> Ado amala säi amo nabalahlilä, beaha aligilo Gini Heledo e asigi säosäosa nelo. Amase, Yalusaleme ami nefolalo amoli sulubadelaage, amalamu helësësa nefolalo. <sup>4</sup> Säosäolahilä, Heledoea Yu udia dolöie gobela ilo busa nefolalo amolige, amase, mala dawadigi nefolalo amolige gege-domalolahilä, ilima nabahalea, Afädë Memelei amoda sege abidi neegela ägümolöla nabi. <sup>5</sup> Amala nabasebegi, ilia säla obëgësalea, Yudia segeamadi gaamu afädë Ëi Bedeleheme amimelë. Amala säsebe amoie mida, bea sälo nelo amea säla dëdëla negei dibe amoda gowe.

<sup>6</sup> Bedeleheme, Yuda segegida, dida Yuda segeie gaamu ilibia edefade difolalebe amoli hawa made. Dige sege edefademelë. Amoie mida, dima aligüla sigi aligilo afädë besela galamolömelë. Eada sugua sibi sigi aligilo amo gadola, nie Isilale udia dolö sigi namolömelëla säla dëdëla negei dialeala säi. *Maiga 5.2*

<sup>7</sup> Amala säi amo nabalahlilä, Heledoea geleä musügä dolö dawadigi eso maasidola mofiai amoli welahlilä, dilia gasumilä amoda abola melila ea ilima fädäla nabi. <sup>8</sup> Nabala ili Bedeleheme mosalolahilä, ea ilima sähalea, Dilia malö amo hedabolafali hogolahilä beagoleseda, nage ie Ëi gauia adamolö moholöie nema säla imalola säla i. <sup>9</sup> Gini amea amala säi amo nabalahlilä, ili awäha nebegi, gasumilä dafidi eso maasido meli amo dafidi awäla, malö dibeami aumala aligisi. \* <sup>10</sup> Iliä gasumilä amo bealahilä, ilile iso asigigila edefademalä obeägimolö besela galai. <sup>11</sup> Aumala aligisi neebe amo bealahilä, dolö amoli mosö afädë neebe amoie mumusogi digai. Nogila digalahilä, ilia malöge ie eme Melige

\* **1:16:** Gelesoda Giligi ado. Hibulu ado sälada Mesaeala sälo. Gelesole Mesaeale nilile ado sälada Afädë Memelei.

\* **1:21:** Yesuda Giligi ado. Hibulu adoeada Yasua. Nilile ado sälada Godea damula aulo. \* **2:1:** Gini Heledo amead, Yudia segege, sege odoa Yudia ga madela dilo amoge, Heledo eamu beaha nelo gasoda, eda Olomoie Gini edefade Ëi Sisala sälo amo hawa nelo. \* **2:9:** Yalusalemela Bedeleheme mia made made, holöbö gilomida gödölasi gadoi, Dodomonala Aya gadola.

bealahilä, emo gumu sasagala fia idogolahilä sefolalea, malö amoie ëi gauia adaha sefolalo. Amalahilä, ilia igi gologe, i heale gobesege hõba gafisigä hedabi baëla aligilo amoge, amase, i afädëie heale sigä gäha made misiäia hëlo ëi muwege, amoli ägüi amo Yesugali somodala i.\*

<sup>12</sup> Amala somodala ialahilä, ili misi idi amogi made, idi elögi obëgëi. Amoie mida, ilia simasia beahaleamelebe, Godea ilima sähalea, Heledo neebeamadida obëgëmbiola säi amo nabalahlilä, hilile segea amala obëgëi.

#### *Fisäla Isibi asi*

<sup>13</sup> Dawadigi dolö amoli afaibua, Yosebea simasia beahaleamelebe, Dafidilo Geloie selesaia fii afädë maala ulufadigilahilä sähalea, Di nowela malöle emele sigi, dili fisäla Isibi mosalo. Awäla neëgi, na dima bu elö säla imolöie ami beaha namialo. Mida, Heledoea malö go nufudadigimolöie hogomolömelëla säi. <sup>14</sup> Amala säsebegi, Yosebe nowela malöle emele sigi, ili gasigi fisäla Isibi asi. <sup>15</sup> Isibi awälahilä, eda Heledo baagomäialahlilä Isibimu nelo. Amoda dafidi Dafidilo Geloia ie bea sälo ma aligila bea säla negei amo gausiala digamolöie, amala hamoi. Bea säla negei amoda gowe.

Nie nafege Isibi segeala na weimelëla säla dëdëla negei dialea.

*Hosea 11.1*

#### *Malësä malei nufudadidigisa maadei*

<sup>16</sup> Heledoeada dolö dawadigi amolia e gadiaboi gabula helësëlahilä, e edefademalä mihaläi. Edefademalä mihalälahlilä, Bedeleheme amige, amase, sege Bedeleheme ga madela sebea amige, dolö malësä gäheo i äudä sulo amolige, gäheo i äudä, aso, made baagi sulo amolige, ea sulubadela baagomäia nufudaha maademalola säi. Dolö dawadigi amolia gasumilä mi gäwila neia idogoi melëla säla i amo helësëlahilä, amala nufualai. <sup>17</sup> Amo hamoi amoda bea sälo Yelmaeaea dafidi bea säla negei amo gausiala digai. Amoie säla negei dibe amoda gowe.

<sup>18</sup> Alama gaamugi ado afädë säsebe, ado amoda edefade didigaola diisa neebe amoda nabaha nea. Eleseloea ie malölaligi diisebe amo. Ili hä maade amea, afädëa e neala adoea aeasisila made sämäiala helësësa saleala

säla dëdëla negei dialea.

*Yelmaea 31.15*

#### *Yosebelali Isibila obëgëi*

<sup>19</sup> Heledo baagoibua, Yosebe Isibi ami nea simasia beahaleamelebe, Dafidilo Geloie selesaia fii afädë maala ulufadigilahilä <sup>20</sup> ema sähalea, Di nowela malöle emele sigi Isilale segea mosalo. Mida, malö amo nufulöla helësësa nefolalo amolida, hä, baagosa maadeimelëla säi. <sup>21</sup> Amala säsebegi, Yosebe e nowela malöle emele sigi, Isilale segea obëgëi. <sup>22</sup> Ili obëgësalea, Yosebea Agelausada ie eedo bedefala Yudiaie beaha aligilo gini neamelëla säi amo nabalahlilä, eda ami obëgëmolö bedäi. Bedäla nebegi, ea simasia beahaleamelebe, Godea ema mosabiosebegi, e Galili segea ami awäla <sup>23</sup> bobala Nasalese gaamugi asi. Amala hamoi amoda bea sälo nefolalo amolia bea säla negesalea, Eda Nasalese fii neala sämolömelëla dafidi säla negei amo gausiala digai.

### 3

#### *Ödägi gelo Yonea ado mala säla iaha nelo*

*(Maga 1.1-8, Ulugu 3.1-18, Yone 1.19-28)*

<sup>1</sup> Gäheo i odoa nelolahilä\*, ödägi gelo Yone e Yudiamadi sege nafade udia dolö aligisia made ami ulufala maalahlilä, mala säla iaha nelo. <sup>2</sup> Ea säla iahalea, Hebeni Beaha Maadela Sigi Neebe amo ga made dibe amea, dili asigi besumalola säla iaha nelo.\* <sup>3</sup> Godea bea sälo Aisaeama aligila Yoneie dafidi bea säla negesalea sähalea,

Sege nafade udia dolö aligisia made ami nea, afädëa wesalea sähalea, Dafidilo Gelo misiaia idi daiala hamogilasimalo. Ie idida mogola fodolasimalola säha neamelëla säla dëdëla negei dialea.

*Aisaea 40.3*

<sup>4</sup> Yone eda sugua gamele hilä fagulo hamoi amo salugalahilä, sugua gafodo gadoia malibu negela nelo. Eada galiawage, äwi ödäge naha nelo.\* <sup>5</sup> Udia dolö Yalusalemelage, Yudia sege dibe amo sulubadelaglage, sege ödä Yodona ga made dibe amilage, Yone

\* **2:11:** Nelebo ohodoa i amolida gädili elögi bidi edefadea nea aulo. \* **3:1:** Giligi adoda Segeyo amo gaalula dëdëla negei dialea gaso, hogoli agedu baagiada hogoli osodaie gäheo i nabülasi äudäie odoai gödölasi gadoi nelo. \* **3:2:** Hebeni Beaha Maadela Sigi Neebela säi amoge, amase, Godea Beaha Maadela Sigi Neebela säi amoge, ado amole säi amoda Gode eda dofä udia dolöle nelebo sulubadela dibe amolele gini namolöla säi. \* **3:4:** Ado egowe fagulo gäige molö naha neloge säi ameadä, Yone eda bea sälo dolö afädë Elaia gadoi galea. Agedu Gini 1.8ge, Malagai 4.5ge, Madiu 11.14ge, amase, 17.10-13ge bimalo.

neebea maahamu nelo. <sup>6</sup> Iliia nafade hamoi amo säla sisiasebegi, ea ili ödä Yodonagi gesa nelo.

<sup>7</sup> Felesi dolö amolige, Sadiusi dolö amolige yafie Yonea ili ödägi gemäia maaha neebe amo bealahilä, ea ilima sähalea, Dilida baagolo nubaie malö nebege, Godea së ia idogomolö amogi, made naala fisäla moholömelëla dilima nowëa säla iasio. <sup>8</sup> Dilia asigi besui amoie gägä ulufala negemalo. <sup>9</sup> Dilia dihilidomu sähalea, Abalahamada nilile mäu nelola sämolö dialeala helësëmbio.\* Na ado afädë säla iahago. Nabualo. Godea igi difolalebe gowegi neala gaulahilä, Abalahamaie yaua mäu hamolasimolöi neamelë. <sup>10</sup> I nefolalebe mia ami gabi negesisi dialea. I gägä hedabi made negelo nefolalebe amolida, sulubadela abalahilä, nulogi gobesa maademolömelë.

<sup>11</sup> Dili asigi besui ameada na dili ödäea gelasimolë. Hobebe ne baagia afädë moholö amoda, ne holöfalimelë neebewe gadoi made, eda ilibia edefade neamelë. Na ie emo usililo gaumolö dofea made neawe. Eada Eleloi Gesamiage, nulo söaeage dili gelasimolömelë. <sup>12</sup> Eada eladi gadoi ëi widiie gägä dobilahilä, isole düle mogemäia nelebo gesala sadia adogolo nama gadoi afädë gaula nea. Mogesa maadelahilä, ea widi gägä amo negelo mosöa ami negesilahilä, ie widi dobilo sege amo gëgelë doala digilahilä, dü fisi amoli nulo usilo made, wisamu neebea ami gobemolömelëla Yonea säi.

*Yonea Godeie malö Yesu ödägi gelasi  
(Maga 1.9-11, Ulugu 3.21-22)*

<sup>13</sup> Segeyo amo gaalu, Yesu e Galilila ödä Yodona dibebe ami maalahilä, e Yonea ödägi gelasimäia misi. <sup>14</sup> Maasebegi, Yonea Yesuea oböla asigi bedefala ödägi made gemolöla sämäia, ea nabahalea, Dia ne ödägi gemolöi dialea gasoda, na di ödägi gemäia, ne neebea misi golela nabi. <sup>15</sup> Amala nabasebegi, Yesuea säla obëgësalea, Walio amala hamomäiamelë. Mala go hamosaleada, Godea hamesebe amoda hamosa maademolö dialeala säi. Amala säsebegi, Yonea ema üi.

<sup>16</sup> Yonea Yesu ödägi gei. Yesu ödägila agesua fodolo aliga adogoi amole, mu dogo negelahilä, ea haea maliabu hagila digalo amo gadola, Godeie Gesami digala edaia fisebe amo meli. <sup>17</sup> Amo gaalu, selesaia mosöala ado afädë säia idogosalea, Egoweda nïe malö, na boba hamosa neawe. Ema edefademalä obeägisa neawela säi.

## 4

*Mugabe busaea Yesuea nafade hamomabelela fedogola bimolöie misi  
(Maga 1.12-13, Ulugu 4.1-13)*

<sup>1</sup> Amala hamosebegi, mugabe busaea Yesuea nafade hamomabelela fedogola bimolöie, Godeie Gesami Yesu e sege nafade udia dolö aligisia made ami sigi fedala ifosi. <sup>2</sup> Amala sigi fedala ifosi nea, Yesu e segeyo nabülasi biyidia, yobage gasigige, molö made naala neamu, sidëa baagoi nelo. <sup>3</sup> E amala sidëa baagosa nebegi, nafade hamomalalo fedogola melëlo busa amea maalahilä sähalea, Di Godeie malö nea galëda, igi gowema wahalo hamomalamola säi.

<sup>4</sup> Amala säsebegi, Yesuea säla obëgësalea, Ado säla dëdëla negei dibe amea sähaleada, Udia dolögalä namolö ilo amoda wahalo nase ameamu ilo mademelë. Ado sulubadela Godeie nafiala maasebe amolia namolöila säla dëdëla negei dialeala säi. *Mala Bu Egei 8.3*

<sup>5</sup> Amala säla obëgësebegi, mugabe busaea Yesu sigi, gaamu Godea hile nafolai Yalusaleme ami awäla, Godeie mosöa ilibiafali gadogo ifosilahilä, <sup>6</sup> ema sähalea, Di Godeie malö nea galëda, hä, di dihi nila sadia idogomo. Amoie ado afädë säla dëdëla negei dibe amea sähaleada, Ea ie selesaia fii amolima die säsegi, igia die emo dualoia, ilile naaboea di sogobala gauia adogomolömelëla säla dëdëla negei dialeala säi. *Gë Udälo 9.11-12*

<sup>7</sup> Amala säsebegi, Yesuea säla obëgësalea, Ado elö gomalä säla dëdëla negei dibe amea sähalea, Dafidilo Gelo, die Gode neebe amo, fedogola bimabiola dëdëla negei dialeala säi. *Mala Bu Egei 6.16*

<sup>8</sup> Amala säsebegi, mugabe busaea segebi ilibia neebedaia ami Yesu sigi fedalahilä, gädili sulubadela dibe amolige, ilile nelebo hedabi difolalebe amoge olesa maadei. <sup>9</sup> Olesa maadelahilä sähalea, Dia ne mia emo gumu sasagalahilä, nïe ëi gauia adaseda, nelebo sulubadela beasebe egowelida, digali iaha maademolömelëla säi.

<sup>10</sup> Amala säsebegi, Yesuea säla obëgësalea, Ai. Saidani. Di moholöi mosö. Ado säla negei dibe amea sähalea, Dafidilo Gelo, die Gode neebe amo, dia ie ëi gauia adamalolage, amase, iemu hamoi hamomalolage säla dëdëla negei dialeala säi. *Mala Bu Egei 6.13*

\* **3:9:** Iliia Abalahamada nilile mäu nelola ado amala sälo ameada, së molö dibebe ami made naala, sisigala moholöla helësëlo amea, Yonea amala helësëmbiola säi.

<sup>11</sup> Amala sāla obēgēsebegi, mugabe busaea Yesu dīgila asi. Asibua, selesaiia fii Yesu neebea maala, ilia e ugila negei.

*Yesuea Galili ami hamoi mi gāwila hamosa nelu*

*(Maga 1.14-15, Ulugu 4.14-15)*

<sup>12</sup> Yone e galabaia mosōa neala sāi amo nabalahlilā, Yesu e Galili segea obēgēi. <sup>13</sup> Obēgēla awālahilā, e Nasalese gaamu dīgila, Gabaniama gaamugi namolō asi. Gabaniama gaamuda, oeabo edefade dibe amoie agesugi Sebulunilele Nafadalilele sege dilo.\* <sup>14</sup> Amo hamoi amoie Godea iē bea sālo Aisaeama aligila, bea sāla negei amo gausiala digai.

<sup>15</sup> Sebuluni segege, Nafadali segege, ēi odoada, idi oeabo edefade dibeamadi ami aulo sege amoge, ödā Yodona agesugi dibe sege amoge, amase, Disiligi Galiligi udia dolō fii odoa yafie maala sefolalebe sege amoge, amolida Sebulunilele Nafadalilele segemu.

<sup>16</sup> Segea ami udia dolō gasimī sagaigi nefolalebe amoliada, yo digalo edefademalā melimelē. Baagoloie sege augi hawa nefolalebe amolimada yo digala besela galaimelēla

sāla dēdēla negei dialea.

*Aisaea 9.1-2*

<sup>17</sup> Segeyo amo gaalu, Yesuea mi gāwila sāla iāhalea, Hebeni Beaha Maadela Sigi Neebe amo ga made dibe amea, dilia asigi besumalola sāla iāha nelu.

*Yesuea dolō biyidia seme digisa nebegi wei*

*(Maga 1.16-20, Ulugu 5.1-11)*

<sup>18</sup> Yesu e Galili oeabo edefade dibe amoie agesudilā awāha nea, ea seme digilo dolō äudā elowole ēole meli. Elōda Saimono, iē ēi elōda Fida, amase, iē edoo Ädulule meli. Eleada ödā edefade amogi seme digisa nelu. <sup>19</sup> Ele bealahilā, Yesuea elema sāhalea, Alia seme nelu amo gadola, udia dolō nimāia na alima neala oleledelā. Ne bēgēla misiēla sāi. <sup>20</sup> Amala sāsebegi, elea elele selēgē amoli dīgila, fodolofali e bēgēla asi. <sup>21</sup> Amila awāha nea, ea edoole edoole elō neebe meli. Elōda Sebediie malō Yamese, amase, elōda iē edoo Yone. Elea elele eedobalā ödā du amodaia selēgē hamogisa neebe meli. Bealahilā, Yesuea ele wesebegi, <sup>22</sup> fodolofali elea ödā duge, eedoge dīgila, Yesu bēgēla asi.

*Yesuea mala sāla olelela digi, oloi wahila didigisa nelu*

*(Ulugu 6.17-19)*

<sup>23</sup> Yesuea Galili sege sulubadelagi nawesa neada, ilile gedolo mosōa sāla olelesalea, Beaha Maadela Sigi Neebe amoie Ado Mala Hedabi sāla olelela digi, udia dolō amoligi olo elō elōla oloi wahila digi, amase, domalo nalafadela nawei sulubadela wahila didigisa nelu.

<sup>24</sup> Amala hamosa nelu amo, udia dolō Siliamadi nefolalo amoli sulubadelaēa nabaha maadei.\* Nabaha maadelahlilā, ilia udia dolō olo elō elōla oloi amolige, sē edefade sēsa difolalo amolige, amase, mugabe fedai difolalo amolige, amulāmei difolalo amolige, fii si sefolalo amolige, sulubadela neala gaula e neebea maasebegi, ea amoli wahisa maadei. <sup>25</sup> Udia dolō yafie Galili amilage, Gaamu Nabūlasimadilage, Yalusalemelage, Yudiamadilage, ödā Yodona nāiada alōmodilage, e bēgēla afiai.

## 5

*Obeägisa neala sāi*

*(Ulugu 6.20-23)*

<sup>1</sup> Yesuea udia dolō yafie negegila nefolalebe amo bealahilā, e gau afädē amo fedala, segebidaia ami sulo.\* Amala sebegi, iē bēgēla aulo amoli e sebea ami mafusebegi, <sup>2</sup> ea mi gāwila nafi dagala ilima sāla olelesalea sāhalea,\*

<sup>3</sup> Odoaea asigigi helēsēsalea, nīe iso asigi dofea made gabula helēsēsa nefolalebe amolida, obeägisa nea. Mida, Hebeni Beaha Maadela Sigi Neebe amoda ilile dialeamelē.

<sup>4</sup> Diisa nefolalebe amolida, obeägisa nea. Mida, Godea ili bobasēla aealasiimolōmelē.

\* **4:13:** Siiba Isilale sosogo äudā Sebulunile Nafadalilela, Galili oeabo agesugi ami filo. Gaso, Yesu e neebe amo gaalu, sege amoda Galili bolobinisi amogi dilo. \* **4:24:** Segeyo Olomoea Yuda beaha nelu amo gaaluda, Galilile Isilaleleamadida holōbō bolobinisi edefade ameadā, Olomo iliada bolobinisi Siliala sālo. \* **5:1:** Yu ilile malada,

dawadigi amolia udia dolōma sāla olelesaleada salea sālo. Madiu 13.2, 24.3, Ulugu 4.20 bimalo. \* **5:2:** Madiu 4.23-25eage, amase, Madiu 9.35eage sāhaleada, Yesueada hamoi nofe äudā hamosa nelola sāi dialea. Amolegi ageda, ea udia dolō ilima sāla olelesa nelu. Amase, ageduda, oloi elō elōla difolalo amolige neala wahila digisa nelu. Amo gadola,

Madiu 5-7 amo niliā beaseda, Yesuea udia dolōma sāla olelesalea, Godea Beaha Maadela Sigi Neebe amoie sāida, ado nahui dialea. Hobealada, Madiu 8-9gi Yesuea oloi difolalo amoli wahisa nelola sedalu sāi amo dialeamelē. Yesuea ado sedadela bia sāi Madiu bebāgi dēdēi dibe amoligida, ageda go. Yesuea segebidaia fedala salea sāi. Ado amoda Hogoli 5-7 amogi dialea.

- <sup>5</sup> Hili nagadaiala aligilo nefolalebe amolida, obeägisa nea. Mida, sege dibe amo sulubadela Godea iligali ïmolömelë.
- <sup>6</sup> Sidëa baagosa neebe amoli molöle ödäle gelola hamese amo gadola, mala mogoi hamomolö gelola hamesebe amolida, obeägisa nea. Mida, Godea ili neala nobalasisa maademolömelë.
- <sup>7</sup> Odoa bobasëla ugila negelo nefolalebe amolida, obeägisa nea. Mida, Godea ili bobasëla ugila negemolömelë.
- <sup>8</sup> Asigi gagadelai amolida, obeägisa nea. Mida, ilia Gode bimolömelë.
- <sup>9</sup> Daluloie hamoi hamosa nefolalebe amolida, obeägisa nea. Mida, ilima Godeie malö neala sämolömelë.
- <sup>10</sup> Mala mogoi hamolo amoie së naha nefolalebe amolida, obeägisa nea. Mida, Hebeni Beaha Maadela Sigi Neebe amoda ilile dialeamelë.
- <sup>11</sup> Dilia ne bëgëla mofiassebe, dolö odoaea dili gagadessege, sëlasisege, ado nafade elö elöla wäfalä säsäla dili hololösege, mala amoli gadoi dilima hamoseda, dili obeägisa nea. <sup>12</sup> Dilia edefademaalä obeägisa namialo. Mida, selesaia mosöa dilile bidi edefade negei dialea. Dili maadeia, bea sälo dafidi nefolalo amoliage së amo gadola wäla naha nefolalömelëla säla ï.

*Dilida ëbile yo digalole gadoila säi  
(Maga 9.50, Ulugu 14.34-35)*

- <sup>13</sup> Yesuea ado aso, sähamu neamu sähalea, Udia dolö sulubadelaie ëbi gadoida, dili nebegomelë. Ëbiië hëdälo amo hogosa heleseda, edoea bu hëdälasimolöi gabu. Ëbi nafade amo gadoida, iso gäwi madela, nagadaia sadia gasegi, udia dolöie emoea daiasalömelë. <sup>14</sup> Udia dolö sege sulubadelagi nefolalebe amolile yo digalo gadoida, dili nebegomelë. Gaamu afädë segebidaia dibe amoda, hagamolöi made dialea. <sup>15</sup> Amase, afädëa gamali yola sagasilahläda, falo hawa negelo mademelë. Amala negelo made, aulidaia negesegi, mosö amogi difolalebe amoli yo digaha maadelömelë. <sup>16</sup> Amo gadola, dilile yo digalo udia dolöea bimäia, yo digalasilömolö dialea. Dilia mala hedabi hamose amo bease amea, ilia dilile Diado selesaia mosöa neebe amoie ëi gauia adamäiala säla ï.

*Mosese nebegi Ado säla negei amoie Yesuea säla olelei*

- <sup>17</sup> Yesuea ado aso, sähamu neamu sähalea, Mosese nebegi Ado säla negei amoge, bea sälo nefolalo amolima mala säla olelesa nelo amoge, na haila digimolöie misi gabula helësëmabio. Na haila digimolöie made misi. Iliä ado säla negei amo gausiala digamolöie ne misi neawe. <sup>18</sup> Na dilima dofä sähago. Naga föige, mu giwige dibe amo gaalu, Mosese nebegi Ado säla negei dibe amogi ado damui afädëge, dudumu afädëge, dofä made hogosa helemolömelë. Mala sulubadela ado amogi dëdëla negei amo gausiala digamäia, mala amo diamolöi diamolömelë. <sup>19</sup> Amaimo, afädëa mala säla negei amogi, mala holöfali afädëa memalä gabula, damula, amase, odoaeage damumäia olelelo neebe amoda, Hebeni Beaha Maadela Sigi Neebea ami emada, dofä gidogofali neala sämolömelë. Amo gadola made, afädëa mala säla negei amo gadola hamola, odoaeage hamomäia olelelo neebe amoda, Hebeni Beaha Maadela Sigi Neebea ami emada, ilibia edefademaalä sämolömelë. <sup>20</sup> Amai gabugi, na dilima ado afädë säla ïahago. Dilia mala mogoi hamolo amoda, mala dawadigi nefolalebe amoliage, Felesi dolö nefolalebe amoliage hamolo amo gadola made, dilia ili baagila awäla made hamoseda, Hebeni Beaha Maadela Sigi Neebea ami dofä made moholömelëla säla ï.

*Yesuea yöla habobalo amo hamogimolöie ado säi  
(Ulugu 12.57-59)*

- <sup>21</sup> Yesuea ado aso, sähamu neamu sähalea, Siibafali udia dolö nefolalo amolima ado sälo dilia nabelo amea sähaleada, Udia dolö baagomäia nufuabio. Afädëa amala hamoseda, gudimolö dië bimolömelëla sälo. <sup>22</sup> Amai gaso, na dilima säla ïahago. Afädëa ie edoobalä mihaläseda, gudimolö dië bimolömelë. Amase, afädëa ie edooma dida dofea madela nolealeseda, Galisölö dolö neebea ami sigi awäla gudimolömelë. Gasoda, afädëa ie edooma dida nafadefali asigi maade nebegola säseada, heli segea nulo gobei dibeami moholömelë. <sup>23</sup> Amaimo, dia nelebo ïmolöie gobela ilo aulidaia negemolö nea, die didoea dima nelebo afädëgi habobai neala helësëla obëgëseda, <sup>24</sup> hä, nelebo ïmolö gaui amoda, gobela ilo auli ga made ami negesilahlä, dafidi die didoo neebea dalumolö mosalo. Dalula asi obëgëlahilä, nelebo ïmolö negei amo ïmalo.
- <sup>25</sup> Ado nii dolö afädëa dibalä gudimolöie awähala säseada, aso, gudimolö segea ami made besela galala, idiafa ebalädale fodolofali hamogimalo. Gudimolöie sigi awäseda, gudi mogelo dolö neebe amoma di gaula ïlahilä, mogelo dolö ameada di dadi gaui amolima ïlahilä, di galabaia mosöa ami ifosiloea. <sup>26</sup> Na dima dofä sähago. Amala hamoseda, dia

nafade hamoi amoie bidi nelo amo gadola neaha maademäia, galabaia mosöa ifosi neamu, made moholömelëla säla i.

*Yesuea udia fa neloie säi*

<sup>27</sup> Yesuea ado aso, sähamu neamu sähalea, Ado säi dilia nabelo amea sähaleada, Udia dolö fa nimabiola sälo. <sup>28</sup> Amai gaso, na dilima gomalä säla iahago. Dolö afädëa udia siia bealahilä gesami awäsedä, udia amo hä asigia fa niimelë. <sup>29</sup> Die si dafädi goea di neala digalasiseda, beselala sadia gamalo. Die domaloie sosogo gogi afädë maade nea, namolöda dofea galea. Die domalo sulubadela aligisa maadei neëgida, heli segea sadia idogomolö amoda, nafade gabugi. <sup>30</sup> Amase, die naabo dafädi goea di neala digalasiseda, naabo amo damula sadia gamalo. Die domaloie sosogo gogi afädë maade nea, namolöda dofea galea. Die domalo sulubadela aligisa maadei neëgida, heli segea moholö amoda, nafade gabugila säla i.

*Yesuea dolöea udia nii fisiloie säi*

*(Madiu 19.9, Maga 10.11-12, Ulugu 16.18)*

<sup>31</sup> Yesuea ado aso, sähamu neamu sähalea, Ado elö sälo amoda gowe. Dolö afädëa ie udia fisiseda, ea beba dëdëlahilä, ie udiama imolö dialeala säi gabio. <sup>32</sup> Amai gaso, na dilima säla iahago. Dolö afädëie udiaea dolö elöbalä mala nafade hamoigi made, ie udia amo fisiseda, ie udia amea dolö fa nimäia fa nimalalasilimelë. Dolö afädëa dolö elöie udia memalä fisi amo neaseda, ameage udia amo fa nimolömelëla säla i.

*Yesuea migalia diigila säloie säi*

<sup>33</sup> Yesuea ado aso, sähamu neamu sähalea, Siibafali udia dolö nefolalo amolima ado sälo dilia nabelo amea sähaleada, Migalia diigila ado gelola säla negei amoda, made fisila, Dafidilo Geloima migalia diigila ado gelola säla negei amoda, hamomalola sälo. <sup>34</sup> Amai gaso, na dilima säla iahago. Migalia diigila ado gelola säla negemabio. Mudaiala säla diigimabio. Mida, mudaiaida Godea beaha maadela filo dialeamelë. <sup>35</sup> Naga föigige säla diigimabio. Mida, naga föida Godeie emoea emesaia idala filo dialeamelë. Amase, Yalusalemege säla diigimabio. Mida, Yalusalemeda beaha aligilo Gini Edefade neebe amoie gaamumelë. <sup>36</sup> Dihile busa säla, migalia diigila ado gelola säla negemabio. Mida, dia busa hilä afädë neala dihi falemolöige, yabumolöige ulimelë. <sup>37</sup> Afädë hamomolö galëda, ü, ailemu sämalö. Ado odoage baala säsedä, ado amo baala sälo amolida, mugabe busa nafadefalimadila maasebe amo sähamelëla säla i.

*Dilia hamola obëgëmabiola säi*

*(Ulugu 6.29-30)*

<sup>38</sup> Yesuea ado aso, sähamu neamu sähalea, Ado säi dilia nabelo amea sähaleada, Afädëa elöie si besela digiseda, ie siige besela digilomelë. Amase, afädëa elöie bese besela digiseda, ie besege besela digilomelëla sälo. <sup>39</sup> Amai gaso, na dilima säla iahago. Afädëa dilima nafade hamoseda, dilia bu dabemabio. Afädëa die ba dafädimadi nufudaseda, ba näiadogoge olemalo. <sup>40</sup> Afädëa die fagulo sedi amo gudi mogeloea imalamolöie, dibalä gudimolö sigi awäsedä, die gögi fagulo daia salugalo amo bu baala imalo. <sup>41</sup> Afädëa gelolafali di dofe afädë mosalaseda, ebalä dofe äudä mosalo. <sup>42</sup> Afädëa nelebo afädë go imola säsedä, hä egali imalo. Amase, afädëa hobeä iduläie bidi negesagola säsedä, auaula baagi imabiola säla i.

*Yesuea ado nii neebe amo boba hamomalola säi*

*(Ulugu 6.27-28,32-36)*

<sup>43</sup> Yesuea ado aso, sähamu neamu sähalea, Siiba ado sälo dilia nabelo amea sähaleada, Odoa nefolalebe amolibalä boba hamosaleada, dibalä ado nii nefolalebe amolibalä habobala namialola sälo. <sup>44</sup> Amai gaso, na dilima gomalä säla iahago. Dilibalä ado nii nefolalebe amolibalä boba hamola, amase, dili neala sälasisa nefolalebe amoli hedabomäia, Godema adolasisa namialo. <sup>45</sup> Ameada, dilile Diado selesäia mosöa neebe amoie malö neala olemolömelë. Mida, eada nafade hamolomage, hedabi hamolomage, ie eso neëlasilo neada, mala mogoi hamolomage, mala mogoi made hamolomage, sege digalasisi nea. <sup>46</sup> Dili boba hamolo amolimü boba hamoseda, dilia edo bidi nimolö. Dagisi muni nelo nefolalebe amoliage amo gadola hamolo nea madele. <sup>47</sup> Dilia dilile didoo amolalimamu haeafula aeahaleada, odoada baagila aulole. Udia dolö Gode helësälo made nefolalebe amoliage amo gadola hamolo nea madele. <sup>48</sup> Amai galëda, dilile Diado selesäia mosöa hedabi mogoifali neebe amo gadola, dilige hedabi mogoifali namialola säla i.

## 6

*Yesuea odoa ugila negeloie mala olelei*

\* **5:41:** Dofe afädëla säi amoda holöbö Dodomonala Dauba gadolaie säi.

<sup>1</sup> Yesuea ado aso, sàhamu neamu sàhalea, Dilia Godeie mala helèsèla hamosaleada, udia dolò nefolalebe amolia dili bimàiala, ilile sidaiada made hamomalo. Amala hamoseda, dilile Diado selesaia mosöa neebe amea diligali bidi ìmolö dibe amo ìmolöi made bimolömelè.

<sup>2</sup> Amaloea, gumusui nefolalebe amoligali nelebo afädè iaseda, odoa ilile sidaia gusàmàiala gelola uuala sàla ìmabio. Asigi fea negelo nefolalebe amoliada bimàialahilä, gedolo mosöage, idiafage, odoaea ilile èi gauia adamàia, amala hamolo nea. Na dilima dofä sàhago. Amoie bidida hä nii aguimelè. <sup>3</sup> Amaimo, dilia afädè gumusui neebe amogali afädè iahaleada, naabo dafädia hamosebegoda, naabo fefeädia made bimàia, <sup>4</sup> musügä ìmalò. Amala iaseda, dilile Diadoea dili hido hìdolaèa musügä hamosebego beaha neebe amea, diligali bidi ìmolömelèla sàla ì.

*Yesuea Godema adoloie mala olelei  
(Uluu 11.2-4)*

<sup>5</sup> Yesuea ado aso, sàhamu neamu sàhalea, Dili nefolalebegoèa Godema adosaleada, udia dolö asigi fea negelo nefolalebe amolia hamolo amo gadola made hamomalo. Ilile asigiada, udia dolö odoa nefolalebe amolia bimàialahilä, gedolo mosöage, idi edefade osogoloage, nowela nea Godema adomolömu hamelo nea. Na dilima dofä sàhago. Amoie bidida hä nii aguimelè. <sup>6</sup> Amala hamolo amo gadola made, dilia Godema adomolö neada, dihilile mosö hogoli afädègi nogila digala idi gala digimalo. Amalahilä, dilile Diado siia bimolöi made neebe amoma adomalo. Amala adoseda, dilile Diadoea dili hido hìdolaèa musügä hamosebego beaha neebe amea, diligali bidi ìmolömelè. <sup>7</sup> Dilia Godema adosaleada, udia dolö odoa Gode made helèsèlo nefolalebe amolia memalä sàla dabolo amo gadola sàmabio. Amolia sedade olögöla adosebe ameada, Godea nabalöla helèsèlo. <sup>8</sup> Amalo amo, dilida ili gadoi namiabio. Dili nefolalebegoèa nelebo sulubadela nimolöi amolida dilile Diadoma aso, adola made neègi, dafidi eadale dawadigisa maadei neamelè.

<sup>9</sup> Amaimo, Godema ado gomalä sàmalo.

Nilile Naado selesaia mosöa nebego, die èi amo eleloifali hido elöi namiàia hamesa neawe. <sup>10</sup> Die Beaha Maadela Sigi Neebe amo misiàiage hamesa neawe. Dia hamesebe amoda, selesaia mosöa nefolalebe amolia hamolo amo gadola, nagadaia nefolalebe niliige hamodelä hamesa neawe. <sup>11</sup> Walioie molö molö amo, walio ìmalò. <sup>12</sup> Odoa ilia nilima asiala hamosegi fisilo amo gadola, diage nilia nafade hamoi amoli fisimalo. <sup>13</sup> Nilì neebeawi fedogola bimolö made negesimalo. Mugabe busa nafadefali neebe amoda, dia neala yolasimalo.

<sup>14</sup> Amaimo, udia dolö odoaea dilima asiala hamoi amo fisiseda, dilile Diado selesaia mosöa neebe amea dilia asiala hamoi amolige fisimolömelè. <sup>15</sup> Gasoda, udia dolö odoaea dilima asiala hamoi amo made fisiseda, dilile Diadoea dilia asiala hamoi amolige made fisimolömelèla sàla ì.

*Yesuea molö made naala namolöie mala olelei*

<sup>16</sup> Yesuea ado aso, sàhamu neamu sàhalea, Dilia Gode helèsèla molö made naala neada, udia dolö odoa asigi fea negelo nefolalebe amolia odagi augia idala aligilo amo gadola namiabio. Udia dolö amoliada molö made naha gabula helèsèmàia, ilia ilile odagi nigime hèla made aligilo nea. Na dilima dofä sàhago. Amoie bidida hä nii aguimelè. <sup>17</sup> Amai gaso, dilia molö made naala, dilile odagi nigime hèlahilä, busagia weli negemalo. <sup>18</sup> Amala hamomolö amoie mida, udia dolö odoa nefolalebe amolia dili bealahilä, molö made naala nefolalebe amo made helèsèmàia, dilile Diado siia bimolöi made neebe ameamu helèsèmàia hamolomelè. Amala hamoseda, dilile Diadoea dili hido hìdolaèa musügä hamosebego beaha neebe amea, diligali bidi ìmolömelèla sàla ì.

*Nelebo hedabi selesaia mosöa gafedela negeloie mala säi  
(Uluu 12.33-34, 11.34-36, 16.13)*

<sup>19</sup> Yesuea ado aso, sàhamu neamu sàhalea, Nagadaia nefolalebeawi, gasiàmoea nulo dibe wige, asömalö gaisa baasia wige, fa nelo amolia mosö dagabola fa nelo neebe wige, dilile nelegei hedabi gafedela negesa namiabio. <sup>20</sup> Amala hamolo dibe wi made, selesaia mosöa gasiàmoea made nulo dibe amige, asömalö gaisa made baasia amige, fa neloea mosö dagabola made fa neasia amige, dilile nelegei hedabi gafedela negesa namialo. <sup>21</sup> Mida, sege die nelegei hedabi dibe amida, die bobahèla asigilo amoda amimu diamolömelè.

<sup>22</sup> Siida domaloie yo digalo gamali gadoi nea. Dilile si hedabi neèda, dilile domalo sulubadelagi yo digaha maadei namolömelè. <sup>23</sup> Amase, dilile domalogi yo digalo neebe amo gasimi sagai dièda, gasimi sagai amoda edela gasimi sagalomelè.



<sup>24</sup> Afädëa dafidilo äudäie galabaia hamoi gadoi hamolasimolö ulimelë. Ea elö amoma bimolö habobahalea, elö amo boba hamomolömelë. Ma, elö amo hedabola ugila nege-saleada, oböla, elö amo memalä gabula helësëmolömelë. Dilia Godeïege, muniëge, helege-laie galabaia hamoi gadoi hamolasimolö ulimelëla säla i.

*Asigia säosäolöie säi  
(Uluu 12.22-31)*

<sup>25</sup> Yesuea ado aso, sähamu neamu sähalea, Amoïeda na dilima säla iahago. Molöle ödäle edo molödula säla, dili namolö goie asigia säosäola helësëmbio. Amase, fagulo edo salugamolödula säla, domalöiege asigia säosäola helësëmbio. Molö aso, nigia galahlä, udia dolö namolö amoda dafidilo madele. Amase, faguloge aso, nigia galahlä, domaloda dafidilo madele. <sup>26</sup> Haea hagila nawiaha dibe amo bimo. Haea amolida molö hawage sagalo made, molö faige gegedola negelo made, amase, negelo mosöage negelo made. Amalo gasoda, dilile Diado selesaia mosöa neebe amea molö hilima iaha neamelë. Haea amoli holöbö gidogolahilä, udia dolö dili dafidilo nebege madele. <sup>27</sup> Dili neebe gogi nowëa asigia säosäose ameada, hile nagadaia namolö amo fu holöfali baalasimolödu. <sup>28</sup> Faguloie asigia säosäola namolö amoda edoie. Mama amoli memalä baulahlä, gägä negelo amo abeahäla fedaha aligilodula helësëmo. Ila hamoige made hamolo, amase, efëge made nolo neamelë. <sup>29</sup> Amai gaso, na dilima säla iahago. Nelebo yafie negelo Solomonoda, ie fagulo hedabifali salugalo amoda, ilile momadoi hido elöi amo gadoi made nelo. <sup>30</sup> Giisi mamala memalä bäui walio nefolalebe amolida, aiyo dolöea damula nulogi gobelo neamelë. Asigi afädë holöfali negei nefolalebela dili, Godea giisi mama nefolalebe amolida memalä momadolasilö. Amo gadola made, dofä baagila awäla, dili nefolalebegoge fagulo gämäia imolö madele. <sup>31</sup> Amaimo, nilia molöle ödäle edo molödulage, fagulo edo salugamolödulage säla, dilia asigia säosäola namiabio. <sup>32</sup> Amo gadolada, udia dolö Gode helësëlo made amolia, nelebo amoli gadoi helësësamu aligilo nea. Amalo gaso, dilile Diado selesaia mosöa neebe ameada, dili nefolalebegoea nelebo amoli nimolöi dibe amoda dawadigi neamelë. <sup>33</sup> Amaimo, ie Beaha Maadela Sigi Neebe amole, ea dilia hamomäia hamesa neebe amoledale hogosa namialo. Amala hogosa aligiseda, ea nelebo amoli dibe amo sulubadela dilima baala imolömelë. <sup>34</sup> Amai galë, walio neada dilia aiyoie asigia säosäola namiabio. Aiyoïeda, segeyo aiyo hi asigia säosäosa namolö. Segeyo afädëie yoi dibe amoda amoïemu dialeamelëla säla i.

## 7

*Odoaea hamose amo mogesebe amoïe säi  
(Uluu 6.37-38,41-42)*

<sup>1</sup> Yesuea ado aso, sähamu neamu sähalea, Godea dilia hamosebego mogeloea, odoaea hamosebe amoge made mogemalo. <sup>2</sup> Mida, dilia odoaea hamosebe amo beala memelelo amo gadola, dilia hamosebe amoge beala memelemolömelë. Amase, dilia odoaea beala mogelo amo gadola, dili bealage amo gadola wäla mogemolömelë. <sup>3</sup> Amaimo, dia die didooie sihidoa gëgelë holöbö diëda melëlo amo, amai dihile sihidoa i gäi gadoi dibe amo helësëlo made amoda edoie. <sup>4</sup> Dilia dihilile sihidoa i gäi gadoi dialea wäla, oböla dilile didooma sähalea, Die sihidoa gëgelë holöbö dibe alogo neahagola abeahäla sämolö gabu. <sup>5</sup> Asigi fea negelo nefolalebela dili, dihilile sihidoa i gäi gadoi dibe amodale neadigilahilä, hobeala dilile didooie sihidoa gëgelë holöbö dibe amo hedabola beala nimolöi bimolömelë. <sup>6</sup> Nelebo Godema odala ilo dibe amogi, dilia ügülogali imabio. Amase, dilile bageie isogi momadoi hedabi amo gadoi helebe näia difolalebe amoli suguagali sadia idogomabio. Amala hamosedada, ilia nelebo amolida emoea daiasala obëgëia welahlä, dili emesala nolealela mihimolömelëla säla i.

*Ïmola sämolöge, hogomolöge, idi gai dugimola sämolöge  
(Uluu 11.9-13, 6.31)*

<sup>7</sup> Yesuea ado aso, sähamu neamu sähalea, Ïmola ëdëgësa namialo. Ïmola ëdëgësedada, diligali imolömelë. Hogosa namialo. Hogosa aligiseda, dilia beagolemolömelë. Idi gai dugimola säha namialo. Idi gai dugimola säha aligiseda, dili digamäia idi gai dogana negesimolömelë. <sup>8</sup> Mida, udia dolö sulubadelaie imosa neebe amolia nimolömelë. Hogosa neebe amea beagolemolömelë. Amase, idi gai dugimola säha neebe amoma idi gai dogana negesimolömelë. <sup>9</sup> Malö eedo nefolalebego, dilile malöea wahalo Ïmola säsedada, dili afädëa igi neala imolöle. <sup>10</sup> Amase, malöea seme Ïmola säsedada, dili afädëa dabaea neala imolöle. <sup>11</sup> Amai dihili dili nafade hamolo nea gaso, dilile malöma hedabi ilo amoda dawa. Amo gadola made, dofä baagila awäla, dilile Diado selesaia mosöa neebe amea Ïmola säsebe amoma nelebo hedabi imolömelë.

<sup>12</sup> Odoaea mala sulubadela dilima hamomäiala hamelo amo gadola, amase, diliage odoaa ilima amo gadola wäla hamomalo. Mida, Mosese nebegi Ado säla negei amoge, bea sälo nefolalo amolia ado säla negei amoge, amolia säi amoie iso gäwida gomelëla säla i.

*Dilida idi doge negei dedeleigi digamalola säi*  
(Ulugu 13.24)

<sup>13</sup> Yesuea ado aso, sähamu neamu sähalea, Idi doge negei dedelei holöfali amogi digamalola. Mida, nafadelo segea aulo idi doge negeida edefade dialea, amase, idi amoge uahabai dialea. Udia dolö yafieda amogimu awäha nea. <sup>14</sup> Amai gaso, namolöfali segea aulo idi doge negeida dedelei holöfali dialea, amase, idige nebolei dialea. Udia dolö afädë afädëlaeamu amo beagolelo neala säla i.

*Wäfali bea sälo nefolalebe amolile säi*  
(Ulugu 6.43-44, 13.25-27)

<sup>15</sup> Yesuea ado aso, sähamu neamu sähalea, Wäfali bea sälo nefolalebe amoli helësëla, idihë namialo. Ili sugua sibi aeai gadoi, dili neebea mulo nea gaso, iso asigida nufudaha maadelo ilua ügülo gadoi nea. <sup>16</sup> Ilile gägä negesebe amo dilia bealahilä, wäfali bea sälo gabula helësëmolömelë. Gufaeo gadoi neebe amomada, gägä hedabi ëi gelebi negesegei failole. Amase, buudi äyo ëfë gadoi amomada äfäeo gägä negesegei failole. <sup>17</sup> Amo gadoi, i hedabi nefolalebe amoli sulubadelaeadä gägä hedabi negelo nea gaso, i nafadë nefolalebe amoliada gägä nafade negelo nea. <sup>18</sup> I hedabi nefolalebe amoliada, gägä nafade negemolö uli nea, amase, i nafade nefolalebe amolia gägä hedabi negemolö uli nea. <sup>19</sup> I gägä hedabi made negelo nefolalebe amolida, sagai eodoea sulubadela abalahilä, nulogi sadia galo. <sup>20</sup> Amaimo, ilile gägä negesebe amo dilia bealahilä, golida wäfali bea sälo gabula helësëmolömelë.

<sup>21</sup> Sulubadelaea ne wesalea, Dafidilo Geloi-e, Dafidilo Geloi-ela säha nefolalebe amolida, Hebeni Beaha Maadela Sigi Neebea ami made digamolö. Nie Naado selesaiä mosöa neebe amea hamesebe amo gadola hamosa nefolalebe amolimu digamolömelë. <sup>22</sup> Godea gudimolö segeyo amo gala, udia dolö yafiea nema sähalea, Dafidilo Geloi-e, Dafidilo Geloi-e, die ëigila nilia ado bea sälage, amase, die ëi säla nilia mugabe fedai nesila digilage, amase, geloi melëlo made gadoi yafiege die ëigila hamosa nelo amodala sämolömelë. <sup>23</sup> Amala säseada, na ilima sähalea, Dilida na dofä dawa made. Mala nafade hamolo dili, ne neebeawi made, bahila afiamola sämolömelëla säla i.

*Dolö äudäea mosö ulië säi*  
(Maga 1.22, Ulugu 6.47-49)

<sup>24</sup> Yesuea ado aso, sähamu neamu sähalea, Amaimo, sulubadelaea na ado säsebeweli nabala bögëla hamosebe amolida, dolö afädë asigi gäwia igidaia mosö uli amo gadoi nefolalea.\* <sup>25</sup> Amala uli nebegi, hä, sege digalage, ödä bëi nedalage, fo guula maalage, mosö amo gelola nidäla asi gaso, made dagaboi. Mida, igau geloidaia uli nelo amea. <sup>26</sup> Amaimo, sulubadelaea na ado säsebeweli nabala made bögëla hamosebe amolida, dolö afädë asigi made gäwia ödä bosedaiä mosö uli amo gadoi nefolalea. <sup>27</sup> Amala uli nebegi, hä, sege digalage, ödä bëi nedalage, fo guula maalage, mosö amo gelola nidäla awäsebegi, mosö dagabola digala nafademolöi nafadeila säla i.

<sup>28</sup> Yesuea ado amoli sulubadela säha maadesebegi, udia dolö yafie negegila nefolalo amolia ea olelei amo nabalahlilä, asigigi fudugisa sefolalo. <sup>29</sup> Mida, ilile mala dawadigi nefolalo amolia säla olelelo amo gadola made, eada geloi gaulahlilä, geloi hido elöi säla olelei amogi.

## 8

*Yesuea dolö gudubu hamoi afädë wahilasi*  
(Maga 1.40-45, Ulugu 5.12-16)

<sup>1</sup> Yesu e segebidaia amila digasebegi, udia dolö yafie nefolalo amoli e bögëla asi. <sup>2</sup> Amala awäha nebegi, dolö afädë gudubu hamoi nelo amo Yesu neebea maalahilä, emo gumu sasagaia idogola salea sähalea, Dafidilo Geloi-e, dia ne wahimäiala helësëseada, hä dia ne wahilasimolöi nebegola säi.\* <sup>3</sup> Amala säsebegi, ie naabo mogodigia gala, dolö amo diigisa nea sähalea, Na amala helësësa, wahimola säi. Amala säsebegi, dolö gudubu hamoi amo hä

\* **7:24:** Giligi adoea dëdëida, igidaia mosö ulila säi. Mida, Isilale iliada igidaia mosö olelo amo helësëla amala säi. Niliada igaudaia mosö olelo amo gadola. \* **8:2:** Yu ilile Ado säla negei ameada, afädë olo amo gadoi gudubu hamoi galëda, eda Godeie siigi nigime baaila sälo. Hä, hi helësëseada, e olo amo hogosa helesa maadeila helësëseada, gobela ilo neebe amo bea aulo. Iliä beahaleamelële, oloi wahi galëda, ilia sähalea, Dolö amoda Godeie siigi hä hëimelëla sälo. Gobela ilo 13-14gi bimalo.

fodolofali wahi.\* <sup>4</sup> Amala hamolahilä, Yesuea ema sähalea, Dofä asiala elöma säloeo. Gobela ilo dolö neebee ami di siia bimäia olemolö mosalo. Amalahilä, di wahi go udia dolöma olemolöie, Mosesea nelebo odala imalola säla negei dibe amo gadola, nelebo amo odala imalola säla i.

*Yesuea ami sigi aligilo afädëie hamoi hamolasilo wahilasi  
(Ulugu 7.1-10)*

<sup>5</sup> Amila awälahilä, Yesu e Gabaniama besela galasebegi, Olomo ilile ami hädali afädë beaha aligilo afädë Yesu neebee maalahlilä, ema hähäfilila sähalea, <sup>6</sup> Dafdilo-o, nie hamoi hamolasilo e nie mosöa oloi dialea. Ie naabo emo baagola së edefademalä sëlahlilä, fologomolö uli dialeamelëla säla i. <sup>7</sup> Amala säsebegi, Yesuea ema sähalea, Na e wahilasimolö awähamelëla säi.\* <sup>8</sup> Amala säsebegi, ami sigi aligilo amea säla obëgësalea, Ai. Dafdilo-o, neda dofea made. Na mosöa di nogila digamolö holöbö dofea made gabugi, dia adoeamu sämäia. Säseba, nie hamoi hamolasilo amo wahimolö. <sup>9</sup> Nage ami behamu aligilo geloi nefolalebe amoli hawa aligilomelë. Amase, ami dolö odoa nefolalebe amoliage ne hawala aligilomelë. Na afädëma mosöla säseba, e aulomelë. Amase, elöma misiëla säseba, e mulomelë. Na nie galabaia hamoi gadoi hamolasiloma gowe hamomola säseba, amo hamolomelëla säi. <sup>10</sup> Amala säi amo nabala Yesu e edefademalä fudugilahilä, udia dolö e bëgëla maaha difolalo amolima sähalea, Na dilima dofä sähago. Isilale segea afädëa asigi afädë egowe gadola gelola negei neebe na made meli neawe. <sup>11</sup> Na dilima gowe sähago. Udia dolö yafie sege eso maasidolage, amase, eso digasidolage maala, ilia Hebeni Beaha Maadela Sigi Neebea ami Abalahamala Aisagala Yeigabala ilibalä molö gegegdola naha sefolamolomelë. <sup>12</sup> Gasoda, Hebeni Beaha Maadela Sigi Neebe amoie malö nefolalebe amoli gasimi sagai dibeami, segea sogobala sadia idogomolömelë.\* Amida, ili diisalea bese ali nalëgësa namolömelëla säi.

<sup>13</sup> Amala sälahilä, Yesuea ami sigi aligilo amoma sähalea, Hä, mosalo. Dia asigi afädë negei neebe go gadola hamomolömelëla säi. Amala säi amole, ami sigi aligilo amoie hamoi hamolasilo amo hä, wahi.

*Yesuea udia dolö yafie wahilasisa nelo  
(Maga 1.29-34, Ulugu 4.38-41)*

<sup>14</sup> Yesu e Fidaie mosöa awälahlilä, Fidaie esöa hëgi olo oloi dibe meli. <sup>15</sup> Bealahilä, ea udia amoie naabogi diigisebegi, dafidi hëgi olo dilo amo damulebe, udia amea nowelahlilä, Yesu e molö muäia neala i.

<sup>16</sup> Deadi eso digase gaalu, udia dolö nefolalo amolia mugabe fedai nefolalo amoli Yesu neebee sigi mofiai. Sigi mofiassebegi, Yesuea ado säi ameamu mugabe yafie nesila didigila digi. Amase, udia dolö oloi difolalo amoli sulubadela wahisa maadesa nelo. <sup>17</sup> Ea amala hamoi amoda, Godea ie bea sälo Aisaeama aligila, bea säla negei amo gausiala digai. Nilile oloi amo hi neala gaui.

Olo elö elöla nilima baai amoli ea neala gaula asila säi amo dëdëla negei dialea.

*Aisaea 53.4*

*Yesuea e bëgëla moholöie mala säi  
(Ulugu 9.57-62)*

<sup>18</sup> Udia dolö yafiea e amalela nefolalebe amo bealahilä, Yesuea sähalea, Ödä edefade dibe gowe dëgëla alogodigogi afiadila säi. <sup>19</sup> Amala säsebegi, mala dawadigi afädë Yesu neebee maalahlilä, ema sähalea, Säla Olelelo-o, di awäsebe go gadola, ne di bëgëla maahagola säi. <sup>20</sup> Amala säsebegi, Yesuea ema säla obëgësalea, Ilua ügülo sefolalebe amolida, naga hagali hawa dilo galea. Amase, haea sefolalebe amolige, dilo mosö galea. Amalo gaso, Dolöie Malö eda busa fugulo negela dilo mosöda, maademelëla säi. <sup>21</sup> Amala säsebegi, bëgëla aulo elöa ema nabahalea, Dafdilo-o, na nie naado dafidi baumolö obëgëmalamolö dofealela nabi. <sup>22</sup> Amala nabasebegi, Yesuea ema säla obëgësalea, Baagoi difolalebe amolia hilile baagoi baumäia. Dida ne bëgëla misiëla säi.

*Yesuea fole ödälema nemoi  
(Maga 4.35-41, Ulugu 8.22-25)*

\* **8:3:** Yu ilile ado afädë säla negei amea sähalea, Dia gudubu hamoi amoma diigiseda, dige Godeie siigi nigime baaila sälo. Amala sälo gasoda, amo gala Yesuie naaboea dolö amoma diigisebegi, hi eda nigime made baai. Eada dolö amoie olo amomu wahilasila nigime hëi. \* **8:7:** Yu ilida dolö fii odoäie mosöda aulo made. Mida, Godeie siigi ilima nigime baalola helësëalea. Abosolo 10.28 bimalo. Amalo gaso, Yesuea amogi fudugila made helësëla, ea Olomo dolöea mosöa awähala säi.

\* **8:12:** Hebeni Beaha Maadela Sigi Neebe amoie malöla säi amolida Isilale udia dolöie säi.

<sup>23</sup> Yesu e ödä duugi awäsebegi, ie bégëla aulo amolige e bégëla asi. <sup>24</sup> Awäha dibegi, oeabo amogi fo edefademalä fodolofali gelola maalahlilä, ödä aidagula maala, du dabelälä hamosebe meli. Amasebegi gaso, Yesu e adi elaboi dilo. <sup>25</sup> Adi elaboi dibegi, ie bégëla aulo amolia awälahlilä Yesu e didiigisalea, Dafidilo Gelo-i-e, ödäea nili hä nudulä hamosebegi, dia ugila negemola säi. <sup>26</sup> Amala säsebegi, ea säla obégësalea, Asigi holöfali negei nefolalebela dili-e, edogi bedäha dialeala säi. Amala sälahilä e nowela, fole ödälema nemosebegi, hä, dofä gadaeala aumalasi. <sup>27</sup> Dolö amolia fudugilahilä sähalea, Dolö goweda nowë gadoidu. Folea ödäleada ie ado nabelo gabula säi.

*Yesuea dolö äudä mugabe fedai nebegi nesila digi*  
(Maga 5.1-20, Ulugu 8.26-39)

<sup>28</sup> Hä, oeabo amo dégëla näiadodi awäla, e Gadala segea besela galai. Besela galaha nebegi, baagoi baulo igi äbä difolalebeamadila, dolö äudä mugabe fedai maaha nebegi, Yesuea gausiala digai. Dolö äudä amolea udia dolö nufudala ialalemolöi gabugi, idi amogida udia dolö aulo made. <sup>29</sup> Elea Yesu gausialahlilä, gelola üalala sähalea, Godeie malö, dia alima abilia hamomolö misi. Së imolö segeyo fu aso, made besela galai, alidale hä, së dafidi imolö misilela säi.

<sup>30</sup> Amo gaalu, holöbö ga madela amida sugua yafie moosa nefolalo. <sup>31</sup> Hä, dolö äudä amolema mugabe fedai amolia Yesuma sähalea, Dia nili nesila digimolö galëda, nili sugua nefolalebe gagowelima nogila fedamolö mosöla sämola säi. <sup>32</sup> Amala säsebegi, ea mugabe amolima mosöla säi. Amala säsebegi, mugabe amolia dolö äudä amole amilahilä, sugua amolima fedai. Fedasebegi, sugua nefolalo amoli sulubadela gau domaladi gelola baluluia digafulahilä, oebogidi digafusebegi, ödäea naha maadei. <sup>33</sup> Amo bealahilä, sugua sigi aligilo nefolalo amoli baluluia fisäla asi. Fisäla awäla, gaamugi besela galalahilä, hamoi amo sulubadela säla ialahlilä, dolö dafidi mugabe fedai äudä amolege, säla äaha maadei. <sup>34</sup> Säla i amo nabalahlilä, udia dolö gaamugi nefolalo amoli sulubadela Yesu nebea ami afiai. Afiala e bealahilä, ilia ema sähalea, Dida nilile segeawi namolö made. Bahüla mosöla säi.

## 9

*Yesuea dolö afädë fii si wahi*  
(Maga 2.1-12, Ulugu 5.17-26)

<sup>1</sup> Yesu e dudaia filahlilä, oeabo dibe amo dégëla obégëlahilä, gaamu hi aligisia ami besela galai. \* <sup>2</sup> Besela galasebegi, dolö odoaea dolö afädë fii si sulo amo dafudaia gaula misi. Amasebegi, ilile asigi afädë negei amo bealahilä, Yesuea dolö fii si amoma sähalea, Nïe malö, asigi gelomalo. Dia nafade hamoi amoli hësa maadeimelëla säi.

<sup>3</sup> Amala säsebegi, mala dawadigi odoa nefolalo amolia asigiamu helësësalea, dolö goweda Gode gadasea neamelëla helësësa nefolalo. <sup>4</sup> Iliä amila helësësa nefolalebe amo bealahilä, Yesuea sähalea, Mi edoie dilia dilile iso asigigi asigi nafade go helësësa nea. <sup>5</sup> Dia nafade hamoi amoli hësa maadeila sämolöle ma, nowela nawesa namiëla sämolöle. Ado aabeida abodo. <sup>6</sup> Amai gaso, Dolöie Malö amea nagadaiawi nea, udia dolöea nafade hamoi amo hëla digimolöie geloi gaula nebea amo dilia helësëmäia olesagomelëla säi. Amala sälahilä, ea dolö fii si amoma sähalea, Nowelahlilä, die dafu neala gaula dihi mosöa hä mosöla säi. <sup>7</sup> Amala säsebegi, e hä hi mosöa asi. <sup>8</sup> Amala hamoi amo bealahilä, udia dolö yafie negegila nefolalo amolia bedäi. Bedälahlilä, ilia Godea geloi hido elöi amo gadoi dolöma i gabulahilä, Godeda dofä edefade gabula säha nefolalo.

*Yesuea Madiu wei*  
(Maga 2.13-17, Ulugu 5.27-32)

<sup>9</sup> Yesu e amila awähalea, dolö afädë, ëida Madiu, eda dagisi muni nelo mosöa ami sebegi meli. Bealahilä, Yesuea ema sähalea, Ne bégëla misiëla säi. Amala säsebegi, Madiu e nowela, Yesu bégëla asi.

<sup>10</sup> Awälahlilä, Yesu e mosöa molö naha sebegi, dagisi muni nelo amolige, dolö yafie mala nafade hamolo amolige maala, Yesula, ie bégëla aulo amolalibalä, molö naha sefolalo. <sup>11</sup> Amala naha sefolalebegi, Felesi dolö amolia bealahilä, ie bégëla aulo amolima nabahalea, Dilile säla olelelo goea dagisi muni neloge, mala nafade hamologe, golalibalä molö naha sebegoda edoie la nabi. \* <sup>12</sup> Amala säi amo nabalahlilä Yesuea sähalea, Udia dolö oloi made

\* **9:1:** Segeyo amo gaalu, sege gaamu Gabaniama amida Yesu e aligilo. \* **9:11:** Felesi iliada gowe gadola made hamomolöla säla negeida malei bégëla hamolo. Iliä helësësaleada, dolö afädë säla negei amo made bégëla hamosada, ea Godeie siigi nafade hamoi neala helësëlo. Amase, dolö fii odoa amobalä seëda, amolige Godeie siigi nigime baai neala sälo. Felesi ilia helësësaleamelebe, dolö odoa Olomoie hamoi hamolasila dagisi muni neaha nefolalo amolida, Godeie siigi nigime baai neala helësëlo. Amoie mida, segeyo sulubadelagi amoliada Olomo dolö Gode made helësëlo amolibalä nawesa neë melëlo amogi.

nefolabe amolida alögoda neebee aulo made. Oloi sefolabe amolimu alögoda neebee aulomelë. <sup>13</sup> Afialahilä ado gowe helësëmalö, Amoda gomalä, Na nelebo nufudala imolö hamela made, bobasëla ugila negemolö amo hamesala säla dëdëla negei dialea. *Hosea 6.6*  
Ne misiweda udia dolö mala mogoi hamolo nefolabe amoli wemolö misi made. Udia dolö mala nafade hamolo nefolabe amoli wemolö misimelëla säla i.

*Yesuea molö made naha aligilo amoëe säi  
(Maga 2.18-22, Ulugu 5.33-39)*

<sup>14</sup> Segeyo amo gaalu, Yoneie bëgëla aulo nefolalo amoli Yesu neebee maalahlilä, ema nabahalea, Niliage, amase, Felesi dolö nefolabe amoliage, nilia molö made naha aligilo amogi, dië bëgëla aulo nefolabe gola molö made naala, made aligilo goda mida edoiela nabi. <sup>15</sup> Amala nabasebegi, Yesuea ilima säla obëgësalea, Dilia dolö afädëa udia neahalea, dolö udia nelo amoëe damelë hi ebalä gedola nea, asigia yoi gadoi neada ifolole. Amalo made gaso, ili neebee amila odoaea e sigi moholö segeyo fu besela galamolömelë. Iliida segeyo amogida, molö made naala namolömelë.

<sup>16</sup> Afädëa fagulo goofogi fagulo gähe nuli baala asogelo made. Amala baala asogeseda, fagulo gähe amo gofoo baala asoge amo edela nulilo. <sup>17</sup> Amase, afädëa wani ödä gähe dibe amo, i sugua meme gafodoea hamoi goofogi söga salelo mademelë. Amala hamoseda, wani ödä gähe amea sugua meme gafodoea hamoi gofoo amo dusulahlilä, wani ödä amo awäha maadela, meme gafodoea hamoi i amoge nafademolöi nafademolömelë. Amala hamoloea, wani ödä gähe dibe amoda, meme gafodoea hamoi i gähe amohi gadoigi söga salaseda, helegela hedabi dië melëlola säi.\*

*Beaha aligilo afädëe idiwige, udiaea Yesuie fagulogi diigi amoge  
(Maga 5.21-43, Ulugu 8.40-56)*

<sup>18</sup> Aso, Yesuea ilima adosa nebegi, beaha aligilo dolö afädë maalahlilä, Yesuie emo mia emo gumu sasagala fia idogolahilä sähalea, Nie nidiwi hädamadefali hame doala asi dialea. Di maala, dië naaboea e diigiseda, e wahila galala namolöla säi. <sup>19</sup> Amala säsebegi, Yesu e nowela e awäsebe amo gadola awäsebegi, ië bëgëla aulo amolige e awäsebe amo gadola asi.

<sup>20</sup> Awäha nebegi, udia afädë gähe i giwilasi heale olo olosamu aligilo amea Yesuie baagido awälahlilä, ië fagulo sedade gai amoëe bidigifali diigi. <sup>21</sup> Mida, hido asigiamu sähalea, Na ië fagulogimu diigiseda, ne wahimolö gabula helësëi. <sup>22</sup> Amala hamosebegi, Yesuea besuia imogola, e bealahilä sähalea, Nie nidiwi-e, asigi gelomalo. Dihä asigi afädë negei amea, di wahigomelëla säi. Amala säi amole, udia amo wahila.

<sup>23</sup> Amilahlilä awäla, Yesu e beaha aligilo dolö amea mosöa nogila digai. Nogila digalahilä, ea beahaleamelebe, fëla gälo dolö odoage, udia dolö yafie gegegdola didigaola goba fedaha dibe amoge bealahilä, <sup>24</sup> ea sähalea, Dili mosalo. Udia malö holöbö goda baagoi made. Süwia adi dialeamelëla säi. Amala säsebegi, ilia Yesubalä öi. <sup>25</sup> Amasebegi, udia dolö nefolalo amoli segea nesila digilahilä, Yesu e ië dilo hogoligi ami nogila digalahilä, udia malö holöbö amoëe naabogi nabeleia wesebegi, nowela galai. <sup>26</sup> Yesuea hamoi amo sege amomadi nefolalo amoli sulubadalea nabala daidoi.

*Yesuea dolö si golai äudäge nafi dofogaige wahilasi*

<sup>27</sup> Yesu e amilahlilä awäsole amegi, dolö äudä si golai nelo amolea e baagiala bëgëla maaha nea, gelola uuala sähalea, Debidiie malö-o, ali bobasëmola säi.\* <sup>28</sup> Yesu e awäla mosöa nogila digasebegi, dolö äudä amole e sebee maasebegi, Yesuea dolö äudä amolema nabahalea, Alile si na wahimäiala helësëla, ali asigi afädë negei nealela nabi. Amala nabasebegi, elea säla obëgësalea, Dafidilo-o, äla säi. <sup>29</sup> Amala säsebegi, Yesuea elele siigi diigisala sähalea, Hali asigi afädë negei neebe gohi gadola hamomolöla säi. <sup>30</sup> Amala sälahilä, elele si amo hedabola fisigäsebegi, Yesuea elema gelolafali sähalea, Go hamoigoda dofä elöma asiala säloeola säi. <sup>31</sup> Amala säi gaso, ele awähaleada, Yesuea hamoi amoda, sege amomadi nefolalo amolia nabaha maademäia säla iia awäha nelo.

<sup>32</sup> Dolö äudä amole doadigila awäsole amo gala, hä oböla, odoaea dolö afädëma mugabe fedalahilä, ado adomolö uli nelo amo, sigi misi. <sup>33</sup> Mugabe fedai nelo amo nesila digisebegi, dolö ado maade amea hä, ado adoi. Amala hamosebegi, udia dolö yafie gegegdola negegila

\* **9:17:** Yu ilia sugua meme nufudala gafodo amo hololo. Amala hamolahilä, i edefade amogida wani ödä amo gögödëla salelo. Ili wani ödä gähe amo hedabola gamogamäia, meme gafodo amogi gögödëla negesila, segeyo holöbö sedade aligilo. Amala negesi diëgi, wani ödä amo hi nobala bolela fedalo. Wani ödä gähe amo meme gafodo gofoo amogi gögödëla negeseda, sugua meme gafodo i amo dusulomelë. \* **9:27:** Yu ilia helësësaleada, Godea Afädë Memelele ië udia dolö sigi obëgëmolöla säi amoda, Debidiie sosogogila moholöla helësëi. Dolö si golai äudä amolea helësësaleage, Yesu eda Isilale dolëa misiäia beaha nelo amo gabula helësëlahilä, elea Debidiie malö-ola säi.

nefolalo amolia fudugilahilä sähalea, Isilale segeawi go gadola hamose afädë dofä made melëlo neawela säi.

<sup>34</sup> Amala säsebegi, Felesi dolö nefolalo amolia sähalea, Mugabe amoli sulubadelaie dafidiloea geloi iasebegi, ea mugabe nesila digisa neamelëla säi.\*

*Yesuea udia dolö amoli sulubadela bobasëi*

<sup>35</sup> Yesu e gaamu sulubadelagige, sege sulubadelagige, nawesa neada, ilile gedolo mosöa säla olelesalea, Beaha Maadela Sigi Neebe amoie Ado Mala Hedabi säla olelela digi, olo elö elöla oloi wahila digi, amase, domalo nalafadela nawei sulubadela wahila didigila digila nawesa nelo. <sup>36</sup> Ea udia dolö yafie gegecola negegila nefolalebe amoli bealahilä, ili bobasëi. Mida, ili sugua sibi sigi aligilo maadeia, hilido aligilo amo gadola, ilia asigia säosöolage, nalaho gadolage nefolalo. <sup>37</sup> Amo bealahilä, ea ie bégëla aulo amolima sähalea, Molö bëi yafie hamosalea gaso, molö bëi gegecolasimolöie hamoi hamolo amolida ede made gabumelë. <sup>38</sup> Amai gabugi, sagai eedo hi hamoi hamolo ie sagai hamoi hamomolöie fisiga gamäia, dilia ema adosa namialola säla i.

## 10

*Bégëla aulo giwilasi amolile ëi*

*(Maga 3.13-19, Ulugu 6.12-16)*

<sup>1</sup> Yesuea ie bégëla aulo giwilasi amoli mofiamolahilä, mugabe fedai nefolalebe amoli nesila digimäiage, olo elö elöla oloi difolalebe amolige, domalo nalafadela nawei amolige, sulubadela wahisa maademäiage, ea ilima geloi i. <sup>2</sup> Abosolo giwilasi amolile ëida gowe ili.\* Dafidida Saimono, ie ëi elöda Fidala sälo, ie edoo Äduluge, amase, Sebediie malö Yamesege, ie edoo Yonege. <sup>3</sup> Filibige, Badolomiuge, amase, Domasage, dagisi muni nelo Madiuge, amase, Alibiasaie malö Yamesege, Dadiusige. <sup>4</sup> Selodo sosogo Saimonoge, Yudasa Isagaliada, ea Yesu hololölo amoge.

*Yesuea dolö giwilasi amoligali hamoi i*

*(Maga 6.7-13, Ulugu 9.1-6)*

<sup>5</sup> Yesuea dolö giwilasi amoli hä, mosalola sälahilä, ea ado gomalä säla i.\* Dili awähalea, udia dolö fii odoa sebea aulo idigi mosabio. Samelia gaamu difolalebeamadi amogige digamabio. <sup>6</sup> Ami made awäla, dilida Isilale udia dolö ili sugua sibi dabadi gi gadoi neebee amimu mosalo. <sup>7</sup> Awähahilä, ado mala säla iahalea, Hebeni Beaha Maadela Sigi Neebe amo ga made dialeamelëla säla imalo. <sup>8</sup> Amase, oloi difolalebe amoli wahila digi, hame doala asi difolalebe amoli neala wahila digi, gudubu hamola nawei sefolalebe amoli wahila digi, mugabe fedai sefolalebe amoli nesila didigisa namialo. Walio dilia nelebo nii gaula neebee goda, bidia made, memalä nii amo gadola, memalä imalo. <sup>9</sup> Dilia awähaleada, muni gologe, silibage, benige afädë muni salelogi salala, made gaula mosalo. <sup>10</sup> Amalahilä, idiafa awäla aduge, fagulo elö baalage, emo usililoge, galiamoge, made gaula mosalo. Mida, hamoi hamolo neebee amogalida, molö imolö dialea.

<sup>11</sup> Dilia gaamu afädëgige, amase, sege afädëgige awäla besela galasegi, afädëa dili nihiligila diahala säsebelela bimolö mosalo. Awäha neëgi, diahala säsebe dolö amobalamu diaha nelolahilä, moholö fu besela galasolo amo gala, giso sege amo digila mosalo. <sup>12</sup> Dili mosö amogi besela galahalea, mosö amoma, neala dalulo dilibalä diamiäiamelëla säla, nogila digamalo. <sup>13</sup> Udia dolö mosö amogi sefolalo amolia obeägila dili gauia idaseda, dalulola säla i amo ilibalä diamialamalo. Iliä amala made hamoseda, dalulola säla i amo dihilima obëgëmäia nea nimalo. <sup>14</sup> Mosö afädëgi sefolalebe amoliage, gaamu afädëgi nefolalebe amoliage, dili midilö mofiamola made säla, dilia ado säsebegoge made nabaseda, dilile emogi dao baai amo fëfëla salalahilä, mosalo.\* <sup>15</sup> Na dilima dofä sähago. Memelela gudimolö segeyo besela galasolo amo gala, Sodomo ilibaläge, Gomola ilibaläge memelela gudimolö amo gadola made, dofä baagila awäla, gaamu amogi nefolalebe amolibalä, gelolafali memelela gudimolömelëla säi.

*Neala sälasimolö elö elöla moholömelëla säi*

*(Maga 13.9-13, Ulugu 12.2-9, 21.12-17)*

<sup>16</sup> Yesuea ado aso, sähamu neamu sähalea, Nabuö. Sugua sibifali gadoi ilua ügülo nefolalebea ami na dili mosalahagomelë. Amo helësëla, dilia hamomolö amo hedabola

\* **9:34:** Mugabe sulubadelaie dafidiloda Saidani. \* **10:2:** Nilile ado adola abosoloda, säla imolö mosöla säsegi aulo.

\* **10:5:** Yesuea ado sedadela bia säi Madiu bebegi dedëi dibe amoligida, ageduda go. Ea säi amoda ie bégëla aulo amolima udia dolöma Godeie ado mala säla olelela awäsebea ami nea, gomalä hamomalola säla i. Ado amoda 10.5-42 amogi dialea.

\* **10:14:** Udia dolö amolia, nilia asiala hamoi gabula helësëmäia, ie bégëla aulo amolia amala olela hamomalola säi. Maga 6.11, Abosolo 13.51ge bimalo.

helēsēlahilā, sisigosa namialo, amase, asigige gagadelai namialo. <sup>17</sup> Dolō nefolalebe amoli helēsēlahilā, idihē namialo. Dili ilile galisōlo amolile naabogi gausimolōmelē. Amase, ilile gedolo mosōa amige dili fēgāmolōmelē. <sup>18</sup> Dilia ne bēgēla mofiasēbegoīe, beaha aligilo gini nefolalebea amige, gamane sigi aligilo nefolalebea amige sigi awāla, dilia meli amoge nabi amoge, ilimage, fii odoa nefolalebe amolimage sāla olelemāia sigi moholōmelē. <sup>19</sup> Iliā odoā ilile naabogi gausiseda, amogi dilia nilia ado abodo sāmōlōdu, nilia ado abeahāla sāla obēgēmōlōdula asigia sāosōala helēsēmabio. Sāsolo segeyo amo gala, dilia sāmōlō amo sāmāia dilima imōlōmelē. <sup>20</sup> Mida, amo gala, ado dihili sāmōlō made. Dilile Diadoīe Gesamīa dihilima aligila sālasiimōlōmelē.

<sup>21</sup> Dolōea iē edoo amo nufudala baagomāia gaula imōlōmelē. Malō eedoeage hīle malō amo gadola wāla hamomōlōmelē. Amase, malōeage iē eedo emelebalā habobala nufudala baagomāia gaula imōlōmelē. <sup>22</sup> Nīe ēigi nefolalebego bealahilā, sulubadelaea dilima bimolō habobamōlōmelē. Amāi gaso, afādēa aso maadela, wagamāialahilā gelolamu aligiseda, e damula moholōmelē. <sup>23</sup> Dili gaamu afādēgi neēgi neala sēlasiseda, fisāla gaamu elōgi afiamalo. Na dilima dofā sāhago. Dolōīe Malō maasolo amo gala, dilia Isilaleīe gaamu sulubadelagi hamoi hamomōlō difolalebe amoda, dofā made hamosa maademōlōmelē.

<sup>24</sup> Bēgēla aulo neebe ameadā, iē olelelo neebe amoda dabiala aulo made. Amase, galabaia hamoi gadoi hamolasilo neebe ameadā, iē dafidilo neebe amoda dabiala aulo made. <sup>25</sup> Amāimo, bēgēla aulo neebe ameadā, iē olelelo neebe amo gadoi namolō amoda dofea. Amase, galabaia hamoi gadoi hamolasilo neebe ameeage, iē dafidilo neebe amo gadoi namolō amoge dofea. Iliā mosō eedo neebe amoma ēi Belesabulula sāseda,\* hīle mosōa aligilo amolima ado nafadela sāmōlō amoda dofā baagila moholō gabula sāi.

*Godebalāmu bedāmōlō dialea  
(Uluḡu 12.2-7)*

<sup>26</sup> Yesuea ado aso, sāhamu neamu sāhalea, Dilia dolō amolibalā bedāmabio. Nelebo sulubadela dabela negei difolalebe amolida, ulufadigisa maademōlōmelē. Amase, nelebo sulubadela musūgā negei difolalebe amolige, dawadigisa maademōlōmelē. <sup>27</sup> Na gasimī sagaia nea sāla iāsebewelida, dilia eso neēsebea amī nea, sāsēbewe gadola bu eegela sāha namialo. Geleā sēdāwala sāi amoda, dilia mosō daiowa nea, uuala sāla iāha namialo. <sup>28</sup> Gesamīa made, domalomu baagomāia nufidelo nefolalebe amolibalā bedāmabio. Gasoda, domalo gesamīa helegela heli segea nafademōlō neebe amobalāmu bedāmabio. <sup>29</sup> Haea nelēsa gigiso gadoi āudāda, bidī holōfali doea afādē gadoia nelo madele. Amāi gaso, dilile Diadoea amala made daiāi galēda, haea amoligi afādē made baagomōlōmelē. <sup>30</sup> Amase, dilile busagia busa hīli nebegoge, sulubadela nidesa maadei neagomele. <sup>31</sup> Amāimo, haea gigiso gadoi sefolalebe amolida holōbō gidogolahilā, dilida abulūmi hamoi nebego bedāmabiola sāi.

*Gelesoīe neawela sāmōlōge, Gelesoma baagi imōlōge  
(Uluḡu 12.8-9)*

<sup>32</sup> Yesuea ado aso, sāhamu neamu sāhalea, Afādēa udia dolō sefolalebe amolile siigi nea, neda Gelesoīe neawela sāla ulufadigiseda, amase, nage nīe Naado selesaia mosōa neebe amoīe siigi, amo gadola wāla sāmōlōmelē. <sup>33</sup> Amāimo, afādēa udia dolō sefolalebe amolile sidaia, neda e sosogo mademelēla sāseda, nage nīe Naado selesaia mosōa neebe amoīe sidaia, dolō amoge ne sosogo mademelēla sāmōlōmelēla sāi.

*Udia dolōea Yesu boba hamomōlō  
(Uluḡu 12.51-53, 14.26-27)*

<sup>34</sup> Yesuea ado aso, sāhamu neamu sāhalea, Diliada na sege sulubadelagi dalulo imōlōīe gaula misi gabula helēsēmabio. Dalulo imōlōīe gaula misi made, nada nudulo helebe gaula misimelē. <sup>35</sup> Na mogemōlō misi amoda gomalā,  
malōea iē eedobalāge,  
idiwīa iē emebalāge, amase,  
malō udīaea egoamebalāge.

<sup>36</sup> Dolōīe ado niida, hīle mosōa aligilo amoli namolōmelē.

*Maiga 7.6*

<sup>37</sup> Afādēa ne boba hamoi amo holōbō gidogolahilā, iē eedole emele boba edefade hamoseda, eda ne sosogo namolō dofea mademelē. Amase, afādēa ne boba hamoi amo holōbō gidogolahilā, iē malō boba edefade hamoseda, eege ne sosogo namolōda dofea mademelē. <sup>38</sup> Amase, afādēa hīle i fūgāi neala gaula, ne bēgēla made maaseda, amoge

\* 10:25: Belesabulūīe ēi elōda, Saidani. Madiu 12.22-28 bimalo.

ne sosogo namolöda dofea mademelë.\* <sup>39</sup> Afädëa hile namolö amo gaula fëdöla aligimolö helësëседа, ìe namolö amo hogosa helemolömelë. Gaso, afädëa hile namolö amo ne helësëла fisiseda, ea ìe namolö amo gaula namolömelëla säi.

*Udia dolöea Geleso sosogo ugila negeseda, bidi nimolö (Maga 9.41)*

<sup>40</sup> Yesuea ado aso, sähamu neamu sähalea, Afädëa dilima, nihiligila namolö mofiamola säседа, nege ebalä namolö misiëla sähagomelë. Amase, afädëa nema, haligila namolö misiëla säседа, ne fisiga welo amoge ebalä namolö misiëla sähagomelë. <sup>41</sup> Amaimo, afädëa goweda bea sälo gabula helësëlahilä, ea mosöa sigi aligiseda, eege, bea säloea bidi nease amo gadoimu nimolömelë. Amase, afädëa goweda dolö mala mogoi hamolo neebe gabula bealahilä, ea mosöa sigi aligiseda, eege, dolö mala mogoi hamoloea bidi nease amo gadoimu nimolömelë. <sup>42</sup> Dolö afädëa nie bëgëla aulo holöbö gidogo neebe amo, nie bëgëla aulo gabula helësëlahilä, amogali gögi ödämu osala iaseda, na dilima dofä sähago, dolö amoda dofä bidi nimolömelëla sähagola säla ì.

## 11

*Ödägi gelo Yonea ìe bëgëla aulo amolima Yesu neebea mosaloi (Uluu 7.18-35)*

<sup>1</sup> Yesuea ìe bëgëla aulo giwilasi amolima säla olelela wagalahilä, amila awäla, ilile gaamu difolalebe amoligi nawesa nea, udia dolö ilima ado mala säla iadigi, säla olelela digisa namolö asi.

<sup>2</sup> Yone e galabaia mosöa nea, Gelesoea hamoi hamosa neamelëla säi amo nabalahlä, Yonea ìe bëgëla aulo amolima sähalea, Yesuma ado gomalä nabalö mosalola säi. Amala säsebegi, ili Yesu neebea awälahilä, <sup>3</sup> ema nabahalea, Afädë moholömelëla säi amoda dile, ma, nilia elö beaha namolöledula nabi. <sup>4</sup> Amala nabasebegi, Yesuea säla obëgësalea, Dili obëgëlahilä, ado nabi amoge, siia meli amoge, Yonema säla imalo. Sähaleada, <sup>5</sup> Si golai nefolalo amolige, siia beaha maadela, emo nafadei sefolalo amolige, emesala nawela, amase, gudubu hamoi sefolalo amolige, wahisa maadela, gëhe gai sefolalo amolige, hä, nabaha maadela, baagoi difolalo amolige, nowelasisa maadela, amalahlä, udia dolö busadäoi nefolalebe amolima Ado Mala Hedabi säla iaha neebeola sämalö.\* <sup>6</sup> Udia dolöea ne bealahilä, ilile asigi afädë negei amo made digasebe amoliada, obeägisa neamelëlage säla imolö mosalola säla ì.

<sup>7</sup> Amala säsebegi, dolö misi amoli awäse amo gaalu, Yesuea udia dolö gegegdola nefolalo amolima Yoneie helësëla sähalea, Sege nafadeia udia dolö aligilo made dibe ami afiai amoda, dilia edo bimolö afiai. Dili afiai amoda giüsi sedade fofa fologosebe amo bimolö afiaile. <sup>8</sup> Amai made galëda, dili afiai amoda edo bimolö afiai. Dolöea fagulo hedabifalimu salugai neebe amo bimolö afiaile. Nabuö. Fagulo hedabifali amo gadoi salugalo amolida beaha aligilo ginia mosöa dilo neamelë. <sup>9</sup> Dili afiai amoda edo bimolö afiai. Bea sälo afädë neebe amo bimolö afiaile. Ä, amomelë. Amai galëda, na hä dilima sähago. Bea sälo ameadä, bea sälo odoä baagila asi neamelë. <sup>10</sup> Ìe helësëla, gomalä dëdëla negei dialea. Nabuö. Nìe ado säla ilo amo, dïe dafidila mosalamolömelë. Di e baagia emesala nawemolöie, ea dïe idi fodolasimolömelëla

säla dëdëla negei dialea. <sup>11</sup> Na dilima dofä sähago. Udiaea neegela ägüi amoli sulubadelagida, afädë ödägi gelo Yone neebe amo gadoi maade, ilida holöbö gidogo. Amai gaso, dolö afädë Hebeni Beaha Maadela Sigi Neebe ami holöbö gidogofali neebe ameadä, Yone baagila asi neamelë. <sup>12</sup> Ödägi gelo Yonea mi gäwila mala säla iaha neloa amila maala, hä, walio wegida, odoaea Hebeni Beaha Maadela Sigi Neebe amogi ilile geloia digaha nea, amase, dolö nefolalebe amolile geloia gausa nea.\* <sup>13</sup> Amaimo, bea sälo sulubadela nefolalo amoliage, amase, Mosesea Ado säla negei ameege, bea säsäla maaha nelolahilä, Yone neebe ami besela galai. <sup>14</sup> Amaimo, dilia nabala asigi afädë negemolö galëda, Elaia

\* **10:38:** Amo gaalu, Olomo iliada fii odoaeage, amase, memalä hamoi hamolasilo nefolalo amoliage nafade hamosegi nufulö galëda, iliada ili i fügäigimu baala negelo. Iliada dolö i fügäigi baala negemolö amohi, sege e baala negemolöia ami i fügäi amo gaula mosalalo. Yesuea i fügäi neala gaula aulola säi amoda ado besula sähalea, Udia dolö dofä e bëgëla aulo neebe amoliada, baagomolömadi namolö gabula helësëmäia säi. \* **11:5:** Godea Isilale udia dolö ugila negemolöie nelebo amo gadola hamomolömelëla Aisaeaea bea säla negei. Aisaea 35.1-7, 61.1-4 bimalo. \* **11:12:** Damo gowegi dibe amoda Giligi adoea ulufala fädäla made säi. Be, dolö odoaea helësësaleada, Yesuea säi amoda sosogo odoä ilia Olomo ilibalä nudulahlä fisigämolö gabu. Nelebo amala hamose ameadä, Hebeni Beaha Maadela Sigi Neebe amo nagadaia digamäia, Gode hì idi hamogimolö gabula helësëi.



moholomelëla sála dëdëla negei amoda, Yone e gabumelë. <sup>15</sup> Afädë gëhe galea galëda, hä nabulö dialea.

<sup>16</sup> Udia dolö walio neebe weli ado abodo gadoima oodo beala sämolödu. Iliida malësäea magai gaamugi salea, malësä odoama uuala säia gala sähalea,

<sup>17</sup> Niliä dilile bäidama dülasilebeda, dilia gosala made aligisio.

Amase, niliä oböla dilile bobasëi gë udälasilebege, amogige dilia bobasëla diila made nelomelëla

sälo amo gadoida ili nea. <sup>18</sup> Amaimo, Yone e maala neada, molö made naalage, wani ödäge made naala nebegi, ilia eda mugabe fedai neala sälomelë. <sup>19</sup> Amalahilä, Dolöie Malö amo maala neada, ea molöge wani ödäge naha nebegi, ilia sähalea, Dolö neebe goweada molöge badoia nulo, wani ödäge edefade nulo nea. Amaimo, e dagisi muni neloge, amase, mala nafade hamolo nefolalebe amolibaläge damelë hamola aligilo neebe gowe bimola sälomelë. Amalo gaso, Godeie asigi falagasei ulufadigisebe ameadä dofä dibe amo ulufadigimolömelëla sála i.

*Gaamu odoagi udia dolöea asigi afädë negela made nelo  
(Ulu 10.13-15)*

<sup>20</sup> Yesuea gaamu odoagi nea geloi melëlo made gadoi yafie hamoi gaso, udia dolö ami nefolalo amolia asigi besula made nelo. Amala hamosebegi, Yesuea ilima nemola sähalea, <sup>21</sup> Gaamu Golasini udia dolö dili, asigii gabu. Amase, Bedesaida udia dolö dilige, asigii gabu. Mida, dili nefolalebea ami geloi melëlo made gadoi hamoi amo gadola, gaamu Daia Saidonolemadi dafidi hamoi galebeda, ilia siiba asigi besula, nafade edefade hamoi amoie ulufala, hewai fagulo salugalahlilä, nisibu uii filabio. <sup>22</sup> Amalabio gaso, na dilima sála iahago. Memelela gudimolö segeyo besela galasolo amo gala, Daia ilibaläge Saidono ilibaläge memelela gudimolö amo gadola made, dofä baagila awäla, dilibalä gelolafali memelela gudimolömelë. <sup>23</sup> Amase, Gabaniama dilige, Godea dili gauia adogola selesaia mosöa fedamolöla helësésale. Ai, dilida heli segea nedala digamolömelë. Dili nefolalebea ami geloi melëlo made gadoi hamoi amo Sodomo ami dafidi hamoi galebeda, Sodomo gaamu amoda aso, walio diëgi amalabio. <sup>24</sup> Amalabio gaso, na dilima sála iahago. Memelela gudimolö segeyo besela galasolo amo gala, Sodomo ilibalä memelela gudimolö amo gadola made, dofä baagila awäla, dilibalä gelolafali memelela gudimolömelëla sála i.

*Yesuea dili ne neebea hele namolö mofiamola säi  
(Ulu 10.21-22)*

<sup>25</sup> Segeyo amo gala, Yesuea sähalea, Mudaiaiege, nagadaiaiege Dafidilo Geloi Naado-o, na die ëi gauia adaha. Mida, asigi falagasei nefolalebe amolimage, nagadaia mala dawadigi nefolalebe amolimage, dia musügä negelahilä, oböla, malësä gadoi nefolalebe amolima nelebo amoli ulufala olei amogi. <sup>26</sup> Ae, nie Naado. Dihï hamomolö helësëi amo gadola, amala hamoi gabumelë.

<sup>27</sup> Nie Naadoea nelebo sulubadela nema gausimelë. Afädëa Malö eda gowe neala dawadigi mademelë. Naadoea hidomu dawadigi nea. Amase, afädëa Naado eda gowe neala dawadigi mademelë. Malö eamu hido dawadigi nea. Amase, Malöea ie Eedo olemolö helësësebe amolima olesegi, iliage e gowe gabula dawadigisa neamelë.

<sup>28</sup> Sulubadelaea nelebo yöi dibe amo baagi sëla gaula nefolalebela dili-e, ne neebea mofiamo. Mofiaseda, na diligali hele fimolö amo imolömelë. <sup>29</sup> Sugua gaoea nelebo afädë gaula dusugamolöie muugia i damui negela begelo amo gadola, dilia nie ado hawala nema dawa nimalo. Mida, na dolö odoama hame negela, nihi nagadaialo mala hamolo. Ameada, dili hele namolö beagolemolömelë. <sup>30</sup> Amala hamomolö amoie mida, nie i damui negela begelo amoda häuai made, aabei dialea, amase, nelebo dihili neala gaumäia na imolö amoda yöi made, hageai dialeala sála i.

## 12

*Segeyo Sabadagi hamoi made hamolo amoie Yesuea ado säi  
(Maga 2.23-28, Ulu 6.1-5)*

<sup>1</sup> Holöbö ede made nelolahilä, segeyo Sabada gafegi Yesu e eladi gadoi ëi widi sagai mogogi awäha nelo. Awäha nea, ie bëgëla aulo amoli sidëa baagosebegi, widi amoie gägä amo faila nana awäha nelo.\* <sup>2</sup> Amala hamosebegi, Felesi dolö nefolalo amolia bealahilä ema sähalea, Segeyo Sabada gafegi made hamomalai amoda, die bëgëla aulo golia hamosa

\* **12:1:** Segeyo Sabadada Yu udia dolö ilile hele aligilo segeyoge, amase, Godeie ëi gauia adalo segeyoge dilo. Godea sege fôi dibe amo sulubadela segeyo gafeiagi hamosa maadelahlilä, segeyo gifalädalügi hi e hele sulo. Isilale udia dolö ilia amo gadola hamomäia, ea segeyo Sabada daiai. Segeyo Sabada Edolo niliada gafela sälo. Mi Gäwi 2.2-3ge, Sigi Obëgëi 20.8-11ge bimalo.

neebe gowe bimola sai.\* <sup>3</sup> Amala säsebegi, ea ilima säla obëgësalea, Debidige, ie dolö odoa amolalia sidëa baagosalea, Debidia hamoi dëdëla negei dibe amo dilia made meli neale. <sup>4</sup> Debidi e Godeie balai mosöa nogila digalahilä, beledi Godegali odala i dibe amo nealahilä, hi eege, ie dolö odoa amoliage mai. Amala hamoi amoda, mala säla negei ameadada beledi amoda gobela ilo nefolalebe amoliamu nulo, odoaeada nulo made. <sup>5</sup> Amase, segeyo Sabadagi gobela ilo amolia Godeie mosöa ami nefolalea segeyo Sabadaie mala damusa aligilo gaso, ilia asiala made hamolo. Mosese nebegi Ado säla negei dibe amogi, dilia ado amo gadoi made meli neale. <sup>6</sup> Na dilima säla iahago. Nelebo afädë walio guwi dibe amoda Godeie mosö amo baagila asi neamelë. <sup>7</sup> Bebagi säla dëdëla negei dibe amogi afädëda gowe. Na nelebo nufudala imolö hamela made, bobasëla ugila negemolö amo hamesala säla dëdëla negei dialea.

*Hosea 6.6*

Amaimo, ado amoie mi gowe gadoila helësëi galebeda, dilia udia dolöea asiala made hamoi nefolalebe amolima, dilia asiala hamoi gabumelëla made sälo aligilabiomelë. <sup>8</sup> Amoiëda Dolöie Malö amo hi eda segeyo Sabada gafeie Dafidilo neala säla i.

*Segeyo Sabadagi Yesuea dolö afädëie naabo nafadei wahilasi (Maga 3.1-6, Ulugu 6.6-11)*

<sup>9</sup> Amila awälahilä, Yesu e ilile gedolo mosö afädë neebee ami nogila digai. <sup>10</sup> Mosö isogi ami dolö naabo nafadei afädë maala sulo. Dolö odoa nefolalo amolia Yesuma dia nafade hamoila sädelälahlilä, ilia ema nabahalea, Segeyo Sabada gafegi neala wahilasimolöda dofeale, ma, dofea madelela nabi. <sup>11</sup> Amala nabasebegi, Yesuea säla obëgësalea, Diligi dolö afädëie sugua sibi afädë Sabada segeyo gafegi dögöigi digai diëda, sugua sibi eedoea made sogobala fisiga adamolöie. <sup>12</sup> Sugua sibida holöbö gidogolahilä, dolöda dafidilo edefade neebe amo beasebele. Amai ameadada, segeyo Sabadagi hedabi hamomolöda dofeala säi. <sup>13</sup> Amala sälahilä, ea dolö amoma sähalea, Die naabo mogodigimola säi. Dolö amea naabo mogodigia gasebegi, bu hedabola obëgëlahilä, naabo näiada hedabi amo hi gadoi wäla hedaboi meli. <sup>14</sup> Amala hamosebegi, Felesi dolö amoli segea doadigila awälahilä, Yesu nufulö abilia hamomolödula didiäha dilo.\*

*Yesu eda Godeie hamoi hamolasilo nea*

<sup>15</sup> Yesuea ilia e nufulö didiäha dibe amo helësëlahilä, sege amo digila asi. Digila awäsebegi, udia dolö yafie nefolalo amolige e awäse amo gadola mofiassebegi, ea udia dolö oloi amoli sulubadela neala wahisa maadei. <sup>16</sup> Ea ilima sähalea, Neda gowe gabiola odoama säla imabiola säla iaha nelo. <sup>17</sup> Bea sälo Aisaeaea bea säla negei amo gausiala digamäia, ea amala hamoi.

<sup>18</sup> Nie hamoi hamolasilo na memelei amo hä neebe gowemelë. Na ema boba hamolahilä, obeägisa neawe. Na nie Gesami ema namolö mosöla sämolömelë. Ea, na memele-molö amo gowe gadoi galeamelëla säla, udia dolö sege elö elölagi sefolalebe amoli sulubadelama säla iaha namolömelë.

<sup>19</sup> Eada gëgësadialage, uualage made sämolömelë. Amase, idiafage afädëa ea ado säse made nabolömelë.

<sup>20</sup> Eada fise dagabomolöie wäbëala digasebe amoge ea made dagabomolömelë. Eada gele wai uliligi neebe amoda made usila digimolömelë. Hamoi hamola mogola hamomolö amo baagila mosäia, eada mogola hahamogisamu namolömelë.

<sup>21</sup> Ie ëi helësëlahilä, udia dolö fii elö elöla nefolalebe amolia sisiläfüla beaha nefolam-olömelëla

säla dëdëla negei dialea.

*Aisaea 42.1-4*

*Ilia sähalea, Yesuea Belesabulubalä nea hamosa neala säi*

*(Maga 3.20-30, Ulugu 11.14-23, 12.10)*

<sup>22</sup> Segeyo amo gala odoaea dolö afädëma mugabe fedalahilä, si nafadela ado adomolö uli nelo amo, Yesu neebee sigi misi. Sigi maasebegi, Yesuea dolö amo wahilasila, hä, ado maade amea siia beala ado ado. <sup>23</sup> Amasebegi, udia dolö yafie gegedoi nefolalo amoli fudugilahilä sähalea, Wae! Egoweda Debidie malöledula säi.\*

<sup>24</sup> Amala säi amo nabalahlilä, Felesi dolö nefolalo amolia sähalea, Dolö goea mugabe fedai nesila digisebegoda, mugabeie dafidilo nea Belesabuluea geloi i ameamu nesisebela säi.

\* **12:2:** Yu ilile Ado säla negei ameadada, segeyo Sabada gafegi hamoi hamolo madela säla dofogala negei dilo. Hamoi amo gadoi hamomolöie Ado säla negei amea sähaleada, Bëi faila negelo amogi ilia made hamomolöla säla dofogai dilo. Sigi Obëgëi 34.21 bimalo. Amala säla negei dilo amo Yesuie bëgëla aulo amolia damui. \* **12:14:** Felesi dolö ilia helësësaleada, oloi wahisebeweda hamoi hamolo gadoila helësëi. Amahaleada, ea segeyo Sabadagi oloi made wahimäiala dofogai. Amogida, Felesi ilia ema habobalahilä, Yesu e nufulöie idi hogosa nelo amo. Ulugu 13.14ge, Yone 5.16-18ge bimalo. \* **12:23:** Madiu 9.27 bimalo.

<sup>25</sup> Amala helēsēsebe amo Yesuea bealahilā ilima sähalea, Gädili afädēa hilimu moge mogela nuduseda, amoda nafademolōmelē. Amo gadolamu, gaamu afädēge mosō afädēge hilimu moge mogela nuduseda, amoleda made namolōmelē. <sup>26</sup> Amaimo, Saidania Saidani nesila digilo galebeda, hībalā moge mogela aligilabio. Amala aligiseda, ea beaha maadela sigi neebe amo abeahāla namolōdu. <sup>27</sup> Na Belesabuluie geloia mugabe fedai nesila digilo galēda, dilibalā aligilo nefolalebe amolia nowēie geloia nesila digilo. Amai galēda, dilibalā aligilo nefolalebe amoliada dilile gudi mogelo namolōmelē. <sup>28</sup> Gasoda, na Godeie Gesamiie geloia mugabe fedai nesila digisa galēda, Godea Beaha Maadela Sigi Neebe amo hā dili neebea besela galai dialeamelē.

<sup>29</sup> Amase elōda, afädēa dolō geloiie nelegei fa nimolō helēsēseda, dolō geloi neebe amodale dafidi made nafodola negesiseda, dolō amoie mosōa digala, ie nelegei dibe amoligi abeahāla fa nimolōdu. Dafidi amala nafodola negesilahilā, hobeala ie mosōa nelegei difolalebe amo fa neaha maademoloi bimolōmelē.

<sup>30</sup> Afädē e nebalā made nea galēda, hī nebalā ado nii nea. Amase, afädēa nebalā made gedolaseda, ea dusula afiaha maademāia nesila digisamelē. <sup>31</sup> Amaimo, na dilima sāla iahago. Udia dolōea nafade hamoi amoge, gagadei amoge, sulubadela hēla fisimolōmelē. Amai gasoda, afädēa Gesami gagadeseda, amoda made hēla fisimolōmelē. <sup>32</sup> Afädēa Dolōie Malō e ado nafadela gagadela sāseda, amo hēla fisimolōmelē. Gasoda, afädēa Eleloi Gesami e gagadela sāseda, amo walioge, hobealage made hēla fisimolōmelēla sāi.

*Iia gāgā negelo  
(Uluḡu 6.43-45)*

<sup>33</sup> Aso, Yesuea sāi amo, uda negela made, sähamu neamu sähalea, Dilia i afädē hedabi neebela helēsēseda, ie gāgāge hedabila helēsēmalo. Be, dilia i afädē nafade neebela helēsēseda, ie gāgāge nafadela helēsēmalo. I afädēa gāgā negesebe amo bealahilā, i gowe gadoi neebela helēsēlomelē. <sup>34</sup> Dilida baagolo nubaie malō nebeḡo. Dihili dili nafade nea, ado hedabida abilia sāmolō gabu. Iso asigigi nobala adugasebe amo gadoi nafi idigila sāla ulufadigilo. <sup>35</sup> Afädē hedabi neebe amēada hīle iso asigigila hedabi dibe amo gadoi ulufadigilo nea. Amase, afädē nafade neebe amēage hīle iso asigigila nafade dibe amo gadoi ulufadigilo nea. <sup>36</sup> Na dilima sähago. Memelela gudimolō segeyo besela galasolo amo gala, udia dolōea ado memalā galone made sāi amoda, mi edoie sāla sāla obēgēmōlōmelē. <sup>37</sup> Mida, dihi ado sāi ameamu, dihi mogoi neala sāmolōmelē. Amase, dihi ado sāi ameamu, dihi asiala hamoila sāmolōmelēla Yesuea sāi.

*Dolōea hamomoloi made gadoi afädē hamomola sāi  
(Maga 8.11-12, Uluḡu 11.29-32)*

<sup>38</sup> Amala sāsebegi, mala dawadigi odoa nefolalo amoliage, Felesi dolō odoa nefolalo amoliage Yesuma sähalea, Sāla Olelelo-o, dia dolōea hamomoloi made gadoi afädē nilia melēdelā hamomola sāi. <sup>39</sup> Amala sāsebegi, Yesuea sāla obēgēsalea, Udia dolō walio nefolalebe welia nafademu hamosa nea, udiea dolō fisilo amo gadola Godeie mala fisilo amolia, dolōea hamomoloi made gadoi afädē hamomola sālo. Amalo gaso, dolōea hamomoloi made gadoi afädē bea sālo Yonama hamoi amomu ilima olemolōmelē. <sup>40</sup> Yona e seme edefade afädēie isogi segeyo ohodoa gasi ohodoala dilo amo gadola, amase, Dolōie Malō amoge segeyo ohodoa gasi ohodoala naga hawa diamolōmelē.\* <sup>41</sup> Memelela gudimolō segeyo besela galasolo amo gala, Niniba udia dolōea walio udia dolō nefolalebe welibalā nowela aligilahilā, ilima dofea made hamoimelēla sāmolōmelē. Mida, ilia Yonaea Godeie ado mala sāla i amo nabalahlilā, asigi besusa maadei amea. Amaimo, walio gui nebeḡo eda Yona nelo amo gadoi made, baagila asi neamelē. <sup>42</sup> Memelela gudisolo amo gala, gädili Siba udia dolō beaha aligilo gini udia amea nowela aligilahilā, walio nefolalebe welibalā, dofea made hamoimelēla sāmolōmelē. Mida, udia amea Solomonono asigi falagasei neebe amoie ado nabalōie, wagadi made hīle segeala naba misimelē. Gaso, nabuō. Afädē walio gui nebeḡo eda, Solomonono nelo amo gadoi made, baagila asi neamelēla sāi.

*Mugabe afädē bu obēgēi  
(Uluḡu 11.24-26)*

<sup>43</sup> Yesuea aso, sähamu neamu sähalea, Dolō afädēma mugabe fedai amo doadigila awāseda, mugabe amo sege falala awālahilā, e hele fimolōie sege hogosa nea, afädē made beagolelomelē. <sup>44</sup> Made beagolelahilā, hīdomu sähalea, Mosō digila misia ami obēgēmōla sālomelē. Awāla mosōa besela galala beahamelēle, mosō badumu, gēgelē doala, nelebo sulubadela hedabola negesi diēgi beagolelomelē. <sup>45</sup> Bea negesiā, bu doadigila awālahilā, hī eda holōbō hedabahlilā, mugabe gifalādalia nafadefali nafade nefolalo amoli ea sigi

\* 12:40: Yona 1.17 bimalo.

obëgëla ebalä awäla nogila digalahilä, mosö amogi aligilo. Amaimo, dolö amo dafidi nafade nelo amo baagila, hobealada nafadeifali aligilomelë.

Walio udia dolö nafademu hamosa nefolalebe gowe ilimage amo gadoi wäla hamolömelëla säi.

*Yesuë eme edoolalida nowë*

*(Maga 3.31-35, Ulugu 8.19-21)*

<sup>46</sup>Yesuea udia dolö gegedoi nefolalo amolima adosa nebegimu, ie eme edoolali segea nea, ebalä ado adomolöie maala nefolalo. <sup>47</sup>Amala nefolalebegi, afädëa ema sähalea, Die dieme didoola ilia dibalä ado adomolöie segea godogoi misi nefolalebela säi.\* <sup>48</sup>Amala säsebegi, Yesuea dolö amoma säla obëgësalea, Nie nemedä abodo, nie nedoolalida nowë gabula säi. <sup>49</sup>Amala sälahilä, ea ie bëgëla aulo amolima naabo sögödügila sähalea, Nie neme nedoolalida nefolalebe gowe ilimelë. <sup>50</sup>Mida, udia dolöea nie Naado selesaia mosöa neebe amea hamese amo gadola hamosa nefolalebe amolida nie nedooge, nie nalfige, nie nemege, amoli nefolaleamelëla säi.

## 13

*Yesuea ado besula, molö gägä fëfëila säi*

*(Maga 4.1-9, Ulugu 8.4-8)*

<sup>1</sup>Segeyo amo galamu, Yesu e mumusogila segea doadigila fedalahilä, oeabo edefade dibe amoie agesua sulo. <sup>2</sup>Sebegi, udia dolö yafie mafula gegedolahilä, e sebe amo nogöla amalei. Nogöla amalelebe, eda ödä dudaia fila fedala sulo. Sebegi, udia dolö gegedoi amolida oeabo agesua nefolalo. <sup>3</sup>Yesu e amala salea, ea ado besula mala yafie säla iahalea, Dolö afädëa gägä sagaido fëfëla aliligi asimelë.\* <sup>4</sup>Fëfëla aliligi awäha nebegi, gägä odoa amo idiafa daala negei dibegi, haea maalahlilä neala naha maadei. <sup>5</sup>Gägä odoa amo igidaia naga abelëi dibe daala negelahilä, fodolofali duulu fedala bäui <sup>6</sup>gaso, eso neëla galasebegi, difi moholö ulisalea, bausosa maadei. <sup>7</sup>Amase, gägä odoa amo ëfë äyo gägäi nebea daala negesebegi, ëfë äyo gägäi amo baulahlilä, widi duulu fedasebe amo dabiala yau hai nelo. <sup>8</sup>Gägä odoa naga hedabi dibe ami daala negei amo baulahlilä gägä negeimelë. Odoaea hädali afädë negei. Odoaea nabülasï gafeia negei. Amase, odoaea nabülasï ohodoa negeimelë.

<sup>9</sup>Afädë gëhe galea galëda, hä nabalö dialeala säi.

*Yesuea edo helësëla ado besula sämolö mi dibegi säi*

*(Maga 4.10-12, Ulugu 8.9-10)*

<sup>10</sup>Amala säsebegi, Yesuë bëgëla aulo amolia e sebea maalahlilä nabahalea, Dia udia dolöma ado besulamü säla iaha nebegoda, edoie amahala nabi. <sup>11</sup>Amala nabasebegi, Yesuea säla obëgësalea, Mida, Hebeni Beaha Maadela Sigi Neebe amoie helësëmolöda, dafidida, odoa ulufadigi made, müsügä negei dilo amo, odoa ilima made i. Dilima imelë. <sup>12</sup>Amoieda, afädëa nelebo afädë gaula neebe amomada, odoa baala iasegi, yafie gaula namolömelë. Amase, afädëa nelebo afädë made gaula neebe amomada, holöfalimelë gaula neebe amoda häila nimolömelë. <sup>13</sup>Na odoa ilima ado besula säla ilo amoie mida, ilia beaha gaso, made bease amoiege, nabaha gaso, made nabala helësëse amoiege amala sälo. <sup>14</sup>Amaimo, Aisaeaea bea säla negei ilima gausiala digasebe amoda gowe.

Dilia nabahamu nea gasoda, fädäla made helësëmolömelë. Dilia beahamu nea gasoda, galone gowe gabula made beagolemömelë.

<sup>15</sup>Amoie mida, udia dolö amolile asigi dofogai nea. Ili gëhe gai gadoia hedabola made nabelo nea. Ilile siige dofogai nea. Ili siia beala, gëhe nabala, asigia helësëla besusa galebeda, amoda na ili wahilasilabiola

säla dëdëla negei dialea.

*Aisaea 6.9-10*

<sup>16</sup>Amäi gaso, dilia obeägïsa nea. Mida, dilile siia beala, amase, gëheage hä nabahagomelë.

<sup>17</sup>Amäi na dilima dofä sähago. Siiba bea sälo yafieage, amase, asigi mogoi nefolalo yafieage, dilia beasego gadola wäla edefademalä bimolö helësëlahilä gaso, made meli nefolalo. Dilia nabasego gadola wäla edefademalä nabalö helësëlahilä gaso, made nabi nefolalola säi.

*Ado besula säi amoie mi fädäla säi*

*(Maga 4.13-20, Ulugu 8.11-15)*

<sup>18</sup>Yesuea amo sälahilä sähalea, Amäi galëda, gägä fëfëlo amoie ado besula säi amo nabuö.

\* **12:47:** Dawadigi dolö odoaea helësësaleada, damo goweda Madiu hi dëdëi made, goda hobeala dolö elöea ado Maga 3.32gi amoge, Ulugu 8.20gige dibe amolebalä gaalumäiaie dëdëila helësëi.

\* **13:3:** Madiugi Yesuea ado sedadela bia säi dëdëi amo gadola, osoda dëdëida go. Hebeni Beaha Maadela Sigi Neebe amoie mala sähaleada, ado besulamü malei säha nelo. Ado amoda 13.3-52 amogi dialea.

<sup>19</sup> Beaha Maadela Sigi Neebe amoie ado mala afädëa nabala fädäla made helëseseda, mugabe busa nafadefali maalahilä, ado mala ie asigigi fëfëi amo fedela neala gaula aulomelë. Eda molö gägä idiafa daala negei amo gadoi nea. <sup>20</sup> Molö gägä igidaia naga abelëi dibe daala negei amo gadoi, afädëa ado mala nabala aabela obeägila neala gaulomelë. <sup>21</sup> Amalahilä gaso, e difi made awäla sedade made aligilomelë. Ea ado mala neala gaui amoie yoi beasege, amase, odoaea e neala sëlasisege, ea fodolofali digila aulomelë. <sup>22</sup> Molö gägä äyo gägäi ëfë neebee daala negei amo gadoi, afädëa ado nabaha nea gaso, nagadaia namolö amo säosäola helësemolöge, nelegei yafie dibe amo asigia negesa maademolöge, amea ea ado mala nabi amo dabilia yau hahalea, gägä made negelo nea. <sup>23</sup> Molö gägä naga hedabi dibe daala negei amo gadoi, afädëa ado mala nabala helëselomelë. Ea gägä hedabola negelomelë, hädali afädëge, nabülasi gafeiage, amase, nabülasi ohodoage negela digisa aligilo neala säi.

*Ado besula giisi nafade afädëe säi*

<sup>24</sup> Yesuea udia dolöma aso, ado besula elö sähalea, Hebeni Beaha Maadela Sigi Neebe amida gowe gadoi dialea. Dolö afädëa hile sagaia eladi gadoi ëi widiie gägä hedabi amo fëfëla sadia gogoi. <sup>25</sup> Amala hamoi gaso, ili sulubadela adi elaboi difolalebegi, ie ado nii dolö maalahilä, widi gägä sadia gogoi dibe ami gägä nafade widi gadoi sadia gogola negesila moholöi asi. <sup>26</sup> Widi bäulahilä, gägä negesebe amo gaalu, giisi nafade widi gadoi amoge gedola bäui neebe meli. <sup>27</sup> Sagai eedoie hamoi hamolasilo amolia e neebee awälahilä, ema säla iahalea, Dafidilo, dia sagaia widi gägä hedabimu hadia gogoi walebelei gaso, giisi nafade bäui neebe amoda abododila maala bäui neadu. <sup>28</sup> Amala säsebegi, ea säla obëgësalea, Goda ado nii afädëa sagai gabula säi. Amala säsebegi, hamoi hamolasilo amolia ema nabahalea, Nilia awälahilä giisi nafade amoli besela digidulela nabi. <sup>29</sup> Amala nabasebegi, ea säla obëgësalea, Ai. Giisi nafade amo walio besela digisegi, widi hi ela beselaloea. <sup>30</sup> Faimolö fu besela galamäia, helegela amala gegecola fedamäia amilasimalo. Amala fisigisilahilä, hobeala faimolö dolö amolima sähalea, Giisi nafade amoli dafidi beselala, gobemolöie dobosa maadelahilä, hobeala widi hi e damula gegecola negelahilä, nie molö negelo mosöa ami negemalola sämolömelëla säla säi.

*Ado besula masada gägäege yidiiege säi*  
(Maga 4.30-32, Ulugu 13.18-21)

<sup>31</sup> Yesuea udia dolöma ado besula elö sähalea, Hebeni Beaha Maadela Sigi Neebe amida gowe gadoi dialea. Dolö afädëa masada gägä gaula awälahilä, hi sagaia sagai. <sup>32</sup> Gägä amoda holöfalifaimelë. Bäuseda, dägöla hawa hëhela odoa sagai dibe amo gadoi made, amoda i gadoi bäulomelë. Bäula fedaha nelolahilä, edefade neëda, haea sefolalebe amoli mafula adomo amogi gilifa hamola dilomelëla säi.

<sup>33</sup> Yesuea ilima aso, ado besula elö sähalea, Hebeni Beaha Maadela Sigi Neebe amida gowe gadoi dialea. Udiaea balawa edefade falodaia besigala salala, amo edelasilo ëi yidi amo gogoal naaboseda, balawa sulubadela edela bolela fedalola säi.

*Ado besulamu säla i*  
(Maga 4.33-34)

<sup>34</sup> Yesuea udia dolö gegecol nefolalo amolima ado säi amo sulubadela, memalä made sälahilä, ado besulamu säla i. <sup>35</sup> Ea amala hamoi amoie, bea säloea bea säla negei amo gausiala digai.

Na nafi dagala ado besula säla imolömelë. Sege föi dibe sulubadela mi gäwila hamoia amila mustugä negei difolalo amoligi säla imolömelëla  
säla dëdëla negei dialea. Gë Udälo 78.2

*Giisi nafadeie ado besula säi amoie mi fädäla säi*

<sup>36</sup> Yesuea ado mala sälahilä, udia dolö gegecolia amila mosöa awäla sebegi, ie bëgëla aulo amoli maalahilä sähalea, Giisi nafade sagai dibeie ado besula säi amoie mi säla imola säi.

<sup>37</sup> Amala säsebegi, Yesuea säla obëgësalea, Dolöea gägä hedabi fëfëla sadia gogola aliligi asi amoda, Dolöie Malö amo neamelë. <sup>38</sup> Sagai amoda, naga föi dibe amomelë. Gägä hedabi amoda, Hebeni Beaha Maadela Sigi Neebe amoie malö nefolalebe amomelë. Amase, gägä nafade amoda, mugabe busa nafadefaliie udia dolö nefolalebe amomelë. <sup>39</sup> Ado niia gägä nafade fëfëla sadia gogoi amoda, mugabe busa neamelë. Molö amo faimolö fuda, segeyo aligila wagamolö amomelë. Molö amo faila negemolöie hamoi hamolo amolida, selesaia fiimelë. <sup>40</sup> Giisi nafade amo beselala dobola nulogi gobelo amo gadola, segeyo aligila wagasolo amo galada, amo gadola wäla hamomolömelë. <sup>41</sup> Amala hamomolö amoda, Dolöie Malö amea ie Beaha Maadela Sigi Neebe amila nelebo sulubadelaie udia dolö neala nafade hamolasila digilasilo amoge, udia dolöea mala nafade hamolo nefolalebe amoli sulubadelaie gegecolasimolö mosäia, ie selesaia fii amoli fisiga gamolömelë.

42 Amala hamolahilä, ilia udia dolö amoli nulo edefade wisebea ami sogobala sadia idogomolömelë. Amida, ili diisalea bese ali nalëgësa namolömelë. 43 Amala hamosegi, Godeie udia dolö amolida Eedoea Beaha Maadela Sigi Neebea ami nea, ilida eso nee yo gadoi nefolamolömelë.

Afädë gëhe galea galëda, hä nabalö dialeala säi.

*Ado besula muni nagagi musügä negeië säi*

44 Yesuea sähalea, Hebeni Beaha Maadela Sigi Neebea amida gowe gadoi dialea. Muni musügä negelo amo gadola sagai afädëgi musügä negei dilo. Amala dibegi, dolö afädëa beagolei. Beagolelahilä, bu gesusilahilä awäla, e hido elöla obeägila, nelebo hi gaui amoli sulubadela bidi nelea awäha nelolahilä, sagai amo bidia niimelë.

*Ado besula bage isogi momado hedabi helebe näia gadoië säi*

45 Amase elöda, Hebeni Beaha Maadela Sigi Neebea amida gowe gadoi dialea. Bidi nelo dolö afädëa bageie isogi momadoi hedabi amo gadoi helebe näia dibe amo nimolöie hogosamu aligilomelë. 46 Amala hogosolo amo gala, ea helebe näia afädë hedabi hido elöi aye negei amo beagolelahilä, ea nelebo hi gaui amoli sulubadela bidi nelea awäha nelolahilä, helebe näia amo bidia niimelëla säi.

*Ado besula selëgëie ado säi*

47 Yesuea aso, sähalea, Amase elöda, Hebeni Beaha Maadela Sigi Neebea amida gowe gadoi dialea. Dolö odoaea selëgë oeoabo dibeami digisebegi, seme yafie elö elöla digaimelë. 48 Selëgë digi amogi nobasebegi, selëgë digilo dolö amolia agesua deala gaula fedala negesila salea, seme hedabi amolida falodaia negesalea, nafade amolida sadia gaimelë. 49 Segeyo aligila wagasolo amo gala, amo gadola wäla hamomolömelë. Selesaiia fii nefolalebe amoli maala, Godeie udia dolö amoli amilasilahilä, nafade hamolo amoli neala nafolala gege dolasimolömelë. 50 Amala hamolahilä, udia dolö nafade hamolo amoli nulo edefade wisebea ami sogobala sadia idogomolömelë. Amida, ili diisalea bese ali nalëgësa namolömelëla säi.

51 Yesuea ie bëgëla aulo amolima nabahalea, Dilia na ado säi amoli sulubadela helësëi nefolalelela nabi. Amala nabasebegi, ilia ema, Äla säla obëgëi.

52 Amala säsebegi, Yesuea ilima sähalea, Amai galëda, mala dawadigi sulubadela Hebeni Beaha Maadela Sigi Neebea amoi dawadigila bëgëlo nefolalebe amolida, mosö eedoea hi nelegei musügä negelo mosöala nelebo gähe hädamade negeile, siiba negeile helegela gaula segea doadigila aulo amo gadoia amoli neala säi.

*Nasalese udia dolöea Yesu hamei made nelo*

*(Maga 6.1-6, Ulugu 4.16-30)*

53 Yesuea ado amoli besula säha maadelahilä, amala digila awäla 54 hi e ëdëia gaamugi ami obëgëi. Amala obëgëlahilä, ea ilile gedolo mosöa ami ilima mala säla olelesebegi, ilia asigigi fudugisa sefolalo. Ili sähalea, Dolö gowea dawa weda, abidi niidu. Gelo melëlo made gadoi hamola nowesebeweda, abidi galudu. 55 Eda mosö olelo amoië malö madele. Emeie ëida Meli, amase, ie eedoda Yamese, Yosebe, Saimono, Yudasafulo madele. 56 Amase, ie eleflia ili sulubadelada, nilibalä sefolalebe gowe madele. Ea nelebo amolida gelola abidi dibegi niidula säi. 57 Ili amala säla, ema bimolö habobalahilä, hamei made nelo. Amasebegi gaso, Yesuea ilima sähalea, Bea sälo neebe amoda hile segeafalige, hile sosogofaligige, ëi maade neala säi. 58 Sege amogi fii amolia asigi afädë made negesebegi, ea ami geloi melëlo made gadoi yafie made hamola nelo.

## 14

*Ödägi gelo Yone baagoi*

*(Maga 6.14-29, Ulugu 3.19-20, 9.7-9)*

1 Amo galada, Galili udia dolö beaha aligilo Heledo eada nelebo Yesuea hamosa neala säi amo nabi. \* 2 Nabalahlilä, ea ie hamoi hamolasilo nefolalo amolima sähalea, Goda ödägi gelo Yone gabugo. E bauia amila nowela galai ameada, ea geloi melëlo made gadoi hamomolöie geloi gaula nebegola säi.

3-4 Dafidi Heledoea edoo Filibië udia Helodiasa fedela nii. Amala fedela nii amogi, ödägi gelo Yonea Heledoma dia didoie udia asiala fedela niimelëla säha nelo. Amala säha nelo amogi, Heledoea Yone galabaia mosöa nafodola negei. 5 Amala säha nelo amogi, Heledoea Yone nufulö helësëi gaso, udia dolöbalä bedäi. Mida, ilia Yone eda bea sälo neala helësëlo amogi.

\* 14:1 Heledoie ëi elöda Ädibasa, eada Galili sege beaha nelo. Eda Gini Heledoie malö, Melia Yesu neegela ägüi amo gaalu nelo amo. Madiu 2 bimalo.

<sup>6</sup> Amala hamolahilä, Heledo e ägüla misi segeyo amo besela galasebegi, Helodiasäie idiwi amea udia dolö gegedoi sefolalebe mogogi ami nea sigoi. Sigosebe amo beala Heledoea edefademalä obeägilahlilä, <sup>7</sup> udia malö amoma migalä diigila ado gelola sähalea, Dia imola säse amo gadoida imolömeläla säla i. <sup>8</sup> Amala säsebe, ie emea gomalä sämalola säsebegi, idiwi amea sähalea, Walio gogi wäla ödägi gelo Yoneie busa damula falodaia negela imola säla i. <sup>9</sup> Amala säla iasebegi, gini e asigia yöia idogolahilä gaso, ea migalä diigila ado gelola säla i amoge, udia dolö ebalä gegedola molö naha sefolalebe amolige helësëla, ea udia malö amea säi amo gadola odoama hamomalai. <sup>10</sup> Amala hamomalalahilä, odoa ili galabaia mosöa fisiga gasebegi, ami Yoneie muugi damui. <sup>11</sup> Damula falodaia gaula maalahlilä, udia malö amo hïma iasebegi, ea emema imolö gaula asi.\* <sup>12</sup> Amala hamosebegi, Yoneie bögëla aulo nefolalo amolia maala, ie domalo gaula awäla bausilahlilä, ilia Yesuma sämolö asi.

*Dolö dausini biae molö mai*

*(Maga 6.30-44, Ulugu 9.10-17, Yone 6.1-14)*

<sup>13</sup> Yesuea amala säi amo nabalahlilä, sege e neloa amo digila, e dudaia fila sege dolö afädë maadeia ami hïdo asi. Amala asibua, udia dolö nefolalo amolia Yesu hä asimelëla säi amo nabalahlilä, ilile gaamu amoli digila, Yesu asi amo bëbögëla nagadabodo afiai. <sup>14</sup> Yesu e ödä dudaiala agesua daala aligilahlilä beahamelebe, udia dolö yafie nefolalebe amo bealahlilä, ili bobasëla, ilile oloi difolalo amoli wahilasisa nelo.

<sup>15</sup> Segeyo amo gala deadisebegi, ie bögëla aulo amoli Yesu neebee maalahlilä ema sähalea, Hä deadifali gabu. Niläda sege molö maadeia neebe amo udia dolö nefolalebe gowe ili dusula awälahlilä, molö bidia nimolöie sege holöfali ga made dibebe ami hogola aliligi afiamalamola säi. <sup>16</sup> Amala säsebegi, Yesuea ilima säla obögësälea, Ai. Ilida moholöi made gabu. Ili molö muäia dihili imalola säi. <sup>17</sup> Amala säsebegi, ilia ema säla obögësälea, Niläda beledi bia, seme äüdäla amomu wi galeala säi.\* <sup>18</sup> Amala säsebegi, Yesuea sähalea, Amo ne neebeawi gaula misiëla säi. <sup>19</sup> Gaula maasebegi, ea udia dolö nefolalo amoli giüsidaia ffigimalolahilä, beledi bia amola seme äüdä amola gaula mudaia sida adogola nea, Godema nesegi. Nesegelahilä, ea beledi dagabodasila, ie bögëla aulo amolima iasebegi, ilia udia dolö sefolalo amoligali sogoi. <sup>20</sup> Amala sogoi amo, ili sefolalo amoli sulubadela dofea nahalea, odoa fea digai amo bögëla aulo amolia gegedola, adu giwilasi salala nobala negei. <sup>21</sup> Molö mai amoli, udia malöla nidela made, dolö muda dausini bia gadoia mai.

*Yesu e ödädabodo asi*

*(Maga 6.45-52, Yone 6.16-21)*

<sup>22</sup> Amalahilä, fodolofali Yesuea udia dolö nefolalo amoli dusula afiamalola sämolölahilä, ie bögëla aulo amolima sähalea, Dilidale dudaia fila, ödä dögëla alogodi afiamalola säi. <sup>23</sup> Amalahilä, ea udia dolö amolima dusula hä afiamalolahilä, e Godema adomolöie hïdo segebidaia ami fedai. Hä, gagasila digase amo gaalu, Yesu e hïdofali nelo. <sup>24</sup> Amala neebe amo gaalu, du amo asi mia made awäha nebegi, fo du awäse busamadila gelola maalahlilä, ödä aidagusebe amea du amo besu besui. <sup>25</sup> Amala hamosebegi, sege yomolö amo gaalu, Yesu e ie bögëla aulo awäha dibebe ami ödädabodo misi. <sup>26</sup> Ili e ödädabodo maasebe amo bealahlilä, edefademalä fudugila emo gigisëla bedäi. Ili fudugila sähalea, Wae! Gosogoda mugabe gabula sälahilä, ili bedäla üala dodogöi. <sup>27</sup> Amala üala dodogösebegi, Yesuea fodolofali ilima sähalea, Bedämabio. Asigi gelomalo. Weda nemelëla säi. <sup>28</sup> Amala säsebegi, Fidaea sähalea, Dafidilo-o, di galëda, di neebee gui ne ödädabodo misiëla sämola säi. <sup>29</sup> Amala säsebegi, ea misiëla säi. Misiëla säsebegi, Fida e dudaia amila ödädabodo Yesu neebee ami moholö asi. <sup>30</sup> Amala asi gaso, fo gelola guula maasebe amo beala fudugila bedäie, ödägi besela digala usabodälä hamosebegi, Fida hi uuahalea, Dafidilo Gelo-i, ne nabelela nimola säi. <sup>31</sup> Amala säsebegi, Yesuea fodolofali naabo mogodigia gala nabelela nea sähalea, Asigi afädë holöfali negei-e, abilideläie asigi äüdä negeila nabi. <sup>32</sup> Amalahilä, ele dudaia fia adogoi amole fo guula maaha nelo amo boogelei. <sup>33</sup> Amasebegi, ie bögëla aulo dudaia sefolalo amolia Yesuie ei gauia adalahlilä sähalea, Dida dofä Godeie malö nebegola säi.

*Yesuea Genesaledi ami oloi difolalo wahi*

*(Maga 6.53-56)*

<sup>34</sup> Amala hamolahilä, ili oeabo edefade amoie agesua dögëla aligilahlilä awäla, sege ei Genesaledi ami besela galai. <sup>35</sup> Besela galasebegi, udia dolö nefolalo amolia e bealahlilä, Yesu gabula helësëi. Amala helësëlahilä, sege ga made difolalo amoli sulubadelama säla sogosebegi, oloi difolalo amoli sulubadela Yesu neebee ami sigi maaha maadei.

\* **14:11:** Yone busa damula falodaia gaula misialola säi amoie mida, Helodiasäie helësësäleada, Yone dofä nufi gabula helësëmölöie amala säi. \* **14:17:** Yu ilia da beledi amoli hamosaleada bobogalada hamolo made. Beledi biala säi amoda dolö äüdäeamu molöi gadoi.

<sup>36</sup> Sigi maalahilä, ilia ema gelola sähalea, Oloi difolalebe gowe ilia die fagulo bidigimu diigimäiamelëla säi. Amo gadola, Yesuie fagulogi diigi amoli sulubadela hä, wahisa maadei.

## 15

*Godeie Ado säla negei dibe amea mäu ilia aiyalo mala dilo amo baagila asi dialea (Maga 7.1-13)*

<sup>1</sup> Amala hamosebegi, Felesi dolö odoa nefolalo amolige, mala dawadigi odoa nefolalo amolige, Yalusalemela Yesu neebee maala, ilia ema nabahalea, <sup>2</sup> Die bégëla aulo amoliada nilile mäu ilia siiba aiyalo mala negei amo damula, naabo nigime hëla made molö nulo amoda mi edoie la nabi.\* <sup>3</sup> Amala nabasebegi, Yesuea ilima säla obëgësalea, Dilia dilile siiba aiyalo mala negei amo helësëla, Godea hamomalai amo damulo amoda mi edoie. <sup>4</sup> Godea sähalea, Die diado diemele hedabola helësëla, elele ado nabalahlilä hamomalola säi dialea. Amase elöda, afädëa eedole emele gadiaboseda, baagomäia nufulö dialeala säla negei dialea. <sup>5</sup> Amai gasoda, dihili sähalea, Afädëa hile nelegei amogi, eedole emele ugila negemolö nea sähalea, Nelebo goweda Godegali odala i dialeala säseada, <sup>6</sup> ea eedo hedabola helësëla made, ugila made negemalola sälo. Dilia mala go hamose goeada, dilile siiba aiyalo mala negei amo helësëlahilä, Godeie mala säla negei amoda memalä gadoi hamola fisilo gabu. <sup>7</sup> Asigi fea negelo dili, bea sälo Aisaeaea dilile hedabola bea sähalea, <sup>8</sup> Udia dolö amolia nema asigi wagadi made ga negesilahilä, adoeamu nie ëi gauia adalo nea.

<sup>9</sup> Ila olelesaleada, dolöfäea mala säla negei amomu olelelo nea. Amaimo, ilia nie ëi memalä gauia adalo nebegola

bea säla dëdëla negei dialeala Yesuea säla i.

*Aisaea 29.13*

*Udia dolö Godeie siigi nigime baaloie säi (Maga 7.14-23)*

<sup>10</sup> Yesuea udia dolö mofiamalolahilä, ea ilima sähalea, Dilia nabala hedabola helësëmalö. <sup>11</sup> Nelebo nafiadi digisebe ameadä, udia dolö Godeie siigi nigime baalo made. Nelebo isogi dilo nafiadila segea doadigila awäse ameadä, udia dolö Godeie siigi nigime baalomelëla säi.

<sup>12</sup> Hobeala ie bégëla aulo amolia Yesu neebee maalahilä sähalea, Dia ado amo nabalahlilä, Felesi dolö nefolalo amolile iso asigigi gäwisalea sësebe amoda dihi melilela säi. <sup>13</sup> Amala säsebegi, Yesuea säla obëgësalea, Nelebo sulubadela nie Naado selesäia mosöa neebe amea made sagai amoda soomo aala digisa maademolömelë. <sup>14</sup> Felesi dolö ilida gamelä, helësëmabu. Hili ili si golai nea, dolö odoa nefolalebe amoli naabogi gaula sigi aulo nebebo. Si golai elöea si golai elö amo naabogi gaula sigi awäha neëgida, helegela balagula dögoigi digalomelëla säi.

<sup>15</sup> Amala säsebegi, Fidaea säla obëgësalea, Ado besula säi amoie mi nilima awala säla imola säi. <sup>16</sup> Amala säsebegi, Yesuea säla obëgësalea, Dilige asigi made gäwi nelo amo gadoi wäla neale. <sup>17</sup> Nelebo nafia digase amoda isogi digalahilä, segea doadigila aulo amo dilia dawa made neale. <sup>18</sup> Amai gaso, nafiadila segea doadigila awäse amoda, iso asigigila besela galasebe amea, udia dolö Godeie siigi nigime baalomelë. <sup>19</sup> Mida, iso asigigila besela galalo amoda asigi nafadege, udia dolö baagomäia nufulöge, udia dolö fa nimolöge, hilimu nafade odoa hamomolöge, nelegei fa nimolöge, wäfalä sämolöge, odoama ado nafadela sämolöge. <sup>20</sup> Mala nafade amolia udia dolö Godeie siigi nigime baalomelë. Amalo gaso, naabo nigime hëla made, molö nulo ameadä, udia dolö Godeie siigi nigime baalo mademelëla säi.

*Gainana udia afädëa Yesuma dofä asigi afädë negei (Maga 7.24-30)*

<sup>21</sup> Sege amo dögila, Yesu e Daiamadige Saidonomadige asi. <sup>22</sup> Ami awäsebegi, Gainana udia afädë segea ami sulo amo Yesu neebee maalahilä, ema uuala sähalea, Debidie malö-o, ne bobasëla ugila negemo. Nie nidiwima mugabe fedalahilä, e neala nafadesaleamelëla säi. <sup>23</sup> Amala säsebegi, Yesuea ema ado afädë made säla obëgëla negei, ie bégëla aulo amoli Yesu neebee maalahilä ema sähalea, Udia goweadä nili baagila aligila uuala aligi maasebego mosalamola säi. <sup>24</sup> Amala säsebegi, Yesuea säla obëgësalea, Isilale udia dolö sugua sibi dabadigi gadoi nefolalebe amolilemu ne fisiga wei neawela säi. <sup>25</sup> Amala säsebegi, udia amea Yesu neebee maalahilä, e mia emo gumu sasagala salea, ema sähalea, Dafdilo-o, ne ugila negemola säi. <sup>26</sup> Amala säsebegi, Yesuea säla obëgësalea, Malöie molö negei ügülogali

\* **15:2:** Bégëla aulo amolile naabo nigime baai molö nasebegi made. Yu ilia nelebo afädë Godeie siigi nigime baai gauledula helësëlahilä, hili ili Godeie siigi nigime baaloala bedälo. Amala helësëlahilä, hili aiyalo mala säla negei amo gadola, Godeie siigi nigime baai made namäia, ilia dafidi naabo nigime hëlahilä, hobeala molö nulo.



sadia gala ìmolòda dofea madela sàì.\* <sup>27</sup> Amala sàlebegi, udia amea sàhalea, Dafidilo, amo dofà. Gasoda, ùgùlòie eedoea molò nahalea dusula digase amoda, ùgùlòea nùlola sàì. <sup>28</sup> Amala sàsebegi, Yesuea ema sàla obègèsalea, Udia-o, dia asigi afàdè negei goda edefade. Dihì hamesebego gadola hamomolòmélèla sàì. Yesuea ado amo sàia gai amole udia amoie idiwi hà wahi.

*Yesuea udia dolò yafte oloi wahi*

<sup>29</sup> Yesu e sege amo dīgila, Galili oeabo dibe amoie agesuadi awàha nelolahilà, gau fedala deadigia adogola ami sulo. <sup>30</sup> Ami sebegi, udia dolò yafte e neebèa gegedola, ilia odoa emo nafadeige, si golaige, domalo nafadeige, nafi dofogaige, amase, olo elò elòla oloige, sulubadela ìe emo mia gaula mafula negesebegi, ea wahisa maadei. <sup>31</sup> Amala hamosebegi, udia dolò gegedoi amolia beahamelebe, odoa nafi dofogai amoli ado adola digi, domalo nafadei amoli wahila digi, emo nafadei amoli nawela digi, si golai amoli beadigisa nefolalebe amo bealahilà, ili fudugi. Fudugilahilà, ilia Isilaleie Godeie èi gauia adaha nefolalo.

*Dolò dausini biyidiae molò mai*

*(Maga 8.1-10)*

<sup>32</sup> Yesuea ìe bègèla aulo amoli wela mofiamolahilà ilima sàhalea, Udia dolò nefolalebe gowe ili asigii gabumelè. Mida, nebalà hà segeyo ohodoa nelo amea, ili molò maade gabu. Sidèa baagoi amola wàla mosòla sàmolòda, na made hamesa. Idiafa ili si dādābèlela digaloeala sàì. <sup>33</sup> Amala sàsebegi, ìe bègèla aulo amolia ema nabahalea, Udia dolò yafte gegedoi nefolalebe weli molò molòda, sege nafade udia dolò aligisia made wi abidi nimolòdula nabi. <sup>34</sup> Amala nabasebegi, Yesuea ilima nabahalea, Beledi abolàia galebela nabi. Amala nabasebegi, ilia sàla obègèsalea, Beledi gifalādalia, seme nelèsa naabo safo gabuwela sàì. <sup>35</sup> Amala gabuwela sàsebegi, Yesuea udia dolò amoli nagadaia fìfigimalai. <sup>36</sup> Amala sàlahilà, ea beledi gifalādalia amoge seme amoge gaula nea, Godema nesegai. Nesegelelahilà, dagabodasila ìe bègèla aulo amolima ìasebegi, ilia udia dolò sefolalo amoligali sogoi. <sup>37</sup> Udia dolò sulubadela sefolalo amolia molò dofea naha maadelahilà, fea digai amo adu gifalādaliagi salala nobala negei. <sup>38</sup> Udia malòla nidela made, molò mai amolida dausini biyidiae sefolalo.

<sup>39</sup> Amalahilà, Yesuea udia dolò gegedoi amoli afiaha maademalolahilà, e odà duugi fila sege èi Magadani asi.

## 16

*Ilia Yesuma dolòea hamomolòie made gadoi afàdè hamomola sàì*

*(Maga 8.11-13, Ulugu 12.54-56)*

<sup>1</sup> Felesi dolò nefolalo amolige, amase, Sadiusi dolò nefolalo amolige, Yesu neebèa maalahlilà, ilia Yesu fedogola himolòie ema sàhalea, Dolòea hamomolòie made gadoi afàdè selesaiya mosòala misi dia hamola nilima olemola sàì. <sup>2</sup> Amala sàsebegi, ea sàla obègèsalea, [Deadi eso fidila digahalea, mu bèla obègèseda, dilia hà, esomolò gabula sàlo. <sup>3</sup> Amase elòda, sege yose amo gaalu, mu gelège bèla gasimi sagaseda, dilia walioda hà fo maala sege digamolò gabula sàlomelè. Amalo amo dilia mu giwigi bealahilà, amo gadola hamomolò gabulada helèsèlo gaso, walio hamosebe amo bealahilà, amo gadola hamomolò gabula helèsèlo made nefolaleale.]\* <sup>4</sup> Udia dolò walio nefolalebe welia nafademu hamosa nea, udiaea dolò fisilo amo gadola Godeie mala fisilo amolia, dolòea hamomolòie made gadoi afàdè hamomola sàlo. Amalo gaso, dolòea hamomolòie made gadoi afàdè Yonama hamoi amomu ilima olemolòmélèla sàì. Amala sàlahilà, ili dīgila eda bahila moholòie asi.

*Felesi dolòlele Sadiusi dolòlele beledi hamolo yidila sàì*

*(Maga 8.14-21)*

<sup>5</sup> Bègèla aulo amoli oeabo edefade dibe amo dègèla nàioda alòmodi besela galahamelebe, beledi afàdè made àgùla elabola misi meli. <sup>6</sup> Amaimo, Yesuea ilima sàhalea, Felesi dolòlele Sadiusi dolòlele beledi edelo yidi amo helèsèla, idihè nea hedabola beaha namialola sàì. <sup>7</sup> Amala sàsebegi, ilia hilidomu didiàhalea, Nilia beledi made àgùie amoie sàsebela didiàha dilo. <sup>8</sup> Hilidomu didiàha dibe amo Yesuea dawadigila nea, ilima sàhalea, Asigi afàdè holòfali negeila dili, dilia beledi maade gabula didiàsebegoda edoie. <sup>9</sup> Aso, dili dawadigi made nelo amo wàlasimu neale. Beledi bia amea dausini biaea nalahlilà, fea digai amoda dilia adu

\* **15:26:** Yesueada udia amo emesala eegela gadiabola sàì made. Eada Ado Mala Hedabi dafidi Isilalemadidale daidola nabaha maadelahilà, hobeala fii odoa ilia nabuàiala helèsèi. Amala helèsèlahilà, ea ado besula Isilale helèsèla malòla sàì. Amase, fii odoa amoli helèsèla ùgùlola sàì. Amala sàì gaso, Yesuea udia amoie asigi besui amo bealahilà, ea e ugila negei.

\* **16:3:** Dawadigi dolò odoaea helèsèlèaleada, ado [gomalà] hohela negeida, Madiu hì dèdèi made, goda hobeala dolò elòea dèdèila helèsèi.

aboläiagi salala nobala negei. Amo elaboi neale. <sup>10</sup> Amase elöda, beledi gifalädalia amea dausini biyidiaea nalahlilä, fea digai amoda dilia adu aboläiagi salala nobala negei. Amoge elaboi neale. <sup>11</sup> Na dilima belediie made säi amo dilia dawadigi made nebegoda edoea. Felesilele Sadiusilele beledi edelo yidi dibe amoie hedabola idihë namialola säla i. <sup>12</sup> Amala säsebegi, ilia helësésaleamelebe, ea hedabola idihë namialola säi amoda beledi neala edelo yidiie made säi gabu. Felesi dolöle Sadiusi dolölea mala säla olelesebe amoie säi gabula helësëi.

*Fidaea sähalea, Afädë Memelei amoda di nebegola säi  
(Maga 8.27-30, Ulugu 9.18-21)*

<sup>13</sup> Yesu e Sisalia Filibai gaumumadi awäla besela galalahilä, ea ie bögëla aulo amolima nabahalea, Udia dolö nefolalebe amolia Dolöie Malö amoda nowë neala säha difolalebela nabi. <sup>14</sup> Amala nabasebegi, ilia säla obögësalea, Odoeada ödägi gelo Yone neala säla digi, odoeada Elaia neala säla digi, amase, odoeada Yelamae galë, bea sälo elö galë neala säla digisa difolaleamelelä säi. <sup>15</sup> Amala säla obögësebegi, ea ilima nabahalea, Amai, diliada ne nowëla säha dialeala nabi. <sup>16</sup> Amala nabasebegi, Saimono Fidaea säla obögësalea, Afädë Memelei amoda dimelë. Dida Gode namolöi neebe amoie malö nebegola säi. <sup>17</sup> Amala säsebegi, Yesuea säla obögësalea, Yonaie malö Saimono-o, dida obeägisa nea.\* Mida, dia walio säi amoda nagadaia dolölea dima olei made. Nie Naado selesaia mosöa neebe amea oleimelë. <sup>18</sup> Amaimo, na dima sähago. Die ëida Fida. Igi amodaia nie udia dolö Godea wela ifosisi nefolalebe amoli na ulimolömelë. Olasegi, baagomolö amoie geloi ameada made nufuda salala salolemolömelë.\* <sup>19</sup> Hebeni Beaha Maadela Sigi Neebe amoie idi gai dogelo gii amo dima imolömelë. Dia naga föidaia hamomolö madela säla negesebe amoda, Hebenige hamomolö mademu dialea. Amase, dia naga föidaia hamomolö dialeala säsebe amoda, Hebenige hamomolömu dialeala säi. <sup>20</sup> Amala sälahilä, ea ie bögëla aulo amolima gelola sähalea, Afädë Memelei moholömelëlä säla negei amoda ne newemelë, odoama säla imabiola säi.

*Yesu e baagolahilä nowemolömelëlä säi  
(Maga 8.31-9.1, Ulugu 9.22-27)*

<sup>21</sup> Segeyo amila nofela, Yesuea mi gäwilafali, ie bögëla aulo amolima fädäla sähalea, Ne Yalusaleme moholö galeamelë. Ami awäseada, dolö dafidilo asigi gäwi nefolalebe amoliage, gobela ilo busa nefolalebe amoliage, amase, mala dawadigi nefolalebe amoliage, ne neala elö elöla edefade sëlasimolömelë. Amala hamolahilä, ilia ne baagomäia nufudasegi, segeyo äudä nelolahilä osodagi ne nowemolömelë. Amala hamomolö galeamelëlä säi. <sup>22</sup> Amala säsebegi, Fidaea Yesu e sigi aliga galahlilä nea nemola sähalea, Dafidilo Geloi-e, amala sämabu. Dima dofä amala made hamomolömelëlä säi. <sup>23</sup> Amala säsebegi, Yesu e besuia imogola Fidama sähalea, Ae. Saidani, ne neebeawi namolö made. Mosö. Dia nie idiafa dofogasebego. Diada Godea helësëlo amo gadola made, dolöfäea helësëlo wäla helësëlebe säi.

<sup>24</sup> Amala sälahilä, Yesuea ie bögëla aulo amolima sähalea, Afädëa ne awäsewe gadola moholö helësëseada, hi hamea hamela helësëlo amo fisila, hile i fügäi gaula, ne bögëla moholö dialea. <sup>25</sup> Mida, afädëa hile namolö amo gaula fëdöla aligimolö helësëseada, ie namolö amo hogosa helemolömelë. Amai gaso, afädëa hile namolö amo ne helësëla fisiseda, ea ie namolö amo gaula namolömelë. <sup>26</sup> Afädëa nagadaia nelegei sulubadela neala gausalea, hi e baagosedada, nagadaia nelegei amea abeahäla e ugila negemolödu. Amase, afädëa bidi edo ilahlilä, hile namolö amo bu nea obögëmolödu. <sup>27</sup> Amala säsebe amoie mida, Dolöie Malö amo ie Edoeie yo digalo hido elöi salugalahilä, ie selesaia fibalä moholömelë. Maasegi, ea udia dolö sulubadelama ilia hamoi amo gadola bidi imolömelë. <sup>28</sup> Na dilima dofä sähago. Dolö odoa walio gui nefolalebe gowe ili baagola made, aso, neëgi wäla Dolöie Malö amo, ie Beaha Maadela Sigi Neebe amobalä maase amo bimolömelëlä säi.

## 17

*Yesuie domalo bedefala elöi neebe meli  
(Maga 9.2-13, Ulugu 9.28-36)*

<sup>1</sup> Segeyo gafeia nelolahilä, Yesuea Fidage, Yamesege, amase, Yameseie edoo Yonege, ili sigi awäla segebi edefadedeia gadogofali fedala hilidofali nefolalo. <sup>2</sup> Ami nefolalea beahaleamelebe, ilile sidaia Yesuie domalo bedefala hido elöi neebe meli. Ie odagi eso si gadoi neëla, ie fagulo gäi amoge falela yo digai hido elöi neebe meli. <sup>3</sup> Amo bealahilä,

\* **16:17:** Giligi adoda Yonaie malö Saimonola säla dëdëla negei. Amase, Yone 1.42gida Yoneie malö Saimonola säla dëdëla negei. \* **16:18:** Giligi adoea Fidaie ëida igi ëibalä ga madefali dialea.

ilia beahaleamelebe, Mosesele Elaiale maala ulufadigilahilä, Yesubalä adosa neebe meli. <sup>4</sup> Amo bealahilä, Fidaea Yesuma sähalea, Dafidilo Geloi-e, nili wi neebeweda hedabi gabu. Na sege mosö ohodoa oledule. Elöda die, elöda Mosesei, amase, elöda Elaiäela nabi. <sup>5</sup> Ea ado amo, aso, säha nebegi wäla, gelë häu faleifali hido elöi amo ili neebeadu maala dabelahilä, gelë amoie isogila ado afädë sähalea, Egoweda nie malö, na boba hamosa neawe. Ema edefademalä obeägisa neawe. Dilia ie ado nabualola säi. <sup>6</sup> Ado säi amo nabala, bögëla aulo amoli edefademalä fudugila bedälähilä, nagadaia gumusula dia didigafui. <sup>7</sup> Amala difolalebegi, Yesu e ili difolalebea ami maala didiigisalea, Bedämabu. Nowemola säi. <sup>8</sup> Amala didiigisebegi, sida adogola beahaleamelebe, dolö elö maade, Yesu hïdomu neebe meli.

<sup>9</sup> Ili segebidaia amila digafiha dialea, Yesuea ilima gelola sähalea, Dolöie Malö amo bauia amila, aso, made nowela neëgida, dilia meli amo odoama säla imabiola säi.

<sup>10</sup> Amala säsebegi, bögëla aulo amolia Yesuma nabahalea, Mala dawadigi nefolalebe amoliada Elaiadale dafidi moholöla sälo amoda mi edöela nabi. <sup>11</sup> Amala nabasebegi, ea säla obëgësalea, Elaiä eda dofä moholö. Eada nelebo sulubadela hahamogisa namolömelë. <sup>12</sup> Gaso, na dilima sähago. Elaiä eda misi. Misi gaso, udia dolö nefolalo amolia e gabulada helësëla made, ilia hamomolö helësëi amo gadola hamosa nelomelë. Amo hamosa nelo amo gadola wäla, Dolöie Malö amoge neala sälasimolömelëla säi. <sup>13</sup> Amala säsebegi, bögëla aulo amolia helësësalea, ado ilima säsebe amoda ödägi gelo Yoneie säsebela helësëi.

*Yesuea maalibu afädëma mugabe fedai nesila digi  
(Maga 9.14-29, Ulu 9.37-43)*

<sup>14</sup> Ili afiala, udia dolö gegedoi dibeä ami besela galasebegi, dolö afädë maala Yesu mia emo gumu sasagala salea <sup>15</sup> sähalea, Dafidilo Geloi-e, nie malö bobasëmo. E amulämelahilä, së yafie nülomelë. E amulämesalea nulo gobelage, ödägi neala digalasisamu aligilomelë. <sup>16</sup> Amaimo, die bögëla aulo amoli nefolalebea sigi misi gaso, ilia e wahilasimolöi made gabiola säi. <sup>17</sup> Amala säsebegi, Yesuea säla obëgësalea, Udia dolö asigi afädë made negela asiala hamolo walio nefolalebea dili, ne dilibalä segeyo aboläia namolödu. Segeyo aboläiagi na dilile yöi gaula namolödu. E ne neebea sigi misiäla säi. <sup>18</sup> Sigi maasebegi, Yesuea ema nemoi. Nemosebegi, mugabe amo doadigila asi. Amala asi amole, malö maalibu amo fodolofali wahi.

<sup>19</sup> Hobeala, bögëla aulo amoli Yesu e hïdomu neebea ami maalähilä, ema nabahalea, Amai nilia mugabe nesila digilibe iliawai amoda edoeadula nabi. <sup>20-21</sup> Amala nabasebegi, ea ilima sähalea, Dilia asigi afädë negei nebegoda, holöfali negei nebegoea amaimelë. Na dilima dofä sähago. I masada gägä holöfali dibeä amo gadoi asigi afädë negela nea, segebi gowema sähalea, Guilahilä gagowedu gasi gamola säseba, gasi gamolömelë. Amase, dilia afädë hamomolö asusugai iliawaida maade bimolömelëla säi.\*

*Yesuea e baagola nowemolömelëla bu elö säi  
(Maga 9.30-32, Ulu 9.43-45)*

<sup>22</sup> Ili Galili segea gegedosebegi, Yesuea ilima sähalea, Dolöie Malö amoda dolögali gaula imolö segeyo hä besela galasebewe. <sup>23</sup> Gaula iasegi, ilia e nufudala baagomolö gasoda, segeyo äudä nelolahilä, osodagi e nowela moholömelëla säi. Amala säsebegi, ili asigia yöia ididogoi.

*Godeie mosöie dagisi muni negei*

<sup>24</sup> Yesuge, ie bögëla aulo amolali awäla, Gabaniama gaamugi besela galai. Ami nebegi, Godeie mosöie dagisi muni nelo nefolalo amolia, Fida neebea maalähilä ema nabahalea, Die säla olelelo neebe ameadä dagisi muni negelolela nabi. <sup>25</sup> Amala nabasebegi, Fidaea säla obëgësalea, Ä, negelomelëla säi.

Amala sälahilä, Fida e mosö mumusogi digala adola made nebegi, Yesuea dafidi Fidama nabahalea, Saimono, nagadaiaie beaha aligilo gini nefolalebe amolia dagisi muni elö elöla negesebe amo negelo amolida nowëadu. Dia edo helësësebe. Ilile malöeaedu, ma odoeaedula nabi. <sup>26</sup> Amala nabasebegi, ea säla obëgësalea, Amoda odoaea gabiola säi. Amala sälebegi, Yesuea ema sähalea, Amai galëda, amolile malöea dagisi muni negemolöi made gabu. <sup>27</sup> Amai gaso, alia ili neala habobalasiloea, dia oeafo dibeä ami seme däamolö mosalo. Amaimo, seme dafidi dease amoie nafigida, muni giwi afädë dië bimolömelë. Ameadä Godeie mosöie dagisi muni diege niege negemolö dofea bimolömelë. Amo neala gaulähilä, alile dagisi muni ilima ia mosalola säi.

\* **17:20-21:** Dawadigi dolö odoaea helësëaleada, damo 21da Madiu hi dëdëi made, goda hobeala dolö elöea ado Maga 9.29gi dibeä amobalä gaalumäiaie dëdëla helësëi. Amoda gomalä [Nelebo afädë hamosebe amea made, molö made naala nea, Godema adosebe ameamu mugabe fedai gowe gadoi nesila digimolöi dialeamelëla säi.]

## 18

*Baagila asi neebe amo nowëla nabi  
(Maga 9.33-37, Ulugu 9.46-48)*

<sup>1</sup> Segeyo amo gala, bégëla aulo amoli Yesu neebee maalahilä, ema nabahalea, Hebeni Beaha Maadela Sigi Neebee amida baagila awäla neebe amo nowëdula nabi. <sup>2</sup> Amala nabasebegi, Yesuea malö holöbö wela, ilile sidaia ifosilahilä <sup>3</sup> sähalea,\* Na dilima dofä sähago. Dilile asigi bedefala, malësä gadoi made aligiseda, Hebeni Beaha Maadela Sigi Neebee amida made nogila digamolömelë. <sup>4</sup> Hi e nagadaiala, malö holöbö gowe gadoi neebe ameada, Hebeni Beaha Maadela Sigi Neebee ami baagila asi nea. <sup>5</sup> Amase elöda, afädëa nie ëigi malö holöbö gowe gadoi neebe amoma, haligila namolöie misiëla säседа, nemage haligila namolöie misiëla sähagomelë. <sup>6</sup> Afädëa malësä nema asigi afädë negei amoligi afädë neala digalasiseda, ëfëa igi edefadegi begela, bidi näiadooëa ie muugia begelahilä, ödëa muäia duhulugi hadia idogosedä, ie hedabida amomelëla säi.

*Nilä neala nafadelasilöie mi säi  
(Maga 9.42-48, Ulugu 17.1-2)*

<sup>7</sup> Yesuea ado aso, sähamu neamu sähalea, Udia dolöëa asiala hamomäia, ili neala digalasilö amöie, sege föigi nefolalebe amoli, asigii gabumelë. Digalasilö amolida dofä moholöi dialea gaso, nelebo amoli misiäia, dolö doga negelo amoda, asigii gabu. <sup>8</sup> Die naaboea galë, emoea galë, di neala digalasiseda, damula sadia gamalo. Naabo elö amo mauäi, emo elö amo mauäi neebe amoda, namolöi namolö dibeä ami nogila digamolöda, dofea galea. Naabo äudäla galë, emo äudäla galë, nulo usilo made dibeä sadia idogomolö amoda nafade gabugi. <sup>9</sup> Amase, die siia di neala digalasiseda, beselala sadia gamalo. Si afädëfali galëda, namolöi namolö dibeä ami nogila digamolöda, dofea galea. Si helegela galëda, heli segea nulo gobeia ami sadia idogomolö amoda nafade gabugila säi.

*Ado besula sugua sibi afädë nafolala asila säi  
(Ulugu 15.3-7)*

<sup>10-11</sup> Yesuea ado aso, sähamu neamu sähalea, Dilia malësä gowe iligi afädë memalä gadoi gabula helësëloea, idihë nea beaha namialo.\* Na dilima sähago. Malësä ilile selesaia fii amolida, nie Naado selesaia mosöa neebe amöie odagia aligilomu nea.\*

<sup>12</sup> Dilia abilia helësësebe. Dolö afädëa ie sugua sibi hädali afädë foi nelo amoligi, afädë nafolala asi galëda, eedo ameada nabülasä sëgëlasäie odoai sëgëlasä amolida, felea ifosilahilä, afädë nafolala asi amo hogola aulo madele. <sup>13</sup> Na dilima dofä sähago. Awälahlilä, ea amo beagoleseda, sugua sibi odoä made nafolala asi amoligi obeägä amoda nagadaialahlilä, sugua sibi afädëfali beagolei amogida, edefade obeägilömelë. <sup>14</sup> Amo gadola wäla, dilile Diado selesaia mosöa neebe amea malësä gowe iligi afädë dabadigimäia made hamesa neamelela säi.

*Didoo afädëa dima asiala hamosegi hamomolö  
(Ulugu 17.3)*

<sup>15</sup> Yesuea ado aso, sähamu neamu sähalea, Die didooëa dima asiala afädë hamosedä, hido neebee ami awälahlilä, halidomu nea, ea asiala hamoi amo olemalo. Dia ado säsebe amo ea nabasedä, dia didoo hä sigi obëgëigomelë. <sup>16</sup> Ea dia ado säsebe amo made nabasedä, dolö afädë galë, äudä galë dibalä awähaeamalo. Amöie mida, ado sulubadela säse amo dofä gabula helësëmäia, äudëa galë, ohodoëa galë melëlo ameage, nabelo ameage iilasila säседа, dofä gabula helësëmolömelë. *Mala Bu Eegee 19.15*

<sup>17</sup> Amala hamosegige, dolö amea ilia säse amo made nabala auusedä, udia dolö Godea wela ifosisi nefolalebe amolima sämalö. Amala hamosegige, dolö amea ilia säse amoge hä, made nabala auusedä, dilia Gode helësëlo made amolimage, amase, dagisi muni nelo amolimage mala hamolo amo gadola, dolö amoma hamomalola säi.

<sup>18</sup> Amaimo, na dilima dofä sähago. Dilia naga föidaia hamomolö madela säsebe amoda, Hebenige hamomolö mademu dialea. Amase, dilia naga föidaia hamomolö dialeala säsebe amoda, Hebenige hamomolömu dialea. <sup>19</sup> Amai na dilima ado elöge dofä sähago.

\* **18:3**: Yesuea ado sedadela bia säi Madiu bebagi dëdëi dibe amoligida, biyiduta go. Yesuea ie bégëla aulo amolia mala abodo bégëla hamomäia säha nelo. Ado amoda 18.3-35 amogi dialea. \* **18:10-11**: Giligi adoëada malësä gowe ilia säi (damo goiege, damo 6iege, amase, damo 14iege) afädëdi go gadoida Maga 10.42 amogida, nie bégëla aulo holöbö gidogo neebe amola säi. Ado amo beasedä, Yesuea malësäiemu helësëla made, ie bégëla aulo odoä amolige helësëla säi bimolö. \* **18:10-11**: Dawadigi dolö odoëa helësësaleada, damo 11da Madiu hi dëdëi made, goda hobeala dolö elöëa Ulugu 19.10 gaula maala dëdëila helësëi. Amoda gomalä [Mida, Dolöie Malö ameada udia dolö dabadigi nefolalebe amoli sigi obëgëmolö misimelë.]

Nagadaia wi nea, diligi äudäea ado afädë negela Godea afädë gowe hamomäiala säla, ema adoseda, nïe Naado selesäia mosöa neebe ameadä hamomalola säse amo gadola hamomolömelë. <sup>20</sup> Amaimo, äudä galëge, ohodoa galëge, nïe ëigi gedola neëda, ne ili mogogi ami namolömelëla säi.

*Hamoi hamolasiloea hamoi gaalu hamolo made bobasëila säi*

<sup>21</sup> Amala säsebegi, Fida e Yesu neebä maalahilä, ema nabahalea, Dafidilo Geloï-e, nedoo afädëa nema asiala hamoseda, na aboläiagi hëmolödu. Gifalädaliälaledula nabi. <sup>22</sup> Amala nabasebegi, Yesuea ema säla obëgësälea, Nada gifalädaliämulä made säha. Nada nabülasï gifalädaliäie odoai gifalädaliämelëla sähago.

<sup>23</sup> Amoië mida, Hebeni Beaha Maadela Sigi Neebä amida gowe gadoi dialea. Beaha aligilo gini afädëa ïe hamoi hamolasilobalä bidi negei dilo amoda, hä mogomolöila helësëimelë. <sup>24</sup> Ea mogodelä hamosebegi, ïe hamoi hamolasilö afädëbalä muni edefade nidemolö asusugai bidi negei dilo amo e neebä sigi misimelë. <sup>25</sup> Hamoi hamolasilö amea bidi negei amo beselala ïmolöi made amea, ïe dafidiloea dolö odoama sähalea, Muni bidi negei amo beselala ïmolöie, hï eege, ïe udiage, ïe malöge, amase, ïe nelegei dibe amo sulubadelage, muni bidi neaha maademalola säi. <sup>26</sup> Amala säi amo nabalahlilä, hamoi hamolasilö amea e mia emo gumu sasagala salea, fudugila sähalea, Made habobala, beaha namialo. Na, aso, sulubadela beselala dihimä iaha maademolömelëla säi. <sup>27</sup> Amala säla obëgësëbegi, hamoi hamolasilö amoië dafidiloea bobasësälea, e mosalolahilä, bidi negei amo hëi. <sup>28</sup> Amala hamosebegi, dolö amo doadigila fedahamelebe, dolö afädë ebalä hamoi gaalu hamolasilö amo gausiai. Dolö e gausiai amea ebalä ïe bidi holöfalä negei dilo. Amasebegi, ea dolö amoië muugia fëdöla gaala nea sähalea, Nïe muni bidi negei amo hä beselala ïmola säi. <sup>29</sup> Amala säsebegi, muni bidi negei amea gumusula dialea fudugila sähalea, Made habobala, beaha namialo. Na di go beselala ïmolömelëla säi. <sup>30</sup> Amala säsebegi gaso, bidi negelo dolö amea beaha namolö made helësëla, elö amea bidi negei amo beselala ïmäia, e galabaia mosöa ifosi. <sup>31</sup> Amala hamosebegi, hamoi hamolasilö odoa nefolalo amolia ea hamose amo bealahilä, ilia edefademalä habobai. Habobalahilä, dilile dafidilo neebä awäla, nelebo sulubadela hamoi amo ema awala säla iaha maadei. <sup>32</sup> Dafidilo amea ïe hamoi hamolasilö amo misialolahilä, ema sähalea, Hamoi hamolasilö nafade di, dia nema fudugila säi amea, dië bidi negei amo na hësa maadeimelë. <sup>33</sup> Nada di bobasëi amo gadola, diada dibalä hamoi gaalu hamolo amomage bobasëmolöi galea madelela säi. <sup>34</sup> Amala sälahilä, dafidilo amea edefade habobalahilä, ïe bidi negei amo hulu beselala iaha maademäia, dolö amo galabaia mosöa sëlasilö dolö amoligali gaala awäla ifosi.

<sup>35</sup> Dili hido hidolaea didooie asiala hamoi amoli iso asigigila made hësedä, nïe Naado selesäia mosöa neebe ameege, dolö dafidiloea hamoi amo gadola wäla, dilima hamomolömelëla säla ï.

## 19

*Dolöea udia nii fisiloie säi*

*(Maga 10.1-12, Ulugu 16.18)*

<sup>1</sup> Yesuea ado amoli säha maadelahlilä, Galili sege digila awäla, ödä Yodona dëgëla alömodi, Yudia segeamadi asi. <sup>2</sup> Awäsebegi, udia dolö yafie e awäsebe amo gadola bëgëla afiai. Amasebegi, ami ea ili neala wahilasisa nelo.

<sup>3</sup> Felesi dolö nefolalo amoli Yesu neebä maalahilä, ilia e fedogola beala sähalea, Galonegige, galone madegige, dolö afädëa ïe udia fisimolö amo dofeale, ma, dofea madelela nabi. <sup>4</sup> Amala nabasebegi, Yesuea säla obëgësälea, Mi gäwila hamosolo amo gala, Hamolo ameadä udiale dolöle hamoila dëdëla negei amo dilia made meli neale. <sup>5</sup> Amase, ea elö sähalea, Amala hamoi ameadä, dolöea ïe eedole emele digila, ïe udiabalä gedola nea, eleda domalo afädëfalä namolömelëla dëdëla negei amoge made meli neale. <sup>6</sup> Amalo amo, ele äudä nelo amo fisila, eleda afädëfalä aligilomelë. Amoië mida, Godea gedola dila afädëfalä namiäia hamoi amo, dolöea hido hidolasimabiola säi. <sup>7</sup> Amala säsebegi, ilia ema nabahalea, Amai galëda, Mosesea sähaleada, Dolö afädëa beba dëdëla ïalahilä, udia nii amo fisila mosalamalola säi amoda, abilia säidula nabi. <sup>8</sup> Amala nabasebegi, ea säla obëgësälea, Dilile iso asigi geloi dibe amoië, Mosesea udia nii fisimolö dialeala säi gabio. Gaso, mi gäwila hamoia amida made fisilomelë. <sup>9</sup> Amoië mida na dilima sähago. Dolö afädëa ïe udia amo dolö elöbalä mala nafade hamosegi made, memalä fisilahilä, udia elö neaseda, ea udia elö amoda fa nimolömelëla säi. <sup>10</sup> Amala säsebegi, ïe bëgëla aulo amolia ema säla obëgësälea, Dolöea udiama mala amo gadola hamomolö galëda, udia nimolöda dofea made gabula säi. <sup>11</sup> Amala säsebegi, Yesuea säla obëgësälea, Ado walio säsebeweda, sulubadela nabala dofea gabula neala gaumolöi made. Iligali helësëlo ï amoliamu dofea gabula neala gaumolöimelë. <sup>12</sup> Dolö odoa mi elö elöla diëda, udia made neala aligilomelë. Odoada, emea neegela

ägüsolo amo gala udia nimolöi made, neegela ägüi. Odoada, dolöea ili iso neadigi. Amase, odoaeada, Hebeni Beaha Maadela Sigi Neebe amomu asigisalea, udia made neala aligilo. Olelesebe amo nabalahlilä, dofea gabula neala gaumolöi galëda, neala gaumalola säi.

*Yesuea malësä e mia misiäiala säi  
(Maga 10.13-16, Ulugu 18.15-17)*

<sup>13</sup> Udia dolö odoa nefolalo amolia, ilile malö Yesuea naaboea diigilahilä, Godema adomäia e neebee sigi maasebegi, ie bëgëla aulo amolia ilima nemoi. <sup>14</sup> Amala nemosebegi gaso, Yesuea sähalea, Dofogamabu. Malësä ne neebee misiäia beasimo. Mida, Hebeni Beaha Maadela Sigi Neebee ami, malësä gowe ili gadoi neebe amolile dialeamelë. <sup>15</sup> Amala sälahilä, malësä amoli naaboea diigilahilä, e sege amo digëla asi.

*Malisä nelegei yafie negeloea Yesuma nabi  
(Maga 10.17-31, Ulugu 18.18-30)*

<sup>16</sup> Segeyo afädëgi, afädëa Yesu neebee maalahlilä ema nabahalea, Säla Olelelo-o, ne namolöi namolö neala gaumolöie, hamoi hedabi abodo gadola hamomolö dialeadula nabi. <sup>17</sup> Amala nabasebegi, Yesuea ema säla obëgësalea, Dia hedabi amoië nema nabi amoda edoië. Afädëmu hedabi nea. Di namolöi namolö dibebe ami nogila digamolöila helësësedä, nilia hamomalai amoli hamosa namialola säi. <sup>18</sup> Amala säsebegi, dolö amea naba obëgësalea, Amoda abodowedula nabi. Amala nabasebegi, Yesuea säla obëgësalea, Baagomäia nufuabio, udia dolö fa nimabio, nelegei fa nimabio, wafäli sämabio, <sup>19</sup> amase, dië diadole diemele hedabola helësëla, elele ado nabala hamomalo, dihidi boba hamolo amo gadola, odoa dibalä nefolalebe amoli boba hamomalola säi. <sup>20</sup> Amala säsebegi, malisä amea sähalea, Amoli sulubadela na hamosa maadei. Nema maade amoda edodula nabi. <sup>21</sup> Amala nabasebegi, Yesuea ema sähalea, Di hedabi mogoifali namolöila asigisada, dië nelegei dibebe amo bidi neaha maademolö mosö. Amalahilä, bidi nease muni amoda, dolö busadäoi nefolalebe amoligali imalo. Amala hamosedä, di Hebeni ami bidi nimolömelë. Amalahilä, ne bëgëla misialola säi. <sup>22</sup> Ado säi amo nabalahlilä, malisä amea asigigi yöia idogolahilä asi. Mida, ie nelegei yafie dilo amogi.

<sup>23</sup> Amala yösebegi, Yesuea ie bëgëla aulo amolima sähalea, Na dilima dofä sähago. Nelegei yafie negelo dafidilo dolö nefolalebe amolida, Hebeni Beaha Maadela Sigi Neebee ami nogila digamolöda, baagi sëi dialeamelë. <sup>24</sup> Na bu elö dilima sähago. Sugua gameleda nusi galabagi doadigila moholöda, baagi sëi holöfali made. Gaso, nelegei yafie negelo dafidilo dolö nefolalebe amoli, Godea Beaha Maadela Sigi Neebee ami nogila digamolöda, baagi sëi baagila asi dialeamelëla säi. <sup>25</sup> Amala säi amo nabalahlilä, bëgëla aulo amoli edefadamalä fudugila sähalea, Amai damula auloda nowëa gaula namolödula säi. <sup>26</sup> Yesuea ilima sillamu nea sähalea, Udia dolöea gowe hamomolöi made. Gaso, Godeada sulubadela hamomolöimu neamelëla säi.

<sup>27</sup> Amala säsebegi, Fidaea ema naba obëgësalea, Amai, niliada nilile nelegei sulubadela fisila, di bëgëla misi amo, nilileda edo dialeadula nabi. <sup>28</sup> Yesuea ilima sähalea, Na dilima dofä sähago. Namolö gähëgi aligisolo amo gala, Dolöie Malö amo ie sigi aligiloie filo hedabi hido elöidaia seëgida, ne bëgëla mulo dilige sigi aligiloie filo giwilasidaia salea, Isilale sosogo giwilasi amoli sigi aligimolömelë. <sup>29</sup> Amase, sulubadela nibe ëi helësëla, ilile mosöge, edooge, elefige, eedoge, emege, malöge, segege, fisila digëla misi amoliada, digëla misi amo gadola hädali afädë nealahilä, namolöi namolöge nimolömelëla säi. <sup>30</sup> Yafie dafidila nefolalebe amolida neala hobeahalea, hobeala nefolalebe amolida neala dafidimolömelëla säi.

## 20

*Dolöea gelebi sagai dibebe ami hamoi hamoië ado besula säi*

<sup>1</sup> Yesuea ado aso, sähamu neamu sähalea, Hebeni Beaha Maadela Sigi Neebee amida gowe gadoi dialea. Segeyo afädëgi yosefali sagai eedo afädëa, dolö odoaea ie i gägä negelo gelebi ëfë sagai ami bidi nimolöie hamoi hamolasimäia hogola asi. <sup>2</sup> Amala nea, dolö odoabalä ado afädë negela sähalea, Segeyo waliöie bidida, muni giwi siliba afädë afädëla sogodeläla sälahilä, ie gelebi sagaia ami afiamaloi.\* <sup>3</sup> Amaimo, eso neëla udigise amo gaalu, magaia gaamugi awäla beahaleamelebe, dolö odoa memalä nefolalebe meli. <sup>4</sup> Bealahilä, ea ilima sähalea, Na muni bidi mogola idulä, dilige gelebi sagaia ami afiamaloi. <sup>5</sup> Amo nabalahlilä, ilige afiai.

Amase, eso mogogige, eso bëgisebegige, ea bu elö amo gadola wäla hamoi. <sup>6</sup> Hä, deadise amo gaalu bu awähamelebe, dolö odoa, aso, memalämu nefolalebe meli. Bealahilä ea

\* **20:2**: Muni giwi silibala säi amoda dolö afädëa segeyo afädëgi hamoi hamola muni bidi nelo amo gadoi. Giligi adoeada denaliusala sälo.

ilima nabahalea, Segeyo sedade amoda memalä aligila waeseigoda mi edoiela nabi. <sup>7</sup> Amala nabasebegi, ilia säla obëgësalea, Afädëa nilima hamoi hamomolö made säsebegi nefolaleawela säi. Amala säla obëgësebegi, ea ilima sähalea, Dilige gelebi sagaia ami afiamalola säi.

<sup>8</sup> Hä, deadi së gämölö amo gaalu, sagai eedo amea ie hamoi sigi aligilo amoma sähalea, Hamoi hamosa nefolalo amoli mofiamalolahilä, deadi maala hamoi amolidade bidi äa nedala, yose maala hamoi amoli äala wagamalola säi. <sup>9</sup> Dolö odoa deadifali misi amoli maala, ilia muni giwi siliba afädë afädëla nii. <sup>10</sup> Amala neasebegi, dafidi awäla hamolo amolia maala helësësaleada, muni baagila awäla nimolö gabula helësëi. Gaso, iliage muni giwi siliba afädë afädëla nii. <sup>11</sup> Muni amo neala gaula awälahlilä, ilia sagai eedo amoma habobala <sup>12</sup> sähalea, Dolö hobeadeadifali misi amolia aoa afädëmu hamoi hamolo amolige, dia nilibalä dafidi misi gadoi hamola, muni afädëdila sogosio. Niläda yosefali awäla hamosa nea, eso nea hëgësebe amoma bibisa hamosa nelola säha dilo. <sup>13</sup> Amala säha dibegi, sagai eedo amea iligi dolö afädëma sähalea, Nedoo, na dima asiala made hamoi. Dia muni giwi siliba afädë afädëla nimolöie nebalä ado afädë negei madele. <sup>14</sup> Di hä, ägo gaula mosalo. Dolö gowe hobeafali misi amoma, digali i amo gadola imolö hamesamelë. <sup>15</sup> Nihile munia nihï hamese amo gadola hamomolö dialea madele. Ma, na mala hedabi hamosa nebegi, dia mudiahalela säi.

<sup>16</sup> Amo gadola sälahilä, Yesuea säla wagala sähalea, Hobeala nefolalebe amolida neala dafidisalea, dafidila nefolalebe amolida neala hobeamolömelëla säla i.

*Yesuea e baagola nowemolömelëla bu elö säi*  
(Maga 10.32-34, Ulugu 18.31-34)

<sup>17</sup> Yesu e Yalusaleme moholöie afiahalea, ea hëgëla aulo giwilasi amolima hildomuu aliga gala nea sähalea, <sup>18</sup> Nabahale. Nilä Yalusaleme afiahamelë. Ami neëgi, Dolöie Malö amo gobela ilo busa nefolalebe amolimage, mala dawadigi nefolalebe amolimage gaula imolömelë. Amala gaula äasegi, ilia e baagomäia nufualola sämolömelë. <sup>19</sup> Amala hamolahilä, fii odoaea e gadiabola, ëfë damuia fëgälahlilä, e baagomäia i fügäigi baala negemäiaie, ilia iligali gaula imolömelë. Amala hamoseda, segeyo äudä nelolahilä, osodagi e nowemolömelëla säi.

*Dafidilo namolöie nabi*  
(Maga 10.35-45)

<sup>20</sup> Sebediie malö äudä amolele emela ie malölali, Yesu neebee maalahlilä, udia amea emo gumu sasagala salea, ema afädë ëdëgëi. <sup>21</sup> Amalebe, Yesuea ema nabahalea, Dia edo hamesala nabi. Udia amea säla obëgësalea, Die Beaha Maadela Sigi Neebee amida, nie malö äudä, elöda die naabo dafädimadi, elöda die naabo fefeädimadila samiäiala sämola säi. <sup>22</sup> Amala säsebegi, Yesuea sähalea, Dilia nabasegoda dawa made nea, fuduia säsebe. Na ödä iigi usi molö neebewe gadola, alia molöi gabulela nabi. Amala nabasebegi, elea ema säla obëgësalea, Äliäda molöi neawela säi. <sup>23</sup> Molöila säsebegi, ea elema sähalea, Äliäda nie ödä iigi usi dibe amo dofä molömelë. Gaso, ali elöda nie naabo dafädimadi, elöda nie naabo fefeädimadila samiäiala sämolöda, nie made. Naadoea gowe samiäiala daiäi amea sämolömelëla säi.

<sup>24</sup> Amo säi amogi, hëgëla aulo nabülasi amolia nabalahlilä, elema habobai. <sup>25</sup> Habobasebegi, Yesuea ili mofiamolahilä sähalea, Fii odoa beaha aligilo neebe amoliada, udia dolö gelola beaha aligilo nea, amase, ilile ëi sälo neebe amoliada, udia dolö bobasëla made, gelola sigi aligilo amoda dilia dawa. <sup>26</sup> Iliä hamolo amo gadola, dilia made hamomolö. Dili neebe gogi afädëa ëi sälo namolöila helësësedä, ea dilile hamoi ugila negelasila hamolasilo namolömelë. <sup>27</sup> Amase, afädëa dafidilo namolöla helësësedä, eda dilile memalä galabaia hamoi gadoi hamolasilo namolömelë. <sup>28</sup> Amo gadola, Dolöie Malöda udia dolöea ie hamoi hamolasimäia made misi. Ea ilile hamoi hamolasimäiage, ie namolö amo udia dolö yafegali fisiga gala, ili sigi obëgëmolöge misimelëla säi.

*Yesuea dolö si golai äudä wahilasi*  
(Maga 10.46-52, Ulugu 18.35-43)

<sup>29</sup> Ili Yaligola äudulä afiasebegi, udia dolö yafie ili hëgëla afiai. <sup>30</sup> Afiahalea beahamelebe, dolö si golai äudä idi agesua ami sebe meli. Elea Yesu baagila awäsebelä säi amo nabalahlilä, uuala sähalea, Dafidilo-o, Debediie malö-o, ali bobasëmola säha sulo. <sup>31</sup> Elea amala uuasebegi, udia dolö gegedoi amolia elema nemola sähalea, Adomabu. Gameläla säla nemoi. Nemosebegi gaso, elea gelola uuahalea, Dafidilo-o, Debediie malö-o, ali bobasëmola säha sulo. <sup>32</sup> Amala säsebegi, Yesu e maala beaha nea, ele welahlilä sähalea, Na alima edo hamomäia helësësebelä nabi. <sup>33</sup> Amala nabasebegi, elea ema sähalea, Dafidilo-o, dia äliie

si fisigälasimäiamelëla säi. <sup>34</sup> Amala säsebegi, Yesuea ele bobasëla, elele sihidoa diigi. Diigi amole fodolofali si fisigäla fädäla bealahilä, ele Yesu bégëla asi.

## 21

*Yesu e beaha aligilo gini gadoi hamola Yalusaleme asi*

*(Maga 11.1-11, Ulugu 19.28-40, Yone 12.12-19)*

<sup>1</sup> Ili Yalusaleme besela galamolö ga madela, Olibebi neebee ami sege Bedefagi besela galamolöie yauabia nea, Yesuea bégëla aulo äudä dafidi mosalolahilä <sup>2</sup> elema sähalea, Gaamugi ami awäla besela galala beahamelële, sugua dögi aseme, ie malö daiadigile begela negei neë aabela bimolömelë. Beaseda, fisigäla ne neebeeami sigi misialo. <sup>3</sup> Afädëa alima ado afädë säседа, gomalä sämalö. Dafidiloea welebalä hamomolö galeamelëla sämalö. Amala säседа, ea fodolo sähalea, Hä sigi mosöla sämolömelëla säi. <sup>4</sup> Dafidi Dafidilo Geloia bea säloma aligila bea säla negei amo gadola gausiala digamäia amala hamoi. Säla negei amoda gowe.

<sup>5</sup> Saionoie idiwima sähalea, Bimo.\* Die beaha aligilo gini amoda di neebee maasebe. Hi e nagadaiala aligilo nea, sugua dögidaia fila maasebe. Sugua dögi üdilidaia fila maasebegola sämalola

säla dëdëla negei dialea. <sup>6</sup> Amala säsebegi, ie bégëla aulo amole awäla, Yesuea hamomalola säi amo gadola hamoi. <sup>7</sup> Elea sugua dögi aseme üdilile sigi maasebegi, elea sugua dögi amoledaia elele fagulo daia salugalo gila fösisebegi, Yesu e amoledaia fila fedai. <sup>8</sup> Amala fedala fise amo gaalu, udia dolö yafie gegedoi amolia ilile daia salugalo fagulo neala idiafa föla digi, odoaea fasela bäu gadoi dagabola gaula mafula föla digisa nelo. <sup>9</sup> Udia dolö gegedoi amoli Yesu awäse amo gadola dafidila awäha nelo amoliage, hobeala maaha nelo amoliage, uuala säsäla awähalea,

Agua. Nesege. Godeie ëi gauia adadi.

Debidüie malöma sähago. Afädë Dafidilo Geloie ëigila maahago Godea e neala obeägälasimäia. Hosana. E ilibia neebee amoie ëi gauia adahala

säsäla afiai. *Gë Udälö 118.25,26* <sup>10</sup> Yesu e Yalusaleme awäla besela galasebegi, udia dolö ami nefolalo amoli sulubadela fudugila bedälahlilä sähalea, Dolö goweda nowëdula säha dilo. <sup>11</sup> Amala säha dibegi, udia dolö gegedoi amolia sähalea, Goda bea sälo Yesu. Eda Galili segeie gaamu Nasalese dolömelëla säha dilo.

*Yesuea Godeie mosöa awäla hamoi*

*(Maga 11.15-19, Ulugu 19.45-48, Yone 2.13-22)*

<sup>12</sup> Yesu e awäla Godeie mosö yala isogi nogila digalahilä beahamelebe, bidi neadigi, bidi nimolöie negela digisa dibe amoli sulubadela nesila digisa nelo. Muni bedefalo auli amolige, amase, haea maliabu gadoi bidi neaha aligilo amolile filo auli amolige, neala besula besigadasi.\* <sup>13</sup> Ea ilima sähalea, Ado säla dëdëla negei dibe amea sähaleada, Nïe mosö amoda Godema adolo mosö dialeala sämolömelëla säla dëdëla negei dialea gaso, dilia fa nelo musügä aligilo igi äbä gadoi hamosebela säi.

<sup>14</sup> Amala säsebegi, e Godeie mosö neebee ami, si golaige emo nafadeige mofiassebegi, ea ili wahila didigisa nelo. <sup>15</sup> Gobela ilo busa nefolalo amoliage, mala dawadigi nefolalo amoliage, Yesuea hedabifali hamose amo bealahiläge, amase, malësä nefolalo amolia Godeie mosöamadila dägö digala sähalea, Agua. Nesege. Godeie ëi gauia adadi. Debidüie malöma sähagola säsebe amo nabalahiläge, ilia habobai. <sup>16</sup> Habobalahilä, ilia Yesuma nabahalea, Iliä säsebegoda dia nabasebelela nabi. Amala nabasebegi, Yesuea ilima säla obëgësalea, Ä. Ado afädë säla dëdëla negei dibe amoda gomalä.

Malësä nelësa amolige, malö dodo naha sefolalebe amolige, ilile nafiala dia die ëi gauia adamäia hedabolafali oleleimelëla

säla dëdëla negei dialea. Dilia ado säla dëdëla negei dibe amo made meli nealela nabi.

<sup>17</sup> Amala nabalahilä, Yesuea ili dögila gaamugi amila Bedani midilö asi.

*Yesuea äfäeoma nemosebegi bausoi*

*(Maga 11.12-14,20-24)*

<sup>18</sup> Diala yosefali nowela, gaamugi obëgësalea e sidëa baagoi. <sup>19</sup> Amala awähalea beahamelebe, idi agesugi ami äfäeo afädë neebee beala e i mia ami bea awähamelebe, gägä afädë maade, bäu badumu neebee meli. Gägä maade beala, ea äfäeo amoma sähalea, Dia gägä hobeala dofä made negemäiala säi. Amala säi amole, fodolofali bausoi. <sup>20</sup> Bausosebegi, ie bégëla aulo amolia bealahilä fudugila nabahalea, Äfäeo amo fodolofali bausoi amoda

\* **21:5:** Saionoie idiwila säi amoda, Yalusaleme udia dolöla helësëmäia säi. \* **21:12:** Dolö odoaea Godeie mosöie yala isogi nelebo nea digahaleada, Godeie mosöa muni negei ameamu nelo. Iliada Olomolele Giligile muniada nelo made. Dolö amolia haea neasebe amolige, amase, nelebo odoa neasebe amolige, nelebo amoli Godegali odala ilo.



abeahäladula nabi. <sup>21</sup> Amala nabasebegi, Yesuea ilima säla obëgësalea, Na dilima dofä sähago. Asigi äudä negela made, asigi afädë negela aligiseda, äfäeoma na walio hamoi amo gadola, diliage hamomolömelë. Amoda afädë amomu made, dilia segebima dihi dagabola awäla, ödä duhuluma digamola säse, amala hamomolömelë. <sup>22</sup> Dilia Godema adosalea, asigi afädë negela, nelebo afädë imola ëdëgëseda, amo dilia nimolömelëla säi.

*Yesu dia hamosebegi nowëa hamomalai hamosala nabi*

*(Maga 11.27-33, Ulugu 20.1-8)*

<sup>23</sup> Yesuea Godeie mosöamadi awäla, ado mala säla olelesa nebegi, gobela ilo busa nefolalo amoliage, udia dolöie dafidilo asigi gäwi nefolalo amoliage, e neebëa maalahilä ema nabahalea, Dia nelebo hamosebegi, nowëa hamomalai hamosa. Nilia nabeldelä, dia säla imo. Go hamomäia, geloi go nowëa iasiola nabi. <sup>24</sup> Amala nabasebegi, Yesuea ilima säla obëgësalea, Nage dilima ado afädë nabaha. Dilia säla obëgëseda, nelebo na hamosebeweda, gowea hamomalai hamosa neala sämolömelë. <sup>25</sup> Yonea ödägi gesa nelo amoda abidila misi. Selesaia mosöala misile na dolömadila misilela nabi. Amala nabasebegi, hilido didiähalea, Nilia selesaia mosöalala säse, ea nilima nabahalea, Amai galëda, ema asigi afädë made negei goda edoiëla nabolö gabu. <sup>26</sup> Gasoda, nilia dolömadilala säse, nili udia dolöbalä bedäsebe. Mida, ili sulubadela helësésalea, Yoneda bea sälo nelola helësësa nefolaleala didiäi. <sup>27</sup> Amala didiälahlilä, ilia Yesuma säla obëgësalea, Nilia dawa madela säla obëgëi. Dawa madela säla obëgësebegi, ea ilima sähalea, Amai galëda, nage nelebo na hamosebeweda gowea hamomalai hamosa neala dilima made säla imolömelëla säi.

*Ado besula malö äudäea hamoila säi*

<sup>28</sup> Yesuea sähalea, Dilia edo helësësebe. Dolö afädë nelo amoië malö äudä sulo. Dolö amea ie malö abulümi amoma sähalea, Dia walio awäla gelebi sagai hamoi hamosa namialola säimelë. <sup>29</sup> Amala säsebegi, malö amea ie eedoma haboila sälahilä gaso, hobeala oböla asigi hedabi negela, hamola asi. <sup>30</sup> Amasebegi, dolö amea ie malö elö amo neebëa ami awälahilä, elö amoma säi amo gadola wäla säi. Sälebe malö elö amea säla obëgësalea, Naado, hamola awähadiola sälahilä gaso, made awäla fisi. <sup>31</sup> Amai, dolö amea hamomalo amo gadola, malö abodoea nabala hamoila nabi. Amala nabasebegi, ilia säla obëgësalea, Abulümiäla säi. Amala säla obëgësebegi, Yesuea ilima säla obëgësalea, Na dilima dofä sähago. Dagisi muni nelo nefolalebe amoliage, idigi nawela susugu hamolo udia nefolalebe amoliage, dilida digäla, ilidale dafidila Godea Beaha Maadela Sigi Neebëa ami afiahagomelëla säi. <sup>32</sup> Amoië mida, Yone e dili neebëa maalahilä, ea idi mogoifali amo olesebegi gaso, dilia dofä gabula helësëla made nelomelë. Dagisi muni nelo amoliage, idigi nawela susugu hamolo udia amoliage, ea ado mala säsebe amo nabalahlilä, ea säse amo dofä gabula helësëimelë. Ila amala helësësebe amo, dilia meli gaso, bealahilä dilia asigi besula, dofä gabula helësëla made nelomelëla säi.

*Ado besula sagai oodola beaha namialola säi*

*(Maga 2.1-12, Ulugu 20.9-19)*

<sup>33</sup> Yesuea sähalea, Ado besula elö säsebewege nabualo. Sege eedo dolö afädëa sagai sagala, yalala amalela dila digimelë. Dila digilahilä, isogi ami gelebi gägä emesala fësëla salimolöie naga dögöi. Amala dögöla negesilahilä, sagai idihë nea beaha aligilo mosö holöbö ilibia ola fedalahilä negesi.\* Amala hamolahilä, ea dolö odoama sähalea, Sagai oodola beaha namialola säsilahlilä, hi e sege wagadi made asimelë. <sup>34</sup> Gelebi gägä hä, faimolö segeyo ga madesebegi, sagai eedo amea ie hamoi hamolasilo amoli mosalolahilä, sagai oodola beaha aligilo amolima ie gägä odoa nimaloi. <sup>35</sup> Amala nimolö awäsebegi, sagai oodola beaha aligilo amolia hamoi hamolasilo amoli gaulahlilä, elö amo nufudala ialalei, elö amo nufudala baagoi, amase, elö amo igia nufi. <sup>36</sup> Amala hamosebegi, sagai eedo amea ie hamoi hamolasilo odo, dafidi fisiga gai amoli holöbö gidogolahilä, fisiga galebege sagai oodola beaha aligilo amolia dafidi hamoi amo gadola wäla ilimage hamoiemelë. <sup>37</sup> Hobeafali, sagai eedo amea hile malö amo fisiga gai. Eedo amea helësëlahilä sähalea, Nie malö wema ilia e hawala mogola hamomolöla helësësala säi. <sup>38</sup> Hile malöfali maase amo bealahilä, sagai oodola beaha aligilo amolia hilido didiähalea, Goda sagai eedo amoië malöfali gabugo. Eedoie nalä negei nilia nimolöie, e nufidedila didiäi. <sup>39</sup> Ila e gaulahlilä, sagai amoië yala baagido sadia gala nufudala baagoimelë.

<sup>40</sup> Amala hamoi amo, sagai eedo amea maalahilä, sagai oodola beaha aligilo amolimada, edo hamomolö gabula nabi. <sup>41</sup> Amala nabasebegi, ilia ema säla obëgësalea, Ea dolö nafade amoli neala nafadela nufudadigimolömelë. Amalahilä, gägä faimolö fu besela galasolo

\* **21:33:** Godea ie Isilale udia dolöma hamosebe amoië, gelebi sagaila säla ado besula Aisaea 5.1-2gi säi dibe amo nealahilä Yesuea säla i. Ado besui amoië mida gomälämelë. Dolö sagai sagalola säi amo gadoida, Gode hi emelë. Amase, gelebi sagai amo gadoida Isilale udia dolömelëla säi.

amo gala, faila mogelo dolô amolia oodola beaha namiäia, sagai amo ilima ïmolömelëla säi. <sup>42</sup>Amala säsebegi, Yesuea ilima sähalea, Dilia ado säla dëdëla negei amoda made meli neale. Mosö olelo amolia igi galone hamomolöi made gabula memelela fisi amoda, galone geloi dafidilo dialeamelë. Dafidilo Geloia hamogilebeda, nilia siia bealahilä fudugisa neala

säla dëdëla negei dialea.

*Gë Udälo 118.22-23*

<sup>43</sup>Amoie na dilima sähago. Godea Beaha Maadela Sigi Neebe amo dili neebee guila neala gaula awälahilä, udia dolöea amoie gägä negelo amolima ïmolömelë. <sup>44</sup>Igi amodaia udia dolô digase amolida, igi amea dusudasila fisimolömelë. Amase, igi amea udia dolô eegeseda, hä eegela fisimolöi fisimolömelëla säi.\*

<sup>45</sup>Amo sälebe, gobela ïlo busa nefolalo amoliage, Felesi dolô nefolalo amoliage, ea ado besula säsebe amo nabalahilä, amoda ilile säsebela helësëi. <sup>46</sup>Ilia Yesu gaudeläla idi hogoi gaso, udia dolô nefolalebe amolia Yesuda bea sälo neala säha dibe amogi bedäi.

## 22

*Ado besula udia neahalea molö giala daiala negeila säi*

*(Uluu 14.15-24)*

<sup>1</sup>Yesuea ado besula ilima bu elö sähalea, <sup>2</sup>Hebeni Beaha Maadela Sigi Neebea amida gowe gadoi dialea. Beaha aligilo gini afädëa ïe malö udia neasebegi, molö giala daiala negei. <sup>3</sup>Daiala negesa maadelahilä, ea ïe hamoi hamolasilo amolima sähalea, Udia dolô giwi säi amoli walio misiäia bea mosalo. Bea asi gaso, giwi säi amoli moholö haboi. <sup>4</sup>Habosebegi, ea hamoi hamolasilo odoama mosalolahilä sähalea, Na giwi säi amolima gomalä sämalö. Molö molö daiala negei dialea. Nie sugua gao gawalige, üdili odoa säfei hedabige giala dagabodasila negela, nelebo sulubadela daiala negei dialea. Udia neaseweie molö molö misiäiala sämalola säi. <sup>5</sup>Amala säla awäsebegi, giwi säi amolia auaulahilä afiai. Dolô afädëda, hile sagaia asi. Amase, elöda hile sidua mosöa asi. <sup>6</sup>Odoa made asi amoliada ïe hamoi hamolasilo amoli gaulahilä, nafadela nufudala baagoi. <sup>7</sup>Amala hamosebegi, beaha aligilo gini amea mihalälahilä, ïe ami dolô amoli mosalolahilä, ilia nufidelo dolô amoli nufudala baagosa maadela, ilile mosö gobesa maadei.

<sup>8</sup>Amala mosalolahilä, ea ïe hamoi hamolasilo amolima sähalea, Molö giala daiala negesi dialea gaso, na giwi säi amolida dofea made gabu. <sup>9</sup>Idi osogoloa ami awälahilä, udia dolô gausiasebe amolima, udia neaseweie molö molö misiäiala sämalö mosalola säi. <sup>10</sup>Amala säsebe amo nabala, hamoi hamolasilo amolia idigi awäla, udia dolô gausiai amoli sulubadela neala gegedosebegi, nafadege hedabige maala, molö molöie mosö amo nobai.

<sup>11</sup>Udia dolô mofiaha maadesebegi, beaha aligilo gini amea mofiai sefolalebe amoli bimolöie digalahilä beahamelebe, dolô afädë udia neahalea fagulo gälo amo made gäi misi sebe meli. <sup>12</sup>Amo bealahilä ea nabahalea, Nedoo, udia neahalea fagulo gälo amo made gäi goda, abilia misi saleala nabi. Amala nabasebegi, dolô amea ado säla obëgëla made sulo. <sup>13</sup>Ado säla made obëgësebegi, beaha aligilo gini amea ïe hamoi hamolasilo amolima sähalea, ïe naabo emole helegela nafodolahilä, gasimi sagai dibeami sadia idogomo. Amida, ili diisalea bese ali nalëgësa namolömelëla säi.

<sup>14</sup>Yafie wei gaso, afädë afädëla memelei gabiola säi.

*Dagisi muni negemolö gabule, ma made negemolö gabulela nabi*

*(Maga 12.13-17, Uluu 20.20-26)*

<sup>15</sup>Felesi dolô nefolalo amoli awälahilä, ado afädë negemolöie didiähalea, Yesuea ado säsebe amoie abilia säla oodomolödu didiäha dilo. <sup>16</sup>Amala didiälahilä, ilia ilile bëgëla aulo nefolalo amolige, Heledoie sosogo nefolalo amolige, Yesu neebee mosalosebegi, ilia ema sähalea, Säla Olelelo-o, nilia helësësaleada, dia ado dofämu sälo. Amase, dia Godeie mala säla olelese goda, mogolafälä säla olelesa. Dia dolô odoabalä made bedälo ameeda, dia mogoi mu olelelola helësësamelë. <sup>17</sup>Amalo gabugi, dia helësësebe amo nilima säla ïmäia. Beaha aligilo Gini Sisa neebe amomada, dagisi muni ïmolö dialeale ma maadelela nabi. <sup>18</sup>Amala nabasebegi, Yesuea ilile asigi nafade amo helësëlahilä, ea ilima sähalea, Asigi fea negelola dilia, edoie ne fedogola beaha. <sup>19</sup>Muni dagisi negelo giwi gogi nema olemola säsebegi, ilia giwi afädë ema ï. <sup>20</sup>Ïasebegi, ea ilima nabahalea, Muni giwi egowegi dolô busa dibe gowege, ëi dëdëi dibe gowege, nowëie gabula nabi. <sup>21</sup>Amalebe ilia sähalea, Sisaiela säi. Amala säsebegi, Yesuea ilima sähalea, Nelebo Sisaieda Sisa hïma ïmalö. Godeieda Gode hïma ïmalola säi. <sup>22</sup>Amala säi amo nabala ili fudugilahilä, e digëla bahïla asi.

\* **21:44:** Dawadigi dolô odoaea helësësaleada, damo gogi dëdëi goda Madiu hï made dëdëi gasoda, dolô elöea hobeaala dëdëi gabula helësëi. Uluu 20.18 bimalo.

*Sadiusi dolô amolia Yesuma baagoi nowelo amoie nabi**(Maga 12.18-27, Ulugu 20.27-40)*

<sup>23</sup> Segeyo amo galamu, Sadiusi dolô nefolalo amolia Yesuma afädë nabolöie e neebëa misi. Sadiusi ilia udia dolô baagoi amoli made nowemolöla sälo. <sup>24</sup> Iliä nabahalea, Säla Olelelo-o, Mosesea sähaleada, Dolô baagoi amea malô made sogobala baagoi galëda, baagoi amoie edoea udia didalo amo bedefala nealahilä, edoo baagoi amoie malô sogobamolô dialeala säla dëdëla negei dialea. <sup>25</sup> Amaimo, niligi edoolali gifalädälia nefolalo amoli, abulümi amea udia nii amo malô made sogobala baagosebegi, ëoea udia amo nii. <sup>26</sup> Neala nea, edoo agedu amoge amo gadola wäla hamosebegi, edoo osoda amoge baagolebe, sosogo gifalädälia amoli sulubadela baagola mimisa maadei. <sup>27</sup> Amala baagosa maadeibua, udia amo hobealafali baagola wagai. <sup>28</sup> Amo gadola hamoi amo, ili sulubadela udia afädë amomu neala nelo. Amai, hobeä baagoi nowesolo amo gala, malô gifalädälia amoligi udia amoda abodoweie udia samolödula nabi. <sup>29</sup> Amala nabasebegi, Yesuea ilima säla obëgësälea, Ado säla dëdëla negei dibe amoge, Godeie geloi dibe amoge made dawadigi neebë goada, dilia asiala helësëla säsebego. <sup>30</sup> Amoieda, udia dolô baagoi amoli nowela galaseda, udia made nimolöge, dolô made fimolöge. Selesaia fii ili selesaia mosöa nefolalebe amoli gadoi namolömelë. <sup>31</sup> Amalo amo, baagoi amoli neala nowelasimolô amoieda, Godea dilima ado säla dëdëla negei dibe amoda, aso, nidela made neale. <sup>32</sup> Ea sähalea, Neda Abalahama, Aisaga, Yeigabala ilile Gode neawela säla dëdëla negei dialea. Gode eda baagoi amolile Gode made, eda nefolalebe amolile Gode neamelëla säi.

<sup>33</sup> Amala säsebegi, udia dolô gegedoi nefolalo amolia nabalahlilä, ea säla olelesebe amogi asigigi fudugisa nefolalo.

*Godea nilia hamomalai dibe amogi, edefadeda abododula nabi**(Maga 12.28-34, Ulugu 10.25-28)*

<sup>34</sup> Yesuea ado säi amea, Sadiusi ilia säla obëgëmolöi made nefolaleamelëla säi amo nabala, Felesi dolô nefolalo amoli gegedolahilä, <sup>35</sup> ili sosogo amoligi dolô afädë mala säla negei amo olelelo amea, Yesu fedogola bimolöie ema ado afädë nabi. <sup>36</sup> Dolô amea nabahalea, Säla Olelelo-o, Ado säla negei amogi, nilia hamomalai dibe edefadeda abododula nabi. <sup>37</sup> Amala nabasebegi, Yesuea ema säla obëgësälea, Dafidilo Geloï die Gode neebë amo die bobaeage, gesamiage, asigiage, boba hamomalo. <sup>38</sup> Nilia hamomalai dibe amoligi, edefadeda amomelë. Amoda dafidilomelë. <sup>39</sup> Amase, agedu gowege amo gadoimelë. Dihidi boba hamolo amo gadola, odoa dibalä nefolalebe amolige boba hamomalo. <sup>40</sup> Mosesea Ado sulubadela säla negei dibe amoge, bea sälo nefolalo amolia bea säla negei dibe amoge, nilia hamomalai ado äudä amolegimu begedidigila gosai dialeamelëla säi.

*Afädë Memelei moholömelëla säla negei amoie nabi**(Maga 12.35-37, Ulugu 20.41-44)*

<sup>41</sup> Felesi dolô amoli gegedoi nefolalebegi, Yesuea ilima nabahalea, <sup>42</sup> Afädë Memelei amoieda, dilia abilia helësësa. Eda nowëie malô neala nabi. Amala nabasebegi, ilia säla obëgësälea, Debidiie malöla säi. <sup>43</sup> Amala säla obëgësebegi, ea ilima nabahalea, Amai galëda, Godeie Gesamia Debidima adolasisëbegi, Debidia ema Dafidilo Geloila säi amoda abiliadu. Debidiada gomalä säimelë.

<sup>44</sup> Dafidilo Geloia nie Dafidilo Geloima sähalea, Die ado nii nefolalebe amoli die emoea daiasamäia, na neala ifosidelä, dida nie naabo dafädimadi beaha samialola säi. <sup>45</sup> Debidia hi ema Dafidilo Geloila säi galëda, eda Debidiie malöda abeahäladula nabi. <sup>46</sup> Amala nabasebegi, afädëa ema ado säla obëgëmolöi made meli. Amasebegi, segeyo amila nofela, ili bedähalea, afädëa ema ado bu made nabelo.

**23***Felesi dolöle mala dawadigi dolölele mala**(Maga 12.38-39, Ulugu 11.43, 11.46, 20.45-46)*

<sup>1</sup> Hobeala, Yesuea udia dolô gegedoi amolimage, ie bëgëla aulo amolimage <sup>2</sup> sähalea, Mala dawadigi dolô amolige, Felesi dolô amolige Moseseie filodaia saleamelë.\* <sup>3</sup> Amai gabugi, ilia dilima ado sulubadela säse amoda, dilia nabala bëgëla hamomolöi. Gaso, mala ilia hamose amo gadolada, dilia made hamomalo. Mida, ilia made hamosalea, adoeamu sälo gabugi. <sup>4</sup> Iliä nelebo yöi neegila häuala gaulo amo, dolöie gidädaia negesilo amogida, hilida naaboea didigila yöi amoli gaumulöla made helësëlomelë. <sup>5</sup> Nelebo sulubadela ilia hamose amoda, dolöea bimäiala hamolo. Iliada nelebo salelo amogi ado damui dëdëla salalahilä, odagiage baala, amase, naabogige gälo gaso, ilia salelo amoli edefade bobogalamu gälo

\* **23:2:** Moseseie filodaia saleamelëla säi amoda, Ado säla negei amo Mosesea udia dolöma olelesa nelo amo gadola, mala dawadigi dolô amoliage, Felesi dolô amoliage amo gadola säla olelesa nefolalo amoie säi.

nefolalo. Amase, iliada efë gadoi fagulo sedade gäi amoie bidigi begedidigilo gaso, ilia efë sedadeamu begedidigilo nefolalo.\* <sup>6</sup> Iliada molö nasebea amige, gedolo mosöa amige, dafidilo filo dibeami fimolömu hamelo. <sup>7</sup> Amase, iliada magai gaamugi, udia dolöea ilima, di go gabiola sämäiage, säla olelelola sämäiage hamelo.

<sup>8</sup> Amalo gaso, dolöea dilima säla olelelola sämolöi mademelë. Mida, afädë emu dilile säla olelelo nea. Dili sulubadela didoo didoolali neamelë. <sup>9</sup> Amase, nagadaiawi neada, dolö afädëma dilile diadolada sämbamo. Mida, afädë emu dilile diado nea. Amoda selesaia mosöa neamelë. <sup>10</sup> Dilima dafidilola sämolöi mademelë. Mida, dilile Dafidilo afädë nea. Amoda Afädë Memelei amomelë. <sup>11</sup> Dilile busa edefade neebe amolida, dilile hamoi ugila negela hamolasilo namolömelë. <sup>12</sup> Afädëa hi e ilibialo amoda, neala nagadaialasisalea, amase, afädë hi e nagadaialo amoda, ilibialasimolömelëla säi.

*Yesuea mala dawadigi dolömage, Felesi dolömage mala nafade ilia hamosebe amoie säi (Maga 12.40, Ulugu 11.39-52, 20.47)*

<sup>13-14</sup> Yesuea ado aso, sähamu neamu sähalea, Asigi fea negelo, mala dawadigi dolöla, Felesi dolöla dili, asigii gabu. Mida, dilia Hebeni Beaha Maadela Sigi Neebea ami udia dolöie odagia gala didigilo. Dihili dilida made nogila digahalea, dilia udia dolö nogila digadelä hamose amolile idi gala didigilomelë.\*

<sup>15</sup> Asigi fea negelo, mala dawadigi dolöla, Felesi dolöla dili, asigii gabu. Dolö afädëamu dili bégëla aulo namiäiaie, dilida duhulu dibeamadige, sege fõi dibeamadige nawesa aligilo. Amaimo, e hä bégëla aulo aligiseda, e heli segeie malö dili gadoi hamolasilo. Gasoda, ie mala nafadea dili baagila aulomelë.

<sup>16</sup> Dihili dili si golai nea, dolö odoa nefolalebe amoli idi olelo nebego. Dili asigii gabu. Mida, dilia sähalea, Afädëa gobela ilo mosöla säla, migalia diigila ado gelola säla negeseda, amoda memalä melëlo. Gaso, afädëa gobela ilo mosöa golola säla, migalia diigila ado gelola säla negeseda, amoda ea säi amo gadola hamomolö dialeala sälo. <sup>17</sup> Dilida asigi maade, si golai gabu. Godeie siigi hedabifalida abodo. Golo amo hedabi gabule, ma gobela ilo mosö amo hedabi gabule. Diliada dawa, goloda gobela ilo mosöa dibe amoie, Godeie nafolala hamolo. <sup>18</sup> Amase, dilia elö sähalea, Afädëa gobela ilo aulila säla, migalia diigila ado gelola säla negeseda, amoge memalä melëlo. Gaso, afädëa auli amodaia nelebo odala i amola säla, migalia diigila ado gelola säla negeseda, amoda ea säi amo gadola hamomolö dialeala sälo. <sup>19</sup> Dilida si golai gabu. Godeie siigi hedabifalida abodo. Nelebo gobela ilo amo hedabile ma, auli amo hedabile. Diliada dawa, nelebo gobela ilo amo aulidaia dibe amoie, Godeie nafolala hamolo. <sup>20</sup> Amai gabugi, afädëa aulila säla, migalia diigila ado gelola säla negeseda, eada auli amoge, nelebo sulubadela aulidaia dibe amoge säla, migalia diigila ado gelola säla negelo. <sup>21</sup> Amase, afädëa gobela ilo mosöla säla, migalia diigila ado gelola säla negeseda, eada mosö amoge, mosö amogi aligilo amoge säla, migalia diigila ado gelola säla negelo. <sup>22</sup> Afädëa selesaia mosöla säla, migalia diigila ado gelola säla negeseda, eada Godeie sigi aligila filo amoge, filo amodaia sebe amoge säla, migalia diigila ado gelola säla negelo.

<sup>23</sup> Asigi fea negelo, mala dawadigi dolöla, Felesi dolöla dili, asigii gabu. Mida, nelebo nelësa sagaia neebe amo sulubadela amogi, nabülas mogelahilä nabü afädë Godegali ilo gaso, Ado säla negei dibe amogi ado edefadeda, dilia buludola fisi. Buludola fisi amolida gowe ili. Mogola hamologe, bobasëla ugila negeloge, amase, asigi afädë negeloge buludola fisi. Nabü afädë Godegali ilo dafidi säi amo made fisila, dilia ado edefade gowe ili hahamola nelo galebeda, dofealabio. <sup>24</sup> Dihili dili si golai nea, dolö odoa nefolalebe amoli idi olelo nebego. Diliada molö gobei nahalea, eeme nelësa seëgi, amo neadigilo gaso, molö gobeigi sugua gamele seëgi, amola wälada sübä dëgilomelë.

<sup>25</sup> Asigi fea negelo, mala dawadigi dolöla, Felesi dolöla dili, asigii gabu. Diliada gaaboge faloge daia baagido gomu hëlo gabu. Gaso, isogida dilia dihilile asigi made sigi aligila, molö fa nelo amea nobai gabumelë. <sup>26</sup> Felesi si golai di, gaabo isogi dafidi nigime hëmalö. Amala hamoseda, daia baagido goge gégelë baai made bimolömelë.

\* **23:5**: Iliä sisigila sähalea gälo amoda Yu dolö ilia hamolo. Iliada ado damui odoa dëdëlahilä, nelebo salelo amogi salelo, amo dëdëla sali amoda ilile naabo fefeädimidige gälo, amase, ilile odagiage baalo. Sigi Obëgi 13.9, 16, Mala Bu Eegei 6.8, 11.18 amoli bimalo. Amase elöda, Yu iliada ado Nidei 15.37-41gi dibe amo bégëla, efë hilile fagulo gäi amoie bidigi begedidigilo. Amalo gaso, Yesuea sähalea, Mala dawadigi dolöge Felesi dolöge sisigila sämolöie nimäla, iliada hä dofä Godeie Ado säla negei amo bégëlo gabula sämäia amalola säi.

\* **23:13-14**: Dawadigi dolö odoaea helësäleada, ado odoage damo amogi dialeala helësë. Ado amoda gomälä. [14 Asigi fea negelo, mala dawadigi dolöla, Felesi dolöla dili, asigii gabu. Mida, dilia udia didalo sebe amoli dahila neala, ilile mosöa nelebo dibe amo fa neala gaula aulo nea. Dilile asigi mustügä negesilahilä, adoeamu Godema sedadela adolo nea. Amala hamosebe amoie, dili së edefade muäia baala imolömelë.] Maga 12.40 bimalo.

<sup>27</sup> Asigi fea negelo, mala dawadigi dolöla, Felesi dolöla dili, asigii gabu. Dilida baagoi bauia beni faleia hëi amo gadoi gabugo. Baui daia amoda hedabifali beaha gaso, isogi dolö baagoi amolile giwi amoge, nelebo sulubadela nigime baala nobai dialea. <sup>28</sup> Amo gadola wäla, dilile domalo beala udia dolöea asigisaleada, dilida dolö mogoi gabula asigilo gaso, dilile isogida asigi fea negeloge, mala nafademu hamologe nobai gabugo.

<sup>29</sup> Asigi fea negelo, mala dawadigi dolöla, Felesi dolöla dili, asigii gabu. Diliada bea sälo amoli baulo mosö olala, amase, dolö mala mogoi hamolo amoli baulo mosö amoge momadolo gabio. <sup>30</sup> Dilia sähaleada, Nili nilile mäula ili nefolalo amogi galebeda, nilia ili ugila negela bea sälo ilile heale made digalabiola sälo. <sup>31</sup> Amala sälo ameada dilia olesalea, dilida bea sälo nufidelo amolile malö gabula oelomelë. <sup>32</sup> Amalo gabugi, dilia dilile diadola ilia mala hamolo amo gadola, hamola wagamalo.

<sup>33</sup> Dilida baagolo nubage, nubaie malöge nebege. Godea dilibalä gudisegi, dili heli segea moholö amoda abeahäla sisigala moholö gabu. <sup>34</sup> Amai gabugi, nabuö. Na bea säloge, dolö asigi falagaseige, amase, mala dawadigi dolöge dilima fisiga gamolömelë. Odoada dilia nufudala baagola, odoada i fügäigi baala negemolömelë. Amase, odoada dilile gedolo mosöa ami fëgälähilä, ili nesila gaamu afädëgila doadigila awäla, gaamu elögi nesila fisiga gamolömelë. <sup>35</sup> Amoie mida, dolö mogoi nagadaiaawi nefolalo odoaea nufi amoli sulubadelaie heale digai amoda dilimamu diamolömelë. Mi gäwila dolö mogoi Aibeledale heale digaia amila maala, Belegaeäie malö Segelaeage, dolö dilia gobela ilo mosöle gobela ilo aulile adeba ami nufi amoie heale digaia ami, ili sulubadelaie heale digai amoda dilimamu diamolömelë. <sup>36</sup> Na dilima dofä sähago. Nafade egoweli sulubadela hamoi amoie bidi nimolö amoda, udia dolö walio nefolalebe welia nimolömelëla säi.

*Yesuea Yalusaleme bobasëi  
(Uluu 13.34-35, 19.41-44)*

<sup>37</sup> Yesuea ado aso, sähamu neamu sähalea, Yalusaleme-e, Yalusaleme-e, bea sälo nefolalo amoli nufudala baagologe di. Amase, dolö digali fisiga wei amoli igia nufidologe di. Haea gagalugoea ie malö gugi hawa neala gafedela musügi negelo amo gadola, segeyo aboläiagi gadola, na die malö goli neala gege dolasideläi gaso, dihili habosio. <sup>38</sup> Nabuö. Godea dilile mosö digila awäla, mosö amo memalä diamolömelë. <sup>39</sup> Na dilima sähago. Dilia ne bu elö made beala nelolahilä, dilia sähalea, Afädë Dafidilo Geloie äigila maahago, Godea e neala obeägilasimäiala säsolo amo gala, dilia ne bimolömelëla Yesuea säla i.

## 24

*Godeie mosö nafademolömelëla säi  
(Maga 13.1-2, Uluu 21.5-6)*

<sup>1</sup> Yesu e Godeie mosöamadila awäha nebegi, ie bëgëla aulo amoli e neeäa maalähilä, ilia ema, Godeie mosö amoli bimola säi. <sup>2</sup> Amala säsebegi, ea ilima säla obëgësalea, Egoweli beahale. Na dilima dofä sähago. Igi elö daia dadagulula fedai golida, sulubadela mugulula digaha maademolömelëla säi.\*

*Yöi yafie moholömelëla säi  
(Maga 13.3-13, Uluu 21.7-19)*

<sup>3</sup> Yesu e Olibebidaia sebegi, ie bëgëla aulo amoli hilidomu maalähilä nabahalea, Dia nilima säla imo. Dia säi amo abola besela galamolödu. Dafidi nelebo edodale besela galasegi, nilia amo bealahilä, di hä, ulufadigimolö amoge, aligila wagamolö amoge, ga made gabula helësëmolöla nabi. <sup>4</sup> Amala nabasebegi, Yesuea ilima säla obëgësalea, Odoaea dili dahila neloea, idihë namialo. <sup>5</sup> Mida, dolö yafie maalähilä nie ëi säla, Afädë Memelel Geleso amo ne misi neawela sälahilä, udia dolö yafie dahila nimolö moholömelë. <sup>6</sup> Amase, sege ga madefali nudusalea ado goba nabase amogige, sege wagadi made nudusalea wabula säse amo nabase amogige, dili fudugila bedäloea, asigi sigi namialo. Nelebo amala hamomolö dialea gaso, amoda aso, aligila wagamolö mademelë. <sup>7</sup> Fii elöle elöle nudula digi, gamane elöle elöle nudula digisa namolömelë. Amase, sidë ige, fogolige sege odoagi moholömelë. <sup>8</sup> Nelebo amoli sulubadela hamomolö amoda, udiaea malö ägümolö salea, mi gäwila sälo amo gadoi bimolömelë.

<sup>9</sup> Amo gala, dili gaula neala sälasila, nufudala baagomolömelë. Nie äigi nefolalebege bealahilä, udia dolö fii odoä amoli sulubadelaie dilima bimolö habobamolömelë. <sup>10</sup> Segeyo amo gala, yafiea nema asigi afädë negei amo digila awälähilä, ilia hilimu bimolö habobala, odoama gaula imolömelë. <sup>11</sup> Amase, wäfali bea sälo yafiege maalähilä, udia dolö yafie dahila nimolömelë. <sup>12</sup> Mala nafade edese amea, udia dolö yafiea boba hamolo amo gögüla

\* **24:2:** Yesuea ado sedadela bia säi Madiu bebägi dëdëi dibe amoligida, biida go. Ea segeyo aligila wagamolö amoie säha nelo. Ado amoda 24.2-25.46 amogi dialea.

badilimolömelë. <sup>13</sup> Amamolö gaso, afädëa aso maadelahilä, wagamäiala gelola aligiseda, e damula moholömelë. <sup>14</sup> Fifi asi sefolalebe amoli sulubadela nabaha maademäia, Beaha Maadela Sigi Neebe amoie Ado Mala Hedabi amo sege föi sulubadelagi säla daidosa maademolömelë. Amala daidosa maadeseda, aligila wagamolömelëlä säi.

*Nelebo yöi ayägöloi bimolö amoie säi*

*(Maga 13.14-23, Ulugu 21.20-24)*

<sup>15</sup> Yesuea ado aso, sähamu neamu sähalea, Amamolö gabugi, dilia bea sälo Danialoea nelebo yöi ayägöloi amoie säla negei amo Godeie mosöa dië beaseda, (ado egowe nidese ameada hedabola helësëmalö) <sup>16</sup> Yudia segea sefolalebe amolida, segebi dibeami fisäla baluluia afufumalo. <sup>17</sup> Amo gala, afädë mosö figidaia sebe amea digalahilä, mumusogi ie nelegei nea digamabio. <sup>18</sup> Amase, afädë sagaia neebe amea, fagulo daia salugalo negei amo mosöa nea obögëmbio. <sup>19</sup> Segeyo amo gala, udia fagulo hagui sefolalebe amolige, malö dubo dodo iaha sefolalebe amolige, asigii gabu. <sup>20</sup> Fisäla moholö amoda i bäu gisalea gögi mulo amo gala galëge, amase, hele filo segeyo Sabada gafegi galëge muloea, dilia Godema adosa namialo. <sup>21</sup> Mida, segeyo amo gala yöi edefede elö elöla yafie maala negei dië bimolömelë. Sege föi dibe sulubadela mi gäwila hamoia amila yöi amo gadoi made meli. Amase, hobeage bu elö made bimolömelë. <sup>22</sup> Amaimo, amo gala Godea segeyo obobagilasi made galebada, udia dolö sulubadela fisilabio. Amalabio gaso, udia dolö hi memelei amoli helësëlahilä, obobagilasimolömelë.

<sup>23</sup> Segeyo amo gala, afädëa dilima sähalea, Bimo. Afädë Memelei amo misi neala säsege, gadowei misi neamelëlä säsege, dofä gabula helësëmbio. <sup>24</sup> Amoie mida, wäfalä Afädë Memelei gadoi odoage, wäfalä bea sälo odoage moholömelë. Amala maalahilä, ilia udia dolö Godea memelei nefolalebe amoli dahila neala hamomabelela bimolöie, dolöea dofä hamomolöi made gadoige, hido elöige hamosa namolömelë. <sup>25</sup> Nabuö. Amo made hamola neebe amo gaalu, na dilima säla iahagomelë.

<sup>26</sup> Amaimo, afädëa dilima sähalea, Nabuö. Sege udia dolö aligilo made dibeami neala säseada, ami mosabio. Amase, afädëa sähaleada, Mosö hogoli afädëgi nogila digai saleala säseada, dofä gabula helësëmbio. <sup>27</sup> Mida, sege yabagelela eso maasidola maala, eso digasido amige yo digalo amo gadola, Dolöie Malö amo ulufadigisolö amo gala, amo gadola wäla ulufadigimolömelë. <sup>28</sup> Baagoi domalo dibeami haea säsalä gadoi gegedomolömelëlä säi.

*Hobeala Dolöie Malö ulufadigimolö*

*(Maga 13.24-27, Ulugu 21.25-28)*

<sup>29</sup> Yesuea ado aso, sähamu neamu sähalea, Segeyo amogi yöi yafie elö elöla amo hamosa maadei amole, eso usila, aube made neëla, amase, gasumilä mudaiala besela didigafulahilä, muugi nelebo geloi hido elöi amoge neala fogolasimolömelë. <sup>30</sup> Amala hamosegi, Dolöie Malö amoie nofe elöi amo mudaia ulufadigisegi, sege dibe sulubadelagi nefolalebe amoli didigaomolömelë. Iliä beahalea, Dolöie Malö amo geloi amole, yo digalo hido elöifalä amolebalä, mu baidilidaia maala neë bimolömelë. <sup>31</sup> Amase, fuuloea gelola fuuse amo gaalu, ea ie selesaia fii amolima mosalolahilä, udia dolö hi memelei sege föi sulubadelagi, agesu näiadi nefolalebe amolige, näiadi nefolalebe amolige, neala gegedolasimalola sämolömelëlä säi.

*Yesuea äfäeoie ado säi*

*(Maga 13.28-31, Ulugu 21.29-33)*

<sup>32</sup> Yesuea ado aso, sähamu neamu sähalea, Diliada äfäeoie mala amogi helësëmalö. Äfäeo fësëgësisila, bäu gähe bobagiseda, dilia helësësalea, sege esomolöda ga made gabula helësëlomelë. <sup>33</sup> Amo gadola wäla, nelebo sulubadela säsewe gadoi hamose dilia beaseda, amoda hä, ga made, suägisa gabula helësëmalö. <sup>34</sup> Na dilima dofä sähago. Udia dolö walio nefolalebe baagola made nefolalegi wäla, nelebo säi amoli sulubadela hamosa maademolömelë. <sup>35</sup> Mu giwige, naga föige hogosa helemolö gaso, nie adoda dofä made hogosa helemolömelëlä säi.

*Dolö afädëa gowe gala hamomolöla dawa madela säi*

*(Maga 13.32-37, Ulugu 17.26-30, 17.34-36)*

<sup>36</sup> Yesuea ado aso, sähamu neamu sähalea, Amala hamomolö amoda segeyoge, aoage afädëa dawa mademelë. Selesaia fii iliage, Malöeage dawa mademelë. Naadoea hidomu dawadigi neamelë. <sup>37</sup> Dolöie Malö ulufadigisolö amo gala, Noaie segeyogi hamoi amo gadola wäla hamomolömelë. <sup>38</sup> Ödä bëi made maala nebegi, ilia molö ödäge nadigi, udia neadigi, dolö fila awäla digisa nebegi, Noa duugi fila fedamolö segeyo amo besela galaimelë. <sup>39</sup> Iliä dawa made nebegi, ödä bëi maala ödäea sulubadela mai. Dolöie Malö ulufadigisolö amo galage, udia dolöea amo gadola wäla hamosa namolömelë. <sup>40</sup> Segeyo amo gala, dolö äudä sagaia neëgi, elö amo neahalea, elö amo digila moholömelë. <sup>41</sup> Udia äudä wahalo däilaha neëgi, elö amo neahalea, elö amo digila moholömelë.

<sup>42</sup> Amai gabugi, dilile Dafidilo segeyo gomo gala moholö gabula, dilia dawa made ameadada, dili idihë namialo. <sup>43</sup> Ado gowe helësëmalo. Mosö eedoea fa nelo dolö gasigi gowe gala moholöla helësëi galebeda, ea idihë neëgi, ie mosö dagabola fa nea digamäia fu made ialabiomelë. <sup>44</sup> Amai amea, Dolöie Malö moholö amoda, dilia gowe gala moholö gabula helësëi made neëgi, e moholö ameadada, diliage daiaha namolö dialeala säi.

*Ado besula hamoi hamolasilo hedabüege nafadeëge*  
(Ulu 12.41-48)

<sup>45</sup> Yesuea ado aso, sähamu neamu sähalea, Hamoi hamolasilo asigi falagaseige, nulügäige neebe amea, ie dafidiloea hile mosöa hamoi hamolasilo odoa sigi namiäia, ilile molö segeyo hi daiala negeifaligi mogela ilo amoda abodowedu. <sup>46</sup> Ie dafidilo amo maalahilä beahalea, hamoi hamolasilo amea, hamoi amo gadola wäla hamosa neë beaseda, hamoi hamolasilo amo obeägisa namolömelë. <sup>47</sup> Na dilima dofä sähago. Dafidilo amea hamoi hamolasilo amoma ie nelegei sulubadela sigi namialamolömelë. <sup>48</sup> Amaimo, hamoi hamolasilo nafadea asigiamu helësésalea, nie dafidilo aso, deegela, fodolo made moholöledula helësëlahilä, <sup>49</sup> ea hamoi gaalu hamolasilo nefolalabe amoli nufudala, gagaalo ödä nulo dolöbalä molö ödäle naha aligilomelë. <sup>50</sup> Amai gabugi, hamoi hamolasilo amea e segeyo gowegi, aoa gowegi moholöla helësëi made neëgi, ie dafidilo amo moholömelë. <sup>51</sup> Maalahilä, ea hamoi hamolasilo amo neala nafademolöi nafadelasila, e asigi fea negelobalä namialamolömelë. Amida, ili diisalea bese ali nalëgësa namolömelëla säi.

## 25

*Ado besula udia dodola nabülasie säi*

<sup>1</sup> Yesuea ado aso, sähamu neamu sähalea, Segeyo amo galada, Hebeni Beaha Maadela Sigi Neebea amida, gowe gadoi diamolömelë. Udia dodola nabülasia ilile elamu amoli neala gaula, udia nimolö dolö amo gausiamolöie afiai. <sup>2</sup> Udia amoligi biada asigi maade, amase, biada asigi gäwi. <sup>3</sup> Udia asigi maade amoliada, ilile elamu gaula afiai gaso, amobalä weli osala nafolala, gaula made afiai. <sup>4</sup> Amasebegi, udia asigi gäwi amoliada, weli ödä iigi söga salala nafolala, ilile elamubalä gaula afiai. <sup>5</sup> Udia nimolö dolö amo fodolo made maasebegi, ili süwiala waola, sulubadela adidi difolalo.

<sup>6</sup> Gasi mogogifali, afädëa uuahalea, Uuaa. Udia nimolö dolö amoda hä, misi gabio. E gausiamolöie afiamalola uuai. <sup>7</sup> Amala uuasebegi, udia dodola amoli sulubadela nowelahlilä, ilile elamu amoli hahamogilahilä gauai. <sup>8</sup> Amasebegi, asigi maade amolia asigi gäwi amolima sähalea, Dilia weli gogi nili gögödëla imo. Nilile elamu usidelä hamosebela säi. <sup>9</sup> Amala säsebegi, asigi gäwi amolia säla obëgësalea, Ai. Weli wegida dilila nililada dofea made. Bidi neasea ami awäla, dilida dihilile bidia nimalola säi. <sup>10</sup> Amala säsebegi, ili weli nea asi amo gaalu, udia nimolö dolö amo besela galai. Amasebegi, daiia udia amolida ebalä awäla, udia neahalea molö edefade nasebea ami digala, idi gai. <sup>11</sup> Hobeala, udia dodola odoa amoli maala, ilia sähalea, Dafidilo, dafidilo, nili idi gai dogasimola säi. <sup>12</sup> Amala säsebegi, ea säla obëgësalea, Na dilima dofä sähago. Dilida na dawa madela säi.

<sup>13</sup> Amamolö gabugi, dilia segeyoge aoage dawa made neebe ameadada, idihë namialola Yesuea säi.

*Ado besula hamoi hamolasilo ohodoäie säi*  
(Ulu 19.11-27)

<sup>14</sup> Yesuea ado aso, sähamu neamu sähalea, Hebeni Beaha Maadela Sigi Neebea amida, gowe gadoi diamolömelë. Dolö afädëa e sege wagadi made moholö awähalea, ie hamoi hamolasilo amoli misialalahilä, ilia ie nelegei sigi namiäiaie, ilile naabogi gausisi. <sup>15</sup> Ea afädëma muni giwi siliba dausini bia i. Elömada muni giwi dausini äudä i, amase, elömada dausini afädëfali i. Ilile asigi dibe amo gadola, afädë afädëlama muni sogola gausisi. Amala hamola negesilahilä, e asi. <sup>16</sup> Awäsebegi, dolö dausini bia nelo ameadada, fodolofali awäla bisinesi hamosa neada, dausini bia elö neala baai. <sup>17</sup> Amase, dolö dausini äudä nelo ameage, amo gadola hamosalea, dausini äudä elö neala baai. <sup>18</sup> Amai gaso, dolö dausini afädë nelo ameadada awäla, ie dafidiloie muni giwi dausini amo naga dögölahilä, naga isogi musügä negesi.

<sup>19</sup> Segeyo holöbö ede nelolahilä, hamoi hamolasilo amolile dafidilo amo obëgëla, ea muni i amoie, ilibalä ado fädäla sämolöie misi. <sup>20</sup> Dolö muni giwi dausini bia nelo amea, dausini bia elöge baala nii amo gaula maala nea sähalea, Dafidilo, dia negali dausini bia i. Ameadada, na dausini bia elö neala baai amo gowemelë. <sup>21</sup> Amala sälebegi, ie dafidilo amea ema sähalea, Hamoi hamolasilo hedabi-e, dia hamoi hedabolafali hamoi gabu. Dida asigi nulügäi. Dia nelegei holöfali go hedabola madëlela sigi nelo goeada, dia nelegei edefade sigi namiäiaie imolömelë. Di nebalä obeägisa namolöie misiëla säi.

<sup>22</sup> Amala säsebegi, dolö dausini äüdä nelo ameage maala nea sähalea, Dafidilo, dia negali dausini äüdä i. Ameada, na dausini äüdä elö neala baai amo gowemelê. <sup>23</sup> Amala säsebegi, ie dafidilo amea ema sähalea, Hamoi hamolasilo hedabi-e, dia hamoi hedabolafali hamoi gabu. Dida asigi nülügäi. Dia nelegei holöfalï go hedabola madëlela sigi nelo goeada, dia nelegei edefade sigi namiäiaie imolömelê. Di nebalä obeägisa namolöie misiëla säi.

<sup>24</sup> Amala säsebegi, dolö muni giwi dausini afädê nelo ameage maala nea sähalea, Dafidilo, dida dolö aabela habobalo amo na dawa. Dia made sagaia amida, dia molö nelo. Sege dia molö gägä made fëfëia amige, diada molö gegegdola negelo. <sup>25</sup> Amalo ameada, ne bedähalea. Ne awäla, dië muni giwi amo na naga dögöla negei. Dië muni amoda gowemelê. <sup>26</sup> Amala säsebegi, ie dafidiloea ema säla obëgësalea, Hamoi hamolasilo nafade di, dida habobame. Dia helësësalea, sagai na made sagaia ami na molö nelo, amase, sege na molö gägä made fëfëia amige, nada molö gegegdola negelöla helësëile. <sup>27</sup> Amala helësëi galëda, dia bëgi dolöbalä nie muni negesi galebada, ne obëgëla maala, baai muni amola nealabio. <sup>28</sup> Amai amea, muni giwi dausini afädê ea gaula neebe go neala, dausini nabülasï galebe amogali imalo. <sup>29</sup> Amoiëda, sulubadelaea nelebo afädê gaula neebe amolimada, odoa baala iasegi, yafie gaula namolömelê. Gaso, afädëa nelebo afädê made gaula neebe amomada, holöfalimelê gaula neebe amoda haila nimolömelê. <sup>30</sup> Hä, hamoi hamolasilo nafade goda sege gasimi sagai dibeä ami sogobala sadia idogomalo. Amida, ili diisalea bese ali nalëgësa namolömelëla säila säi.

### *Dolöie Malöea udia dolö sulubadela mogemolö*

<sup>31</sup> Yesuea ado aso, sähamu neamu sähalea, Dolöie Malö amo, ie yo digalo hido elöi salugalahlilä, selesaiä fii sulubadelabalä maasolo amo gala, e ie sigi aligila filo hedabi hido elöidaia samolömelê. <sup>32</sup> Fifiä asi sefolalebe amoli sulubadela, ie odagia maala gegegdolasisegi, sigi aligilo ilia sugua sibile sugua memele nafolala mogelo amo gadola, eada udia dolö mogela, <sup>33</sup> sugua sibida dafädimadi negela, sugua memeda fefeädimadila negemolömelê.

<sup>34</sup> Amo gala, beaha aligilo Ginia ie dafädimadi nefolalebe amolima sähalea, Nie Naodoea neala obeägilasi dili-e, dili misii. Godea Beaha Maadela Sigi Neebeä ami digamalo. Amoda sege föi dibe sulubadela mi gäwila hamoia amila dilile daiäi dilo. <sup>35</sup> Mida, ne sidëa baagoi nebegi, dilia ne molö i. Ne ödä haläi nebegi, dilia ne ödä i. Amase, ne näiadodi dolö gabugi, dilia ne mosöa sigi asi. <sup>36</sup> Ne fagulo maade nebegi, dilia ne fagulo i. Amase, ne oloi dibegi, dilia ne sigi nelo. Ne galabaia mosöa nebegige, dilia ne bea misila samolömelê. <sup>37</sup> Amala säsegi, mogola hamolo nefolalo amolia ema säla obëgësalea, Dafidilo Geloi-e, di sidëa baagoi nebegi, nilia abola beala, di molö iasio. Di ödä haläi nebegi, nilia abola di ödä iasio. <sup>38</sup> Amase, di näiadodi dolö nebegi, nilia abola di mosöa sigi awäsiö. Di fagulo maade nebegi, nilia abola digali fagulo iasio. <sup>39</sup> Amase, di oloi dibegige, galabaia mosöa nebegige, nilia di abola bea awäsiöla nabolömelê. <sup>40</sup> Amala nabasegi, Gini amea ilima säla obëgësalea, Na dilima dofä sähago. Dilia nelebo sulubadela nie nedoolaligi afädê holöbö gidogofali neebe amoma hamoi amoda, dilia nema hamoila samolömelê.

<sup>41</sup> Amala säsegi, ea fefeädimadi nefolalebe amolima sähalea, Nemola fisi udia dolöla dili, dilida ne neebeawi made, bahila afiala, nulo usilo made dibeä ami moholö mosö. Nulo amoda mugabe busa amoiëge, ie hamoi hamolasilo amolilege daiäi. <sup>42</sup> Mida, ne sidëa baagoi nebegi, dilia ne molö made i. Ne ödä haläi nebegi, dilia ne ödä made i. <sup>43</sup> Amase, ne näiadodi dolö gabugi, dilia ne mosöa made sigi asi. Ne fagulo maade nebegi, dilia ne fagulo made i. Amase, ne oloi dibegige, galabaia mosöa nebegige, dilia ne made bea misila samolömelê. <sup>44</sup> Amala säsegi, iliage naba obëgësalea, Dafidilo Geloi, di sidëa baagoi nebegige, di ödä haläi nebegige, di näiadodi dolö gabugige, di fagulo maade nebegige, di oloi dibegige, amase, di galabaia nebegige, nilia amo abola bealahilä, di made ugila negesiöla nabolömelê. <sup>45</sup> Amala nabasegi, ea ilima säla obëgësalea, Na dilima dofä sähago. Dilia nelebo sulubadela afädê holöbö gidogofali neebe amoma made hamoi amoda, dilia nema made hamoila samolömelê. <sup>46</sup> Amai gabugi, ilida së nahamu namolöia ami moholömelê. Gaso, mogoi hamolo amolida namolöi namolö dibeä ami moholömelëla Yesuea säla wagai.

## 26

### *Busa dolö amolia Yesu baagomäia nufulöla didiäha dilo*

*(Maga 14.1-2, Ulugu 22.1-2, Yone 11.45-53)*

<sup>1</sup> Yesuea ado amoli sulubadela säha maadelahlilä, ie bëgëla aulo amolima sähalea, <sup>2</sup> Segeyo äüdä namolö gabulahilä, Baagila Asi Segeyo besela galamolö amoda dilia dawa. \* Hä, Dolöie Malö amo i fügäigi baala negemäia, odoäie naabogi gausimolömelëla säi.

\* **26:2:** Baagila Asi Segeyola säi amoda, Isilaleie malö made nufudala, baagila awäla, Isibiie dolö malö abulümi amoli nufudaha maadei amoië helësëla obëgëlo segeyola säi.



<sup>3</sup> Segeyo amo gala, gobela ilo busa nefolalo amola, udia dolöie dafidilo asigi gäwi nefolalo amolali, gobela ilo Busa Edefade, amoie ëida Gaiafasa, amoie mosöa gegedoi. <sup>4</sup> Iliä Yesu abeahämola oodolahilä, nufudala baagomäia gaumolödula geleä didiäha difolalo. <sup>5</sup> Iliä sähalea, Amamolö gaso, Segeyo Edegi gedosolo amo gala made, udia dolöea gelola üala dodogöla sälolea säi.

*Udia afädëa Yesuie busagia weli söga negei  
(Maga 14.3-9, Yone 12.1-8)*

<sup>6</sup> Yesu e sege Bedani ami gudubu hamoi Saimonoea mosöa sebegi, <sup>7</sup> udia afädëa weli hedabi gafisigäi hido elöi muni edefadea nelo amo gaula, e sebea ami misi. Yesu e ami molö naha sebegi, udia amea weli ödä i igia hamoigi osala negei dilo amo, ie busagia söga negei. <sup>8</sup> Amala hamoi amo, ie bégëla aulo amolia bealahilä, ilia habobala sähalea, Faeagasebegoda edoiedu. <sup>9</sup> Ameada bidi edefade nealahilä, muni amo busadäoigali ialabiola säi. <sup>10</sup> Yesuea ilia habobasebe amo dawadigi nea, ea ilima sähalea, Dilia e edoie yölasisa. Eada nema mala hedabi hamosebemelë. <sup>11</sup> Busadäoia dilibalä namolöi namolömelë. Gaso, neda dilibalä namolöi namolö mademelë. <sup>12</sup> Udia amea nie domalogi weli negei amoda, ne baumolö amoie daiai. <sup>13</sup> Na dilima dofä sähago. Ado Mala Hedabi gowe sege föi sulubadelagi säla olelesaleada, e helëselahilä, ea hamoi amoge säla imolömelëla säi.

*Yudasaea Yesu hololömolöie ado afädë negela üi  
(Maga 14.10-11, Ulugu 22.3-6)*

<sup>14</sup> Giwilasi amoligi afädë, ie ëida Yudasa Isagaliada, e gobela ilo busa neebee ami awälahilä, <sup>15</sup> ea nabahalea, Na e dilile naabogi gausideläie, diliada negali edo imolö gabula nabi. Amala nabasebegi, ilia muni giwi siliba nabülasi ohodoo nidelahilä, egali i.\* <sup>16</sup> Segeyo amila nofela, ea Yesu ilile naabogi gausimolöie fu hogosa nelo.

*Yesu e ie bégëla aulo amolibalä molö naha dilo  
(Maga 14.12-21, Ulugu 22.7-14, 22.21-23, Yone 13.21-30)*

<sup>17</sup> Segeyo Edefadegi beledi edelo yidila made gobela molö amoie segeyo bu agesolo amo gala, bégëla aulo amoli maalahlilä, Yesuma nabahalea, Dia Baagila Asi Segeyo molö molö amoie, nilia abidi daiamäia hamesebela nabi. <sup>18</sup> Amala nabasebegi, Yesuea sähalea, Gaamugi awälahilä dolö amoma gomalä sämalö. Säla Oleleloea sähalea, Nie fuda hä, ga made gabugi, nie bégëla aulolali, Baagila Asi Segeyo amoie molö molö amo na dibalä nuduläla säila sämalola säi. <sup>19</sup> Amala säsebegi, bégëla aulo amolia Yesuea säi amo gadola hamola, Baagila Asi Segeyo amoie molö molöie daiai.

<sup>20</sup> Deadifali, Yesu e giwilasi amolibalä molö naha sefolalo. <sup>21</sup> Ili molö naha sefolalea, ea sähalea, Na dilima dofä sähago. Dili sebegogi afädëa ne hololöla odoäie naabogi gausimolömelëla säi. <sup>22</sup> Amala säsebegi, ilile asigia edefade yöia idogolahilä, hido hidolaea ema säla didigahalea, Dafidilo Geloi-e, nale, ma nalela säla didigai. <sup>23</sup> Amala säla didigasebegi, Yesuea säla obégësalea, Dolö nebalä falogi naabo gaalu digai ameada, ne hololöla odoäie naabogi gausimolömelë. <sup>24</sup> Ie säla dëdëla negei dibe amo gadola, Dolöie Malöda baagomolö. Gaso, Dolöie Malö e hololöla odoäie naabogi gausise dolö amoda, asigii gabumelë. E emea made neegela ägüi galebeda, e hedabi aligilabiomelëla säi. <sup>25</sup> Yudasa, e hololöla odoäie naabogi gausimolö amea nabahalea, Säla Olelelo-o, nalela nabi. Amala nabasebegi, ea ema sähalea, Dihä säse gomelëla säi.

*Yesuea beledile wani ödäle ie bégëla aulo amoligali i  
(Maga 14.22-26, Ulugu 22.15-20, Age Golidi 11.23-25)*

<sup>26</sup> Ili molö naha sefolalea, Yesuea beledi afädë nealahilä, Godema nesegiei. Nesegelahlilä, ea beledi dagabodasila, bégëla aulo amoligali iahalea, Goda nie domalomelëla säi. <sup>27</sup> Amala sälahilä, ea gaabogi usi amo neala gaula nea, Godema nesegelahlilä, iligali iahalea, Dili sulubadelaea go hä, gobe dadagabola mualo. <sup>28</sup> Goda nie healemelë. Asialo made ado elöi säla negemolöie healemelë. Nafade hamoi amoli hëmäia, udia dolö yafiegali besigahawe. <sup>29</sup> Na dilima sähago. Segeyo wila nofela, ne wani ödä bu elö made naala nelolahilä, Naadoea Beaha Maadela Sigi Neebea ami nea, dilibalä bu elö molömelëla säi.

<sup>30</sup> Amala sälahilä, ilia gë afädë udälahlilä, Olibebia afiai.

*Fidaea Yesu dawa madela sämolömelëla säi  
(Maga 14.27-31, Ulugu 22.31-34, Yone 13.36-38)*

\* **26:15:** Muni giwi siliba nabülasi ohodoo go, walioda aboläiadu nilia dawa made. Goda holöbö muni edefade. Hamoi hamolo dolöea aube bia gadoigige, gafeia gadoigige bidi nelo amo gadoi. Madiu 27.9-10 amoge bimalo.

<sup>31</sup> Olibebia afiahalea, Yesuea ilima sähalea, Walio gasigi, dili sulubadelaea, nema hamosebe amo beahalea, dilile asigi afädë negeigo digamolömelë. Mida, ado säla dödëla negei dibe amea sähaleada,

Na sugua sibi sigi aligilo nufudasegi, sugua sibida fisäla dusudasila afufumölömelëla säla dödëla negei dialea. <sup>32</sup> Amamolö gaso, ne nowelasisegi, na dili baagila, nedale Galili mohölömelëla säi. <sup>33</sup> Amala säsebegi, Fidaea ema säla obögësalea, Dima hamosebe amo bealahilä, sulubadelaie asigi afädë negei amo digasada, neda dofä made amamolömelëla säi. <sup>34</sup> Amala säsebegi, Yesuea ema sähalea, Na dima dofä sähago. Walio gasigi gagalugo gawalia made gäla neëgi, dia ne dawa madela nafi bu ohodoala sämolömelëla säi. <sup>35</sup> Amasebegi, Fidaea ema sähalea, Neda dibalä gaalu baagomolö galëge, ameadä na di dawa madela dofä made sämolömelëla säi. İe bögëla aulo amoli sulubadelaeege amalamu säla didigai.

*Yesu e Gesemani sagaia Godebalä adoı*  
(Maga 14.32-42, Ulugu 22.39-46)

<sup>36</sup> Yesu e ilibalä sege ëi Gesemani besela galalahilä, ea bögëla aulo amolima sähalea, Ne holöbö gasi gala Godema adose gaaluda, dili wi sefolamialola säi. <sup>37</sup> Amala sälahilä, Fidge, Sebediie malö äüdä amolege, ea ili sigi awälahilä nea, ie iso asigia yöia idogola, säosäosa nelo. <sup>38</sup> Amala nea, ea ilima sähalea, Nie iso asigia edefademalä yöia idogosalea, ne baagomolö gabumelë. Dili gui nea, nihiligila idihë namölölamelëla säi. <sup>39</sup> Amala sälahilä, e holöbö gasi gala, nagadaia gumusula dia idogola dialea, Godema sähalea, Nie Naado, asiamolö fu galëda, gaabogi usi molö amo na asiamäia. Amamäia gaso, na hamese amo gadola made, dia hamese amo gadola hamomäiamelëla säi. <sup>40</sup> Amala sälahilä, ea İe bögëla aulo sebea ami awäla beahaleamelebe, ili süwia adi dibe amo bealahilä, ea Fidama nabahalea, Dilia nebalä aoa afädë idihë namölö ulisebele. <sup>41</sup> Nafadea dili fedogola melëloea, idihë nea, Godema adosa namialo. Dofä. Asigiada hamomölöila helësësa neago gaso, domaloda wäbëai nebegola säi. <sup>42</sup> Amala sälahilä, e bu agedu obögëla, Godema adosalea, Nie Naado, go made asiala, muäia galëge, dia hamese amo gadola hamomäiamelëla säi. <sup>43</sup> Amala sälahilä, e bu obögëla maala beahaleamelebe, ili süwia adi dibe meli. Mida, ilile si gafodo amo hä, gadugisalea amai. <sup>44</sup> İli ami bu elö digila awälahilä, ea bu osoda Godema dafidi säi amo gadola wäla säi. <sup>45</sup> Amala sälahilä, İe bögëla aulo amoli sebea ami bu obögëla, ea ilima sähalea, Dili süwiamu diala, hele saleale. Bimo. Fu hä, ga madesebege. Dolöie Malö amoda, nafade hamolo amolile naabogi holölöla gausisebemelë. <sup>46</sup> Dili hä, nowemo. Afiadi. Bimo. Dolöea ne holölöla odoäie naabogi gausimölö amo hä, ga made misi neebemelëla säi.

*Yesu odoäie naabogi gausi*  
(Maga 14.43-50, Ulugu 22.47-53, Yone 18.3-12)

<sup>47</sup> Yesuea ado amo aso, säha nebegi, giwilasi amoligi Yudasa e misi. Dolö maleia nudulo helebege baialage gaula, ebalä mofiai. Gobela İlo busa amoliage, udia dolöie dafidilo asigi gäwi amoliage, dolö amoli misialai. <sup>48</sup> E holölöla ilile naabogi gausilo amea, ilima dafidi daiala säla İahalea, Na dolö gaula mimise amoda emelë. E gaumalola säla İ. <sup>49</sup> İli maalahlilä, e hä, Yesu neebee fodolofali maala sähalea, Säla Olelelo-o, di go gabiola sälahilä, e gaula mimi. <sup>50</sup> Mimisebegi, Yesuea ema sähalea, Nedoo, dia hamomölö misi amoda hä, hamomola säi. Amala säsebegi, dolö amoli maala, Yesu hä, gaula fëdöi. <sup>51</sup> Amalebegi, dolö afädë Yesubalä nelo amea, İe helebe besela neawelahilä, gobela İlo Busa Edefade amoie hamoi hamolasilo amo nufudala, İe gëhe dagala sali. <sup>52</sup> Amala hamosebegi, Yesuea ema sähalea, Dia helebege dihi negeia ami negela obögëmo. Mida, dolö sulubadelaea helebea nudumölöie gausada, helebea İli nufudala baagosa maademölö gabu. <sup>53</sup> Na nie Naadoma nabaseda, eada waliomu selesaia fii yafie, ami giwilasi amo baagila asi amolida, nema fisiga wemölömelë. Na ema amala nabolö ulıla helësësebele. <sup>54</sup> Gaso, na amala nabaha galebeda, ado säla dödëla negei dibe amo gadola, amala hamomölöi dialeala säi amo made gausiala digalabiola säi.

<sup>55</sup> Amo gala, Yesuea gegedoi amolima sähalea, Fa nelo gaumölöie mulo amo gadola, nudulo helebege baialage gagaulahlilä, ne gaumölö misile. Segeyo sulubadelagi, nada Godeie mosöa säla olelesa sulo amogi, dilia ne made gauı amoda. <sup>56</sup> Gaso, bea sälo amolia ado säla dödëla negei dibe amo gadola gausiala digamolöie, nelebu sulubadela amala hamosamelëla säi. Amala säsebegi, bögëla aulo amoli sulubadelaea e digila fisäla awähä maadei.

*İlia Yesuma gudi nabi*  
(Maga 14.53-65, Ulugu 22.54-55, 63-71, Yone 18.13-14, 18.19-24)

<sup>57</sup> Yesu gauı amolia gobela İlo Busa Edefade Gaıafasa neebee ami, e sigi asi. Mala dawadigi dolöge, dafidilo asigi gäwi dolöge, İli ami gegedoi nefolalo. <sup>58</sup> Fida e holöbö

hobeala baagiala e bēgēla awāla, gobela ilo Busa Edefadeie mosō yala isogi digalahilā, hā, wagasebe amo bimolōie, hamoi hamolasilo amolibalā beaha sulo.

<sup>59</sup> Gobela ilo busa amoliage, Galisolō dolō amoli sulubadelaage, e baagomāia nufulōie, dolō odoaea wāfalī, Yesuea asiala hamose melēlo amo sāmāiala hogoi. <sup>60</sup> Hogosebegi, yafia wāfalī, ea asiala hamose melēlo amo sāla misi gaso, e nufulōie mi made meli. Made beasebegi, giso hobealafalī, dolō āudā maalahlilā <sup>61</sup> sāhalea, Egowea sāhaleada, Na Godeie mosō go haila digilahilā, segeyo ohodoagi bu ulimolōimelēla sāmēlēla sāi. <sup>62</sup> Amala sāsebegi, gobela ilo Busa Edefadea nowela aligilahilā, Yesuma nabahalea, Dia ado afādē made sāla obēgēsale. Elea dima sāsegoda, abeahāmola sāhadula nabi. <sup>63</sup> Amala nabasebegi gaso, Yesu e ado saula sulo. Amasebegi, gobela ilo Busa Edefade amea ema sāhalea, Gode namolōi neebe amoie ēigi, dia nilima fādāla sāmola sāha. Afādē Memelei amoda, dile. Dida Godeie malōlela nabi. <sup>64</sup> Amala nabasebegi, Yesuea ema sāla obēgēsalea, Dihī sāse gomelē. Gaso, na dilima sāhago. Hobealada, Dolōie Malō Geloī Edefade amoie naabo dafādīmadi filahlilā, e mu baidilidāia maaha neē bimolōmelēla sāi. <sup>65</sup> Amala sāsebegi, gobela ilo Busa Edefade amea, hile fagulo gadelaha nea sāhalea, Ea Gode gagadela sāsebegi. Odoama ea hamoi amoie nalī made nabelēlēmēlē. Hādāmade ea Gode gagadela sāsebe amo dilia hā, nabi amomelē. <sup>66</sup> Dilia abilia helēsēselela nabi. Amala nabasebegi, ilia sāla obēgēsalea, Eda hā, nufudala baagomolō dialeala sāi. <sup>67</sup> Amala sālahlilā, ilia Yesu e odagia gofedela gagalala, e nufudala ialalei. Odoaeada e naabo gafea nufudalahilā <sup>68</sup> sāhalea, Afādē Memelei, dolō di nufudase egoweda nowē gabu. Dihī bea sāla sāmola sāha nelo.

*Fidaea Yesu dawa madela sāi*

*(Maga 14.66-72, Ulugu 22.56-62, Yone 18.15-18, 18.25-27)*

<sup>69</sup> Amo gala, Fida e segea yala isogi nogila digasia ami sebegi, hamoi hamolasilo dolisā afādē maalahlilā ema sāhalea, Dige Galilī dolō Yesubalā nawesa aligilo amo gabula sāi. <sup>70</sup> Amala sāsebegi gaso, Fidaea dolō sulubadelaie sidaia ne madela sālahlilā sāhalea, Ado dia sāse goda, na dawa mademelēla sāi. <sup>71</sup> Amala sālahlilā, e yala baagido idi dagaboimadi awāha nebegi, hamoi hamolasilo dolisā elōea e bealahilā, ami nefolalebe amolima sāhalea, Dolō egoweda Nasalese dolō Yesubalā nawesa aligilo amo gabula sāi. <sup>72</sup> Amala sāsebegi, Fidaea migalīa diigila, bu elō ne madela gelola sālahlilā sāhalea, Dolō amoda na dawa mademelēla sāi. <sup>73</sup> Hobeala, dolō odoa ami nefolalebe amolia maalahlilā, Fidama sāhalea, Dida dofā amoligi gabu. Dia adosebegoea dihi di ulufadigisebegomelēla sāi. <sup>74</sup> Amala sāsebegi, Fidaea, na we wāfalī sāseba, dofā ne Godea sē imāiala sālahlilā, migalīa diigila sāhalea, Dolō amo na dawa mademelēla sāi. Ea sāia gai amole, hā, gagalugo gawalia gāi. <sup>75</sup> Amala gāsebegi, Fidaea helēsēsalea, Yesuea sāhalea, Gagalugo gawalia aso, made gāla neēgi, dia ohodoala ne dawa madela sāmōlōmelēla sāi amo helēsēla obēgēi. Amala helēsēla obēgēlahilā, e segea doadigila awāla, gāia gūsāla diisa nelo.

## 27

*Ilia Yesu e Gabena Bailadi neebēa sigi asi*

*(Maga 15.1, Ulugu 23.1-2, Yone 18.28-32)*

<sup>1</sup> Segeyo sagala digase amo gaalu, gobela ilo busa nefolalo amoli sulubadelaage, udia dolōie dafidilo asigi gāwi nefolalo amoliage, Yesu baagomāia nufulōla sāla ado afādē negei.

<sup>2</sup> Iliā Yesu nafodola sigi awālahilā, Gabena Bailadiie naabogi gausi.\*

*Yudasa e baagoi*

*(Abosolo 1.18-19)*

<sup>3</sup> Iliā e nufulōie hamosebe amo bealahilā, Yudasa, Yesu hololōlo amea asigi bedefalahilā, muni giwi siliba nabūlasi ohodoa amo neala gaula, gobela ilo busa amolige, dafidilo asigi gāwi amolige neebēa obēgēlahilā <sup>4</sup> sāhalea, Nada dolō nafade afādē made hamoi hololōi amoda, asiala hamoi gabiola sāi. Amala sāsebegi, ilia sāla obēgēsalea, Dia hamoi goda nilile mademelē. Goda dihiēmelēla sāi. <sup>5</sup> Amala sāsebegi, Yudasaea muni amo Godeie mosō isogi ami sadia idogolahilā awāla, hīmu maagō bēola baagoi. <sup>6</sup> Amala hamosebegi, gobela ilo busa amolia muni amo neala gaula nea sāhalea, Goweada dolōie heale digamāia hamoi amea, muni goda negelo dibeā ami gedola negemolōda dofea mademelēla sāi. <sup>7</sup> Iliā ado afādē negelahilā, muni amea sege afādē nii. Sege amoda, nagaea sosobene hamolo dolō amōna nii. Udia dolō sege odoadila misi amoli baagosegi baumolōie sege nii. <sup>8</sup> Amala hamoi amo

\* **27:2:** Bailadida Olomo dolō. Olomo ilia, e Yu ilile gamane beaha aligilo gabena namialai. Yu ilia hilidomuda Yesu nufudala baagomolō uli gabugi, Olomo dolō amoliāmu nufudala baagomolō dialeala sāmōlōi dilo. Ameada, Yu ilia Bailadi neebēa Yesu sigi asi amo. Yone 18.31 bimalo.

helësëlahilä, sege amoda Heale Segela sälo, amase, walioge amala säha nea.\* <sup>9</sup> Amoda Godea bea sälo Yelemaeama aligila bea säi amo gausiala digai. Ado amoda gomalä. Ili muni giwi siliba nabülasi ohodoa amo neala gau. Bidi amoda Isilaleie malö odoaea dolö goie bidida gomalä säla negei. <sup>10</sup> Dafidilo Geloia na hamomalai amo gadola, nagea sosobene hamolo dolö amoie sege nimolöie, ilia bidi amo ila säla dëdëla negei dialea.

*Yesuma dida Yu udia dolöie beaha aligilo ginilela nabi*

*(Maga 15.2-5, Ulugu 23.3-5, Yone 18.33-38)*

<sup>11</sup> Yesu Gabenaie siigi nebegi, Gabenaea Yesuma nabahalea, Dida Yu udia dolöie beaha aligilo ginilela nabi. Amala nabasebegi, Yesuea säla obëgësalea, Dihä säse gomelëla säi. <sup>12</sup> Gobela ilo busa amoliage, dafidilo asigi gäwi amoliage, ea asiala hamoimelëla säsebegi, ea ado afädë made säla obëgëi. <sup>13</sup> Amasebegi, Bailadia ema nabahalea, Ili dima asiala hamoila säsebegi, dia made nabahalea nabi. <sup>14</sup> Hä, Yesuea ado afädëge made säla obëgësebegi, Gabena amo edefademalä fudugi.

*Yesu baagomäia nufuöla säi*

*(Maga 15.6-15, Ulugu 23.13-25, Yone 18.38-19.16)*

<sup>15</sup> Segeyo Ede amoie molö nasolo amo galada, Gabenaea galabaia negei afädë fisigähamu aligilo. Udia dolö gegedoi amolia dolö gowe fisigämola säse amo gadola, hilima fisigälasi. <sup>16</sup> Segeyo Ede amo gala, dolö afädë, ëi Balabasa galabaia negei dilo. Udia dolö sulubadelaea ie mala dawadigi. <sup>17</sup> Udia dolö yafie maala gegedoi nebegi, Bailadia ilima nabahalea, Na nowë dihilima fisigämäiala hamesebe. Balabasa fisigädule, ma Yesu, ema Afädë Memeleila sälo go fisigädulela nabi. <sup>18</sup> Amala nabi amoie mida, ilia Yesuma mudialhilä, ie naabogi gausi gabula helësësalea amai.

<sup>19</sup> Amaimo, e gudisalea filo amodaia sebegi, ie udiaea ado afädë säsisalea, Dolö mogoi goma afädë made hamomala. Mida, na walio simasia beala, e helësëla nie asigi edefade yöia idogimelëla säi. <sup>20</sup> Amai gaso, gobela ilo busa amoliage, dafidilo asigi gäwi amoliage, udia dolö gegedoi amolima Balabasa fisigähalea, Yesu nufuöla sämäia si nigilasi. <sup>21</sup> Amasebegi, hä, Gabenaea ilima nabahalea, Äüdä amolegi abodo dihilima fisigämäiala nabi. Amala nabasebegi, ilia säla obëgësalea, Balabasamelëla säi. <sup>22</sup> Amala säsebegi, Bailadia ilima nabahalea, Amai galëda, Yesu, ema Afädë Memeleila sälo goma, na abilia hamomäiala nabi. Amala nabasebegi, ili sulubadelaea säla obëgësalea, I fügäigi baala negemäiala säi. <sup>23</sup> Amalebe, ea ilima nabahalea, Mida edogi. Ea edo nafade hamoi gabiola nabi. Amai gaso, ilia gelolafali uuala sähalea, Eda i fügäigi baala negemäiala säha nelo. <sup>24</sup> Ea säse amo made nabahalea, ilia gelola üala dodogöla sämolö hamosebe amo bealahilä, Bailadia udia dolö gegedoi amolile sidaia naabo nigime hësalea sähalea, Dolö goie heale digaseda, asialada nema maademelë. Dihilima gomelëla säi. <sup>25</sup> Amala säsebegi, udia dolö amoli sulubadelaea säla obëgësalea, Ie healeda nilimage, nilile malömage diamiäiala säi.\* <sup>26</sup> Amala säsebegi, ea Balabasa hilima fisigäi. Amalahilä, odoaea Yesu fëgämaloi. Fëgälahlilä, e i fügäigi baala negemolö siigi mosalai.

*Ami dolö amolia Yesu gadiaboi*

*(Maga 15.16-20, Yone 19.2-3)*

<sup>27</sup> Amala hamosebegi, Gabena amoie ami dolö amolia Yesu sigi awäla, Beledoliama mosöa nogila digalahilä, ami dolö odoama gegedomalolahilä, e nogömaloi.\* <sup>28</sup> Ami nebegi, ilia ie fagulo gäi amo gila negesilahilä, fagulo bëi sedade bedefala salugasi. <sup>29</sup> Amalahilä, ëfë äyo gägäi neala nasigila amalela, ginüie busa gadoi hamola ie busagia salugasilahilä, i dama dagaboige ie naabo dafädimidäi gausi. Ili e mia emo gumu sasagala fia idogola salea, e gadiabola sähalea, Yu udia dolöie beaha aligilo gini-e, di go gabiola säha nelo.\* <sup>30</sup> Amalahilä, ilia e gopedela gagalala digi, amase, i dama dagaboi gausi amo fedela neala busagia nufudadigisa nelo. <sup>31</sup> Ili ema amala gagadiabosa nelolahilä, fagulo sedade amo holola, hile fagulofali amo salugasi. Salugasilahilä, ilia e i fügäigi baala negemolöie sigi asi.

*Yesu e i fügäigi baala negei*

*(Maga 15.21-32, Ulugu 23.26-43, Yone 19.17-27)*

<sup>32</sup> Ili amila doadigila afiaha dibegi, gaamu Sailini ami fii dolö afädë, ie ëida Saimono gausiala digai. Amalebe, ilia ema Yesuie i fügäi amo gaumalala eegei. <sup>33</sup> Afialahlilä, sege

\* **27:8:** Ado amea, walioge amala säha neala säi amoda, segeyo walio nili neebewëie made säi. Amoda Madiuea ie beba dëdësebe amo gaalu segeyo dilo amoie säi. \* **27:25:** Ie healeda nilimage, nilile malömage diamiäiala säi amoda gomalä helësëla säi. E nufudala heale digasebe amoie sëda, hili molöla sähalea säi. \* **27:27:** Beledoliama mosöda Gabenaie mosö edefade. Amogida ami dolö amoli aligilo. \* **27:29:** Ami dolö ilia Yesu gadiabola dahila neala, beaha aligilo ginia momadolo amo gadola momadolasi. Segeyo amo gaalu, beaha aligilo gini iliada, fagulo bëige, habuga gadoige salugala,

i dama dagaboige gaula filo negei.

ëi Gologoda besela galai. Gologoda amoda Busa Giwi Segela sälo. <sup>34</sup> Besela galalahilä, ilia wani ödäge gamogai ödäge gegoalahilä, egali muäia iasebegi, ea nabibilage, molö made helësei. <sup>35</sup> Amalebe, ilia e hä, i fügäigi baala negelahilä, ie fagulo gii amo nowëa nimabelela, sadu dahila, ie fagulo amo amala mogei. <sup>36</sup> Amalahilä, ili ami fia idogola, e idihë sefolalo. <sup>37</sup> Ili i fügäigi ie busa daia adomoi, ema gudisalea säi amo dëdësalea, Goda Yu udia dolöie beaha aligilo Gini Yesua dëdëla baala negei. <sup>38</sup> Amala hamolahilä, ebalä fa nelo dolö äudä, elö naabo dafädimadi, amase, elö naabo fefeädimadila i fügäigi baala negei. <sup>39</sup> Udia dolö ili amogi baagila afu mafusalea, ema busa dugagila digila gagadiabola <sup>40</sup> sähalea, Diada Godeie mosö haila digilahilä, segeyo ohodoagi ulimolöeai amo, di dihimu damula mosö. Dida Godeie malö galëda, i fügäia adogoila digamola säla baagila digisa nelo. <sup>41</sup> Amaimo, mala dawadigi amoliage, dafidilo asigi gäwi amoliage, gobela ilo busa amoliage, amo gadola wäla gadiabola sähalea, <sup>42</sup> Eada udia dolö odoa ugila negelo. Amai gaso, hi e ugila negemolöi made gabu. Eda Isilaleie beaha aligilo gini nea. I fügäia adogoila e walio digasada, nilia ema asigi afädë negemolö. <sup>43</sup> Ea Godema asigi bogia adogola nelo. Godea e hameseda, ea e ugila negemäia. Mida, ea sähaleada, Neda Godeie Malöla sälo ameala säha dilo. <sup>44</sup> Fa nelo dolö ebalä i fügäigi baala negei amoleage, amo gadola wäla ema nemoi.

### *Yesu baagoi*

*(Maga 15.33-41, Ulugu 23.44-49, Yone 19.28-30)*

<sup>45</sup> Eso mogogila awäla eso bégise gaaluge, sege sulubadela gasilasimu dilo. <sup>46</sup> Eso bégise gaalu, Yesuea gelolafali wela säia adahalea, Eli, Eli lama sabagadanila säi. Amoië mida gomäl, Nie Gode, nie Gode, dia ne edogi fisigisisala säi. <sup>47</sup> Amo nabalahlilä, odoa ami nefolalo amolia sähalea, Goeada Elaia wesebegola säi. <sup>48</sup> Hä, fadolofali amoligi afädë baluluia awäla, nelebo afädë dahudu gadoi wani ödä gamogai dibeä ami gelahlilä, i bidigi yaala, egali muäia i. <sup>49</sup> Amala hamosebegi, odoa amolia sähalea, Aso. Elaia maala, e damula misiabelela beaha aligidila säi. <sup>50</sup> Yesuea bu elö gelola sälahilä, ie namolö amo fisila, hame hä, mosaloi. <sup>51</sup> Amasebegi, fagulo edefade Godeie mosöa gosagisi dilo amo, gadogola gadelala digalahilä, elö eamu eamula negesi. Amase, fogolige maala, igige gäudäla digi. <sup>52</sup> Amase, baui amolige dogä negesebegi, Godeie udia dolö baagoi difolalo amoligi, yafie nowelasisi. <sup>53</sup> Yesu baagoi amo nowelasisiebegi, nowelasisi amoli baui amo digila awäla, gaamu Godea hile nafolai Yalusalame dibeä ami nogila digasebegi, udia dolö yafieä ili meli.

<sup>54</sup> Ami dolö hädali afädë beaha aligilo ameage, amase, ebalä Yesu idihë nefolalo amoliage fogoli misi amogige, nelebo hamoi amogige beala, edefademälä fudugila bedälahlilä sähalea, Wae! Goweda dofä Godeie malö gabula säi.

<sup>55</sup> Udiafali yafieä Yesu ugila negemolöie, Galilila e bégëla mofiai amolige, ami holöbö mia madela sidawewela nefolalo. <sup>56</sup> Magadala udia Melige, Yamesele Yosebelele eme Melige, amase, Sebediie malö äudä amolele emege, udia amoligi nefolalo.

### *Yesuie domalo baui*

*(Maga 15.42-47, Ulugu 23.50-56, Yone 19.38-42)*

<sup>57</sup> Deadifali, Alimadia nelegei yafie negelo dafidilo dolö afädë misi. Dolö amoië ëida Yosebe. Eege Yesuie bégëla aulo nelo. <sup>58</sup> E Bailadi neebee maalahlilä, Yesuie domalo amo ema imäiala nabi. Nabasebegi, Bailadia ami dolöea ema neala imalai. <sup>59</sup> Amasebegi, Yosebeä Yesuie domalo amo nealahilä, fagulo nigime baai made, hedabifali amea usuläla <sup>60</sup> gaula awälahlilä, hile igi äbä gähe duwi dilo amogi bausi. Bausilahilä, igi edefade afädë bebugula maala, idi amo dofogasila, e hä asi. <sup>61</sup> Magadala udia Melige, amase, Meli elö amoge, ele Yesu baui gaalu alömodi sulö.

### *Ami dolö amolia baui amo idihë nelo*

<sup>62</sup> Nelebo daialo segeyo amo baagia, segeyo amogi gobela ilo busa nefolalo amolige, Felesi dolö nefolalo amolige, Bailadi neebee awäla gegedolahilä <sup>63</sup> sähalea, Dafidilo, dahila nelo goea aso, made baagola nea sähalea, Segeyo äudä nelolahilä osodagi, ne nowelasi-molömelëla säi amo nilia helësäla obëgëimelë. <sup>64</sup> Amala säi amea, segeyo ohodoa gogi, odoaea baui amoië idi hedabola galahlilä, idihë namialamalo. Bégëla aulo amolia maala, ie domalo amo nealahiläda, udia dolöma hä bauia amila nowelasi-melëla säloea. Iliä amala hamola, dahila neala säsedä, ea dafidi dahila neala sälo amo baagila moholö gabumelëla säi. <sup>65</sup> Amala säsebegi, Bailadia ilima sähalea, Ami dolö odoa idihë aligilo namiaia diligali iahago. Dilia ili sigi awälahlilä, ilia bauia ami idihë namialamalo. Dilia gomälä hamomolöila asigisebe amo gadola hamola, baui hedabola gamalola säi. <sup>66</sup> Amala säsebegi, ili awäla baui amo hedabola galahlilä, odoaea idi galo igi amo bebugula auloea nofe negela, idihë aligilo amolima hedabola idihë namialai.

## 28

*Yesu e baagoiala nowela asi*

*(Maga 16.1-10, Ulugu 24.1-12, Yone 20.1-18)*

<sup>1</sup> Segeyo Sabada baagibua, saleleie mi gäwi segeyogi, eso mi gäwila säsälosebe amo gaalu, Magadala udia Melile, Meli elölea baui amo bea asi.\* <sup>2</sup> Ami nebegi, fogoli edefade misi. Dafidilo Geloie selesaia fii afädë Hebenila digahalea amai. Digalahilä, selesaia fii amea igi amo bebugula negesilahilä, e amodaia sulo. <sup>3</sup> Selesaia fii amoie odagida sege yabagelela yo digalo amo gadoi, amase, ie fagulo gäige falelafali fisi. <sup>4</sup> Amogi, idihë aligilo amoli ebalä bedähalea, ili emo gigisëla, baagoi gadoi hamoi.

<sup>5</sup> Amaimo, selesaia fiia udia amolema sähalea, Ali bedämabio. Aliada Yesu i fügäigi baala negei hogola misi amo, na dawamelë. <sup>6</sup> Eda wi maade. E negei diloa gowe bea misië. Mida, ea säi amo gadola, nowela asimelë. <sup>7</sup> Ali hä, aabela awäla, ie bögëla aulo amolima gomalä sāmalo. Eda baagoiala nowela asimelë. Dili baagila, edale Galili moholö awäha nea, e ami bimolömelëla sāmalo. Na hä, alima säi agui amomelëla säi. <sup>8</sup> Amala säsebegi, ele bedälage, edefademalä obeägilage, fodolofali bauia amila awäla, ie bögëla aulo amolima sāmölöie baluluia asi. <sup>9</sup> Awäha nebegi, Yesuea ele gausiala digala sähalea, Ali go gabiola säi. Amala säsebegi, ele e mia ga madela maala, ie emogi gaula digala, elea ie ëi gauia adai. <sup>10</sup> Amasebegi, Yesuea elema sähalea, Bedämabio. Aliada, nie nedoolalima, ili Galili mosalamalo. Awäseda, ilia ne ami bimolömelëla sāmölö mosalola säi.

*Idihë aligilo amolia säi*

<sup>11</sup> Udia äudä amole awäha nebegi, idihë aligilo odo awäla gaamu isogi digalahilä, ilia gobela ilo busa amolima nelebo sulubadela hamoi amo säla iaha maadei. <sup>12</sup> Amala säsebegi, gobela ilo busala, dafidilo asigi gäwi dolöbalä gegeadolahlilä, ilia ado afädë daiala negei. Ili muni malei neala, ami dolö amoligali iahalea <sup>13</sup> sähalea, Dilia gomalä sāmalo. Ie bögëla aulo amolia gasigi maalahilä, nili adidi dibegi, ie domalo amo fa niimelëla sāmalo. <sup>14</sup> Amasebegi, Gabenaea ado gowe nabaseda, amoda, nilia ebalä ado hahamogimolömelë. Dilia asiala hamoi made bimäiala säi. <sup>15</sup> Amala säsebegi, ami dolö amolia muni amo nealahilä, ilima säi amo gadola bögëi. Amaimo, walioge Yu ilia ado amomu säla daidosa nea.

*Yesuea ie bögëla auloma hamoi ilia hamomäiaie säi*

*(Maga 16.14-18, Ulugu 24.36-49, Yone 20.19-23)*

<sup>16</sup> Bögëla aulo gidälasi amoli Galili afulahlilä, segebidaia Yesuea säla negeia ami afiai. <sup>17</sup> Afulahlilä, ilia e beala, ie ëi gauia adai. Amai gaso, odoeada asigi äudä negei. <sup>18</sup> Amasebegi, Yesu e ili neebee maala nea, ilima sähalea, Hebeniiege, nagadaiauweiege, geloi sulubadela nema gausisa maadeimelë. <sup>19</sup> Amala hamoi amea, dili awalahilä, fifii asi sefolalebe amoli sulubadela nie bögëla aulo aligimäiaie sāmölö mosalo. Amalahilä, dilia Naadoie eigige, Malöie eigige, Eleloi Gesamiie eigige, ili ödägi gelasila, <sup>20</sup> na dilia hamomalai amo sulubadela ilia bögëla hamomäia olelemalo. Segeyo sulubadelagi ne dilibalä namolömelë. Amalamu awäla, aligila wagamolömelëla säi.

Hä amo.

\* **28:1:** Saleleie mi gäwi segeyoda, salele ede. Edolo niliada gifaladalüla sälo.

## Maga Neala olelo oboba

Ado mala hedabi Maga bebagi dëdëla negei amea, dafidi mi mi gäwila sähaleada, Godeie malö Yesu Gelesoie ado mala hedabila säla dëdëla negei dialea. Nilia Magaea dëdëi beaseda, Yesuea geloi hido elöi gaula nelo amoge, hamoi hamosa nelo amoge ulufala dëdëi. Yesuea mala olelesa nelo amoge, mugabe fedai nesila digisa nelo moge, udia dolöea nafade hamoi hësa nelo amoge, ea amo gadola hamosa neada, ie geloi amo olesa nelo. Yesuea hï ëida gomalä sälo. Dolöie malöla sälo. Dolöie Malö Namolö misi ameadada, ie namolö fisiga gala udia dolö yafie sigi obëgemolömelëla säi, (10.45)

Magaea Yesuea hamosa nelo amo sedalu yafie säi. Gasoda, Yesuea udia dolöma ado mala olelesa nelo amolida ea sedalu hedabola made säi. Magaea dafidida Ödägi gelo Yoneie sedalu sälahilä, Yesu e ödägi gei amoge mugabe Saidania e fedogola meli amoge, obobala dëdëlahilä, Yesuea hamoi geloi hamosa nelo amoge ulufala dëdëi. Amase elöda, Udia dolöea yöi elö elöla gausada ea boba hamomolö amoie ilima olelesa nelo.

Ïe bëgëla aulo amolia, mi gäwilafali, Yesuea nelebo hamosa nelo amoie mi fädäla dawa made nelo. Gaso, gelëla bebea awäha nea giso beagolei. Beaseda, udia dolö ilia Yesubalä ado neala yöi yafie ila säi dië bimolömelë. Ea ado mala hedabi dëdëla wagahalea, Yesu baagola nowela asi amo dëdëla negei dialea.

### Yesu misi amoda udia dolöma Godea Beaha Maadela Sigi Neebe amoie säla imolö misi

*(Maga 1.1-3.6)*

*Ödägi gelo Yonea ado säla iaha nelo*

*(Madiu 3.1-12, Ulugu 3.1-18, Yone 1.19-28)*

<sup>1</sup> Ado Mala Hedabi goda, Godeie malö Yesu Gelesoia dafidi mi gäwi amo dialea. <sup>2</sup> Bea sälo Aisaeäie bebagi ado dafidi dëdëla negei dibe amoda gowe.

Godea sähalea, Nabuö! Nie ado säla imolö mosalamalo amomada, dië idi fodolasimäia, ema dafidimola sämolömelë.

*Malagai 3.1*

<sup>3</sup> Sege falai udia dolö aligisia made ami nea afädëa wesalea, Dafidilo Gelo misiäia idi fodomolö amo dadaiaha namialo. Ïe idi amoda mogolafali fodolasimalola säha neamelëla

*Aisaea 40.3*

<sup>4</sup> Amala säla dëdëla negei dibe amo gadola, sege nafade udia dolö aligisia made ami ödägi gelo Yone e misi nelo. Ea sähalea, Dilia nafade hamoi amo Godea hëmäia, dilile iso asigi besulahilä, ödägi gemolö dialeala säla iaha nelo. <sup>5</sup> Yudia sege gaamu holöfali holöfali dibeamilage, Yalusaleme udia dolö sulubadelage, nefolalo amoli e nebea ami mafusa nelo. Mafula ilia nafade hamoi amo sisiaha maadesebegi, Yonea ili ödä Yodonagi gesa nelo. <sup>6</sup> Yone eda sugua gamele hiliä fagulo hamoi amo salugalahlilä sugua gafodo gadoia malibu negela nelo. Eada galiawage äwi ödäge naha nelo. <sup>7</sup> Ea ado mala säla iahalea, Ne dafidi misi neawe. Hobea ne baagia afädë moholö amoda, ne holöfali neebewe gadoi made, eda ilibia edefade neebe amo moholömelë. Ne hedabi made ameadada, na ie emo usililo ëfë gumusula dialea fisigamolö amo dofea made neawe. <sup>8</sup> Na dili ödäeamu gesa neawe, eada dili Eleloi Gesamia gemolömelëla sa namolömelëla säla iaha nelo.

*Yonea Yesu ödägi gelasi*

*(Madiu 3.13-17, Ulugu 3.21-22)*

<sup>9</sup> Segeyo amogimu Yesu e Disiligi Galiliie gaamu Nasalesela maasebegi, Yonea Yesu ödä Yodonagi gelasi. <sup>10</sup> Yesu ödägi gelahlilä ödägila fodolo agesua aliga adogoi amole, mu dusuia gase amo meli. Amala dusuia gasebegi, Gesamia haea maliabu gadoi amo digalahilä ema fise meli. <sup>11</sup> Amo gaalu, selesaia mosöala ado afädë säia idogosalea, Dida nie malö. Na dima edefademalä boba hamoi nea, nie iso asigia dima obeägisa neawela säi.

*Mugabe Yesuea nafade hamomabelela fedogola bimolö misi*

*(Madiu 3.1-12, Ulugu 3.1-18, Yone 1.19-28)*

<sup>12</sup> Ado amo säha maadeia gai amole, Godeie Gesamia Yesu e sege nafade udia dolö aligisia made ami mosäia fisiga gai. <sup>13</sup> E fisiga gaia ami segeyo nabülasi biyidia nebegi, mugabe Saidania Yesuea nafade hamomabelela fedogola bimolö misi. Yesu e sugua ilaba elö elöla nefolalebea ami nebegi, selesaia fi ilia e ugila negemolö misi.

*Yesuea hamoi mi gäwila Galili hamosa nelo  
(Madiu 4.12-17, Ulugu 4.14-15)*

<sup>14</sup> Yone galabaia negesebegi, Yesu e Galili awälahilä Godea Beaha Maadela Sigi Neebe amoie Ado Mala Hedabi säla iaha nelo. <sup>15</sup> Yesuea sähalea, Segeyo Godea daiala negei dilo amo walio wegi gausiai ameadä, Godea Beaha Maadela Sigi Neebe amoda ga madefali dialeamelä. Dili asigi besulahilä, Ado Mala Hedabi go gaula mogomalola säla i.

*Yesuea dolö biyidia seme digisa nebegi wei  
(Madiu 4.18-22, Ulugu 5.1-11)*

<sup>16</sup> Yesu e oabo Galili agesu nedaha nea beahamelebe seme digilo dolö äudä, Saimono ie edoo Ädulule seme digisa neebe meli. <sup>17</sup> Bealahilä Yesuea elema sähalea, Na alima udia dolö nelo mala oleledä. Ali ne awäsewe gadola bégëla misiëla säi. <sup>18</sup> Amala säsebegi, elea selégë amo fodolofali ami negesilahilä e bégëla asi. <sup>19</sup> Yesu e holöbö sedade awälahilä beahamelebe, Sebediie malö Yamese ie edoo Yonele dudaia ami nea selégë nuli amo hamogisa neebe meli. <sup>20</sup> Bealahilä fodolofali ele wesebegi, elele eedo Sebedige bidi nimolöie hamoi hamosa nefolalo amolige dudaia amilahilä ele Yesu bégëla asi.

*Yesuea dolö afädëma mugabe fedai nesila digi  
(Ulugu 4.31-37)*

<sup>21</sup> Yesuge udia dolö odoage ili Gabaniama gaamugi afiai. Segeyo Sabada gafe besela galasebegi,\* Yesu e gedolo mosöa ami nogila digalahilä, ea udia dolö ilima ado mala olelesa nelo. <sup>22</sup> Ea säla olelese amo nabalahlilä ili fudugisa sefolalo. Mida, Ado säla negei olelelo amolia olelelo amo gadola made, geloi hido elöi gaula nea olelese amogi. <sup>23</sup> Segeyo amo gala dolö mugabe fedai afädë gedolo mosöa ami maala sulo. Dolö amea üalala digila sähalea, <sup>24</sup> Nasalese fii Yesu-o, nili neebee wi dia edo hamomolö misi. Nili nufudadigimolöie misile. Nada di dawa. Dida dolö hedabi mogoifali, Gode hi e neebeala misimelëla säi. <sup>25</sup> Amala säsebegi, Yesuea mugabe amoma nemosalea, Adomabu. Dolö go digilahlilä mosöla säi. <sup>26</sup> Amala säsebegi, mugabe amea dolö amo neala amulämelasilahlilä üalala digila doadigila asi. <sup>27</sup> Amala hamosebegi, udia dolö sefolalo amoli sulubadela, fudugilahilä hilidomu säla didigahalea, Walio hamoi amoda edo gadoidu. Walio dolö goea ado säi amoda ado gähe geloi hido elöi gelola säimelä. Ea ado säseba, mugabe ilia nabelo gabula säi. <sup>28</sup> Yesuea hamoi amo fodolofali udia dolö Galilimadi nefolalo amoli sulubadelaëa nabala didigai.

*Yesuea udia dolö yafie wahilasisa nelo  
(Madiu 8.14-17, Ulugu 4.38-41)*

<sup>29</sup> Yesuge Yamese Yonege ie begela aulo odoa ilige gedolo mosöa amila Saimono Ädululea mosöa asi. <sup>30</sup> Saimonoie udia amoie eme domalo hégila oloi, imiddaia adi dilo amo, ilia fodolofali Yesuma säla i. <sup>31</sup> Säla iäsebegi, Yesu e udia oloi dibeä ami awälahlilä, naabogi gaula nowela ifosi. Amala hamosebegi, e hégila oloi dilo amo hogosa helela wahisebegi ea ili molö muäia neala i. <sup>32</sup> Deadi eso digase gaalu, udia dolö nefolalo amolia oloi difolalo amoli neala gaula, mugabe fedai nefolalo amolige sigi gaula digila Yesu neebee ami gegedoi. <sup>33</sup> Gaamugi ami udia dolö nefolalo amoli sulubadela idi galo hadai daia amimu gegedoi. <sup>34</sup> Amala hamosebegi, Yesuea udia dolö yafie olo elö elöla oloi difolalo amoli wahila digi, mugabe fedai yafie nefolalo amoli nesila digila digisa nelo. Amala hamosebegi, mugabe amolia Yesu eda gowe neala dawadigi nefolalebegi, Yesuea mugabe amolima dilia adomabula säi.

*Yesuea Galilimadi ado mala säla i  
(Ulugu 4.42-44)*

<sup>35</sup> Sege yomolö amo gaalu Yesu e nowela segea awäla, udia dolö aligisia made ami awälahlilä Godema adosa sulo. <sup>36</sup> Saimonoge ebalä nefolalo amoliage Yesu hogogola hobeala bégëi. <sup>37</sup> Beagolelahilä ilia ema sähalea, udia dolö sulubadelaëa di hogosa neamelëla säla i. <sup>38</sup> Amala säla iäsebegi, Yesuea säla obégësalea, Gamelä, Sege gaamu ga made dibeä ami ado mala säla imolö afiadi. Neda amo hamomolö misimelëla säi. <sup>39</sup> Amala sälahilä e Galili sege sulubadelamadi nawesa nea gedolo mosö nefolalebeadi amogi awälahlilä Yesuea ado mala säla iädigi, mugabe fedai nefolalo amoli nesila digisa nelo.

*Yesuea dolö gudubu hamoi afädë wahi  
(Madiu 8.1-4, Ulugu 5.12-16)*

\* **1:21:** Segeyo Sabadada Yu udia dolö ilile hele aligilo segeyoge, amase, Godeie ëi gauia adalo segeyoge dilo. Godea sege fii dibe amo sulubadela segeyo gafeiagi hamosa maadelahlilä, segeyo gifaladalügi hi e hele fila sulo. Isilale udia dolö ilia amo gadola hamomäia, ea segeyo Sabada daia. Segeyo Sabadada Edolo niliada gafela sälo. Mi Gäwi 2.2-3ge, Sigi Obégëi 20.8-11ge bimalo.



<sup>40</sup> Amala hamosa nebegi, dolö gudubu hamoi afädë Yesu neebee ami maalahlilä emu gumu sasagala fia idogola salea sähalea, Dia ne wahimäia helësëse, hä dia ne wahilasimolöi nebegola säi. <sup>41</sup> Amala säsebegi, Yesuea e bobasëlahilä ie naabo mogodigia gala, dolö amo diigisa nea sähalea, Na amala helësësa, wahimola säi. <sup>42</sup> Amala säsebegi, gudubu hamoi amo fodolofali hogosa helela wahi. <sup>43</sup> Yesuea e fodolofali mosalolahilä, ema gelola sähalea, <sup>44</sup> Nabuö! Di wahi go oböla odoama säla imabio. Gobela ilo dolö neebee a mea di bimäia olemolö mosalo. Amalahilä, udia dolö ilia bimäia di wahi go olemolöie, di hëmäia Mosesea säla negei dibe amo gadola nelebo afädë odala imalola säla i. <sup>45</sup> Amala säla i amo nabalahlilä gaso, dolö amo awäha neada, ema hamoi amo ili sulubadelama säla iia awäha nelo. Amala sälebeda, Yesu e ilile siigi gaamu dibe ami made awäla, udia dolö aligisia made gasi gala nelo. Amala gasi gala nebegi, sege sulubadelagi udia dolö nefolalo amoli Yesu neebee ami mafula gegedoi.

## 2

*Yesuea dolö afädë fii si wahilasi  
(Madiu 9.1-8, Ulugu 5.17-26)*

<sup>1</sup> Ami segeyo odoa nelolahilä Yesu e bu Gabaniama obëgëi. Yesu obëgëla misi neala säi amo udia dolö nefolalo amoli sulubadelaea nabaha maadei. <sup>2</sup> Nabalahlilä udia dolö yafie Yesu neebee ami mafula gegedoi a mea mosö isogige idilibage fimolö fu maade negegi dibegi Yesuea ilima ado mala säla iaha nelo. <sup>3</sup> Säla iaha nebegi, dolö afädë fii si sulo amo e neebee ami, dolö biyidiäea iwasala gaula misi. <sup>4</sup> Udia dolö yafie negegi a mea, ilia dolö amo Yesu neebee gaula moholö uli gabugi, mosö figüdaia gaula fedalahilä, Yesu e neebee amo gaalu mosö figi dusuia galahlilä dolö iwasala gaula misi dafu amo mumusogi salisi. <sup>5</sup> Ili asigi afädë negei nea hamosebe amo bealahilä, Yesuea dolö fii si amoma sähalea, Nie malö, dia nafade hamoi amoli na hësa maadeimelëla säi.

<sup>6</sup> Amala säsebegi, mala dawadigi dolö odoa sefolalo amolia asigiamu helësësalea, <sup>7</sup> dolö goea ado egoweda abeahäla sähadu. Eada Gode gagadesa nea. Gode eamu udia dolöe nafade hamoi amoli hëmölöi neala helësësa sefolalo. <sup>8</sup> Ili amala helësësa sebe amo ea asigia fodolofali bealahilä, ilima sähalea, Edoie dilia go helësësa dialea. <sup>9</sup> Dia nafade hamoi amoli hësa maadeila sämolöle ma, di nowela die fëo gaula nawesa namiëla sämolöle. Dolö fii si gowema ado aabeida abodo. <sup>10</sup> Amaimo, Dolöie Malöea nagadaiaawi nea, udia dolöe nafade hamoi amoli hëla digimolöie geloi gaula neebee amo dilia helësëmäia olesagomelëla säi. Amala sälahilä ea dolö fii si amoma sähalea, <sup>11</sup> Na dima sähago. Di nowela die fëo neala gaula dih mosöa mosalola säi. <sup>12</sup> Amala säsebegi, dolö amo nowelahlilä, udia dolö sulubadelaei sidaia ie fëo amo neala gaula fodolofali asi. Amala hamosebegi, ili sefolalo amoli sulubadelaea asigigi fudugilahlilä Godeie ei gauia adala sähalea, Siiba nelebo gowe gadoi hamose nilia melëlo mademelëla säla didigai.

*Yesuea Ilibai wei  
(Madiu 9.9-13, Ulugu 5.27-32)*

<sup>13</sup> Yesu e eoabo Galili agesu bu elö nedaha nebegi, udia dolö yafie e neebee ami mafula gegedoi. Gegedosebegi Yesuea ilima ado mala säla iaha nelo. <sup>14</sup> Säla iaha nelolahilä awäha nea, Alibiasaie malö Ilibai e dagisi muni nelo mosöa sebe amo bealahilä, Yesuea ema sähalea, Ne bëgëla misiëla säi. Amala säsebegi, e Yesu bëgëla asi.

<sup>15</sup> Yesu e Ilibaia mosöa molö naha sebegi, dolö dagisi nelo yafiege, dolö mala nafade hamolo yafiege, Yesula ie bëgëla aulola ilibalä gedola salea molö naha sefolalo. Dolö yafie amo gadoi yafieada Yesu awäse amo gadola bëgëla awähamu nelo. <sup>16</sup> Ado säla negei olelelo Felesi dolö amolia beahamelebe, Yesu e dagisi muni neloge, mala nafade hamologe, nefolalo amolibalä gedola salea molö naha sebe meli. Bealahilä ilia Yesuie bëgëla aulo amolima nabahalea, Mala nafade hamologe dagisi muni neloge, nefolalo amolibalä, e gedola salea molö naha sebegoda edoie nabi. <sup>17</sup> Amala nabasebegi Yesuea ilima säla obëgësalea, Udia dolö oloi made nefolalebe amolida, alögodä neebee aulo made. Oloi sefolalebe amolimü alögodä neebee aulo. Amo gadola wäla, ne misi weda, udia dolö hedabi nefolalebe amoli wemolö misi made, udia dolö nafade hamolo nefolalebe amoli wemolö misimelëla säla i.

*Yesuea molö made naala aligiloie säi  
(Madiu 9.14-17, Ulugu 5.33-39)*

<sup>18</sup> Molö nulo made segeyo amögida, ödägi gelo Yoneie bëgëla aulo amoliage Felesi dolö amoliage molö naala made aiyala nefolalo. Udia dolö odoa maalahlilä, Yesuma nabahalea, Yoneie bëgëla aulo amoliage Felesi dolöie bëgëla aulo amoliage molö made naala aligilo amogi, Die bëgëla aulo golia molö naha nebegoda mi edoie nabi. <sup>19</sup> Amala nabasebegi, Yesuea ilima säla obëgësalea, Dolö afädëa udia neahalea, udia dolö e damelë molö molö

gedoi hi ebalä sefolalebe amolima, dili molö made naala samialola samolöle. Udia nimolö dolö amo ilibalä seëda, ilia molö made naala made samolömelë. <sup>20</sup> Gaso, hobeala dolö amo odoaea sigi gaula asibua, ili molö made naala namolömelëla säi.

<sup>21</sup> Amala sälahilä Yesuea ado elö sähalea, Afädëa fagulo goofogi fagulo gähea baala asogelo made. Amala hamoseda, fagulo gähe amea gofo amo nulimolömelë. Amalahilä dafidi nuli amo gadola made bu edela nulimolömelë. <sup>22</sup> Amo gadolamu, dolö afädëa sugua meme gafodoea ödä i hamoi gofo amogida, wani ödä gähe dibe amo söga salelo mademelë. Amala hamoseda, wani ödä amea ödä i sugua meme gafodoea hamoi gofo amo dusulahilä, ödä i amoge wani ödä amoge, hä, nafademolömelë. Amala hamoloea, wani ödä gähe dibe amoda sugua meme gafodoea ödä i hamoi gähegi oselola säi.

*Yesuea segeyo Sabada gafegi hamoi made hamolo amoie säi*  
(Madiu 12.1-8, Ulugu 6.1-5)

<sup>23</sup> Segeyo Sabada gafegi Yesu e, ie bögëla aulo amolalibalä eladi gadoi ëi widi sagaido afiaha dilo. Afiaha dialea ie bögëla aulo amolia widi amole gägä faila nana awäha nelo. <sup>24</sup> Nana awäha neebe amo Felesi dolö ilia bealahilä Yesuma sähalea, Nilile mala säla negei dibe ameadä segeyo Sabada gafegi hamolo made amo die bögëla aulo golia damula hamosa nebege bimola säi. <sup>25</sup> Amala säsebegi, Yesuea ilima säla obögësalea, Siiba Debidia hamoi dëdëla negei dibe amo dilia nidela made neale. Debidige dolö odoa ebalä nefolalo amolige molö maadela sidëa baagosalea, <sup>26</sup> Abiada e gobela ilo Busa Edefade nebegi, Debidie e Godeie mosöa nogila digalahilä beledi Godegali odala i dilo amo neala mai. Beledi amoda odoaea nulo made, Gobela ilo amoliamu nulo negei amo ea nalahlilä, odoa ebalä nelo amoli muäia neala gaula awäla imelëla säi amo dilia made nidei neale. <sup>27</sup> Yesuea ilima säla wagala sähalea, Godea segeyo Sabada gafe hamoi amoda, Udia dolö fifi asi sefolalebe amolia segeyo Sabada gafe ugila negemäia hamoi mademelë. Udia dolö fifi asi sefolalebe amoli ugila negemäia hamoimelë. <sup>28</sup> Amala negei ameadä, Dolöie Malö amoda, segeyo Sabada gafeie Dafidilo neamelëla säla i.

### 3

*Segeyo Sabada gafegi Yesuea dolö afädë naabo nafadei wahi*  
(Madiu 12.9-14, Ulugu 6.6-11)

<sup>1</sup> Yesu e gedolo mosöa bu elö nogila digai. Mosöa amida dolö naabo elö amo balägädöla nafadei afädë sulo. <sup>2</sup> Udia dolö odoa sefolalo amolia Yesuma dia nafadela hamoila sämolölahilä, segeyo Sabada gafegi Yesuea dolö amo wahisebelela bimolöie ilia si dadaiaha sefolalo. <sup>3</sup> Yesuea dolö naabo nafadei amoma sähalea, Di nowela mogogi namolö misiëla säi. <sup>4</sup> Amala sälahilä ea ilima nabahalea, Nilia segeyo Sabada gafegi hedabi hamomolö amo dofeale ma, nafade hamomolö amo dofeale. Udia dolö hedabola namiäia damula moholö amo dofeale ma, baagomäia nufulö amo dofealela nabi. Amala nabasebegi, ilia säla obögëla made sefolalo. <sup>5</sup> Yesuea udia dolö sefolalo amoli sidawewela beahamelebe, ilile iso asigi geloi dibe amo beala yöi. Yölahilä ea dolö naabo nafadei amoma sähalea, Die naabo mogodigia gamola säi. Dolö amea naabo mogodigia gai amole ie naabo amo wahimolöi wahi meli. <sup>6</sup> Amala hamosebe amo bealahilä, Felesi dolö sefolalo amoli segea fodolofali doadigila awäla Heledo sosogo nefolalo amolibalä gege dolahlilä, Yesu baagomäia abilia hamomolödula säla djiäha dilo.

**Yesuea ie geloi olei, gaso hile segea fii amolia asigi afädë made negei**

(Maga 3.7-6.6)

*Udia dolö yafie oeabo agesua gegedoi*

<sup>7-8</sup> Yesula ie bögëla aulola ili sege ili neloa amo fisila Galili oeabo dibeami afiai. Ili afiasebegi udia dolö yafiea ili bögëla afiai. Sege Yudialage, gaamu Yalusalemelage, sege Idumialage, ödä Yodona dëgëla alämadilage, gaamu Daiamadilage Saidonomadilage sege amoligila udia dolö yafie sämolö asusugai Yesuea hamoi amo nabala e bögëla afialahlilä e neebea ami gegedoi. <sup>9</sup> Amala gegedosebegi Yesuea ie bögëla aulo amolima sähalea, Udia dolö yafie gegedoi amea ne fedöla dedelei gabugi, ne dudaia fedadelä dilia du afädë gaula maala ne neebe gaalu, ga made negesimola säi. <sup>10</sup> Ea udia dolö yafie dafidi wahilasi amo gadola, udia dolö oloi sefolalo amoliage ili wahilasimäialahlilä, ilia e digimolöie gegedoi amea dedelei. <sup>11</sup> Mugabe amolia e bealahilä ie emo mia gumusula dia digalahilä, üalala digila sähalea, Dida Godeie malömelëla säi. <sup>12</sup> Amala säsebegi, ea mugabe amolima gelola sähalea, Odoama ne Godeie malö neala säla imabiola säi.

*Yesuea abosolo giwilasi memelei*  
(Madiu 10.1-4, Ulugu 6.12-16)

<sup>13</sup> Yesu e segebidaia fedalahilä, dolö odoa hi hamei amoli misiäia wesebegi, ili e neebea ami misi. <sup>14-15</sup> Maasebegi ea dolö giwilasi amoli ebalä namolöie ili memelelahilä, ea ilile ei abosolo negei. Iliä Godeie ado mala säla imolö mosäiäge, mugabe fedai nesila digimolöie geloi iligali imolöiege ea ili memelei. <sup>16</sup> Giwilasi memelei amolile äida gowe ili. Saimono, Yesuea ie ei elö Fida negei amoge, <sup>17</sup> Sebediie malö Yamesege, ie edoo Yonege, Yesuea elele ei elö Boaneyisi negei. Nilile ado sälada sege gudusebeie malöla säla negei amolege, <sup>18</sup> Äduloge, Filibige, Badolomiuge, Madiuge, Domasage, Alibiasaie malö Yamesege, Dadiuisige, Selodo sosogo Saimonoge, <sup>19</sup> Yudasa Isagaliada, Yesu holölölo amoge. Giwilasi amoli Yesuea memelei. Amala memelea maadelahilä, Yesu e mosöa asi.

*Yesu e mugabe Belesabulubalä nea hamosa neebela säi*

*(Madiu 12.22-32, Ulugu 11.14-23, 12.10)*

<sup>20</sup> Udia dolö yafie bu gegedoi amea, Yesula ie bögëla aulola amolali molö molö fu made meli. <sup>21</sup> Amala hamoimelëla säi amo nabalahlilä, Yesu sosogo nefolalo amolia e bea asi. Mida, odoa ilia e gagaosa neala säi amogi. <sup>22</sup> Mala dawadigi dolö Yalusalemela digafui amolia sähalea, Mugabe Belesabuluda Yesuma fedai nea.\* Mugabe ilile busaea ema geloi iasegi, ea mugabe nesila digisa neamelëla säi. <sup>23</sup> Amala säsebegi, Yesuea ili mofiamolahilä ilima ado besula sähalea, Mugabe Saidani himuda abilia nesila digimolöi gabu. <sup>24</sup> Sege afädëgi fii hilimu mogela nuduseda, fii amoda geloi made bimolömelë. <sup>25</sup> Mosö afädëgi fii hilimu mogela nuduseda, mosö amoda gelola namolö mademelë. <sup>26</sup> Mugabe Saidania himu ado neala, e sosogo neebe amoli mogeseda, amoda dofä geloi made aligila, hogosa helesa maademolömelë. <sup>27</sup> Afädëa dolö geloi neebe amoie mosöa ie nelegei dibe amo fa nimolö moholöi mademelë. Ea dolö geloi amo dafidi naabo emoge nafodola negesiä ie mosöa nelegei dibe amo fa nimolö moholöi galë. <sup>28</sup> Na dilima dofä gelola sähago, Udia dolöea nafade hamoi amoli sulabadelage, gagadela ado nafade elö elöla säi amolige, hëla fisimolöi bimolömelë. <sup>29</sup> Be afädëa Eleloi Gesami gagadeseda, made hëmolö. Ie nafade hamoi amoda, walioge hobéalage hi ebalä diamolöi diamolömelëla Yesuea säi. <sup>30</sup> Iliä Yesu e mugabe fedai neala säi amo nabala ea ado amo amala säi.

*Yesuie eme edoolalida nowë*

*(Madiu 12.46-50, Ulugu 8.19-21)*

<sup>31</sup> Segeyo amo gala Yesuie eme edoolali mafula segea ifo baagido nea. Odoa ilima sähalea, Yesu e nili neebewi misialasebela sämola säi. <sup>32</sup> Amala säsebegi, udia dolö yafie Yesu amalela sefolalo amolia ema sähalea, Nabahale. Die dieme didoo dialfilali misi segea nea. Iliä di misialala säsebela säi. <sup>33</sup> Amala säsebegi, ea säla obögësalea, Nie neme nedoolalida nowë gabula säi. <sup>34</sup> Ea e amalela sefolalebe amoli sidawewela bealahilä ilima sähalea, Bimo. Neme nedoolalida sefolalebe gowemelëla säi. <sup>35</sup> Udiaeage dolöeage, Godea hamese amo gadola hamolo nefolalebe amolida, nedooge nalifige nemege amolimelëla säi.

## 4

*Yesuea ado besula, molö gägä fëfëila säi*

<sup>1</sup> Yesuea Galili oeabo agesua nea udia dolöma ado mala bu säla olelesa nelo. Udia dolö yafie gegedoi amea negegisebegi, du ödä daia dilo, amodaia Yesu e fila fedai. Udia dolö yafie gedoi amolida agesua nefolalo. <sup>2</sup> Yesuea ado besu yafie ilima olesalea säi amoda gowe. <sup>3</sup> Nabuö! Dolö afädëa gägä sagaido sadia gogola aligi asi. <sup>4</sup> Sadia gogola aligi awäha nebegi, gägä odoa idiafa daala negei amo haea maala, neala naha maadei. <sup>5</sup> Gägä odoa igi naga abelëidaia daala negelahlilä, gägä amea naga abelëi amodaia fodolofali bäui. <sup>6</sup> Bäui gaso, eso nea hëgisalea difi moholö asusugala ödölöla bausoi. <sup>7</sup> Amase, gägä odoa äyo gägäi neebea ami digai. Amoda äyo gägäi amobalä gegedola bäui amea widi gägä amo yau hahalea gägä made negei. <sup>8</sup> Gägä odoa naga hedabi dibeami daala negei ameada, hedabola bäulahlilä gägä negeimelë. Odoaeada gägä nabülası ohodoa negei. Odoaeada nabülası gafeia negei. Odoaeada nabülası emu nabülası negeimelëla säi. <sup>9</sup> Amala sälahilä Yesuea säla wagala sähalea, Dili gëhea galea galëda nabuöla säi.

*Ado besula sämolö mi dibegi säi*

*(Madiu 13.10-17, Ulugu 8.9-10)*

<sup>10</sup> Udia dolö yafie afiaha maadeibua e bögëla aulo giwilasi amola udia dolö odoa Yesubalä nefolalo amola ilia ea ado besula säi amoie ema mi nabi. <sup>11</sup> Amala nabasebegi, Yesuea ilima säla obögësalea, Godea Beaha Maadela Sigi Neebe amo helësemäia amoda dafidi ulufadigila made musügä negei dilo amo dilia helësemäia säla i amomelë. Be udia dolö segea nefolalebe amolimada ado besulamu säla iäha neebeweie <sup>12</sup> Mida.

\* 3:22: Belesabuluie ei elöda, Saidani. Madiu 12.22-28 bimalo.

Ilia siia beahamu nea gaso, dofä gowe gabula made beagolemölömelë. Ilia gëhea nabahamu nea gaso, asigia mi gowe gabula made helësëmolömelë. Ilia beagolela helësësa galebeda, ili asigi besusa maadesegi ilia nafade hamoi amo Godea hësa maadelabili-  
ola

säla i.

*Aisaea 6.9,10*

*Ado besula säi amoie bu awala säi*

*(Madiu 13.18-23, Ulugu 8.11-15)*

<sup>13</sup> Yesuea ië bëgëla aulo amolima sähalea, Ado besula säi amoie mi fädäla made helësëi neale. Made helësëi nea galëda, ado odoa besula säse amo sulubadela abilia helësëmolö gabu. <sup>14</sup> Dolö amea hawa fëfëi amo gadolada ado mala fëfëlo dolö e nea. <sup>15</sup> Ado mala idiafa digai amo gadoida, udia dolö odoaea ado mala nabasebegi, Godea ilile isogi ado mala sagasi amo, mugabe Saidani maala fodolofali neala gaula aulo nea. <sup>16</sup> Amase, udia dolö odoa widi gägä igi naga abelëidaia digai amo gadoi neebe amoliada, ado mala obeägila nabalahlä fodolofali neala gaulo. <sup>17</sup> Amai gaso, ili difi moholö ulisalea sedade made aligilo. Amalahilä ilia ado mala neala gau amoie yöi beasege, odoaea ili neala sëlasisege, ilia fodolofali digila aulomelë. <sup>18</sup> Udia dolö odoa giisi äyo gägäi damui fedaha dibe daala negei amo gadoi neebe amoliada ado mala nabalahlä gaso, <sup>19</sup> ilia nagadaia galu difolalebe amoligi säosäola helësëlahilä, muni edefade negemölöila, nelebo elö elöla gesami awäla helësëse amea, ado mala nabi amo yau hahalea gägä negelo made nea. <sup>20</sup> Gaso, udia dolö odoa naga hedabia molö gägä daala negei amo gadoi neebe amoliada, ado mala nabala asigi afädë negela neala gaulahlä, ilia gägä nabülasä ohodoa negela digi, nabülasä gafeia negela digi, nabülasä emu nabülasä negela digilo neamelëla säi.

*Gamalüe ado säi*

*(Ulugu 8.16-18)*

<sup>21</sup> Amala sälahilä Yesuea ië bëgëla aulo amolima sähalea, Afädëa gamali yola sagaseda faloea dabelole ma, imidi hawa negelole. Ai amala made hamolo, aulidaia negelomelë. <sup>22</sup> Nelebo musügä negei dibe amoda hobeala ulufadigisa maadela, udia dolöe nelebo dabela negei difolalebe amolida hobeala yo digai dibe ami ulufadigisa maademölömelë. <sup>23</sup> Afädëa di gëhe galea galëda, nabualola säi. <sup>24</sup> Ea aso ilima sähamu neamu sähalea, Ado dilia nabi amoda hedabola helësëmalo. Dilia odoagali mogela iäседа, Godeage amo gadola wäla diligali mogela iahalea odoage baala imölömelë. <sup>25</sup> Afädëa nelebo afädë gaula neebe amomada Godea odoa baala imölömelë. Afädëa nelebo afädë gaula made neebe amoda, ea holöfali gaula nea dofe gaula neala neebe amolida, Gode hi fedela nimölömelëla säi.

*Molö sagai bäulo amoie ado säi*

<sup>26</sup> Yesuea ado aso sähamu nea sähalea, Godea Beaha Maadela Sigi Neebe amoda gowe gadoi dialea. Dolö afädëa sagaido hawa fëfëla aligi awäha nelolahilä, <sup>27</sup> gasi sulubadelagi dolö amo daiala, yose nowela afu mafusa neë gaalu, hawa fëfëi amo duulu besela galala bäuse amoda gomälä bäusebela dolö amo hida dawa made aligilo. <sup>28</sup> Nagaea bäulasä gägä negelomelë. Dafidida bäudale bobagila, hobeala mumusu negelomelë. Hobeafali hodo hi e gägä negelomelë. <sup>29</sup> Molö amo nimölö galëda, dolö amo hi damulo. Mida, molö mumului nimölö segeyo besela galai amea.

*Ado besula masada gägäie säi*

*(Madiu 13.31-32,34, Ulugu 13.18-19)*

<sup>30</sup> Yesuea aso sähamu nea sähalea, Godea Beaha Maadela Sigi Neebe amo, nilia abodo gadoila sämolödu. Ado besula nilia abodo gadoima oodo beala sämolödu. <sup>31</sup> Amoda masada gägä gadoi. Gägä odoa gadoi made. Gägä amoda holöfaliäfiä. Ilia amo sagaiä sagalomelë. <sup>32</sup> Ilia sagai amo fedala edefadela aligiseda dägöala sagai odoa amo baagila awäla bäulomelë. Ië adomo edefade bafui amogida haea mafula bäu augi hawa ami mosö olelomelëla säi. <sup>33</sup> Udia dolö amolile asigia helësësedä helësëmäia Yesuea ado mala säla iahaleada, ado besulamu yafie säla iaha nelo. <sup>34</sup> Ea udia dolöma ado mala säla iahaleada, ulufala made säla iäla, ado besulamu säla iaha nelo. Ië bëgëla aulolali hilidomu neada, ea ado besula säla ilo amoie mi sulubadela ilima säla iaha maadei.

*Yesuea fo ödälebalä adoi*

*(Madiu 8.23-27, Ulugu 8.22-25)*

<sup>35</sup> Segeyo amo gala deadi eso digase gaalu, Yesuea ië bëgëla aulo amolima sähalea, Oeabo edefade goie agesu alogodigogi afiadila säi. <sup>36</sup> Amala sälahilä udia dolö yafie nefolalo amoli amilahilä, ili Yesu sulo du amodaia fila fedalahilä, eege hiligila fila afiai. Du odoage ili awäse amo gadola hobeala bëgëla afiai. <sup>37</sup> Afiaha dibegi, fo edefade gelola guula maalahlilä

oabo bubolela aidagula dudaia häila digala, du nobamolö hamose meli. <sup>38</sup> Amala hamose amo gaalu, Yesu eda du bidigi busa fugulo negela adi dilo. Amala adi dibegi ilia e didiigisalea sähalea, Säla Olelelo-o, di nowemo. Nili baagodelä hamosebe gowegi di holöfali fudugila made dialealela säi. <sup>39</sup> Amala säsebegi, Yesu e nowelahilä foma nemolahilä ödäma sähalea, Aeala aumamo. Fologomabula säi. Amala säi amole fo gelola misi amo boogelela ödä aidagula fedai amoge aumalasi. <sup>40</sup> Ea ie bégëla aulo ilima nabahalea, Edogi bedäha dialea. Dili Godema asigi afädë negei made nealela nabi. <sup>41</sup> Amala usila aumase amo beala, ili edefademalä bedälahlilä hilidomu sähalea, Fo elea ödä eleada ie ado nabelo gabu. Dolö weda nowëdula säha difolalo.

## 5

### *Yesuea dolö afädëma mugabe fedai nesila digi (Madiu 8.28-34, Ulugu 8.26-39)*

<sup>1</sup> Yesuia ie bégëla aulola ili oabo Galili agesu alömodi amogi awäla Gelasa fii mosöa besela galai. <sup>2</sup> Yesuea ödä du ami negesila awäha nebegi, dolö mugabe fedai afädë baagoi igi äbägi bausidola maaha nebegi gausiala digai. <sup>3</sup> Dolö amoda baagoi bausia amimu diaha aligilo. Dolö afädëa ie naabo emoge igi ëfëa gaula nafodomolöi made nelo. <sup>4</sup> Segeyo yafegi ilia ie naabo emoge igi ëfëa nafodosamu aligilo. Gaso, igi ëfë amo ea hësäla digisamu aligilo nelo. Geloj hido elöi amoda dolö afädëa e gaumulöi made nelo. <sup>5</sup> Dolö amoda gasi esoage baagoi bausiale segebidaialemu nawesa aligilo. Ea üalala gaula nawesamu neada hile domalo igia dagabosamu aligilo.

<sup>6</sup> Amala hamosamu aligilo amo, Yesu e aso wagadi made maaha neebe amo beala, e baluluia awälahlilä Yesuie emo mia gumusula dia digai. <sup>7</sup> Gumusula dialea gelola üalala sähalea, Gode Ilibiafali ilibia neebe amoie malö Yesu, dia nema abilia hamomolöie misi. Na dima Godeie ei nabasewegida dia ne së imabiola säi. <sup>8</sup> Ea amala gelola säi amoie mida, Yesuea ema dida mugabe, dia dolö go digila mosöla säsebegi amala säla obëgëi. <sup>9</sup> Yesuea ema nabahalea, Die ëida nowëla nabi. Ea säla obëgësalea, Nïe ëida Amala. Nilida holöfali made, maleimelëla säi. <sup>10</sup> Amala sälahilä ea Yesuma gelolafali sähalea, Segeweda digila mosalola sämabiola säi.

<sup>11</sup> Amo gaalu ami sugua yafie gau domala moosa nefolalo. <sup>12</sup> Mugabe amolia Yesuma gelolafali sähalea, Nili sugua nefolalebe gagowelima fedala namolö mosöla sämola säi. <sup>13</sup> Yesuea amala hamomola säsebegi, dolö amo digila mugabe amoli sugua nefolalo amolima fedai. Amala nogila fedalahilä gau mogobogi amogi baluluia didigafula ödägi nogila digaha maadelahlilä, sulubadela ödäea naha maadei. Sugua amoli gedolada dausini äudä gadoi ödäea mai. <sup>14</sup> Amala hamoi amo bealahilä, sugua sigi aligilo amoli fisäla awälahlilä, gaumu dibeaa amige mosö gägäwila asi dibeaa amige säsäla awäha nelo. Säi amo nabalahlilä udia dolö nefolalo amolia abilia gelola hamoi walebelela fädäla bea asi. <sup>15</sup> Ili Yesu neebaa awälahlilä beahamelebe, dolö dafidi mugabe yafie fedai nelo amo fagulo salugalahlilä, e asigi hedabi negei sebe amo beala ili bedäi. <sup>16</sup> Udia dolö Yesuea hamose melëlo amolia, udia dolö misi nefolalebe amea nabuäia dolö amoma mugabe yafie fedai nesila digi amoge sugua ödäea mai amoge ilima säla äaha maadei. <sup>17</sup> Amala säla äasebegi, ilia Yesuma gelolafali sähalea, Dida nilile segea wi namolö mademelë. Näiadodi namolö mosalola säi. <sup>18</sup> Amala säsebegi Yesu e dudaia fimolö awäha nebegi, dolö mugabe yafie fedai dafidi nesila digi amea, Yesuma nabahalea, Di awäsebe go gadola ne mudulela nabi. <sup>19</sup> Amala nabasebegi, Yesuea dolö amoma säla obëgësalea, Nebalä moholö made. Dafidilo Geloia dima hamoi amoiege bobasëi amoiege die sosogoma säla imolö dihi mosöa mosalola säi. <sup>20</sup> Amala säsebegi, dolö amea Gaumu nabülasi difolalebe amo sulubadelagi awälahlilä, Yesuea ema hamoi amo udia dolö nefolalo amolima säla äasebegi, ilile asigigi fudugisa nefolalo.

### *Yalusie idiwige, udia Yesuie fagulogi diigisebegi wahi amoge (Madiu 9.18-26, Ulugu 8.40-56)*

<sup>21</sup> Yesu e dudaia fila Galili oabo amo dëgëla obëgëla awäla agesua nebegi, udia dolö yafie mafula ea ado säse amo nabulö gedegi. <sup>22</sup> Amase amo gaalu, gedolo mosö beaha aligilo afädë misi amoie ëida Yalusi. Ea Yesu beagolelahilä ie emo mia gumusula dia idogolahilä <sup>23</sup> Yesuma gelola sähalea, Nïe nidiwi holöböda baagomolö ga madefali dialea. Dia dofä naaboea diigisegi made baagola wahimäia awähadula säi. <sup>24</sup> Amala säsebegi, ebalä asi.

Udia dolö yafie nefolalo amoliage e bégëla afiahalea negegila dedelela aligi afiaha dilo. <sup>25</sup> Afiasa amo gadola udia afädë gäheo i nabülasi afädëie odoai äudä heale olo olosamu aligilo amoge asi. <sup>26</sup> Udia ameada e wahimäiala alögoda yafie neebaa ami awähamu aligilo gaso, Ea së edefade meli. Amase, ea alögoda iligali muni iahamu aligilo gaso, e olo amo made wahila neala edesa aligilo. <sup>27</sup> Amala hamoi salea, ea Yesuea hamolo sedalu säi amo nabalahlilä, udia dolö Yesu bégëla afiasebe amolibalä awälahlilä e baagido maala ie

fagulogi diigi. <sup>28</sup> Ea hido asigiamu helēsēsalea, na ñe fagulogi diigiseda, neda wahimolöla helēsēi. <sup>29</sup> Ea Yesuei fagulogi diigi amole, heale olo oloi amo hogosa helela e fodolofali wahi gabula helēsēi. <sup>30</sup> Yesuea ñe wahilo geloi awāse amo helēsēlahilä, besula nea nabahalea, Nie fagulogi diigi amo nowēala nabi. <sup>31</sup> Amala nabasebegi, ñe bēgēla aulo amolia ema sähalea, Dibalä udia dolö yafie dedelela aligi afiaha dibewe dia beasegoda, ne nowēa diigila edoie nabahala säi. <sup>32</sup> Amala säse amo gaalu, e nowēa digisa walebelela sidawewela hogoi. <sup>33</sup> Udia amea ema hamoi amo helēsēlahilä emo gisisēla bedälahilä, Yesu mia ga madela gumusula dia idogolahilä, Ema hamoi amo sulubadela säla ñaha maadei. <sup>34</sup> Yesuea ema sähalea, Nie nidiwi-e, dia nema asigi afädē negei amea di wahigomelē. Olo amea dima bu elö made baamolö, dalulo baagui mosalola säi. <sup>35</sup> Yesuea säha nebegimu dolö odoa gedolo mosö beaha aligilo Yalusie mosöala misi. Maalahilä ilia ema sähalea, Die didiwi hä hame doala asi amoda. Olelelo dolö goma yö ñase go edoie la säi. <sup>36</sup> Iliä amala säsebegi, Yesuea auaulahilä gedolo mosö beaha aligilo amoma sähalea, Dia bedämabu. Godema asigi afädē negemalola säi. <sup>37</sup> Amala sälahilä udia dolö odoa nefolalo amolima dili misiabiola sälahilä, Fida Yamese ñe edoo Yonela ohodoa ilimu ebalä asi. <sup>38</sup> Gedolo mosö beaha aligilo amoie mosöa maligahamelebe, udia dolö yafie gege dolahilä didigaosalea goba fedaha dibe meli. <sup>39</sup> Beala e mumusogi nogila digalahilä ea ilima sähalea, Dilia edogi didigaola goba fedaha dialea. Udia malö goda baagui made, süwia adi dialeamelēla säi. <sup>40</sup> Amala säsebegi, ilia Yesubalä ösa sefolalo. Amasebegi, ea ili sulubadela segea nesila digilahilä, udia malö amoie eedo emelela ñe bēgēla aulo ohodoa amolali udia malö dusugala negei hogoli amogi nogila digai. <sup>41</sup> Yesuea udia malö amoie naabogi gaula nabeleia wesalea, Dalida gumi. Nilile ado adolada, Udia malö holöbö, na dima säha. Di nowemola säi. <sup>42</sup> Amala säi amole udia malö amo fodolofali nowela asi. Amala hamose amo beala udia dolö nefolalo amoli edefademalä fudugila bedäi. Udia malö amoie gäheo ida nabülasi afädēie odoai äudä. <sup>43</sup> Yesuea ilima gelolafali sähalea, Na walio hamoi amoda udia dolö odoama säla ñmabiola säi. Amala sälahilä, Ea ilima udia malö holöbö go molö muäia ñmola säi.

## 6

*Nasalese udia dolöea Yesu hamei made nelo  
(Madiu 13.53-58, Ulugu 4.16-30)*

<sup>1</sup> Yesuea sege amo digila ñe bēgēla aulolali hi e ödēla aligi segea ami bu obögēi. <sup>2</sup> Segeyo Sabada gafegi Yesu e gedolo mosöa ami awälahilä, udia dolöma ado mala olelesa nelo. Udia dolö yafie ea ado mala säse nabaha sefolalo amoli asigigi fudugilahilä sähalea. Ado goweda, dolö goea abidi niidu. Ema dawa edefade dibe goweda, dawa edo gadoidu. Ea melēlo made gadoige hamomolöi made gadoige hamose weda edodu. <sup>3</sup> Eda mosö olelo dolö, Meliie malö madele. Eda Yamese Yosese Yudasa Saimonola ilile edoo madele. ñe elefila ilida nilibalä wi sebe amoda. Iliä amala sälahilä, ema bimolö habobala hamei made nelo. <sup>4</sup> Amasebegi, Yesuea ilima sähalea, udia dolö fifi asi sulubadelada, bea säloie ado nabaha. Gaso, hile segeafali fii amoliage sosogo iliage hile mosöa fii amoliage ñe ei maademelēla säi. <sup>5</sup> Dolöea hamomolöi made gadoige melēlo made gadoige segea ami hamomolöi made gabugi ea hamola made nelo. Ea udia dolö oloi afädē afädēlamu naaboea diigila wahisa nelo. <sup>6</sup> Amala hamose amo beala ilia ema asigi afädē made negesebegi Yesu e fudugisa nelo. Amasebegi, ea Nasalese sege fisila udia dolö fii odoa ilima ado mala olelela aligi nawesa nelo.

**Yesuea ñe bēgēla aulo amolima ñe geloi olei, gaso, ilia e dawadigi made nelo.**

*(Maga 6.6-8.21)*

*Bēgēla aulo giwilasi amolima Yesuea hamoi ñ  
(Madiu 10.5-15, Ulugu 9.1-6)*

Amalahilä eda udia dolö nefolalebeadi ado mala olelela aligi nawesa nelo. <sup>7</sup> Yesuea ñe bēgēla aulo giwilasi amoli wela gege dōsebegi. Ea ili äudä äudäla afufumalola sälahilä, udia dolö mugabe fedai nefolalebe amoli nesila digamäia ea ilima geloi i. <sup>8</sup> Ea ilima sähalea, Dili afiahaleada galiamomu gaula mosalo. Nelegei odoa gaula mosabio. Molöge aduge muni salelogi salala gaula mosabio. <sup>9</sup> Emo usililo salugamalo. Fagulo äudä salugamabiola säi. <sup>10</sup> Ea ilima aso sähamu nea sähalea, Dili awäla sege afädēgi besela galala mosö afädēgi nogila digiseda, mosö amogimu nelolahilä dilia sege amo digila awäsolo amo gala giso mosö amo hä fisimalo. <sup>11</sup> Amase, sege odoagi besela galasegi, ami fii amolia mosö fu made ñala, dilia säse amoge made nabaseda, sege amo hä digila mosalo. Digila awähaleada, dilile emogi dao baai amo fēfēla salalahilä mosalo. Amala hamosedä, ilia helēsēsalea, nilia asiala hamoi amea amala hamosebela helēsēmolömelēla säi. <sup>12</sup> Amala säi amo nabala ili afialahilä, udia dolö ilima sähalea, dili asigi besumalola säla i. <sup>13</sup> Iliä amala säla ñalahilä, udia dolö yafie

mugabe fedai nefolalo amoli nesila digila digi. Udia dolô oloi yafie difolalo amolige ilia weli sôga negesebegi, wahisa maadei.

*Ödägi gelo Yone baagoi*

*(Madiu 14.1-12, Ulugu 9.7-9)*

<sup>14</sup> Udia dolôea Yesuie ëi säsäi asi ameadä beaha aligilo Gini Heledoea nabi. Odoaea sähalea, Ödägi gelo Yone dafidi baagoi amo bu nowelahilä obëgëla misi nea, geloi melëlo made gadoi hamosa neamelëla säha dilo. <sup>15</sup> Odoaea sähaleada, Eda Elaiä gabu. Amase, odoaea sähalea, Eda bea sälo siiba nelo amo gadoi gabula säi. <sup>16</sup> Heledoea ado amo nabalahlilä sähalea, Yoneä na muugi damui amo bu obëgëla maala neebe gadoi gabula säi. <sup>17-18</sup> Helodiasa eda dafidi Heledoie edoo Filibiie udia sulo amo hobeala Heledoea fedela nii. Amala hamosebegi, Yonea Heledoma sähalea, Dia didoie udia fedela neala dibalä sebegi dofea made hamoimelëla säi. Amala säsebegi, Heledoea ami dolô nefolalo amolima sähalea, Yone gaumulô mosalola säi. Amalebe ilia e igi ëfëa nafodolahlilä galabaia mosöa negei. Heledoea ie udia Helodiasa obeägmäia amala hamoi. <sup>19</sup> Ie udia Helodiasaea Yonema habobalahilä e baagomäia abilia nufulödula helësësa sulo. Gaso, nufulô fu made meli. <sup>20</sup> Mida, Heledo eada Yone eada dolô hedabi, Godeie siigi asigi mogoi neala helësëla bedälahlilä, eada Yone idihë nelo. Ea Yonea ado säse nabala obeägilo ameadä e asigi säosäla helësësa nelo. <sup>21</sup> Heledo e ägüla misi segeyo beala galasebegi gamane sigi aligilo nefolalo amolimage, ami sigi aligilo nefolalo amolimage, Galili segeie dafidilo nefolalo amolimage ea sähalea, Molô molô gegendomalola säi. Molô giasolo amo galada Helodiasaea Yone nufulô fu beagolei. <sup>22</sup> Segeyo amo gala ili molô naha dibegi udia malô Helodiasaie idiwü maalahilä sigoi. Heledoeage dolô odoa ebalä molô naha sefolalo amoliage, ea sigoi amogi hido elöla obeägi. Hido elöla obeägisebegi, ginia dolisä amoma sähalea, Sigosegoie nelebo afädë imose amo gadoi imolömelëla säi. <sup>23</sup> Ea naabo migalä diigila dolisä amoma sähalea, Nelebo afädë imoseda, na sege edefade beaha neebe amogi mogoi nofela imolömelëla säi. <sup>24</sup> Amala säsebegi, dolisä amo segea doadigila awälahlilä emema nabahalea, Ne edo imola sämolödula nabi. Amala nabasebegi, emea sähalea, Ödägi gelo Yoneie busa damula imola sämalola säi. <sup>25</sup> Amala säsebegi, dolisä amo fodolofali baluluia obëgëla awälahlilä Ginima sähalea, Ödägi gelo Yoneie busa damula falodaia gaula maala walio imäia hamesamelëla säi. <sup>26</sup> Amala säi amo nabalahlilä ginia edefademalä bobasëi. Gaso, dolô molô naha sefolalo amoli sidaia migalä diigila säi ameadä, fisimola sämolô uli gabula helësëi. <sup>27</sup> Amala helësëlahilä ea fodolofali ami afädëma sähalea, Yoneie busa damula gaula obëgëmolô mosöla säi. Amala säsebegi, ea galabaia mosöa awälahlilä Yoneie busa damui. <sup>28</sup> Damulahilä falodaia negela gaula maalahilä dolisä amoma i. Iäsebegi, dolisä ameadä emema i. <sup>29</sup> Amala hamoimelëla säi amo nabalahlilä ie bëgëla aulo amolia ie domalo neala gaula awäla igi äbägi bausi.

*Udia dolô yafiea molô mai*

*(Madiu 14.13-21, Ulugu 9.10-17, Yone 6-14)*

<sup>30</sup> Abosolo dolô amoli Yesu neebea obëgëla maalahilä, ilia hamoi amoge mala olelei amoge sulubadela ema säla iäha maadei. <sup>31</sup> Udia dolô afu mafusalea ili molô molô fu made beasebegi, Yesuea ilima sähalea, Nili udia dolô madeido hele namolô afiadila säi. <sup>32</sup> Amala sälahilä ili hilido ödä dudaia ffigila udia dolô madeido afiai. <sup>33</sup> Ili afiaha dibegi, udia dolô yafiea bealahilä ili awäha gabula helësëi. Amala helësëlahilä ili gaamu elögi elögila nagadabodo baluluia afialahlilä ili moholô awäsebea ami dafidi ilidale awäla besela galai. <sup>34</sup> Ili awäla ödä agesua besela galahamelebe, udia dolô yafie nefolalebe meli. Bealahilä ea ili edefademalä bobasëi. Mida, Ili sugua sibi sigi aligilo maadesalea, hilido aligilo amo gadoi neebe amo beala. Amalebe ea ilima ado mala yafie säla olelesa nelo. <sup>35</sup> Segeyo amo gala deadisebegi, ie bëgëla aulo amolia e neebea maalahilä ema sähalea, Sege udia dolô maadeia wimu nebegi hä deadisebegi. <sup>36</sup> Dia udia dolô nefolalebe gowe ili mosalala sämo. Afialahlilä hili molô bidia nimolô sagaia mosö dibeä amige gaamu holöfali dibeä amige hogogola mosäiamelëla säi. <sup>37</sup> Amala säsebegi, ea ie bëgëla aulo ilima säla obëgësalea, Ili molô muäia dilia imalola säi. Amala säsebegi, ilia ema säla obëgësalea, Muni gina hädali äudäea ili beledi muäia neala imolô afiadulela nabi. <sup>38</sup> Ea ilima nabahalea, Dilia beledi äobäläia ägüi walebelela bimolô mosalola säi. Beala maalahilä ilia ema sähalea, Niliäda beledi bia seme äudä amolemu ägüubela säi. <sup>39</sup> Amala säsebegi, ea ilima sähalea, Udia dolô sulubadela nudulu hamola giisi hedabidaia, gegendola ffigimalamalola säi. <sup>40</sup> Amala säsebe amo gadola säsebegi, odoada hädali afädë, odoada nabülasi bia gadoi dimu hamola ffigi. <sup>41</sup> Amala ffigi dibegi ea beledi bia amoge seme äudä amoge naaboea gaula nea, Ea selesäia mosöa sida adogola nea Godema nesegehlilä, ie bëgëla aulo amolia udia dolô iligali sogomäia beledi dagabodasila i. Amalahilä ea seme äudä amoge dagabodasilahlilä, ili sulubadelagali sogomalai. <sup>42</sup> Amala sogoi amo, ili sefolalo amoli dofea nahalea, <sup>43</sup> beledige semege odoa

fea digai amo bēgēla aulo amolia gegedola, adu giwilasi salala nobai. <sup>44</sup> Beledi seme naha sefolalo amoli dolōmuda dausini bia sulo.

*Yesu ōādabodo asi  
(Madiu 14.22-23, Yone 6.15-21)*

<sup>45</sup> Yesuea iē bēgēla aulo amoli fodolofali mosalolahilā sähalea, Dilidale dafidi ōdā dudaia fila oeabo go dēgēla alogodi sege ēi Bedesaida mosalola sāi. Amala sālāhilā udia dolō gegedoi amolima sähalea, Dilige dihili mosōa dusula afiamalola sāi. <sup>46</sup> Ili sulubadela hawio afiamalolahilā, eda Godema adomolōie segebidaia fedai. <sup>47</sup> Iē bēgēla aulo amoli dudaia fila asi amo oeabo mogogi gasise amo gaalu, segea amida Yesu e hīdo nelo. <sup>48</sup> Yesu e ami nea beahamelebe, du busamadila fo gelola maase amea ōdā adelo i amea ilia gelola adimolō iliawasebe amo meli. Haea gāmolō amo gaalu, Yesu e ōādabodo ili neebee ami moholō asi. Ea ili baagila moholō awāse <sup>49</sup> amo gaalu, ilia e ōādabodo maase amo beala, mūgabedula helēsēlahilā ūalai. <sup>50</sup> Ili sulubadela bealahilā edefademalā bedāsebe amo bealahilā, Ea ilima fodolofali sähalea, Asigi hā gelomalo. Weda nemelē. Bedāmabiola sāi. <sup>51</sup> E maala ilibalā dudaia fii amole fo maala made boogelei. Amala hamosebegi, ilile asigigi edefademalā fudugi. <sup>52</sup> Iliada ea udia dolōea muāia beledi i amoie mida fādāla made helēsēi nelo. Ilile iso asigi gai nelo.

*Yesuea Genesaledi ami udia dolō oloi yafie wahi  
(Madiu 14.34-36)*

<sup>53</sup> Yesula iē bēgēla aulola ili oeabo amo dēgēla alāmadi sege ēi Genesaledi besela galalahilā ōdā du amo ēfēa begela agesua ami negesi. <sup>54</sup> Du negesiā maaha neebe amo udia dolō nefolalo amolia fodolofali bealahilā, Yesu gabula helēsēi. <sup>55</sup> Amala helēsēlahilā fodolofali ili sege dibe amo sulubadelagi baluluia afufulahilā udia dolōma sāla iaha maadei. Udia dolō Yesu misi neala sāi nabi amoliada, oloi difolalo amoli iwasala gaula Yesu neebee ami misi. <sup>56</sup> Sege dibe sulubadelagige gaamu dibe sulubadelagige, mosō dibe sulubadelagige Yesu e awāla besela galasebea amida, udia dolō nefolalo amolia oloi difolalo amo gaula mafula magaiā gaamugi negesisi. Negesiā ilia Yesuma gelola sähalea, Oloi gowe ilia die fagulo bidigimu diigimāiamelēla sāi. Oloi amoli sulubadelaea amala diigisebegi, wahisa maadei.

## 7

*Godeie Ado sāla negei amea māu ilile ado baagi  
(Madiu 15.1-9)*

<sup>1</sup> Felesi dolōge ado sāla negei olelelo dolō odoā Yalusalemela misi amolige gegedolahilā ili Yesu neebee afiai. <sup>2</sup> Ili beahamelebe iē bēgēla aulo odoaea naabo nigime hēla made molō naha sefolalebe amo meli. <sup>3</sup> Felesi dolō iliage Yu udia dolō sulubadelaage māu ilia aiyalo mala negei amo helēsēlahilā naabo nigime hēla madeda molō nūlo made nelo. <sup>4</sup> Ili magaiā gaamugi awāla obēgēla maalāhilā nigime made hēla molō nūlo made nelo. Ōdā ige faloge gaabo ige aiyala nigime hēlo negei amo gadola aiyala hamolo odoā yafie negei. <sup>5</sup> Felesi dolō amoliage mala dawadigi dolō amoliage emā nabahalea, Die bēgēla aulo golia māu ilile aiyalo mala dibe amo damula naabo nigime hēla made buludola molō nase goda edoīela nabi. <sup>6</sup> Amala nabasebegi, ea ilima sāla obēgēsalea, Siiba Aisaeaea asigi fea negelo dilile hedabola bea sāla negeimelē. Ea bea sāla dēdēi amoda gowe, Udia dolō ilile iso asigi wagadi made negesiā adoeamu nīe ēi gauia adalo nea. <sup>7</sup> Ili dolōfāea mala sāla negei amomu olelesaleada, Godeie adoda amomelēla sālo nea. Amaimo, ilia nīe ēi memalā gauia adalo nebegola

sāla dēdēla negei dialeala Yesuea sāi.

*Aisaea 29.13*

<sup>8</sup> Dilia Godeie mala sāla negei dibe amo fisilahilā dolōie aiyalo mala dibe amomu gelola hamosa nebegola sāla i. <sup>9</sup> Yesuea ilima aso sāhamu nea sähalea, Dilile aiyala hamolo mala amo hamosalea. Dilia Godeie mala sāla negei dibe amo fisi gabu. <sup>10</sup> Amoie Mosesea ado sāla negesalea, die diado diemele hawa nea elele ado nabala bēgēla hamomalola sālāhilā sähalea, Afādēa iē eedo emele gadiaboseda, baagomāia nufulō dialeala sāla negei dialea. <sup>11-12</sup> Amai gaso, dilia gomalā sālomelē. Afādēa nelebo amoligi Gobana sāseada eada eedo emele ugila negemolō mademelēla sähalea sālo, Gobana nīlile ado sālada Godegali odala i neawe. <sup>13</sup> Amalo ameadā, dilia māu ilia aiyala hamolo mala olelei amomu hamosa neada, dilia Godeie ado fisilahilā mala amo gadol yafie hamosamu aligilomelēla sāi.

*Yesuea udia dolō neala nafadelo amoie sāi  
(Madiu 15.10-20)*

<sup>14</sup> Yesuea udia dolō nefolalo amoli bu misialolahilā ilima sähalea, Dili sulubadelaea na sāsebewe nabala hedabola helēsēmalō. <sup>15-16</sup> Nelebo segea dilo dolō isogi digase ameadā udia dolō neala nafadelo mademelē. Nelebo isogi dilo segea doadigila awāse amea udia



dolô neala nafadelomelêla sai. <sup>17</sup> Amala sâlahilâ udia dolô amoli amilahilâ e mumoso isogi digala sebegi, ïe bégêla aulo amolia ema nabahalea, Ado besula sai amoiê mida edodula nabi. <sup>18</sup> Amala nabasebegi, ea ilima sâhalea, Dilige aso asigi made gâwi neale. Nelebo sulubadela segea dilo isogi digase ameadâ, udia dolô Godeïe siigi nigime baalo made amo, dilia dawa made neale. <sup>19</sup> Molô nase amoda asigigi aulo mademelê. Gaisagi digalahilâ segea doadigila aulomelêla sai. Ado amoiêda Yesuea gomalâ sâhalea sai. Molô sulubadela nase ameadâ Godeïe siigi nigime baalo mademelêla sai. <sup>20</sup> Ea sâhamu nea sâhalea, udia dolôïe iso asigigi besela galasebe ameadâ, udia dolô Godeïe siigi nigime baalomelê. <sup>21</sup> Udia dolô ilile iso asigigila besela galalo amoda gowe. Asigi nafadege, nelegei fa nimolôge, udia dolô baagomâia nufulôge, udia dolô susugu hamomolôge, hilimu nafade odoa hamomolôge, <sup>22</sup> Udia nii susugu hamomolôge, gesami moholôge, mala nafade elô elôla hamomolôge, wâfalî sâmolôge, nafade memelela made sulubadela hamomolôge, mudiamolôge, wâfalî sâsâla hololômolôge, gugusâmâia hamomolôge, asigi maade gadoia hamolo wâla hamomolôge. <sup>23</sup> Nafade amoli sulubadela asigigila besela galasebe amea udia dolô Godeïe siigi nigime baalomelêla sai.

*Fonisia fii udia afädêa Yesuma asigi afädê dofâ negei  
(Madiu 15.21-28)*

<sup>24</sup> Yesu e sege amo digîla gaamu Daiamadi asi. Awâlahilâ e mosô afädê neebee amoiê mumusogi digai. Udia dolô nefolalebe amolia e neala made helêsêmâia nelo gaso, e musügâ fimolôï made nelo. <sup>25</sup> Amala nebegi, udia afädêïe idiwi holôböma mugabe fedai sulo. Amoiê emea Yesu neala sai amo nabalahilâ, e fodolofali maalahilâ Yesuïe emo mia gumusula adi. <sup>26</sup> Udia ameadâ Giligi ado adolo. Eda Silia Fonisia fii udia. Ea Yesuma gelola sâhalea, Nie nidiwi holôböma mugabe fedai sebe amo dia nesila digamâia helêsêsamelêla sâla ï. <sup>27</sup> Amala sâsebegi, ea udia amoma sâhalea, Molô nahalea dafidi malô ilidale ïmolô galea. Malôïe molô dibe amogida ügüloea muâia sadia gala ïmolôï made galeala sai. <sup>28</sup> Amala sâsebegi udia amea sâla obêgêsalea, Dafidilo-o, dofâ gaso, malêsâea molô nahalea iso dusula fisia digaida ügüloea neala nûlo madelela sai. <sup>29</sup> Amala sâsebegi Yesuea udia amoma sâhalea, Dia ado sai ameadâ diê didiwima mugabe fedai amo hâ asimelê. Di hâ mosôa obêgêmalola sai. <sup>30</sup> Udia amo hi mosôa obêgêlahilâ beahamelebe, ïe malôma mugabe fedai amo doadigila asi, diasia dofea dibe meli.

*Dolô afädê gêhe gaala ado dadabi wahi*

<sup>31</sup> Yesu e Daiamadila obêgêla awâla gaamu Saidono awâlahilâ Gaamu Nabûlasimadi nawesa nelolahilâ Galili oeoabo edefade dibeami awâla besela galai. <sup>32</sup> Udia dolô nefolalo amolia dolô afädê gêhe gaala ado dadabi nelo amo e neebee ami sigi maalahilâ, Yesuea e naaboea diigimâiamelêla sâla ï. <sup>33</sup> Amala sâsebegi, ea udia dolô nefolalo amoli amilahilâ dolô amole hefedo aliga galahilâ, ïe naabo sôgôea dolô amoiê gêhe helegelagi diigilahilâ, hîle naabo sôgôgi gofedela galalahilâ, dolô amoiê elîgi diigilahilâ <sup>34</sup> selesâia mosôa sida adogola nea hame hêia fedalahilâ sâhalea, Efadala sai. Nilile ado adolada, Gêhe gai dugimo. <sup>35</sup> Amala hamosebegi, dolô amoiê gêhe doga negela, ïe eli fodolofali hedabolasilahilâ ado hedabola sai. <sup>36</sup> Yesuea udia dolô nefolalo amolima gelola sâhalea, Walio meli amo udia dolô odoama sâla ïmabiola sai. Sâmabiola sâla ïahamu neebe amo nabalahilâ gaso, ilia auaula sâla ïahamu nelo. <sup>37</sup> Udia dolô amolia ado amo nabala ili asigigi edefademalâ fudugilahilâ sâhalea, Ea hamosebego sulubadela hedabola hamosebe. Gêhe gai nelo amo doga negela digi, adolo made nelo amo hedabola adomâia hedabolasilo neala sâha nelo.

## 8

*Yesuea udia dolô dausini biyidiagali molô ï  
(Madiu 15.32-39)*

<sup>1</sup> Segeyo amo gala udia dolô yafie bu gegedoi amoli molô molô made gabugi, Yesuea ïe bégêla aulo amoli mofiamolahilâ ilima sâhalea, <sup>2</sup> Udia dolô gegedoi gowe ili nebalâ segeyo ohodoa nelo amea hâ molô molô maade gabugi asigisebemelê. <sup>3</sup> Na ili sidêa baagoi amola wâla hili mosôa mosalaseda, ïli idiafa si dädâbêlela digamolô gabumelê. Odoada sege wagadi madela mofiai gabula sai. <sup>4</sup> ïe bégêla aulo amolia ema nabahalea, Nili sege nafadeia neebe ameadâ, udia dolô nefolalebewe ili muâia, nilia molô abidi nea awâla nimolôdula nabi. <sup>5</sup> Amala nabasebegi, Yesuea ilima nabahalea, Dilia Beledi abolâia galebela nabi. Iliã ema sâla obêgêsalea, Nilia gifalâdalâia galebela sai. <sup>6</sup> Amala sâsebegi, Yesuea udia dolô nefolalo amoli nagadaia fifigimalola sai. Amala sâlahilâ ea beledi gifalâdalâia amo gaula nea, Godema nesegelahlilâ, dagabodasila ïe bégêla aulo amolima sogomâia ïasebegi, ilia udia dolô sefolalo amoligali neala sogoi. <sup>7</sup> Iliã seme nelêsa naabo safô ägüi amoge, ea nesegelahlilâ udia dolô iligali sogomâia ï. <sup>8</sup> Udia dolô sefolalo amoli sulubadela dofea naala, bolesalea fea digai amo ilia adu gifalâdalâia salala nobai. <sup>9</sup> Udia dolô amolida dausini biyidia gadoi

nelo. <sup>10</sup> Yesuea udia dolô amoli hä afiamalola sälahilä, ie bégëla aulola ilida fodolofali ödä dudaia fila Dalamanagera segeamadi asi.

*Ilia Yesuma dolôea hamomolôï made gadoi hamomola säi  
(Madiu 16.1-4)*

<sup>11</sup> Felesi dolô odoa Yesu neebee maalahlilä ebalä gégësalea. Dolôea hamomolôï made gadoi nofe elôï afädë selesaia mosôala misi dia hamomola säi. Ilia e amala fedogola beasebegi, <sup>12</sup> Yesuie iso asigigi yöla hame hëia fedalahilä sähalea, Udia dolô walio nefolalebe welia dolôea hamomolôï made gadoi nofe elôï hamosebe amo bimolôie hogosa nebegeöï mida edo! Na dilima dofä gelola sähago. Udia dolô walio nefolalebe welima, dolôea hamomolôï made, nofe elôï afädë dofä made hamomolômelëla säi. <sup>13</sup> Amala sälahilä, ili ami dögila e dudaia bu fila, oeabo edefade amo näiadi alômodi amogi asi.

*Ado besula Heledo Felesilele yidila säi  
(Madiu 16.5-12)*

<sup>14</sup> Ie bégëla aulo amolia beledi ägüla made elabola asi. Dudaia amida, ilile beledi afädëfalimu dilo. <sup>15</sup> Yesuea ilima gelola sähalea. Felesi dolôiege Heledöiege beledi edelo yidi dibe amo helësëlahilä, hedabola idihë namialola säi. <sup>16</sup> Amala säi amo nabalahlilä ilia hilidomu sähalea, Ea säse egoweda, nilia beledi ägüla made misi amoie säsebelemëla säha dilo. <sup>17</sup> Ilia säi amo ea helësëlahilä ilima sähalea, Nilia beledi made ägüi amoie säsebegola säha dibegoda edoie! Dilia fädäla helësëla made nelo amomu nea, dawa made neale! Ma, dilile iso asigi gai, aso, neagole! <sup>18</sup> Dilile si galea gaso, dilia made beasebele. Gëhe galea gaso, dilia made nabahalea. Dilia elaboile! <sup>19</sup> Amo gala beledi bia ameamo dolô dausini biaea muäia, dagabodasi amo nalahlilä, fea digai amo dilia neala, adu aboläia nobala salila nabi. Amala nabasebegi ilia ema säla obëgësalea, Adu Giwilasila säi. <sup>20</sup> Ilia amala säsebegi ea ilima sähalea, Udia dolô dausini biyidäia muäia beledi gifalädälia dagabodasi amo nalahlilä, fea digai amo adu aboläia nobala salila nabi. Ilia ema säla obëgësalea, Gifalädäliä säi. <sup>21</sup> Amala säsebegi, ea ilima sähalea, Dilia fädäla made helësëla nelo amomu aso neagolela säi.

## **Yesuea ie bégëla alo amoli olelesa nelo**

*(Maga 8.22-10.52)*

*Bedesaida dolô afädë si golai wahi*

<sup>22</sup> Yesula ie bégëla aulolali afiala Bedesaida segea besela galai. Dolô odoaea dolô afädë si golai nelo amo e neebee sigi maalahlilä ema sähalea, Dolô gowe dia naaboea diigimäiamelëla säi. <sup>23</sup> Amala säsebegi, Yesuea dolô si golai amo naaboea gaula mosö dibeä amila segea sigi awälahlilä, Ea dolô si golai amoie sihidooa gofedela galala ie naaboea diigilahlilä dolô amoma nabahalea, Nelebo beasebelela nabi. <sup>24</sup> Amala nabasebegi, dolô amea busa fädägägia adogola bealahilä sähalea, Dolô nawese dibe beaha gaso, i gadoi nawese beasebelemëla säi. <sup>25</sup> Amala säsebegi, Yesuea dolô amoie siigi bu elô diigisebegi, dolô amea si gadaea gala beasebegi ie si wahilahlilä nelebo sulubadela beaha maadei. <sup>26</sup> Amala hamolahilä Yesuea dolô amoma sähalea, Mosö yafie dibeadi amogida mosabio. Dihï mosöa mosalola säi.

*Fidaea afädë Memelei amo dofä dimelëla säi  
(Madiu 16.13-20, Ulugu 9.18-21)*

<sup>27</sup> Yesula ie bégëla aulolali Sisalia Filibai gaamumadi sege odoa dibeadi amogi afiai. Idiafa awäha difolalea ea ie bégëla aulo amolima nabahalea, Udia dolô nefolalebe amoliada neda nowë neala säha difolalebela nabi. <sup>28</sup> Amala nabasebegi, ilia ema säla obëgësalea, Udia dolô odoaeada, ödägi gelo Yone neala säla digi, odoaeada, Elaia neala säla digi, odoaeada, bea sälo dolô afädë neala säla digisa neamelëla säla i. <sup>29</sup> Amala säla iasebegi, ea ilima nabahalea, Diliada ne nowë neala säha neala nabi. Fidaea ema säla obëgësalea, Afädë Memelei amoda dofä dimelëla säi. <sup>30</sup> Amala säsebegi, Yesuea ilima gelola sähalea, Neda amomelë, odoama säla imabiola säi.

*Yesu e baagola nowemolômelëla säi  
(Madiu 16.21-28, Ulugu 9.22-27)*

<sup>31</sup> Yesuea ie bégëla aulo amolima mi gäwila säla olelesalea, Dolôie Malö amoda së edefade molômelë. Dolô dafidilo neebe amoliage, gobela ilo busa neebe amoliage, mala dawadigi neebe amoliage, ema habobalahilä ilia e baagomäia nufulômelë. Segeyo osodagi hï bu nowela galamolômelëla säla i. <sup>32</sup> Ea ilima ado amo mogola säla i gaso, Fidaea Yesu sigi aliga galahlilä, amala made sämalola nemoi. <sup>33</sup> Amala säsebegi, Yesu besula, ie bégëla aulo amolima siila nea, Fidama nemosalea, Saidani, ne neebeawi namolô made. Mosó! Diada Godea helësëlo amo gadola made, dolôfäea helësëlo amo gadola helësësebela säi. <sup>34</sup> Amala sälahilä, ea udia dolô nefolalo amolige, ie bégëla aulo amolige mofiamolahilä ilima sähalea, Afädëa ne bégëla moholô helësëseba, hï hamea hamela helësëlo amo fisila, hïle i fügäi gaula,

ne bēgēla moholō dialea. <sup>35</sup> Afādēa hīle namolō amo gaula fēdōla aligiseda, iē namolō amo hogosa helemolōmelē. Amai gaso, afādēa nege, nīe Ado Mala Hedabige helēsēla hīle namolō amo fisiseda, eada iē namolō amo gaula namolōmelē. <sup>36</sup> Afādēa nagadaia nelebo dibe amoli sulubadela gaula neēgi hī e baagoseda, nagadaia nelebo amea, hī e abeahāla ugila negemolōdu. <sup>37</sup> Afādēa bidi edo iālahilā, hīle namolō amo hī bu nea obēgēmolōdu. <sup>38</sup> Udia dolō Godeie mala made nabelo nefolalebe amolige nafade namolo nefolalebe amolige bealahilā, afādēa nemage, nīe ado malamage hewaseda, Dolōie Malō amo Eedoie yo digalo hīdo elōibalā, selesaia fii hedabifalī amolibalā obēgēsolo amo gala, eage dolō amobalā hewamolōmelēla sāla i.

## 9

<sup>1</sup> Ea ilima sähalea, Na dilima dofā sähago. Dili walio nebege odoa baagola made neēgi, Godea Beaha Maadela Sigi Neebe amoie, geloi edefademalā maase amo bimolōmelēla sāla i.

*Yesuie domalo bedefala elōi neebe meli*  
(Madiu 17.1-13)

<sup>2</sup> Segeyo gafeia nelolahilā, Yesu Fida Yamese Yonelali hilidofalī segebidaia fedala nefolalo. Iia beahamelebe Yesuie domalo neala bedefalahilā elōi neebe meli. <sup>3</sup> Iē fagulo gāi amo yo digalahilā falefalī, sege fifi asi dibe amea fagulo falei amo gadoi hamomolōi made, neebe meli. <sup>4</sup> Iia beahamelebe Elaia Moselele maala ulufadigilahilā, Yesubalā adosa neebe meli. <sup>5</sup> Amo bealahilā Fidaea Yesuma sähalea, Sāla Olelelo. Nili wi nefolalebewe hedabi gabugi, nili sege mosō ohodoa olahadio. Elōda die, elōda Moseseie, elōda Elaiaie la sāi. <sup>6</sup> Ili edefademalā bedalahilā, ea edo sāmōdula asusugahalea, ea ado amo amala sāi. <sup>7</sup> Amala sāse amo gaalu gelē hāu afādē maala ili hagulahilā, gelēgi amila ado afādē sāia idogosalea, Egoweda nīe malō, na boba hamoi neamelē. Dilia iē ado nabualola sāi. <sup>8</sup> Amo nabalahilā ilia fodolofalī sidawewela beahamelebe ilibalā dolō odoa made, Yesu emu neebe meli.

<sup>9</sup> Ili segebidaia amila digahalea, Yesuea ilima gelola sähalea, Dilia nelebo meli amo odoama sāla iila made nelolahilā, Dolōie Malō bauiala nowela neēgi giso, sāla imalola sāla i. <sup>10</sup> Ado sāi amo ilia odoama made sāla musūgā negelahilā, hilidomu didiāhalea, Bauiala nowelasisegida sāi amoda edodula didiāi.

<sup>11</sup> Iia ema nabahalea, Mala dawadigi neebe amolia sähalea, Elaia e dafidi moholōmelēla sāha neebe amoda edoie la nabi. <sup>12</sup> Yesuea ilima sāla obēgēsalea, Dofā. Nelebo sulubadela hamogimolōie Elaia e dafidi moholō. Gaso, Dolōie Malō e sē edefade naala, odoaea ema bimolō habobamolōmelēla sāla dēdēla negei dibe amoda abeahāladu. <sup>13</sup> Na hā dilima sāla iahago, Elaia eda hā misi. Gaso, ado sāla dēdēla negei dibe amo gadola odoa nefolalo amolia ema hamomolō helēsēi amo gadoi hamoimelēla sāi.

*Yesuea maalibu afādēma mugabe fedai nesi*  
(Madiu 17.14-21, Ulugu 9.37-43)

<sup>14</sup> Ili awāla iē bēgēla aulo odoa neebee ami besela galai. Iia beahamelebe udia dolō yafie gegedoi amolia ili amalela digilahilā, mala dawadigi dolō amolia ilibalā gēgēsa dibe meli. <sup>15</sup> Udia dolō yafie nefolalo amolia Yesu maasebe amo beala ili fodolofalī fudugilahilā e neebee baluluia afialahilā ilia e sāla olela gausiai. <sup>16</sup> Amasebegi, ea ilima nabahalea, Dilia ilibalā edogi gēgēsa dialeala nabi. <sup>17</sup> Udia dolō gegedoi amoligi dolō afādēa ema sāla obēgēsalea, Sāla Olelelo-o, nīe nafegema mugabe fedai amea made ado adosebegi di neebee sigi misimelē. <sup>18</sup> Mugabe ema fedala nagadaia nidala awālahilā, iē nafadi dību besigala, bese nalēgēlahilā, iē domalo gelola sosolahamelēla sāla i. Die bēgēla aulo ilia mugabe fedai amo nesila digamalai gaso, nesimolō ulisio. <sup>19</sup> Amala sāsebegi, Yesuea udia dolō amolia sähalea, Udia dolō walio nefolalebege dili asigi afādē negei made nebegeoda. Segeyo abolāia ne dilibalā namolōdu. Na dilile yōi gaula segeyo abolāia namolōdu. Malō go nema sigi misiēla sāi. <sup>20</sup> Amala sāsebegi, ilia malō amo ema sigi misi. Sigi maasebegi, mugabe amea Yesu beala fodolofalī malō amo gelola amulāmelahilā, nagadaia nidala awāla fefede fefedelahilā, nafadi dību besigalasi. <sup>21</sup> Amala hamosebegi, Yesuea malō amoie eedo amoma nabahalea, Gowe gadola abodo gala mi gāwila hamosiola nabi. Eedoea sāla obēgēsalea, Holōfaligila amaila sāi. <sup>22</sup> Mugabe malō go baagomāia segeyo yafiegi nulo gobeiage ödāgige digalasisamu nelomelē. Dia hamomolōi galēda, nili bobasēla ugila negemola sāi. <sup>23</sup> Yesuea ema sähalea, Dia hamomolōi galēdala sāi amo edoie. Dolō asigi afādē negei neebe amea nelebo sulubadela hamosa maademolōi neamelēla sāi. <sup>24</sup> Amala sāsebegi, malō amoie eedo amea fodolofalī ūalala digila sähalea, Na asigi afādē negei. Amai gaso, na asigi afādē negemolōie dia ne ugila negemola sāi. <sup>25</sup> Ili neebee ami udia dolō yafie baluluia mafula gegedosebe amo bealahilā, Yesuea mugabe amoma nemosalea, gēhe galaloge made adologe, dida mugabe. Dima gelola sähago. Malō go digila mosō, ema

bu elö fedamabiola säi. <sup>26</sup> Amala säsebegi, mugabe amea üalala, gelola amulämelasilahlilä doadigila awähalea, malö amo hame doala asi gadoi negesi. Udia dolö yafiea amo bealahilä sähalea, hame doala asi gabula säi. <sup>27</sup> Amala hamosebegi, Yesuea malö amo naabogi nabelela nowelahilä nowela ifosi. <sup>28</sup> Amala hamolahilä Yesu e mosöa nogila digala ie bégëla aulo amolali hilidomu salea ema nabahalea, Nilia mugabe nesimolö uli amo abisalea amaidula nabi. <sup>29</sup> Amala nabasebegi, Yesuea säla obégësalea, Godema adose ameamu mugabe nesimolömelë, idi elöda mademelëla säi.

*Yesu e baagola nowemolömelëla bu elö säi  
(Madiu 17.22-23, Ulugu 9.43-45)*

<sup>30</sup> Yesula ie bégëla aulolali sege amo dīgila Galili segeamadi awäla moholö awäha nelo. Yesueada afädëa e neala made helësëmäia helësëi. <sup>31</sup> Mida, Ea ie bégëla aulo amolima säla olelemolö amo helësëla. Ea ilima sähalea, Dolöie Malö amo dolö odoama hololöla gausiseda, ilia e baagomäia nufulömelë. Baagomäia nufudaseda, segeyo osodagi hi nowela galamolömelëla säla iaha nelo. <sup>32</sup> Säi amo nabalahlilä ilia helësëi made nea, ema mi nabolö amo bedäi nelo.

*Baagila asi neebe amo nowëla didiäi  
(Madiu 18.1-5, Ulugu 9.46-48)*

<sup>33</sup> Ili awäla Gabaniama segea besela galala mosö isogi nogila digalahilä, Yesuea ie bégëla aulo amolima nabahalea, Idiafa maahalea dilia ado edo didiäla aligi misila nabi. <sup>34</sup> Amala nabasebegi, ili maahalea niligi baagila asi neebe amo nowëla säla didiäla aligi misi amo helësëlahilä, ema säla obégëla made nefolalo. <sup>35</sup> E fia idogola salea gawilasi amoli mofiamolahilä sähalea, Afädë dafidilo namolöila helësësedä, dafidi hüdäle made, udia dolö odoadale ugila negemolöi galeala säi. <sup>36</sup> Amala sälahilä ea malö holöbö afädë nabelela gaula maalahlilä ili mogogi ifosilahilä, sogobala gaula nea ilima sähalea, <sup>37</sup> Afädëa ne helësëla malö holöbö gowe gadoi amoma obëbëla obeägiseda, nema obeägisamelë. Afädëa nema obeägiseda, nema obeägisa maademelë, ne digamalala sälo amoma obeägisamelëla säi.

*Nilibalä ado nii made neebe amoda nili damelë neala säi  
(Ulugu 9.49-50)*

<sup>38</sup> Yonea Yesuma sähalea, Säla Olelelo-o, nilia beahamelebe, dolö afädëa die ëi säla mugabe fedai nesila digisa nebegi nilia ema amamabiola säimelë. Mida, dolö amoda nilibalä nawelo made amea hamosebegi amala säimelëla säi. <sup>39</sup> Amala säsebegi, Yesuea säla obégësalea, Amamabula sämabio. Afädëa nie ëi säla dolöea hamomolöi made gadoi afädë hamosedä, hobeä ne aabela made gagademolömelë. <sup>40</sup> Dolö nilibalä ado nii made neebe amoda nili damelë neamelë. <sup>41</sup> Na dilima dofä gelola sähago. Dilia nie ëi gaula neëgi, afädëa diligali ödä muäia osala laseda, udia dolö amoda dofä bidi nimolömelëla säi.

*Asigi afädë negei nafadelöie ado säi  
(Madiu 18.6-9, Ulugu 17.1-2)*

<sup>42</sup> Yesuea aso säha neamu sähalea, Afädëa malö holöbö gowe gadoia nema asigi afädë negei neebe amo nafade hamomäia digalasiseda, igi edefade ëfëa ie muugia neegilahilä, ödä nudugawa sadia idogola baagomolö amoda ie hedabida amomelë. <sup>43-44</sup> Die naabo elö goea asiala hamola digalasiseda, naabo elö goe damula fisimalo. Naabo afädëamu nea namolöi namolö dibeä ami moholö hedabi dialea, naabo äudälada heli segea nulo usilo made dibeä ami auloea. <sup>45-46</sup> Die emo elö goea di neala digalasiseda, emo elö goe damula fisimalo. Emo afädëamu nea namolöi namolö dibeä ami moholö hedabi dialea, emo äudälada heli segea sogobala sadia idogolea. <sup>47</sup> Die si elö goea asiala hamola digalasiseda, si elö goe beselala fisimalo. Si afädëamu nea Godea Beaha Maadela Sigi Neebeä ami moholö hedabi dialea, si äudälada heli segea sogobala sadia idogolea. <sup>48</sup> Amida domalo hehea nase amo baagolo madege, nulo usilo madege, dialeamelë. *Aisaea 66.24*  
<sup>49</sup> Nulo söaea udia dolö sulubadelama molögi ëbi baalo amo gadola baamolömelë. <sup>50</sup> Ebi hedabi dialea. Ebiie hädälo amo made galëda, dilia edoea neala hädälasimolö gabu. Dilile isogi ëbi baalahilä udia dolöbalä aeaha namialola säi.

## 10

*Udia nii fisimabiola säi  
(Madiu 19.1-12, Ulugu 16.18)*

<sup>1</sup> Yesuea amala säha nelolahilä, sege amo dīgila awäla Yudia segea besela galala ödä Yodona dëgëla alömodi asi. Udia dolö yafie e neebeä ami mafula bu gegedosebegi, hi hamolo amo gadola ilima ado mala säla olelesa nelo. <sup>2</sup> Amala olelesa nebegi, Felesi dolö odoä e neebeä ami maalahlilä, Yesuma fedogola nabahalea. Mala säla negei dibe ameadä

dolô afädëa udia nii fisimolöi galeala säla negeida dialealela nabi. <sup>3</sup> Amala nabasebegi, ea ilima säla obëgësalea, Moseseada dilima edo hamomalola säla negei dialeala nabi. <sup>4</sup> Iliä säla obëgësalea, Mosesea säla negesaleada, Dolöea udia fisisaleada, beba dëdëla ialahilä, fisimolöi galeala säla negei dialeala säla obëgëi. <sup>5</sup> Yesuea ilima säla obëgësalea, Moseseada dilile iso asigi geloi dibe amo bealahilä dilima amala säla dëdëla negeimelë. <sup>6</sup> Godea siiba nelebo sulubadela mi gawila hamosolo amo gala, udia dolöle hamoi. <sup>7</sup> Amala hamoi ameada, dolöea ie eedole emele dïgila, ie udiabalä gedola nea, <sup>8</sup> eleda domalo afädëfali namolömelë. Amo gadola ele äudä nelo amo fisila afädëfali nea. <sup>9</sup> Godea gedolasi amoda dolöea mogemabiola säi.

<sup>10</sup> Hobeala ie bëgëla aulolali mosöa obëgëla awäla sefolalea, ie bëgëla aulo amolia ado säi amoie ema mi fädäla nabi. <sup>11</sup> Amala nabasebegi, ea ilima säla obëgësalea, Dolö afädëa hile udia fisila udia elö neaseda, ea udia amo fa susugu hamomolömelë. <sup>12</sup> Udia afädëa ie dolö fisila dolö elöma fiseda, dolö amo ea fa susugu hamomolömelëla säi.

*Yesuea malësäma obeägïsa nelo  
(Madiu 19.13-15, Ulugu 18.15-17)*

<sup>13</sup> Udia dolö odoa nefolalo amolia, ilile malö Yesuie naaboea diigimäia e neebee sigi maasebegi, ie bëgëla aulo amolia ilima nemoi. <sup>14</sup> Amala hamosebe amo bealahilä Yesuea ilima habobalahilä sähalea, Malësä ne neebee maase goli misiäia, nemola dofogamabu. Godea Beaha Maadela Sigi Neebea amida malësä go gadoi nefolalebe amolile dialea. <sup>15</sup> Na dilima dofä gelola sähago. Godea Beaha Maadela Sigi Neebea ami malësä go ili gadoia moholöila helësëi neebee amo gadola, afädë ne moholöila made helësëi neebee amoda dofä made nogila digamolömelëla säi. <sup>16</sup> Amala sälahilä ea malësä amoli sogobala gaula nea naaboea diigisalea, Gode dia ugila negemalola säla fisiga idodogosa nelo.

*Dolö nelegei yafie negelo afädëa Yesuma nabi  
(Madiu 19.16-30, Ulugu 18.18-30)*

<sup>17</sup> Yesu e moholö awäha nebegi, dolö afädë baluluia maala, ie emo mia gumusula dia idogolahilä sähalea, Säla Olelelo hedabi-e, ne namolöi namolö neala gaumolöie abilia hamomolödula nabi. <sup>18</sup> Amala nabasebegi, Yesuea ema säla obëgësalea, Dia nema hedabila säi amoda edoie. Afädë hedabi maademelë, Gode emu hedabi nea. <sup>19</sup> Ado säla negei dibe amolida dia dawadigi. Baagomäia nufuabio, udia fa nimabio, nelegei fa nimabio, wäfali säsäla gudimabio, dahila neala elöie nelegei dibe amo nimabio, die diado diemelele ado nabala hamomalola säla negei dialeala säla i. <sup>20</sup> Amala säsebegi, ea Yesuma säla obëgësalea, Säla Olelelo-o, ado amolida ne malësägila hamosa maadeimelëla säi. <sup>21</sup> Amala säsebegi, Yesuea dolö amo boba hamolahilä, ema siila nea sähalea, Afädëmu dofea made nebebo. Die nelegei dibe amo bidi neaha maademolö mosö. Amalahilä muni nease amoda nelegei made negelo busadäoi neebee amoligali imalo. Amala hamoseda, selesaia mosöa bidi edefade nimolömelë. Amalahilä ne bëgëla misialola säi. <sup>22</sup> Dolö amea ea säi amo nabala yöla ie odagi augia idalahilä asi. Mida, ie nelegei yafie dilo amogi.

<sup>23</sup> Amasebegi Yesuea ie bëgëla aulo nefolalebeadi sidawewela bealahilä sähalea, Udia dolö nelegei yafie negelo nefolalebe amolida Godea Beaha Maadela Sigi Neebea ami moholö häuai bimolömelëla säi. <sup>24</sup> Ea amala säsebegi ie bëgëla aulo amolia fudugi. Yesuea ilima aso bu elö sähalea, Nïe malöla dili-e! Godea Beaha Maadela Sigi Neebea ami moholöda häuai galeamelë. <sup>25</sup> Sugua gameleda nusi galabagi nogila moholö uli amo gadola, nelegei yafie negelo dafidilo dolö nefolalebe amolida, Godea Beaha Maadela Sigi Neebea ami moholö häuai bimolömelëla säla i. <sup>26</sup> Amala säsebegi, ie bëgëla aulo amolia edefademalä fudugilahilä hilidomu didiähalea, Namolöi namolö nowëa neala gaumolödula säi. <sup>27</sup> Amala säsebegi, Yesuea ilima siila nea sähalea, Udia dolöea hamomolöi made amoda. Godea hamomolöi madaeda maade, ea sulubadela hamosa maademolöi neamelëla säi.

<sup>28</sup> Amala säsebegi, Fidaea ema säla obëgësalea, Hä bimo. Niliada nelebo sulubadela fisisa maadelahilä di bëgëla misimelëla säi. <sup>29</sup> Amala säsebegi Yesuea ilima sähalea, Na dilima dofä gelola sähago. Afädëa nemage, Ado Mala Hedabimage helësëlahilä, mosöge, edooge, elefige, emege, eedoge, malöge, segege, fisisa maadelahilä, <sup>30</sup> hädali afädë nimolömelë. Ili nagadaiawi nebegi Godea nelebo yafie dafidi i amo baagila awäla imolömelë. Mosö yafiege, edoo yafiege, elefi yafiege, eme yafiege, sagai yafiege, segege, ilia yafie nimolömelë. Amase odoaeage e neala sëlasimolömelë. Hobeala segeyo afädë besela galasolo amo gala ea namolöi namolö gaula namolömelë. <sup>31</sup> Yafie dafidila nefolalebe amolida neala hobeahalea, hobeala nefolalebe amolida neala dafidimolömelëla säla i.

*Yesu e baagola nowemolömelëla bu osoda säi  
(Madiu 20.17-19, Ulugu 18.31-34)*

<sup>32</sup> Yesula ie bĕgĕla aulolali Yalusaleme aulo idigi awāhalea, Yesu e, edale dafidi awāsebegi ie bĕgĕla aulo amoli hobeala awāhalea fudugila aligila aligi asi. Udia dolō odo hobeafali awāha nelo amoliage bedāla aligi asi. Yesuea ie bĕgĕla aulo giwilasi amoli bu sigi aliga galahlā ema hobeala hamomolō amoiē ado <sup>33</sup> sāla iahalea, Nabualo. Walio nili Yalusaleme awāhamelē. Dolōie Malō amo gobela ilo busa amolimage, ado sāla negei dawadigi amolimage ilia e gaula imolōmelē. Iliā ebalā gudila baagomāia nufulōmelēla didiāla daiialahlā, fii odoagali gaula imolōmelē. <sup>34</sup> Dolō amolia ema gofedela galala digi, ēfē damuia nufudalahilā baagomāia nufulōmelē. Amala hamoseda, segeyo osodagi hī nowela moholōmelēla sāla i.

*Yamese Yonelea dafidilo namolōie hogoi  
(Madiu 20.20-28)*

<sup>35</sup> Sebediie malō Yamese Yonele Yesu neebee maalahlilā elea ema sāhalea, Sāla Olelelo-o, alia helēsēsewe gadoi dia alima hamomāia hamesamelēla sāla i. <sup>36</sup> Amala sāsebegi, ea elema sāla obĕgēsalea, Na alima edo hamomāia helēsēsebelā nabi. <sup>37</sup> Amala nabasebegi, elea ema sāla obĕgēsalea, Die yo digalo hido elōibalā fisolo amo gala elōda die naabo dafādīmadi, elōda die naabo fefeādīmadi fimalola sāmāia helēsēsamelēla sāla i. <sup>38</sup> Amala sāsebegi, Yesuea elema sāhalea, Ado sāi amoda alia helēsēla made nea sāimelē. Na ödā iigi usi naha neebewegi alia molōi gabule. Ma, ne ödāgi gesa neebewegi ali gemolōi gabulela nabi. <sup>39</sup> Amala nabasebegi, elea ema sāla obĕgēsalea, Alia amala hamomolōi neawela sāi. Amala sāsebegi, Yesuea elema sāhalea, Na ödā iigi usi nasewe gadola aliage molōmelē. Ne ödāgi gesewe gadola alige gemolōmelē. <sup>40</sup> Gaso, ali elō di nie naabo dafādīmadi, elō di nie naabo fefeādīmadii samāia memelemolōda nīe mademelē. Godea fimāiala daii amolilemelēla sāla i. <sup>41</sup> Bĕgĕla aulo nabūlasi odoa amolia elea ado sāi amo nabalahlilā elema habobaha nelo. <sup>42</sup> Amasebegi, Yesuea ili mofiamolahilā ilima sāhalea, Fii odoa beaha aligilo gadoi neebe amoliada, udia dolō gelola beaha aligilo nea, amase, ilile ēi sālo neebe amoliada udia dolō bobasēla made, ilia sāse amo gadola hamomāia gelola sigi aligilo amoda dilia dawa. <sup>43</sup> Iliā amala hamolo amo gadola, dili nebegogi afādēa amala hamomolōi mademelē. Dili nebegogi afādēa ēi sālo namolōila helēsēseda, odoa neebe amoligalimu hamoi hamolasilo namolōi dialea. <sup>44</sup> Afādēa e dafidilo namolōila helēsēseda, ea udia dolō sulubadelaie galabaia hamoi gadoi hamolasilo namolōi galea. <sup>45</sup> Mida, Udia dolōea Dolōie Malō misi amo egali hamoi hamolasimāia made misi. Ea ilile hamoi hamolasimāiage, ie namolō amo udia dolō yafiegali fisiga gala, ili sigi obĕgĕmolōge misimelēla sāi.

*Yesuea Badimasa si golai wahi  
(Madiu 20.29-34, Ulugu 18.35-43)*

<sup>46</sup> Yesula ie bĕgĕla aulolali afiala Yaligo gaamugi besela galai. Besela galala ie bĕgĕla auloge udia dolō yafie odoage ebalā Yaligo baagila awāha dilo. Dolō si golai afādē idi agesua ami sulo. Eada muni imola ēdĕgĕsa filo. Dolō amoda Dimasaie malō Badimasa. <sup>47</sup> E amala salea Nasalese dolō Yesu maahala sāi amo nabalahlilā, ea uuala sāhalea, Debidiiē malō Yesu-o, ne bobasēmola sāi. <sup>48</sup> Amala sāsebegi, udia dolō yafiea ema nemosalea, Dia adomabula sāi gaso, ea bu gelola uuala nea sāhalea, Debidiiē malō-o, ne bobasēmola sāhamu nelo. <sup>49</sup> Ea Amala sāsebegi, Yesu ea beaha nea sāhalea, E misialamola sāi. Amala sāsebegi, ilia dolō si golai amoma sāhalea, Ea di wesebego, asigia gelola nowemola sāi. <sup>50</sup> Ea fagulo afādē salugala sulo amo gila sadia galahlilā fodolofali nowela Yesu neebee misi. <sup>51</sup> Maasebegi, Yesuea ema nabahalea, Na dima edo hamomāia helēsēsebelā nabi. Amala nabasebegi, dolō si golai amea ema sāla obĕgēsalea. Sāla Olelelo-o, na bimolō helēsēsebelā sāi. <sup>52</sup> Amala sāsebegi, Yesuea ema sāhalea, Dihī asigi afādē negei amea die si wahigomelē. Hā mosalola sāi. Amala sāsebegi, dolō amo fodolofali wahila siia fādāla bealahilā, Yesu bĕgĕla asi.

## Yesu e sē nalā baagoi

### 11

*(Maga 11-16)*

*Yesu e beaha aligilo gini gadoi hamola Yalusaleme besela galai  
(Madiu 21.1-11, Ulugu 19.28-40, Yone 12.12-19)*

<sup>1</sup> Yesula ie bĕgĕla aulolali Yalusaleme besela galamolō ga madela nea, sege Bedefagige Bedanige Olibe biage ili awāla besela galai. Besela galala ami nea, Yesuea ie bĕgĕla aulo amoligi, āudā dafidila mosalolahilā, <sup>2</sup> elema sāhalea, Segea ami awāla besela galala beahamelēle, sugua dōgi ūdili afādē dolōea fila aulo made, ga madefali gui gide begela negei neē bimolōmelē. Dōgi amo fisigālahilā wi sigi misialo. <sup>3</sup> Afādēa alima dōgi go abidā fisigāhala nabaseda, alia ema gomālā sāmalo. Dafidilo Geloia webalā hamoi hamomolōmelē. Amalahilā, ea fodolofali sigi obĕgĕmalamolōmelēla sāmalo sāi. <sup>4</sup> Amala sāi amo nabalahlilā, ele awāla besela galala beahamelebe, sugua dōgi ūdili afādē mosōa nogila digalo, ifo

baagido idiliba ami, gide begela negei neebe amo bealahilä, fisigäi. <sup>5</sup> Fisigäsebegi, udia dolö ami nefolalo amolia elema nabahalea, Abilia hamodelä, sugua dögi üdüli go fisigähala nabi. <sup>6</sup> Elea Yesuea sämalola säi amo gadola säsebegi, ilia hä, sigi mosalola säi. <sup>7</sup> Elea sugua dögi üdüli amo Yesu neebaa sigi gaula awälahilä, elea sugua dögi amodaia fagulo daia salugalo gila fösisebegi, Yesu e amodaia fedala sulo. <sup>8</sup> Amala hamosebegi, udia dolö yafia ilile fagulo gäi amo gilahlilä idiafa föla digi, odoaea idi agesua faseala bäu gadoi dagabola gaula mafula föföla aligi awäha nelo. <sup>9</sup> Udia dolö nefolalo amoli Yesu awäse amo gadola, dafidila awäha nelo amoliage, hobeala maaha nelo amoliage, uuala säsäla awähalea, Agua. Nesege. Godeie ei gauia adadi.

Afädë Dafidilo Geloie eigila maahago, Godea ema obeägimäia. <sup>10</sup> Nilile naado Debidia beaha maadela sigi nelo amo gadola namolö neebe amoma obeägidi. *Gë Udälo 118.25,26* Selesaia fiia Godeie ei gauia adala nese gemola uuala säsäla awäha nelo. <sup>11</sup> Yesu e Yalusaleme besela galala, Godeie mosö amoie yala isogi nogila digalahilä, ami nelebo difolalebe amo sulubadela beaha maadei. Hä deadisebegi, ie bögëla aulo giwilasi amolali Bedani obögëi.

*Yesuea äfäeoma säi  
(Madiu 21.18-19)*

<sup>12</sup> Diala aiyo amogi ili Bedanilahilä obögësalea Yesu e sidëa baagoi. <sup>13</sup> Sidëa baagosebegi holöbö wagadi madela sida gahamelebe äfäeo bäu bealahilä, gägä negei walebelela bea asi. Bea awähamelebe gägä negei made, bäumu neebe meli. Mida, äfäeo gägä negelo segeyogi made amea bäumu meli. <sup>14</sup> Amo bealahilä ea äfäeo amoma sähalea, Die gägäda udia dolöea hobea made molömelëla säi. Amala säse amo ie bögëla aulo amolia nabi.

*Yesuea Godeie mosöa magäia negei hai  
(Madiu 21.12-19, Ulugu 19.45-48, Yone 2.13-22)*

<sup>15</sup> Yesula ie bögëla aulolali awäla Yalusaleme besela galai. Yesu e Godeie mosö yala isogi nogila digalahilä beahamelebe, bidi neadigi, bidi nimolöie negela digisa difolalo amoli nesila digilahilä, Muni bedefalo auli amoge, haea maliabu gadoi bidi neaha aligilo amolile filo auli amoge, besigala hësögudusa maadei. <sup>16</sup> Dilia Godeie mosö yala isogi nelebo gaula, nogila digafu fedafumabiola säla i. <sup>17</sup> Amala sälahilä ea ilima säla olelesalea sähalea, Ado bebagi säla dädëla negei dibe amoda gomalä madele. Nie mosöda fifi asi sulubadela Godema adolo mosö neamelëla sämolömelëla dädëi gaso, dilia fa nelo musügä aligilo igi äbä gadoi hamoi gabula säi.

<sup>18</sup> Amala hamoila säi amo nabalahlilä, gobela ilo busa amoliage, ado säla negei dawadigi dolö amoliage, Yesu abeahäla nufulödula fu hogosa nelo. E nufulö helësëi amoie mida, ebalä bedähalea. Ebalä bedäi amoie mida, udia dolö nefolalo amoli sulubadela ea mala olelei amo nabalahlilä, fudugisebegi. <sup>19</sup> Säha nea së gäsebegi, Yesula ie bögëla aulo amolali Yalusaleme digila afiai.

*Äfäeo i bausoi amoie ado säi  
(Madiu 21.20-22)*

<sup>20</sup> Ili diala yose awähalea beahamelebe, äfäeo amo bäuge difige bausosa maadei neebe meli. <sup>21</sup> Bealahilä Yesuea säi amo helëselahlilä Fidäea ema sähalea, Säla Olelelo-o, bimo. Dia aiyo äfäeoma gabobala säi amoda bausoi gabuwela säi. <sup>22</sup> Amala säsebegi, Yesuea ilima säla obögësalea, Godema asigi afädë negemalo. <sup>23</sup> Na dilima dofä gelola sähago, Dolö afädëa asigi äudä negela made, segebi gowema dihä dagabola duhuludaia digamola, ea säse amo dofä amamolöla helësësedä, ea säi amo gadola amamolömelë. <sup>24</sup> Amaimo, na dilima säla ihago. Dilia Godema adola nelebo afädë dofä nimolö wedala helësëla ema nabaseda, Dilia säi amo gadoi nimolömelë.

<sup>25-26</sup> Dilia nowela nea Godema adosalea, dolö afädëa dilima asiala hamoi amo helësësedä, dolö amea asiala hamoi amo fisimalo. Amala hamoseda, dilille Diado selesaia mosöa neebe amea, dilia asiala hamoi amoge fisimolömelëla säi.

*Yesu dia geloi gaula neebe go nowëa ila nabi  
(Madiu 21.23-27, Ulugu 20.1-8)*

<sup>27</sup> Yesula ie bögëla aulolali Yalusaleme bu obögëlahilä, Yesu e Godeie mosöa nogila digaha nebegi, gobela ilo busa amolige, Ado säla negei dawadigi dolö amolige, dolö dafidilo amolige, e neebaa ami maalahilä, <sup>28</sup> ema nabahalea, Nelebo dia hamosa neebe goli hamomäia, nowëa hamomalai hamosa. Nilia nabeldelä, dia säla imo. Go hamomäia, geloi go nowëa iasiola nabi. <sup>29</sup> Amala nabasebegi, Yesuea ilima säla obögësalea, Nage dilima afädë nabahago, Na dilima nabase amo dilia säla obögësedä, na nelebo hamosa neebewe hamomäia geloi i amoda gowea imelëla na dilima säla imolömelë. <sup>30</sup> Yonea ödägi gesa nelo amoda Godeie galueale ma, dolöie galueale. Dilia nema säla imola säi. <sup>31</sup> Amala säsebegi, ilia

hilido didiähalea, Nilia selesaia galueala säseba, dilia ema asigi afädë negela made nelo goda edoïela sämolö gabu, <sup>32</sup> Amase nilia dolöie galueala sämolö gaso, amoge dofea made gabula säi. Iliä amala säi amoïe mida, Udia dolö sulubadelaea Yoneda Godeïe bea sälo afädë neala helësëi neebe amo helësëla ili udia dolöbalä bedäi. <sup>33</sup> Amalahilä ilia Yesuma säla obëgësalea, Niliäda dawa mademelëla säi. Amala säsebegi, Yesuea ilima sähalea, Amai galëda, na nelebo hamosebwea gowea hamomalai hamosa neamelëla, nage dilima made säla ïmolömelëla säla ï.

## 12

*Ado besula dolö afädëa gelebi sagai beaha neloïe säi  
(Madiu 21.33-46, Uluğu 20.9-19)*

<sup>1</sup> Yuda ilile busa dolö nefolalo amolima, Yesuea ado besula säla ïahalea. Dolö afädëa yalala agulahilä, ëfë gägä negelo ëi gelebi sagai. Gelebi sagai amo emesala fësëla salimolöïe uli dögoi. Amalahilä sagai amo idihë namiäia mosö afädë holöbö ilibia ola negesi. Amalahilä, ea dolö odoama sähalea. Sagai amo beaha nea bisinesi hamosa namialola säsilahilä, hi eda sege wagadi made namolö asi. <sup>2</sup> Hä, gelebi gägä amo faimolö segeyo besela galasebegi, sagai eedo amea ïe hamoi hamolasilo afädëma sähalea. Nïe sagai beaha aligilo nefolalebe amolima, gelebi gägä odoa faila ïmola sämolö mosalola säi. <sup>3</sup> Faila ïmola sämolö asi gaso, sagai beaha aligilo nefolalo amolia e gaula nufudala ïalalelahilä, memalä e hodomu fisiga gaimelë. <sup>4</sup> Amala hamoi galebe, sagai eedo amea ïe hamoi hamolasilo elöma bu mosaloi. Awäsebegi, ilia busagia afisila nufudalahilä e gagadela gadiaboi. <sup>5</sup> Amala hamosebegi, sagai eedo amea ïe hamoi hamolasilo osoda bu mosaloi. Awäsebegi, ilia dolö amo nufudala baagoi. Amalamu hamosebegi ea dolö yafie oböla bu mosaloi. Amolige odoa nufudala ïalalelahilä, odoa baagomäia nufi. <sup>6</sup> Hä dolö afädëfalimu nelo. Dolö amoda hile efefe hi boba hamoi nelo. Hobeafali eedoea ïe malö amoma ili neebea mosalalahilä sähalea, Iliäda nïe malöïe ado nabala mogola hamomolöla helësësamelëla säi. <sup>7</sup> Gaso, sagai oodola beaha aligilo nefolalo amolia hilidomu säla didiähalea, Sagai eedo amoïe malö amoda hä go gabugo. Eedoïe nalä ea nimolö gabugi, niligali bedefala nedelä, e baagomäia nufidedila sälahilä, <sup>8</sup> ilia malö amo nufudalahilä ïe domalo amo sagai yala baagido sadia gaimelë.

<sup>9</sup> Amala hamoi amoïe sagai eedoeada abilia hamomolödu. E maalahilä sagai beaha nefolalo amoli baagomäia nufudaha maadelahilä, sagai amo odoaea beaha namiäia ïmolömelë. <sup>10</sup> Bebagi ado säla dëdëla negei dibe amo dilia made meli neale.

Mosö olelo ilia igi amo galone hamomolöïi made gabula memelela fisi. Gaso, walioda galone geloi gelola dialeamelë. *Gë Udälo 118.22-23* <sup>11</sup> Amoda Dafidilo Geloi hi hamogi amo nilia siia bealahilä fudugisa neamelëla

säla dëdëla negei dialeala säi.

*Gë Udälo 118.22,23*

<sup>12</sup> Dolö busa nefolalo amolia Yesuea ilile ado besula säsebe amo bealahilä ilia e gaudelä hamoi gaso, udia dolö yafie nefolalebe amoli beala ili bedähalea digila asi.

*Dagisi muni ïmolö dialeale ma, madelela nabi  
(Madiu 22.15-22, Uluğu 20.20-26)*

<sup>13</sup> Busa dolö amolia, Felesi dolö odoage, Heledoïe damelë odoage, Yesu neebea mosaloi. Mida, Yesuea ado asiäla säseba, e gaumolöïe Yesu fedogola adomolö mosaloi. <sup>14</sup> Ili Yesu neebea afialahilä, Yesuma sähalea. Säla Olelelo-o, niliäda, dia mala säla olelese amoda mogola olelesala helësësamelë. Amalahilä dolö odoa ëi sälo geloi nefolalebe amolibalä bedäla madege, odoa nefolalebe amolia di beala säse amogige dia helësëla made neada, Godea hamese amoïe mala udia dolöma säla olelelo amoda mogola säla olelelomele. Amalo gabugi dima afädë nabaha. Nilile mala säla negei dibe amo helësëlahilä, Beaha Aligilo Sisa neebe amoma dagisi muni ïmolö dialeale ma, madele. <sup>15</sup> Nilia ema dagisi muni ïmäiale ma made ïmäialela nabi. Iliä e fedogola wäfalä säsebe amo dawadigilahilä, ea ilima säla obëgësalea. Edoïe nïe fedogola beaha. Na melëdelä muni giwi afädë gaula misiëla säi. <sup>16</sup> Iliä muni giwi afädë gaula maasebegi, ea ilima nabahalea, Muni giwi egowegi dolö busa dibe gowege, ëi dëdëi dibe gowege nowëïe gabula nabi. Amala nabasebegi, ilia ema säla obëgësalea, Beaha Aligilo Sisaïela säi. <sup>17</sup> Yesuea ilima säla obëgësalea, Nelebo Sisaïe dibe amoda Sisa hima ïmalo. Godeïe dibe amoda Gode hima ïmalola säi. Amala säi amo nabalahilä ili fudugi.

*Sadiusi ilia Yesuma baagoi abilia nowemolöla nabi  
(Madiu 22.23-33, Uluğu 20.27-40)*

<sup>18</sup> Sadiusi dolö udia dolö baagoi made nowela galamolöla sälo amoli Yesu neebea maalahilä sähalea. <sup>19</sup> Säla Olelelo-o, Mosesea, nilia hamomäia ado afädë dëdëla negei dibe amoda gowe. Dolö afädëïe edoo malö maade nea baagosedä, udia didalo amo sulolahilä, dolö baagoi amo sosogo namiäia, ïe ëigila malö sogobamolöïe, edoo elö amohi udia amo



nimäiala säla dödëla negei dialea. <sup>20</sup> Amaimo, edoolali gifalädaläia salea, abulümi amea udia afädë neala nea, malö made sogobala baagoi. <sup>21</sup> Baagoibua, abulümi baagia amea udia didalo amo bedefala nealahilä, eage malö made sogobala baagoi. Amala bu baagoibua, edoo osoda ameage amala hamolahilä, <sup>22</sup> edoolali gifalädaläia amoli malö made sogobala baagosa maadei. Amalahilä udia amo hobea wagala baagoi. <sup>23</sup> Amala hamoi amo dolö gifalädaläia amolia udia afädë amomu nii amea, hobea baagoi amoli nowela galasolo amo gala udia amo nowëie udia samolödula nabi.

<sup>24</sup> Amala nabasebegi, Yesuea ilima säla obëgësalea, Bebagi ado säla dödëla negei dibe amoge, Godeie geloi dibe amoge, dilia dawa made amea dilia asiala säsebegi. <sup>25</sup> Udia dolö baagoi amoli nowela galasolo amo galada, dolöea udia nimolö mademelë. Amase, udiage dolö fimolö mademelë. Iliida selesaia fii neebe amo gadoi namolö madele. <sup>26</sup> Amase, udia dolö baagoi amoli nowela galamolö amöie ado afädë sähago. I afädëgi nulo söa fedaila säla Mosesea dödëla negei dibe amo dilia made melile. Amila Godea Mosesema sähalea, Neda Abalahamaiege, Aisagaiege, Yeigabaiege Gode neamelëla säila säla dödëla negei dialea. <sup>27</sup> Eda udia dolö baagoi amolile Gode mademelë. Eda udia dolö sebe amolilemelë. Dilia asiala helësi gabumelëla säi.

*Godea Ado säla negei dibe amogi geloi dafidilo gelola säla negei dibe amoda gowe  
(Madiu 22.34-40, Ulugu 10.25-28)*

<sup>28</sup> Ado säla negei dawadigi afädë nelo amo maalahilä, Sadiusi dolö amolia Yesubalä gëgëla ado säsebegi, ea ilima hedabola säla obëgësebe amo nabalahilä, ea Yesuma nabahalea. Godea Ado säla negei dibe amogi geloi dafidilo gelolada abododula nabi. <sup>29</sup> Amala nabasebegi, Yesuea ema säla obëgësalea, Ado säla negei dibe amogi geloi dafidilo gelolada gowemelëla sähago. Isilale udia dolö-o, dilia nabualo. Dafidilo Geloie eda nilile Gode. Emu Dafidilo Geloie neamelë. <sup>30</sup> Dafidilo Geloie die Gode neebe amo die bobaeage, gesamiage, asigiage, geloiage boba hamomalola säla negei. <sup>31</sup> Amo baagia elöda gowe. Dihidi boba hamolo amo gadola, odoa dibalä nefolalebe amoli boba hamomalola säla negei. Mala geloi dafidilo gelolada äudä amolemu säla negei dialea. Odoa mademelëla säi. <sup>32</sup> Amala säsebegi, ado säla negei dawadigi amea ema säla obëgësalea, Säla Olelelo-o, dia Gode afädëfali emu neala säi amoda, dia dofä säi. Elöda maademelë. <sup>33</sup> Ema bobaeage, dawaeage, geloiage hamelahilä, dihidi boba hamolo amo gadola odoa dibalä nefolalebe amoli boba hamomalo. Äudä amoleada Godegali gobela ilo amoge, odala ilo amoge baagila asimelëla säi. <sup>34</sup> Yesuea dolö amea hedabola helësäla säsebe amo bealahilä, ema sähalea, Godea Beaha Maadela Sigi Neebea ami di ga made nebegola säi. Amala säsebegi, udia dolö odoa ilia Yesuma nelebo odoa nabalö bedäi.

*Yesuea udia dolöma Godea Afädë Memeleie nabi  
(Madiu 21.41-46, Ulugu 20.41-44)*

<sup>35</sup> Yesuea Godeie mosöa säla olelesa nea sähalea, Ado säla negei dawadigi nefolalebe amolia, Afädë Memelei moholömelëla säi amo e Debidie malöla sälo amoda abeahäla säلود. <sup>36</sup> Eleloi Gesamia Debidima helësälasisebegi, Debidia sähalea, Dafidilo Geloia nie Dafidilo Geloima sähalea, Na die ado nii nefolalebe amoli die emoea emesala namiäia, dida nie naabo dafädimadi awäla salea, beaha samialola säimelë. *Gë Udälo 110.1*

<sup>37</sup> Amase, Debidia hi ema Dafidilo Geloila säi amoda, Dafidilo Geloie e Debidie malöda abeahäladula nabi. Udia dolö yafie gegedoi amolia ea säse amogi obeägila nabi.

*Yesuea mala dawadigi nefolalebe amoli helësäla idihë namialola säi  
(Madiu 23.1-36, Ulugu 20.45-47)*

<sup>38</sup> Yesuea ilima ado mala olelesalea sähalea, Dilia Ado säla negei olelelo nefolalebe amoli hedabola idihë namialo. Iliia fagulo sedademu salugala magäia gaamugi awälahlilä, udia dolöea ili beala gugusäla gausiamäiala helësälo nea. <sup>39</sup> Amase, gedolo mosöage iliada dolö dafidilo filo dibeä amimu fimolöila helësäloge, udia dolö yafie gegedola molö nasebeä ami molö gialo eedo amobalä dafila salea, ua gagaula hamomolöila helësälo nea. <sup>40</sup> Iliia udia didalo sebe amoli dahila neala, ilile mosöa nelebo dibe amo fa neala gaula aulo nea. Iliile asigi musügä negesilahilä, adoeamu Godema sedadela adolo nea. Amala hamosebe amöie ili së edefade muäia baala imolö dialeala säi.

*Udia didalo afädëa muni negei  
(Ulugu 21.1-4)*

<sup>41</sup> Godeie muni negelo dibeä ami Yesu e ga madela salea, udia dolö yafie misi amolia muni negelo amogi muni negese amo siila sulo. Nelegei yafie negelo dafidilo udia dolö yafie amoliada muni yafie negei. <sup>42</sup> Udia didalo busadäoi afädë maalahilä muni giwi äudä, doea afädë gadoi, negei. <sup>43</sup> Amala negesebegi, Yesuea ie bëgëla aulo amoli misiëlahilä ilima

sähalea, Na dilima dofä gelola sähago. Udia didalo busadäoi gowea negei amea udia dolö sulubadela Godeie muni negelo amogi muni negei amo baagila asimelë. <sup>44</sup> Iliä muni yafie negei dilo amogi odoa mogela hilile negesalea mogela negei gaso, udia goweada afädë gaula made, ea molö nimolö gaui amo sulubadela negesa maadeimelëla säi.

## 13

*Yesuea Godeie mosö mugulula digamolömelëla säi*  
(Madiu 24.1-2, Ulugu 21.5-6)

<sup>1</sup> Yesu e Godeie mosö amila doadigila awäha nebegi, ie bëgëla aulo afädëa ema sähalea, Säla Olelelo-o, igi boboga hedabi hido elöia mosö hedabi hido elöi olola fedai neebe gowe bimola säi. <sup>2</sup> Amala säsebegi, Yesuea ema säla obëgësalea, Dia mosö hedabi beahago gasoda, igi dadagulula olola fedai neebe goda igi afädë daia negela made, Goda sulubadela mugulula digaha maademolömelëla säi.

*Yöi elö elöla bimolömelëla säi*  
(Madiu 24.3-14, Ulugu 21.7-19)

<sup>3</sup> Yesu e Olibe bi daia fedalahilä Godeie mosö sida idogola sebegi, Fida Yamese Yone Ädululali hilidomu nea ema nabahalea, <sup>4</sup> Dia nilima säla imo. Segeyo abodo gala dia säi amo besela galamolö. Dafidi nelebo edodale besela galasegi, nilia amo bealahilä dia säi amo besela galamolö amoda ga made gabula helësëmolömelëla nabi. <sup>5</sup> Amala nabasebegi, Yesuea ilima säla obëgësalea, Odoaea dili dahila neloea, idihë namialo. <sup>6</sup> Dolö yafie maalahlilä nie ëi säla sähalea, Neda dolö amo misi neawela sälahilä, udia dolö yafie dahila nimolö moholömelë. <sup>7</sup> Ga made nudusalea ado goba nabase amogige, sege wagadi made nudusalea wabula säse amo nabalage, dilia bedäla fudugimabio. Nelebo amala hamose ameadä, aligila wagamolöie amamolö mademelë. <sup>8</sup> Fii elöle elöle nudula digi, gamane elöle elöle nudula digisa namolömelë. Amase, sege föi odoagi fogolige maala, sidë ige moholömelë. Nelebo amoli hamomolö amoda, udiaea malö ägümolö salea mi gäwila sëlö amo gadoi bimolömelë.

<sup>9</sup> Dilia hedabola idihë namialo. Iliä dili nafodola gaula galisolö neebea sigi moholömelë. Gedolo mosöa amige dili nufudala ialalemolömelë. Nie ëi gaula mogoi ameadä gamane dolöie siigige, gini dolöie siigige gaula awäla ifosimolömelë. Amala hamoseda nie Ado Mala Hedabi nabuäia säla iaha namialo. <sup>10</sup> Amo hamola made neebewegi wäla, fifi asi sefolalebe amoli sulubadelaä nie Ado Mala Hedabi nabaha maademäia dafidi säla imalo. <sup>11</sup> Iliä dili nafodolahilä gudimolöie sigi gaula awäseda, ado abodo sämolödula asigia säosöla helësëmabio. Gudisolo amo gala Godea ado säla iäsebe amo säla imalo. Ado säla imolö amoda dihili sämolö mademelë. Eleloi Gesamia sämolömelë. <sup>12</sup> Dolöea ie edoo nufudala baagomäia gaula imolömelë. Malö eodea hile malöge amo gadola wäla hamomolömelë. Amase, malöeage ie eedo emelebalä habobalahilä nufudala baagomäia gaula imolömelë. <sup>13</sup> Nie ëigi nefolalebege beala, sulubadelaä dilima bimolö habobamolömelë. Amai gaso, afädëa aso maadela, hamola wagamäialahlilä gelola aligise amo eda damula moholömelëla säi.

*Nelebo yöi hehealei bimolömelëla säi*  
(Madiu 24.15-28, Ulugu 21.20-24)

<sup>14</sup> Yesuea ilima sähalea, Hehealela bedälasimolö maala negemolöi made dibeä ami maala negei dië bimolömelëla säla i. (Ado gowe nidese ameadä hedabola helësëmalö.) Yesuea amala sälahilä sähalea, Amo siia beaseda, Yudia segea sefolalebe amolida segebi dibeä ami fisäla balulua afufumalo. <sup>15</sup> Amo gala, afädë mosö figidaia sulo amea digalahilä, ie nelegei nea numusogi digamabio. <sup>16</sup> Dolö sagaia nelo amea hi mosöa fagulo nea obëgëmbio. <sup>17</sup> Segeyo amo gala udia fagulo hagui sefolalebe amolige, malö dubo dodo iaha sefolalebe amolige, edefademaalä asigiimolö dialea. <sup>18</sup> Amo hamomolö amoda, i bäu gisalea gögï mulo amo gadola muloea, Godema adosa namialo. <sup>19</sup> Mida, segeyo amo gala yöi yafie elö elöla maala negei dië bimolömelë. Godea nelebo mi gäwila hamoia amila yöi amo gadoi made meli. Amase, hobeage bu elö made bimolömelë. <sup>20</sup> Amaimo, Dafidilo Geloia segeyo amo neala obobagilasimolö made helësëi galebeda, udia dolö sulubadela namolö amo fu made bealabio. Udia dolö hi memelei amoli helësëlahilä, segeyo amo neala obobagilasimolö helësëi. <sup>21</sup> Amaimo, afädëa dilima sähalea, Afädë Memelei amo misi neebe gowe bimola säsege, e neebe gagowe bimola säsege, dofä gabula helësëmbio. <sup>22</sup> Dolö odoaea wäfalä säsäla sähalea, Afädë Memelei amo ne misi neawela sämolö moholömelë. Odoaea wäfalä säsäla sähalea, Neda Godeie bea sälo misi neawela sämolö moholömelë. Amala maalahlilä, ilia udia dolö Godea memelei nefolalebe amoli dahila neala hamomolöi walebelela bimolöie, dolöea

hamomolöi made gadoige, hido elöige hamosa namolömelë. <sup>23</sup> Dili idihë namialo. Nelebo amoli hamola made neebe amo gaalu, na dilima dafidi säla iahagomelëla säla ï.

*Hobeala Dolöie Malö bu obëgëmolö  
(Madiu 24.29-31, Ulugu 21.25-28)*

<sup>24</sup> Yesuea aso, sähamu nea sähalea, Yöi yafie elö elöla hamosa maadeibua eso usilahilä, aube made neëla, <sup>25</sup> gasumilï mudaiala besela didigafula, mudaiaa geloi hido elöi amo neala fogolasimolömelë. *Aisaea 13.10, 34.4*

<sup>26</sup> Amala hamose amo gaalu, Dolöie Malö amoda geloile, yo digalo hido elöilebalä mu baidilidaia maala neë udia dolöea bimolömelë. <sup>27</sup> Bease amo gaalu, ea ïe selesaia fii amolima mosalolahilä, udia dolö hi memelei sege föi sulubadelagi, agesu näiada nefolalebe amolige, näiada nefolalebe amolige, sege afädëgi neala gedolasimolö mosalola sämolömelëla säi.

*I bäu bobagiloie ado säi  
(Madiu 24.32-35, Ulugu 21.29-33)*

<sup>28</sup> Yesuea aso, sähamu nea sähalea, Diliada äfäeoie mala amogi helësëmäia sähago. Äfäeo fësëgësisila, bäu gähe bobagiseda, dilia helësësalea, sege esomolöda ga made gabula helësëlomelë. <sup>29</sup> Amo gadola wäla, dilia nelebo säi amo gadoi hamose beaseda, Dolöie Malö amo hä moholö suägisa gabula helësëmalö. <sup>30</sup> Na dilima dofä gelola sähago. Udia dolö walio nefolalebeago made baagola nefolalegi wäla, nelebo säi amoli sulubadela hamosa maademolömelë. <sup>31</sup> Mu giwige naga föige hogosa helemolö gaso, nïe ado mala dofä made hogosa helemolömelëla säi.

*Nelebo gowe gala hamomolö gabula sulubadelaewa dawa madela Yesuea säi  
(Madiu 24.36-44)*

<sup>32</sup> Yesuea aso, sähamu nea sähalea, Amala hamomolö amoda segeyoge, aoage afädëa dawa mademelë. Selesaia fii iliage, malöeage dawa mademelë. Naadoea hido dawadigi neamelë. <sup>33</sup> Nelebo amoli hamomolö amoda gowe gala hamomolö gabula dilia dawa made ameada, dilia hedabola idihë namialo. <sup>34</sup> Amoda gowe gadoimelë. Dolö afädëa, ïe mosö diğila, sege wagadi made aulo amo gadola awähalea, ïe hamoi hamolasiloma, ïe hamoi beaha namialola säla, hido hidolama hamoi sogolahilä, idiliba beaha aligilo amoma sähalea, Hedabola beaha namialola säsilä aulomelë. <sup>35-36</sup> Mosö eedo amoda së gäse gaalu obëgëmolöledu ma, gasi mogogi obëgëmolöledu ma, haea gäse gaalu obëgëmolöledu ma, yose obëgëmolöledula dilia dawa made neebe ameada, dili oböla adi elaboi diëgi fodolofali muloea, idihë namialo. <sup>37</sup> Na dilima ado säla iasewe gadola udia dolö sulubadelamage, dili idihë namialola säla iahadiola säi.

## 14

*Busa dolö ilia Yesu nufulöie didiäha dilo  
(Madiu 26.1-5, Ulugu 22.1-2, Yone 11.45-53)*

<sup>1</sup> Segeyo äudä nelolahilä, osodagi Baagila Asi Segeyo amoie molö molö amoda, Beledi Yidila Made Gobei Segeyo amoie molö gabula helësëi. Amala helësëlahilä gobela ilo busa nefolalo amolaliage, mala dawadigi nefolalo amolaliage didiähalea, Yesuma wäfalï abeahäla sälahilä, e gaula nufulödula säla didiäha difolalo. <sup>2</sup> Iliä sähalea. Segeyo Edefadegi gedola molö nasolo amo galada, amala made hamodelä, udia dolöea nilibalä nuduloeala säi.

*Udia afädëa Yesuie busagia susu gadoi weli söga negei  
(Madiu 26.6-15, Yone 12.1-8)*

<sup>3</sup> Yesu eda sege Bedani ami Saimonoea mosöa molö naha sulo. Saimono eda dafidi gudubu hamoi nelo. Ea mosöa ami sebegi, udia afädëa weli hedabi gafisigäi hido elöi, amoie ëida nada. Weli amoda muni edefadea nelo ödä i igia hamoigi osala negei dilo. Amo gaula maala dusulahilä, Yesuie busagia söga negei. <sup>4</sup> Amala hamosebegi, udia dolö odoafolalo amolia habobalahilä, hilidomu sähalea. Weli gafisigäi we memalä edoie waeesadu. <sup>5</sup> Weli gafisigäi egoweda gina hädali ohodoa (300) nimolöi. Amala nii galebeda dolö busadäoi nefolalebe amoligali neala ialabio gabula säla, ilia udia amoma habobala baagido säha dilo. <sup>6</sup> Amala säsebegi, Yesuea ilima sähalea, Beasimo. Edoie ema habobala baagido säha. Udia gowea nema hamoi amoda, hedabi hido elöi hamoimelë. <sup>7</sup> Udia dolö busadäoi nefolalebe amolida dilibalä namolöi namolömelë. Dilia ili abodo gala ugila negemolöila helësësedä, amoda dilia ugila negemolö dofea. Gaso, neda dihilibalä namolöi namolö mademelë. <sup>8</sup> Udia gowea hamomolöi beala hamoimelë. Ea nïe domalogi nada hëi amoda, hobeä nïe domalo baumulö amoie, dafidi daiala hëimelë. <sup>9</sup> Na dilima dofä gelola sähago. Ado Mala

Hedabi sege fōi sulubadelagi sāla olelesaleada, e helēsēla, ea walio nema hamoi amo sāla īmolōmelēla sāi.

*Yudasaea Yesu hololōmolō asi  
(Madiu 26.14-16, Ulugu 22.3-6)*

<sup>10</sup> Amalahilā bēgēla aulo giwilasi amoligi Yudasa Isagaliadaea gobela ilo busa neebee ami awālahilā, ilia Yesu nufuāia hololōmolō asi. <sup>11</sup> Ea sāi amo nabala ilia obeāgīlahilā, egali muni īmolōmelēla sāla ī. Amalebe ea Yesu hololōla gaula īmolōie fu hogosa nelo.

*Yesula īe bēgēla aulolali Baagila Asi Segeyo amoie molō mai  
(Madiu 26.17-25, Ulugu 22.7-14,21,23, Yone 13.21-30)*

<sup>12</sup> Segeyo agegi Beledi Yidila Made Gobei Segeyo amo besela galaseda, Isilale iliada Baagila Asi Segeyo amoie sugua sibi malō nufidelo. Segeyo amo gala, īe bēgēla aulo amolia Yesuma nabahalea, Baagila Asi Segeyoie molō molō amoie nilia abidi daiamāia hamesebela nabi. <sup>13</sup> Amala nabasebegi, ea īe bēgēla aulo āudā mosalalahilā, elema sāhalea. Ali awāla gaamugi besela galahamelē, dolō afādēa ödā iigi usi gaui maaha neēgi, gausiamolōmelē. Alige dolō amo bēgēla mosalo. <sup>14</sup> Alia beahamelēle, dolō amo mosōa nogila digaseda, alia mosō eedo amoma gomalā sāmalo. Sāla Olelelo neebe amea dima nabahalea, nīe bēgēla aulola nili Baagila Asi Segeyo amoie molō molōie nīe mosō hogoli abidi dialeala nabimelēla sāmalo. <sup>15</sup> Amala sāsedā, ea filo aulige molō negelo aulige daiāla negesa maadei hogoli edefade daia dilo amo olemolōmelē. Ami nili molō molō daiamalola sāi. <sup>16</sup> Amala sāi amo nabalahilā, īe bēgēla aulo āudā amole awāla, Yalusaleme besela galalahilā beahamelebe, ea sāi amo gadola sulubadela gausiala digaha maadesebegi, elea Baagila Asi Segeyo amoie molō molō daiai.

<sup>17</sup> Deadi Yesula īe bēgēla aulo giwilasi amolibalā misi. <sup>18</sup> Maalahilā ili molō naha sefolalea Yesuea sāhalea, Na dilima dofā gelola sāhago. Dili sebegogi afādēa ne hololōmolōmelē. Dolō amoda nebalā molō naha saleala sāi. <sup>19</sup> Amala sāsebegi, ilia asigia yōlahilā, ema hido hidolalea dafidi hobeala sāla didigahalea. Nale ma, nalela sāla didigai. <sup>20</sup> Amala sāla didigasebegi, Yesuea ilima sāla obēgēsalea, Dili giwilasi sebegogi afādēa nebalā falo afādēdaia beledi ua negela naha sebe ameamelē. <sup>21</sup> Dolōie Malō amoda bebagi īe dēdēla negei dibe amo gadola baagomolō. Gaso, Dolōie Malō e hololōla odoāie naabogi gausise dolō amo, asigiisebemelē. E emea made neegela āgūi galebada, e hedabi aligilabiomelēla sāi.

*Yesuea beledile wani ödāle īe bēgēla aulo amoligali ī  
(Madiu 26.26-30, Ulugu 22.14-20, Age Golidi 11.23-25)*

<sup>22</sup> Ili molō naha sefolalea, Yesuea beledi afādē neala gaula nea, Godema nesegelahlilā, beledi amo dagabodasila īe bēgēla aulo amoligali īa gogosalea sāhalea, Nimo. Nīe domalo gomelēla sāla ī. <sup>23</sup> Amalahilā, ea wani ödā usi amo neala gaula nea, Godema nesegelahlilā iligali iasebegi, ili sulubadelaēa nea mai. <sup>24</sup> Ea ilima sāhalea, Goda nīe healemelē. Asialo made ado sāla negei amoie mida nīe heale gogi dialeamelē. Amoda udia dolō sulubadelagali besigahawe. <sup>25</sup> Na dilima dofā gelola sāhago. Ne wani ödā bu elō made naala nelolahilā, Godea Beaha Maadela Sigi Neebee ami nea, bu gāhe elō molōmelēla sāi. <sup>26</sup> Amala sālahilā, ilia gē afādē udālahilā, ili Olibe bi daia fedafiai.

*Fida, dia ne dawa madela sāmōlōmelēla sāi  
(Madiu 26.31-35, Ulugu 22.31-34, Yone 13.36-38)*

<sup>27</sup> Yesuea ilima sāhalea, Dili sulubadelaēa ne digīla fisāla awāha maademolōmelē. Bebagi ado sāla dēdēla negei dibe amea sāhaleada, Na sugua sibi sigi aligilo neebe amo nūfulōmelē. Amaseda sugua sibi nefolalebe amoli fisāla dusudasila afufumolōmelēla sāla dēdēla negei dialea.

*Segelaea 13.7*

<sup>28</sup> Amaimo, Godea ne nowelasisigida, dili baagila nedale dafidi Galili moholōmelēla sāi. <sup>29</sup> Amala sāsebegi, Fidaea sāla obēgēsalea, Ili sulubadela fisāla awāseda, neda made fisāla moholōmelēla sāi. <sup>30</sup> Amala sāsebegi, Yesuea ema sāla obēgēsalea, Dima na dofā gelola sāhago. Walio gasigi haea gagalugo gawalia nafi bu āudā made gāla neēgi, dia ne dawa madela nafi bu ohodoala sāmōlōmelēla sāla ī. <sup>31</sup> Amala sāsebegi, ea gelolafalī sāla obēgēsalea, Neda dibalā baagomolō nea galēda, na di dawa madela dofā made sāmōlōmelēla sāi. Ili sulubadelaēa amo gadolamu sāi.

*Yesu e Gesemani awālahilā Godebalā adosa sulo  
(Madiu 26.36-46, Ulugu 22.39-46)*

<sup>32</sup> Yesula, īe bēgēla aulolali sege ēi Gesemani dibeā ami afialahlilā, ea īe bēgēla aulo amolima sāhalea, Ne Godema adomolō awāsewe gaalu, dili wi sefolamialola sāi. <sup>33</sup> Amala sālahilā, ea Fida Yamese Yonela ilimu sigi awālahilā, īe asigigi fudugila yōla sāosōmolō mi gāwila besela galai. <sup>34</sup> Ea ilima sāhalea, Nīe iso asigigi edefademalā yōsalea, ne baagomolō

gabumelê. Dili gui salea idihê namialola sai. <sup>35</sup> Amala sâlahilâ e holôbö aliga gala nagadaia gumusula dia idogolahilâ sâhalea, Asiamolô fu galêda, nema walio hamomolô amo asiamalola sai. <sup>36</sup> Ea sâhalea, Aba, Naado, dia nelebo sulubadela hamosa maademolô nebege. Nema ôdâ igi usi dibe amo dia nea nimalo. Amai gaso, na helêsêsewe gadola made, dia helêsêse amo gadola hamomalola sai. <sup>37</sup> Amala sâlahilâ obêgêsamelebe, ili sûwia adidi dibe amo bealahilâ ea Fidama sâhalea, Saimono, adi dialeale. Dia damo afâdê idihê namolô ulîsebele. <sup>38</sup> Nafadea dili digalasiloea, idihê nea Godema adosa namialo. Asigia hamomolô helêsêsa neago gaso, domalo wâbêai nebegola sai. <sup>39</sup> Amala sâsila e bu awâlahilâ, dafidi sai amo gadola sâha sulo. <sup>40</sup> Amala sâlahilâ e bu obêgêsamelebe, ili adidimu dibe melî. Mida, sûwiaea si gafodo gadugisalea amai. Ila ema edo sâla obêgêmolôdula asusugai. <sup>41</sup> E bu osoda obêgêlahilâ ilima sâhalea, Dili hele salea adidi dialealedu. Amo dofea. Fu hâ besela galai gabu. Bimo. Dolôie Malô amoda nafade hamolo amolima gaula iasebege. <sup>42</sup> Nowemo. Nilia gausiala afiadi. Ne gaumâia hololôlo amoda ga made misi nebege bimola sai.

*Yesu gauî*

*(Madiu 26.47-56, Ulugu 22.47-53)*

<sup>43</sup> Yesuea ado aso sâha nebegi, ie bêgêla aulo giwilasi amoligi Yudasa e dolô maleibalâ fodolofalî misi. Ila helebe baialage gagaula ebalâ misi. Gobela ilo busa amoliage, mala dawadigi amoliage, dolô dafidilo amoliage ili mosalola fisiga wesebegi misi. <sup>44</sup> Yesu gaumâia hololôlo amea ilima dafidi daiala sâhalea, Na gomalâ hamoseda, amo gabula helêsêmalô. Dolô na mimila nôdôseda, amo gaula hedabola sigi mosalola sâla i. <sup>45</sup> E besela galala, Yesu neebee fodolofalî maala aligilahilâ sâhalea, Sâla Olelelola sâlahilâ, Yesu mimila nôdôi. <sup>46</sup> Mimila nôdôsêbegi, ilia hâ e fêdôla gauî. <sup>47</sup> Amala hamosebe amo gaalu, dolô afâdê ami nelo amea helebe besela nealahilâ, gobela ilo Busa Edefade amoie hamoi hamolasilo neebe amoie gêhe dagala salisi. <sup>48</sup> Yesuea ilima sâhalea, Fa nelo gaumolôie mulo amo gadola, helebe baialage gagaulahilâ ne gaumolô misile. <sup>49</sup> Segeyo yafiegi ne dilibalâ nea Godeie mosôa ado mala olelesa nelo amogi ne dila made gauî amoda. Amai gaso, bebâgi ado sâla dêdêla negei dibe amo gadola hamomâiamelêla sai. <sup>50</sup> Amasebegi, ie bêgêla amoli sulubadela e digila fisâla awâha maadei.

*Malô malisâ afâdê fisâla asi*

<sup>51</sup> Malô malisâ afâdê fagulo bulula gâi Yesu bêgêla awâha nebegi, dolô amolia e gauî. <sup>52</sup> Gaso, fagulo bulula gâi amo ilima gila amilahilâ e dudugîmu fisâla asimelê.

*Yesu e galîsolô dolô amolibalâ gudimolôie sigi asi*

*(Madiu 26.57-68, Ulugu 22.54-55,63, Yone 18.13-14,19-24)*

<sup>53</sup> Ila Yesu e sigi gaula gobela ilo Busa Edefade sebea ami asi. Gobela ilo busa amolige, dafidilo amolige, mala dawadigi amolige gedola ami sulo. <sup>54</sup> Fida e Yesu bêbêgêla asi. Gaso, eda holôbö hobeala awâha nelolahilâ, gobela ilo Busa Edefade amoie mosô yala isogi nogila digalahilâ, idihê aligilo amolibalâ nulo gobeia ami hêgi hausa sulo. <sup>55</sup> Gobela ilo busa amoliage, Galîsolô dolô amoli sulubadelaeeage, dolô odoaea Yesuea asiala hamose melêlo amoli misialolahilâ, ilia fâdâla sâmalai. Ila e nufuâia ea asiala hamoi walebelela hogosamelebe, afâdê made melî. <sup>56</sup> Ilima dolô yafea ea made hamoi amo babala sai gaso, ado afâdêdi made melî. <sup>57</sup> Odoaea nowela nea ea made hamoi amo babala sâhalea, <sup>58</sup> Nilîada ea gomalâ sâse nabimelê. Godeie mosô dolôie naaboea hamoi amo, ea haila digila, segeyo ohodoagi ea bu ulimolô amoda, dolôie naaboea olelo amo gadola made, ulimolômelêla sâimelêla sai. <sup>59</sup> Ila ado amala sai amoge aso afâdêdi made melî. <sup>60</sup> Amala sâsebegi, gobela ilo Busa Edefade amea dolô sefolalebe amoie mogogi nowela aligilahilâ Yesuma nabahalea, Dia ado afâdê made sâla obêgêmolôle. Ila dia asiala hamoilâ sai amo edo hamoilâ nabi. <sup>61</sup> Yesuea nafi daga made sâla obêgêsêbegi, gobela ilo Busa Edefade amea ema bu elô nabahalea, Dida Afâdê Memelei Gode hedabi hido elôi neebe amoie malôda dilela nabi. <sup>62</sup> Amala nabasebegi, Yesuea sâla obêgêsalea, Â, neda amomelê. Dolôie Malô e Geloi Edefade Neebe amoie naabo dafâdimadi fila, mu baidilidaia maala neêda, dilile siia bimolômelêla sai. <sup>63</sup> Amala sâsebe amo nabala gobela ilo Busa Edefade amea mihalâla hîle fagulo nulilahilâ sâhalea, Ea hamoi amo sâmâia odoa misialola nalî made sâmalô. <sup>64</sup> Ea Gode gagadese nabi amo. Dilia abilia helêsêsebelâ nabi. Amala nabasebegi, ili sulubadelaea sâhalea, Ea asiala hamoi amoieda e baagomâia nufulô dialeala sâla didigai. <sup>65</sup> Amala sâlahilâ odoaea e gofedela galala, ie si usulala naabo gafea nufudalahilâ sâhalea, di dolô gowea nufila olemola sai. Amase, idihê aligilo amoliage elea nufudala fisiga gala eleâha nelo.

*Fidaea, na Yesu dawa madela sai*

*(Madiu 26.69-75, Ulugu 22.56-62, Yone 18.15-18,25-27)*

<sup>66</sup> Fida e yala isogi nogila digala sebegi, gobela ilo Busa Edefade amoie hamoi hamolasilo dolisâ afâdê maalahlilâ <sup>67</sup> beahamelebe, Fida e hêgi hausa sebe amo fâdâla bealahilâ sâhalea,

Dige Nasalese dolö Yesubalä nawesa aligilo amo gabula säi. <sup>68</sup> Amala säsebegi, Fidaea ne mademelëla sälahilä sähalea, dia ado säsebegoda, na dofä dawa mademelëla säi. Amala sälahilä e mosö amoie idi galo baagido awäha nebegi haea Galugulugoea gäi. <sup>69</sup> Hamoi hamolo dolö sä amea e bealahilä, dolö nefolalo amolima bu sähalea, Dolö goda amoligimelëla säi. <sup>70</sup> Amala säsebegi, ea bu elö sähalea, ne mademelëla säi. Holöfali nelolahilä dolö nefolalo amolia Fidama bu elö sähalea, Dofä. Dida amoligi. Dige Galili dolömelëla säi. <sup>71</sup> Amala säsebegi, Fidaea gelolafali säla gabulo amo gadola migalia diigila sähalea, na we wäfali säseba, Godea ne dofä sê imäiamelëla sälahilä, Dilia dolö ëi säse goda na dofä dawa mademelëla säi. <sup>72</sup> Ea amala säia gai amole haea galugulo gawalia nafi bu äudä gäi. Fidaea amo nabalahlilä dafidi Yesuea, haea galugulo gawalia nafi bu äudä made gäla neëgi, dia ne dawa madela nafi bu ohodoala sämolömelëla säi amo helësëla obëgëi. Amo helësëlahilä dïisa nelo.

## 15

*Yesu Bailadi neebee sigi asi*

*(Madiu 27.1-2,11-14, Uluğu 23.1-5, Yone 18.28-38)*

<sup>1</sup> Yosefali gobela ilo busa amolige, dolö dafidilo amolige, mala dawadigi amolige, Galisolö dolö amoli sulubadelage gege dolahlilä ilia hamomolö amoie ado didiäha dilo. Didiäha dilolahilä ilia Yesu e igi ëfëa nafodolahilä Bailadi neebee sigi gaula asi. <sup>2</sup> Sigi gaula maasebegi, Bailadia Yesuma nabahalea, Yu udia dolöie beaha aligilo ginida dilela nabi. Amala nabasebegi, ea säla obëgësalea, Dia säse gomelëla säi. <sup>3</sup> Gobela ilo busa amolia sähalea, Eada nafade yafie hamoimelëla säi. <sup>4</sup> Iliä Amala säsebegi, Bailadia ema bu elö nabahalea, Dia ado afädë made säla obëgëmolöle. Iliä dia nafade yafie hamoila säi amo nabilela nabi. <sup>5</sup> Amala nabi amogi Yesuea ado elö made säla obëgësebegi Bailadi e fudugisa nelo.

*Bailadia Yesu e i fügäigi baala negemalola säi*

*(Madiu 27.15-26, Uluğu 23.13-25, Yone 18.39-19.16)*

<sup>6</sup> Gäheo i sulubadelagi Segeyo Ede amoie molö nase segeyo amo galada, udia dolöea galabaia negei amoligi ëi säla gowe fisigämola säsegi Bailadia fisigähamu aligilo. <sup>7</sup> Segeyo amo gaaluda, dolö odoaea gamanebalä nudusalea dolö odoa nufudasebegi, ilia ili galabaia negei. Amogi dolö afädë galabaia negei nelo amoie ëida, Balabasa. <sup>8</sup> Udia dolö gegedoi amolia Bailadi neebee maalahilä, ema sähalea. Dia nilima gäheo i sulubadelagi hamolo amo gadola walio hamomäiamelëla säi. <sup>9</sup> Ea ilima säla obëgësalea, Na Yu udia dolöie beaha aligilo gini dihilima fisigämäiala helësësebelela nabi. <sup>10</sup> Amala säi amoie mida, gobela ilo busa amolia Yesuma mudiala mihalälahlilä e sigi gaula misi gabula helësëla, Bailadia amala säi. <sup>11</sup> Gaso, gobela ilo busa ilia, udia dolö gegedoi amolia Bailadima, Balabasa hilima fisigämäiala gelola sämäiala si nigilasi. <sup>12</sup> Bailadia ilima bu elö nabahalea, Dilia Yu udia dolöie ginila sälo neebe gowema na abilia hamomäia helësësebelela nabi. <sup>13</sup> Amala nabasebegi, ilia bu uuala sähalea, Eda i fügäigi baala negemalola säi. <sup>14</sup> Amala säsebegi, Bailadia ilima sähalea, Mi edogi. Ea edo nafade hamoi gabiola nabi. Amala nabasebegi, ilia gelolafali sähalea, I fügäigi baala negemalola säi. <sup>15</sup> Amala säsebegi, Bailadia, udia dolö gegedoi amolia obëgëmäia, Balabasa hilima fisigälahlilä, ea ami dolö ilia Yesu fëgämalolahilä, ilia i fügäigi baala negemolö sigi mosalai.

*Ami dolö ilia Yesu gadiaboi*

*(Madiu 27.27-31, Yone 19.2-3)*

<sup>16</sup> Ami dolö amolia Yesu sigi gaula gamane sigi aligiloie mosö yala isogi nogila digai. (Mosö amoie ëida Beledoliama.) Iliä ami dolö odoage misialosebegi gegedoi. <sup>17</sup> Gedolahilä ilia fagulo sedade bëi gadoi Yesuma salugasilahilä, ëfë äyo gägäi amalela nasigila ginie habuga gadoi hamolahilä ie busagia salugasi. <sup>18</sup> Amalahilä ilia naabo sögödügila sähalea, Yu udia dolöie beaha aligilo gini, namolöi namiäiamelëla säi. <sup>19</sup> Amala sälahilä, ilia ie busagia buudi damuia nufudalahilä, godefela gagalai. Amalahilä ilia ie ëi gauia adogose gadoi hamola emo gumu sasagala dia digafui. <sup>20</sup> Iliä ema gagadela hamomolö amo gadoi hamosa maadelahlilä, fagulo bëi sedade gäsi amo gilahlilä hile fagulo amo salugasi. Salugasilahilä ilia e i fügäigi baala negemolöie segea sigi asi.

*Yesu i fügäigi baala negei*

*(Madiu 27.32-44, Uluğu 23.26-43, Yone 19.17-27)*

<sup>21</sup> Ili idiafa afiaha dibegi Sailini fii dolö afädë ie ëida Saimono. Alegisäda Ulufasalele eedo amo, sagaiala maaha nebegi gausiala digalahilä, ami dolö amolia ema Yesuie i fügäi gaumalala eegei. <sup>22</sup> Iliä Yesu sigi gaula sege ëi Gologoda asi. (Gologoda nilile ado adolada Busa Giwi Sege.) <sup>23</sup> Iliä wani ödäge i afädëie ödä muwege gegoalahilä egali muäia i gaso, ea made mai. <sup>24</sup> Amalahilä, ilia e i fügäigi baala negei. Iliä ie fagulo amo nowëa nimabelela, ilia sadu dahilahlilä, ie fagulo amo amala mogei. <sup>25</sup> Yose eso neëla udigisa nebegi, e i

fügäigi baala negei. <sup>26</sup> Ea nafade hamoila sälo amolia dëdësaleada, Yu udia dolöie beaha aligilo ginila säla dëdëi. <sup>27-28</sup> Amase, Yesu baala negei amo gaalu, fa nelo dolö äudä, elö ie naabo dafädimadi, elö ie naabo fefeädimadila, i fügäigi baala negei. <sup>29</sup> Udia dolö e dibeadi baagila afu mafusaleada, Yesu gagadiabola busa dugagila sähalea, Èhehe, Godeie mosö haila digilahilä, segeyo ohodoagi ulimolöeai amo, <sup>30</sup> dihimu damula awäla i fügäia adogoila digamola säla baagila nelo. <sup>31</sup> Amo gadola wäla gobela ilo busa amoliage, mala dawadigi amoliage Yesu gagadiabola säla didigahalea, Eada udia dolö odoa ugila negela wahilo amo gadola, e himu ugila negemolöi made gabugi dialealedu. <sup>32</sup> Nilia ema asigi afädë negedeläie Afädë Memelei, Isilale udia dolöie gini ameada, e i fügäia adogoilahilä digamäia. Nilia amo bealahilä, asigi afädë negedeläla säi. E i fügäigi baala negei gaalu, i fügäigi baala negei äudä amoleage e gadiabola amo gadolamu säi.

*Yesu hame doala asi*

*(Madiu 27.45-56, Ulugu 23.44-49, Yone 19.28-30)*

<sup>33</sup> Eso mogogila eso bëgise gaaluge, sege sulubadela gasilasimu dilo. <sup>34</sup> Eso bëgise gaalu, Yesuea gelolafali säia adahalea, Elöi, Elöi, lama sabagadanila säi. Nilile ado adolada, Nie Gode, nie Gode, abisigi ne digila asila säi. <sup>35</sup> Amala säi amo nabalahlilä, udia dolö odoa ami nefolalo amolia sähalea, Nabuö. Ea Elaia wesebegola säi. <sup>36</sup> Afädë baluluia awälahlilä, nelebo afädë dahudu gadoi wani ödä gamogai dibeami gelahlilä, i bidigi yaala, egali muäia ialahlilä sähalea, Aso. Elaiaea e i fügäigi dibeami adogoi fisigamolö maasebelela beaha aligidila säi. <sup>37</sup> Yesuea gelola uualahlilä hame doala asi. <sup>38</sup> Amasebegi, gobela ilo mosöa fagulo edefade negei dilo amo, gadogola gadelala digalahilä, elö eamu eamula negesi. <sup>39</sup> Ami dolö hädali afädë beaha aligilo dolö amea sida adogola beahamelebe, Yesu amala hame doala asi amo bealahilä sähalea, Dolö goda dofä Godeie malö gabula säi. <sup>40</sup> Amo gaalu, udiáfali holöb wagadi madela nea, sida gala nefolalo amoligi Magadala udia Melige, Yosese ie öo Yameselele eme Melige, Salomege nelo. <sup>41</sup> Dafidi Yesu e Galili neëgida, ilia e awäse amo gadola awälahlilä, e ugila negesa filo. Udia odoa yafie ebalä Yalusaleme misi amolige nefolalo.

*Yesu baui*

*(Madiu 27.57-61, Ulugu 23.50-56, Yone 19.38-42)*

<sup>42</sup> Segeyo amoda nelebo daialo segeyo. Deadise gaalu, segeyo Sabada aiyu namolö gabula helësälahlilä, <sup>43</sup> Alimadia dolö Yosebe Bailadi neebee awälahlilä, bedälo made mumulasi amea, Yesuei domalo nimolö audulela nabi. Dolö amoda Galisolö amoligi asigi hedabi negei nea, Godea Beaha Maadela Sigi Neebe amo beaha nelo. <sup>44</sup> Amala nabasebegi, Bailadia e aabela baagoi gabula fudugilahilä, ami dolö hädali afädë beaha aligilo amo welahlilä e hä baagoilela nabi. <sup>45</sup> Amala nabasebegi, Bailadima ami beaha aligilo amea e hä baagoimelëla säi amo nabalahlilä, Yosebema ie domalo nimolö dofeala säi. <sup>46</sup> Amala sälebegi Yosebea fagulo falei hedabi afädë nealahilä, ie domalo i fügäidaia dibe amo neala gaula digalahilä, fagulo amea usulala gaulahlilä, igi äbä dafidi hamola negei diloa ami baumulö gaula asi. Bausilahlilä, igi edefademalä afädë bebugula gaula maalahilä amea idi gasi. <sup>47</sup> Amala bausi dibe amo Magadala udia Meli Yoseseie eme Melilea meli.

## 16

*Yesu nowela asi*

*(Madiu 28.1-8, Ulugu 24.1-12, Yone 20.1-10)*

<sup>1</sup> Segeyo Sabada gafe maadeibua, Magadala udia Melige Yameseie eme Melige Salomege ilia Yesuei domalogi häla moholöie, weli gafisigäi hido elöi amo bidia nii. <sup>2</sup> Segeyo gifalädalugi yosefali ili äbägi bauia ami afiai. <sup>3</sup> Hilido afiaha dialea sähalea, Bausalea igi edefadea gai amo nowëa ugila negela doga negesimolödula säsäla afiai. <sup>4</sup> Afiaha dialea igi edefadea gai dilo amo sida gala beahamelebe, igi edefade amo bebugula fisiga galahlilä doge negei dibe meli. <sup>5</sup> Ili äbä isogi bauia ami nogila digalahilä beahamelebe, malö malibu afädë fagulo falei sedade gai ilile naabo dafädimadi sebe amo bealahilä, ili fudugi. <sup>6</sup> Malö malibu amea ilima sähalea, Dilia fudugimabu. Dilia Nasalese fii Yesu, ilia i fügäigi baala negei amo hogola misi goda, eda nowela asimelë. Eda wi maade. Ili e negei diloa amo bimo. <sup>7</sup> Hä dili afiala Fidamage ie bëgëla aulo odoa amolimage säla iahaleada, Ili e Galili bimolömelëla dafidi säla i amo gadola, eda edale Galili moholö awäha neamelëla säla imalola säla i. <sup>8</sup> Amala säi amo nabalahlilä ili igi äbägi amila fodolofali doadigila awähalea emo gisigëla fudugila aligi afiai. Udia dolö odoabaläge made adoi. Mida, ili bedähalea.

*Magadala udia Melia Yesu meli*

*(Madiu 28.9-10, Yone 20.11-18)*

[<sup>9</sup> Segeyo gifalädalügi yosefali Yesu e nowelahilä, Magadala udia Melia bimäia e se-beadale Yesu e ulufala besela galai. Dafidi udia amoma mugabe gifalädalia fedai sebegi Yesuea nesila digi. <sup>10</sup> Besela galai amo bealahilä, Yesubalä dafidi nawesa aligilo amolia asigiila diisa dibeä ami säla imolö asi. <sup>11</sup> Awälähilä Melia ilima sähalea, Yesu hi nowela asi amo na melimeläla säi. Iliä nabi gasoda dofä gabula made heläsëi.

*Bëgëla aulo äudäea Yesu meli*  
(*Uluğu 23.13-35*)

<sup>12</sup> Hobeala ie bëgëla aulo äudä ididila awäha nebegi, Yesu e domalo elölahilä elea e bimäia besela galai. <sup>13</sup> Amo bealahilä ele obëgëla awäla bëgëla aulo odoa amolima säi gaso, ilia dofä gabula made heläsëi.

*Yesuea ie bëgëla aulo amolima Ado Mala Hedabi säla imalola säi*  
(*Madiu 28.16-20, Uluğu 24.36-49, Yone 20.19-23, Abosolo 1.6-8*)

<sup>14</sup> Amalahilä hobeafali gidälasi amoli molö naha dibeä ami Yesu e besela galai. Besela galalahilä ilia asigi afädë made negei amogige, iso asigi geloi neebe amogige, odoaea e hi nowela neebe melila säi amo nabalähilä dofä gabula made heläsëi amogige nemoi. <sup>15</sup> Amalahilä ea ilima sähalea, Dili sege föi sulubadelagi afufulahilä, udia dolö sulubadelama Ado Mala Hedabi säla imalo. <sup>16</sup> Afädëa asigi afädë negeseda, ödägi gelahilä damula aulo neala gaumolömelë. Be afädëa asigi afädë made negeseda amobalä gudimolömelë. <sup>17</sup> Asigi afädë negei neebe amoliada dolöea hamomolöi made gowe gadoi hamomolömelë. Nie ëgi nea mugabe fedai nesila digimolöge, udia dolö odoae ado adomolöge, <sup>18</sup> baagolo nuba gausege baagolo ödä nasege made baagomolömelë. Oloi difolalebe amoli ilia naaboea diigiseda wahimolömelëla säi.

*Yesu selesaia mosöa fedai*  
(*Uluğu 24.50-53, Abosolo 1.9-11*)

<sup>19</sup> Dafidilo Geloia Yesuea ilima ado amo säla ialahilä, selesaia mosöa fedalahilä Godeie naabo dafädimadi sulo. <sup>20</sup> Amala asibua ili afufulahilä, sege sulubadelagi ado mala säla iaha nebegi, Dafidilo Geloia ilibalä hamoi hamola, ilia dofä säsebelä heläsëmäia dolöea hamomolöi made gadoi hamolasij



## Yone Neala olelo oboba

Ado Mala Hedabi Yoneie bebagi dëdëi dibe amea sähaleada, Ado eda dolö domalola digala, nilibalä wi nelola säla dëdëi. Yonea beba gowe dëdëi amoie mida, ea sähalea, beba gowegi dëdëla negei dibe amo nidesalea, Godeie malö Yesu Gelesoma asigi afädë negemäiage, Afädë Memelei amo dofä Yesu Geleso gabula helësëmäiage dëdëla negesamelëla säi (20.31 bimalo).

Dafidi Yonea niliima, Ado eda mi gäwilafalä, Godebalä siiba nelomelëla säla dëdëla negei. Amalahilä, Yesuea hamomolöi made gadoige, melëlo made gadoige hamosa nelo ameadä, Afädë Memelei amoda Yesu, amase, Yesuda Godeie malö gabula helësëmäia ulufala dëdëla negei dialea. Amase, Yonea niliima, Yesuea hamomolöi made gadoige, melëlo made gadoige hamoi amoie mi fädäla säi. Amase, udia dolö odoaea ema asigi afädë negela e bëgëla asi amoge, odoaea ema asigi afädë made negela ebalä ado nii nelo amoge dëdëi bimolömelë.

Hogoli 13-17gi dëdëi dibe ameadä, Yesuea ie bëgëla aulo amolibalä nea, e hä baagomolö ga made gabula helësëlahilä, ilile asigia dofea, aso maadela gelola namiäia, galone yafie säla iaha nelo.

Yonea wagala dëdëla negei dibe ameadä, Yesu e nafodola gaula awäla gudi amoge, e i fügäigi baala negesebegi, hi hame doala mosaloi amoge, e nowela awäla ie bëgëla aulo nefolalebea ulufadigi amoge, dëdëla negei dialea.

Beba gowegi namolö gäheie mala dofä dibe amoli olelemolölahilä, segeyo sulubadelagi hamomolö amoie, galone helësëmolöie dibe amolida gowe. Foïela sälage, ödäela sälage, beledüela sälage, yo digaloïela sälage, i gägä negelo gelebi ëfëïela sälage, sugua sibi sigi aligiloïela sälage, säi amoli dëdëla negei dialea.

## Yone Ado e dolö namolö digai. Eda udia dolöbalä namolö digai.

*(Yone 1)*

*Ado eda namolöie mi, dolö namolö digai*

<sup>1</sup> Ado eda mi gäwilafalä siiba nelo. Eda Godebalä nelo. Ado hi eda Gode nelo. <sup>2</sup> Eda mi gäwilafalä, Godebalä siiba nelo. <sup>3</sup> Afädë idi elömadila misida maade. Godea Adobalä nea nelebo sulubadela hamosa maadeimelë. <sup>4</sup> Emada namolö mi dilo. Namolö ameadä udia dolöie yo digalo nelo. <sup>5</sup> Yo digalo ameadä gasimi sagaia ami yo digaha nea. Gasimi sagaloeada yo digalo amo gesumolöi made dilo.

<sup>6</sup> Godea dolö afädë nagadaia fisiga wei amoie ëida Yone e misi nelo. <sup>7</sup> E misi amoda yo digalo amoie säla imolöie misi. Amaimo, udia dolö sulubadelaie ie ado nabalahlä, asigi afädë negemäiie misi. <sup>8</sup> Hi eda yo digalo amo made. E misi amoda yo digalo amoïemu säla imolö misi. <sup>9</sup> Yo digalo amoda dofä yo digalofali nelo. Udia dolö sulubadelagali yo digalo ilo. E nagadaiawi moholö nelo.

<sup>10</sup> Ado eda nagadaiawi nelo. Ado ameamuda Godea sege fëi hamoi gaso, nagadaia udia dolöea e gowe gabula made helësei nelo. <sup>11</sup> Eda hile segea wi misi gaso, hile sosogoea e made säla olei. <sup>12</sup> Gaso, odoaea e säla olela ie ëigi asigi afädë negesebegi, ea ilima sähalea, Dilida Godeie malö namialola säi. <sup>13</sup> Ii Godeie malö besela galai amoda, eedole emelele healemadila made, amase, domaloie hameloea made, amase, dolöie hameloea made, Godeamu ie malö hamola besela galai.

<sup>14</sup> Ado eda dolö domalola digala, nilibalä wi nelo. Nilibalä wi nebegida, ie yo digaloge ie geloige hido elöi amo nilia melimelë. Eedoie malö emu nea, ugila negelole ado dofäle ema nobala, ie yo digaloge ie geloige hido elöi dilo amo nilia melimelë.

<sup>15</sup> Yonea Adoie säla iaha nelo. Ea uuala sähalea, Dolö goda dafidi na dilima säla iahalea, Ne baagia maase amoda, ne baagila asimelë. Mida, ne maadeia e dafidi nelola säila säi. <sup>16</sup> Ema nobai amo adugasebegi, ea nili sulubadela ugila negelahlä, hä, bu elöge ugila negesamu nelo. <sup>17</sup> Godea Mosemadila mala säla negei amo säla i gaso, ugila negelole ado dofäleda, Yesu Gelesomadila misimelë. <sup>18</sup> Afädëa Gode dofä made meli gaso, ie Malö afädëfali amea Gode e niliima ulufala olei. Malö amoda dofä Gode. Eda Edobalä dila nea.

*Ödägi gelo Yonea säla iaha nelo*

*(Madiu 3.1-12, Maga 1.7-8, Ulugu 3.15-17)*

<sup>19</sup> Yu ilia gobela ilo dolöge, amase Ilibai dolöge Yalusalemela Yone neebä mosalosebegi, ili maala Yonema nabahalea, Dida nowëla nabi. Amala nabasebegi, Yonea gomalä säla i. <sup>20</sup> Ea müsügä negela made, hedabola ulufala säla iahalea, Afädë Memelei amoda ne

mademelëla säla i.\* <sup>21</sup> Amala säla iäsebegi, ilia ema nabahalea, Amai dida nowë. Dida Elaialela nabi. Amala nabasebegi, ea säla obëgësalea, Neda e mademelëla säi. Amala säsebegi, ilia ema bu nabahalea, Dida bea sälo amolela nabi. Amala nabasebegi, ea säla obëgësalea, Ai. Neda amo mademelëla säi. <sup>22</sup> Amala säsebegi, ilia ema bu nabahalea, Dida dofä nowë. Dolö nili fisiga welo amolima eda gowe gabiola sämolöie, diada dihi dimada nowëla sähala nabi. <sup>23</sup> Amala nabasebegi, Yonea bea sälo Aisaeaea säi amo gadola ilima säla obëgësalea, Neda afädëa sege nafadeia udia dolö aligilo made dibea ami nea uuala sähalea, Dafidilo Gelo misiaia idi mogola fodomalola säha neamelëla

säla obëgëi.

*Aisaea 40.3*

<sup>24</sup> Felesi ilia dolö fisiga gai <sup>25</sup> amolia Yonema nabahalea, Dida Afädë Memelei amo made galëda, amase, Elaia made galëda, amase, bea sälo amo made galëda, amai mi edoie dia udia dolö ödägi gesa neala nabi. <sup>26</sup> Amala nabasebegi, Yonea ilima säla obëgësalea, Nada ili ödëeamu gesa neawe. Gaso, dolö afädë dilia made dawa dili mogogi nea. <sup>27</sup> Dolö amoda ne baagia hobeala moholömelë. Nihineda ie emo usililo ëfë fisigämolöda dofea mademelëla säi.

<sup>28</sup> Yonema nabi amoge, amase, ea säla obëgëi amoge ödä Yodona dëgëla alömodi, Bedani segea nea amala säi. Segea amida Yonea udia dolö ödägi gesa nelo.

*Yesuda Godeie Sugua Sibi Malö neala säi*

<sup>29</sup> Amo aiyu amogi, Yonea Yesu e neebee maasebe amo bealahilä sähalea, Bimo. Egoweda Godeie Sugua Sibi Malömelë. Goeada udia dolö sege föi sulubadelagi nefolabebe amolile nafade hamoi amo hësa maademolömelë. <sup>30</sup> Dolö goda dafidi na dilima säla iahalea, Ne baagia hobeala maase amoda, ne baagila asimelë. Mida, ne maadeia e dafidi nelola säla i amoda egowemelë. <sup>31</sup> Nada e dawa made nelömelë. Amai gaso, e Isilale udia dolöma ulufala olemolöie, na udia dolö ödägi gemolö misimelëla säi. <sup>32</sup> Yonea e ulufala sähalea, Na beahamelebe, Gesami Hebenila haea maliabu gadoi digalahilä, edaia fise melimelë. <sup>33</sup> Nada e dawa made nelo gaso, udia dolö ödägi gemäia ne fisiga welo amea neme sähalea, Dia Gesami digalahilä dolö afädëdaia fise beaseda, dolö ameada udia dolö Eleloi Gesamia gemolömelëla säi. <sup>34</sup> Eda Godeie malö neebe amo na melimelë. Amo na dilima säla imelëla Yonea säi.

*Dolö ohodoaea Yesu bëgëla asi*

<sup>35</sup> Amo aiyu amogi, Yonege ie bëgëla aulo äudä amolege bu amimu nelo. <sup>36</sup> Amala nea, Yonea Yesu awäha neebe amo bealahilä sähalea, Bimo. Egoweda Godeie Sugua Sibi Malömelëla säi. <sup>37</sup> Amala säsebegi, ie bëgëla aulo äudä amolea ea säse amo nabalahlilä, Yesu bëgëla asi. <sup>38</sup> Amalebegi, Yesuea besula beahamelebe, ele e bëgëla maaha neebe meli. Ea elema nabahalea, Alia edo hogosala nabi. Amala nabasebegi, elea ema nabahalea, Elabai-e, dida mosö abodogi saleala nabi. Elabai amo besulada säla olelelola sälo. <sup>39</sup> Amala säsebegi, Yesuea elema säla obëgësalea, Alia bea misiëla säi. Amala säsebegi, ele awälahlilä e diasebe mosö amo beaha nelo. Segeyo amoda ebalä ami nelo. Ele ebalä asi amoda eso si biyidugi gadola deadi asi.

<sup>40</sup> Bëgëla aulo äudëaea Yoneie ado nabala Yesu bëgëla asi amolegi, afädëda Saimono Fidaie edoo Ädulu. <sup>41</sup> Eada Yesu hä amilahlilä, fodolofali ie edoo Saimono bea asi. Amalahilä, ea Saimonoma sähalea, Alia hä Mesaea melimelëla säi. Ei Mesaea amo besulada Gelesola sälo.\* <sup>42</sup> Amalahilä Äduluea e sigi Yesu neebee asi. Maaha nebegi, Yesuea ema siila nea sähalea, Dida Saimono, Yoneie malö. Die eida Sifasala sämolömelëla säi. Ei Sifasa amo besulada Fida.\*

*Yesuea Filibile Nadanalele wei*

<sup>43</sup> Amo aiyu amogi, Yesu e Galili moholö helësëi. E awäla Filibi gausialahlilä ema sähalea, Ne bëgëla misiëla säi. <sup>44</sup> Filibida gaamu Bedesaida ami fii dolö. Sege amoda Ädulule Fidalele sege. <sup>45</sup> Amasebegi, Filibia Nadanale hogola asi amo beagolelahilä ema sähalea, Mosesea Ado säla negei dibe amogi ie dëdëla negei amo gadolage, amase, bea sälo amolia bebägi ie dëdëla negei amo gadolage, nilia hä e melimelë. Amoda Nasalese fii Yesu, Yosebeie malö amo gabiola säi. <sup>46</sup> Amala säsebegi, Nadanalea ema nabahalea, Amai nelebo hedabi afädë Nasalesela moholöi gabulela nabi. Amala nabasebegi, Filibia ema sähalea, Dia bimolö misiëla säi. <sup>47</sup> Amala säsebegi, Yesuea Nadanale e maaha neebe amo bealahilä, e

\* **1:20:** Afädë Memelela säi amoda Godea afädë memelela ie udia dolö sigi obëgëmolöla helësëla säi. Giligi adoeada Gelesola sälo. Hibulu ado sälada Mesaeala sälo. Gelesole Mesaealeda nilile ado sälada Afädë Memelela sälo. \* **1:41:** Hibulu ado sälada Mesaeala sälo. Giligi ado sälada Gelesola sälo. Mesaeale Gelesole nilile ado sälada Afädë Memelela sälo.

\* **1:42:** Ei Sifasada Alamege ado. Segeyo amo gaaluda Yu ilile adoda Alamege ado. Amase, ei Fidada Giligi adomadila misi. Sifasale Fidale nilile ado sälada igila sälo.

helësëla sähalea, Bimo. Dolö maasebe egagoweda dofä Isilale dolömelë. Wäfalí sälo afädë egowemada mademelëla säi. <sup>48</sup> Amala säsebegi, Nadanalea ema nabahalea, Dia ne abilia dawadigila nabi. Amala nabasebegi, Yesuea ema säla obëgësalea, Filibia di, aso, made wela nebegi, di äfäeo i mia sulo amoda na melimelëla säla i. <sup>49</sup> Amala säla iasebegi, Nadanalea säla obëgësalea, Säla Olelelo-o, dida Godeie malö. Dida Isilaleie Ginimelëla säi. <sup>50</sup> Amala säsebegi, Yesuea ema säla obëgësalea, Di äfäeo i mia sulo amo na melila säi amea dia nema asigi afädë negesale. Hobealada go gadoi made, baagila asi elöi bimolömelëla säi. <sup>51</sup> Amalahilä, Yesuea ema bu elö sähalea, Na dilima dofä gelola sähago. Hebeni doga negei bealahilä, dilia Godeie selesaia fii amoli Dolöie Malöma fedafu digafusa neë bimolömelëla säi.

## **Yesuea ie ei ilibia amoge, ie geloi amoge, nofe elöi amo olemolöie melëlo made gadoige, hamomolöi made gadoige, mi gäwila hamosa nelo\***

### 2

*(Yone 2-4)*

*Dolö afädëa Gaina segea udia nii*

<sup>1</sup> Segeyo äudä nelolahilä osodagi, Disiligi Galiliie Gaina segea ami, dolö afädëie udia ifoseba Yesuie emea amo bea asi. <sup>2</sup> Iliä Yesuge ie bëgëla aulo amolige misialola wesebegi, ili awälahilä, udia ifoseba ami nelo. <sup>3</sup> Wani ödä amo hä maadei gabugi, Yesuie emea ema sähalea, Iliä wani ödä amo hä, maadei gabuwela säi. <sup>4</sup> Amala säsebegi, Yesuea ema säla obëgësalea, Neme, nie hamoi amogida, dia nema hamomola sämolöi mademelë. Nie segeyoda, asomelëla säi. <sup>5</sup> Amala säsebegi, emea oböla hamoi hamolasilo amolima sähalea, Ea dilima nelebo afädë hamomalola säseba, dilia amo nabala hamomalola säi. <sup>6</sup> Amaimo, amida gobo i igia hamoi bobogamu gafeia dilo. Yu iliada ilile aiyalo mala dibe amo gadola hësa aligilo dilo. I afädë afädëlagida bagedi i nabülasa gadoia galë, mimogolasi gadoia galë, söga salasegi nobamolöi dilo. <sup>7</sup> Amala säsebegi, Yesuea hamoi hamolasilo amolima sähalea, Gobo i gogi ödä osaha maademalola säi. Amala säsebegi, iliä ea säsebe amo gadola, osala nobaha maadei. <sup>8</sup> Amala hamosebegi, ea ilima sähalea, Ödä usi gogi odoa neala gaula, molö sigi aligilo neebee ami mosalola säi. Amala säsebegi, iliä amo gadola hamolahilä, gaula asi. <sup>9</sup> Gaula awälahilä, molö sigi aligilo amoma iasebegi, ea ödäfalä wani ödä hamoi amo na bealahilä, abidi niidula asusugai. Hamoi hamolasilo dolö, ödä usi gaula mulo amoliamuda, dawadigi nelo. Amala asusugalahilä, ea udia goa amo welahilä, <sup>10</sup> ema sähalea, Udia dolö molö molö misialola säi misi sefolalebe amoli wani ödä hedabi amo dafidi muäia osala iia awälahilä, udia dolö amoli edefade naala gagaosa neëgi, wani ödä fea amo odoa muäia ilo negei gaso, wani ödä hedabi amo musugä negei dilolahilä, dia oböla hobeala gaula misi gabula säi.

<sup>11</sup> Yesuea dolöea hamomolöi made gadoi dafidi mi gäwila hamoi amoda, Disiligi Galiliie gaamu Gaina amidale hamoi. Ea amo hamoi amoda, ie geloi hido elöi dilo amo olei. Amala hamosebegi, ie bëgëla aulo amolia ema asigi afädë negei. <sup>12</sup> Hobeala, Yesuge, ie emege, ie edoolalige, amase, ie bëgëla aulo amolige, Gabaniama gaamugi awälahilä, segeyo ede made ami nelo.

*Yesuea Godeie mosöa magaiä negei hai*

*(Madiu 21.12-13, Maga 11.15-17, Ulugu 19.45-46)*

<sup>13</sup> Yu ilile Baagila Asi Segeyo edefade amo hä, ga made dibegi, Yesu e Yalusaleme moholö asi.\* <sup>14</sup> Amalahilä, ea Godeie mosöa ami beahamelebe, sugua gaoge, sugua sibige, haea maliabu gadoige, bidi neadigisa dibe meli. Amase, dolö odoa muni bedefaloge ami sefolalebe meli.\* <sup>15</sup> Amo bealahilä, Yesuea ëfë gadoia fëgälo ëfë afädë hamoi. Amalahilä, ea dolö amolige, sugua gaoge, amase, sugua sibige, Godeie mosö yala isogi amila nulufuda segea nesila fisiga gaha maadei. Muni bedefa bedefalo sefolalo amolile muni aulidaia difolalo amola neala besigadasila sadia galahilä, auli amoge besusa maadei. <sup>16</sup> Amala besusa maadelahilä, haea magaiä neaha difolalo amolima sähalea, Goda sulubadela segea gaula afiamo. Naadoie mosö ameadä, magaiä nelo mosö gadoi hamomabiola säi. <sup>17</sup> Ea

\* 2:: Yesuea hamomolöi made gadoige, melëlo made gadoige, nofe elöi hamoi amoda, Yone bebagida damo yafie gowe iligi dibe amo bimalo: 2.11, 2.18-19, 2.23, 3.2, 4.54, 6.2, 6.14, 6.26, 9.16, 11.47, 12.18, 12.37. \* 2:13: Baagila Asi Segeyo edefadela säi amoda, Isilaleie malö made nufudala, baagila awäla, Isibiie dolö malö abulümi amoli nufudaha maadei amöie helësëla obëgëlo segeyola säi.

\* 2:14: Dolö odoaea Godeie mosöie yala isogi nelebo nea digahaleada, Godeie mosöa muni negei ameamu nelo. Iliada Olomolele Giligilele muniada nelo made. Dolö amolia haea neasebe amolige, amase, nelebo odoa neasebe amolige, nelebo amoli Godegali odala ilo.

amala hamose amo bealahilä, ie bægëla aulo amolia ado afädë bebagi säla dëdëla negei dibe amo helësëla obëgëi. Amoda gowe. Na die mosö gelola hamese amea, ne sëlasingimolömelëla säla dëdëla negei dibe amo helësëi.

*Gë Udälo 69.9*

<sup>18</sup> Yesuea amala nesila digisebegi, Yu ilia ema nabahalea, Dia hamoi amo gadola hamomolöie geloi gaeamelëla säla, dolöea hamomolöi made gadoi abodo hamola nilima olemolö gabula nabi. <sup>19</sup> Amala nabasebegi, Yesuea ilima säla obëgësalea, Dilia Godeie mosö neebe gowe hä, haila fisimo. Amaseda, na segeyo ohodoagimu bu ulimolömelëla säi. <sup>20</sup> Amala säsebegi, Yu ilia säla obëgësalea, Wae! Go hamosaleada, gäheo i nabulasi biyidiäie gafeia asi amoda. Amai, diada segeyo ohodoagimu ulimolölela nabi. <sup>21</sup> Gaso, Yesuea Godeie mosöla säi amoda, hile domalo amo helësëla amala säi. <sup>22</sup> Hobeala, e bauiala nowesebegi, ie bægëla aulo amolia bu helësëla obëgësalea, ea ado dafidi säi amo helësëi. Amala helësëlahilä, Godeie ado säla negei dibe amoge, ado Yesuea säi amoge, dofä säi gabula helësëi.

*Yesuea udia dolö sulubadelaie asigi dawadigisa maadei nea*

<sup>23</sup> Yesu e Yalusalame ami nea, Baagila Asi Segeyo amoie helësëla molö molö gedosolo segeyo amo gala, ea dolöea hamomolöi made gadoi hamose amoli bealahilä, udia dolö yafiea ie ëigi asigi afädë negei. <sup>24</sup> Amala negei gaso, Yesuea udia dolö sulubadela dawadigi neebe amea, ilima asigi bogia gala made nelo. <sup>25</sup> Udia dolöie iso asigi dawadigi neebe ameadä, eda dawa oboba made, amase, afädëa ema ebedada gowe gadoimelëla säla imolöi mademelë.

### 3

*Yesuea Nigudimusima ado säi*

<sup>1</sup> Felesi dolö afädë Yu ilile busa nelo, amoie ëida Nigudimusi. <sup>2</sup> E Yesu neebä gasigi maalahilä, ema sähalea, Säla Olelelo-o, nilia dida säla olelelo Godea fisiga weila helësësamelë. Mida, Gode e dolö afädëbalä made nea, ea dolöea hamomolöi made gadoi dia hamosego gadola hamomolöi mademelëla säi. <sup>3</sup> Amala säsebegi, Yesuea ema säla obëgësalea, Na dima dofä gelola sähago. Dolö afädë e bu elö made neegela ägüseda, Godea Beaha Maadela Sigi Neebe amo ea made bimolömelëla säi. <sup>4</sup> Amala säsebegi, Nigudimusia ema nabahalea, Dolö fädäi amoda abilia neegela ägümolödu. Amai emeie isogi nogila digaseda, emea bu elö neegela ägümolölela nabi. <sup>5</sup> Amalebe, Yesuea säla obëgësalea, Na dima dofä gelola sähago. Amai afädë ödäeage, Gesamiage, made neegela ägüi neebe amoda, Godea Beaha Maadela Sigi Neebe ami dofä made nogila digamolömelë. <sup>6</sup> Afädë e domaloea neegela ägüse amoda, domalomu neamelë. Amase, Gesamia neegela ägüse amoda, gesami neamelë. <sup>7</sup> Na dima sähalea, Dilida hä, bu elö neegela ägümolö dialeala säla i amogi, dia fudugimabu. <sup>8</sup> Foda hi hamea aulomelë. Gobamu nabelo gaso, abododila maala abododi awähadu, amoda dia dawa mademelë. Amai Gesamia neegela ägüi nefolalebe amoli sulubadelada, amo gadoi neamelëla säi. <sup>9</sup> Amala säsebegi, Nigudimusia ema nabahalea, Dia säsebegoda, abeahäladula nabi. <sup>10</sup> Amala nabasebegi, Yesuea ema säla obëgësalea, Dida Islale ilile säla olelelo nebege gaso, na säsebeweda made helësësebele. <sup>11</sup> Na dima dofä gelola sähago. Nelebo nilia dawadigi amoge, amase, beaha maadei amoge, dilima säla iahawe gaso, ado nilia säla iasebe amoda, dilia dofä säsebelä helësëla made nebege. <sup>12</sup> Na dilima nelebo nagadaia dibe amogi neawela säla iaha gaso, asigi afädë made negese goeada, amai Hebeniie nelegei dibe amogi neawela säseba, dilia abilia asigi afädë negemolödu. <sup>13</sup> Afädë nagadaiaiwila Hebeni fedaida maade. Hebenila Dolöie Malö nagadaiaiwil digai amomu Hebeni fedaimelë. <sup>14</sup> Siiba, Mosesea sege nafadeia udia dolö aligilo made dibeä ami nea, nuba iigi baala gauia adogoi amo gadola, Dolöie Malö amoge amo gadola wäla gauia adogomolö dialea.\* <sup>15</sup> Mida, udia dolö sulubadelaie amo asigi afädë negese amoliada, namolöi namolö gaula namiäiaie.

<sup>16</sup> Godea udia dolö sege sulubadelagi nefolalebe amoli boba hamolahilä, ie malö afädëfali nelo amo i. Ie malöma asigi afädë negei nefolalebe amoli, made baagila, namolöi namolö amo neala gaumäiaie imelë. <sup>17</sup> Godea ie malö amoda udia dolöbalä gudimolöie fisiga wei made. Udia dolö sege sulubadelagi nefolalebe amoli damula mosäia fisiga weimelë. <sup>18</sup> Godea ie malöma asigi afädë negei nefolalebe amolibaläda gudila asiala hamoila made säimelë. Ema asigi afädë made negei nefolalebe amolibaläda gudila asiala hamoila säimelë. Mida, Godeie malö afädëfali amoie ëigi asigi afädë made negei amea amaimelë. <sup>19</sup> Asiala hamoila säi amoda gomalä. Yo digalo nagadaiaiwil digai nebegei gaso, udia dolöea mala nafademumu hamolo amea, gasimi sagalomu boba hamosalea, yo digaloda boba hamoi made nelo. <sup>20</sup> Udia dolö mala nafade hamolo amoli sulubadelaieada, ilile mala nafade hamoi amo ulufadigiloea, yo digalobalä habobalahilä, ilida yo digalo neebä ami mulo mademelë. <sup>21</sup> Amai gaso, mala dofä hamolo neebe amolia hamosebe amoda, Godeie

\* 3:14: Nidei 21.9 bimalo.

geloigila hamosamelëla yo digaloea olemäialahilä, ilida yo digalomadi maala aligilomelëla Yesuea säi.

*Ödägi gelo Yonea Yesuda gowe gadoi neala ulufai*

<sup>22</sup> Hobeala, Yesula ie bégëla aulo amolali, hä, Yudia segea moholö afiai. Afiala ilibalä salele odoa ami nea, ea udia dolö ödägi gesa nelo. <sup>23</sup> Amase, Salimi gaamu ga madela Ainono segea ami, ödä yafie dilo ameage, amase, udia dolö yafie ödägi gemäia mafui ameage, Yonea ili ödägi gesa nelo. <sup>24</sup> Amoda Yone e, aso, galabaia negela made nelo amo gaalu, amala hamosa nelo.

<sup>25</sup> Amaha nea, Yoneie bégëla aulo amolia, nigime hëla mala negei dibe amo helësëla, Yu dolö afädëbalä gëgësa dilo. <sup>26</sup> Amala gëgësa dilolahilä, ili Yone neebee afialahilä ema sähalea, Säla Olelelo-o, dolö afädë dibalä Yodona dëgëla alömodi nebegi, dia sähalea, Dolö amoda gowemelëla säi ameada, udia dolö ödägi gesa nea. Amala hamosebegi, udia dolö sulubadela e neebeamu awäha neamelëla säla i. <sup>27</sup> Amala säla iasebegi, Yonea säla obëgësalea, Afädë Hebenila nelebo ema iase amomu neala gaumolöimelë. <sup>28</sup> Na dafidi dilima sähalea, Afädë Memele amoda ne mademelë. E hobe misiaia, nedale fisiga weila säsebegi, dilia nabi amoda säla imolöi galeamelë. <sup>29</sup> Amaimo, dolö afädë udia neasea, udia amoda dolö amoie udia filo. Dolö esama ebalä ga madela nelo amea, udia goaea ado säsebe amo nabalahlilä, edefademalä obeägilo. Amo gadola obeägilo nema nobasebe ameada, na obeägisa neawe. <sup>30</sup> Neda holöfalä, eda ilibiala edemolö dialea.

<sup>31</sup> Afädë gadogola digai neebe amoda, sulubadelaie edefade nea. Afädë nagadaiala misi neebe ameada, nagadaiala maala nagadaia mala amomu sälo nea. Afädë Hebenila digai neebe amoda, sulubadelaie edefade neamelë. <sup>32</sup> Ea meli amoge, nabi amoge, udia dolöma säla iaha nea gaso, afädë ea säsebe amo made nii neamelë. <sup>33</sup> Ea säi amo nii neebe amea, Gode eada dofä sälo neamelëla ulufalomelë. <sup>34</sup> Amoie mida, Godea gëla made, ie Gesami ilo amea, afädë ea fisiga idai ameada, Godeie ado amo sälo nea. <sup>35</sup> Eedoea ie Malö amo boba hamolahilä, nelebo hulu sulubadela ie naabogi gausisa maadei. <sup>36</sup> Malö amoma asigi afädë negei neebe ameada, namolöi namolö amo gaula nea. Malö amea ado säsebe amo made nabala, auaula fofolëlo neebe ameada, namolö amo made bimolöimelë. Amobaläda, Godeie habobalo amo diamolöi diamolöimelëla Yonea säi.

## 4

*Yesuea Samelia udiabalä ado*

<sup>1</sup> Yonea ie bégëla aulo namiäia udia dolö ödägi gesa nelo amoli holöfalilahlilä, Yesuea yafie gesa neamelëla odoaea säi amo Felesi dolö amolia nabi. <sup>2</sup> Yesueada afädë made gei. Gaso, ie bégëla aulo amoliamu amala gesa nelo. <sup>3</sup> Amo nabimelëla säi amo Yesuea nabalahlilä, e Yudia digila Galili obëgei.

<sup>4</sup> Galili moholöda, Disiligi Sameliamadi awäla aulo negei. <sup>5</sup> Amalebe e awäla, Samelia ilile gaamu afädëgi besela galai. Gaamu amoie ëida Sigala sälo. Siga gaamu amoda siiba Yeigabaea ie malö Yosebegali sege ia ami ga madela dilo. <sup>6</sup> Segea amida siiba Yeigabaea ödä dögoi afädë dilo. Yesu e awäha nea emo hëhela, ödä dögoi amo ga madela ami hele sulo. Amoda eso mogogi amai.

<sup>7</sup> Amala sebegi, Samelia udia afädë ödä usimolö maaha nebegi, Yesuea ema sähalea, Ne ödä molö gabu. Osala imola säi. <sup>8</sup> Amoda ie bégëla aulo amoli, gaamugi molö nea afiaibua amai. <sup>9</sup> Amala säsebegi, Samelia udia amea ema säla obëgësalea, Dida Yu dolö. Neda Samelia udiamelë. Dia ödä imo ne nahadula säsebegoda, abilia sähala säi. Udia amea amala säi amoie mida, Yu iliada Samelia ilibalä gedola made aligilo. <sup>10</sup> Amala säsebegi, Yesuea udia amoma säla obëgësalea, Dia Godeie galu amoge, amase, dolö dima ne ödä imo nahadula säsebegoge, dawa galebada, dia ema namolöi namolö ödä imola säsegi, ea digali namolöi namolö ödä amo ialabiola säi. <sup>11</sup> Amala säsebegi, udia amea ema säla obëgësalea, Dafidilo-o, dida ödä i maade goda, ödä dögoi goweda ga ga gidogofali dibe amo, dia namolöi namolö ödäda abidi usimolö. <sup>12</sup> Ödä dögoi oselo goweda, nilile mäu Yeigabaea niligali i. Amase, hi eege, ie malöralige, ie sugua gaoge, sugua sibige, sulubadelada ödä dögoi gowegimu naha nelo amo, amai diada Yeigaba baagilela nabi. <sup>13</sup> Amala nabasebegi, Yesuea ema säla obëgësalea, Udia dolö sulubadela ödä gowegi naha neebe amolida bu halämolö. <sup>14</sup> Gaso, afädë ödä na imolö amo nasebe amoda, bu elö made halämolö. Ödä na ema imolö amo gü dusula besela galahamu neëgi, eda namolöi namolö gaula namolöimelëla säi. <sup>15</sup> Amala säsebegi, udia amea Yesuma sähalea, Dafidilo-o, hobe ne ödä made halämolöiege, ödä dögoi gowegi bu elö made osa moholöiege, dia ödä go negali imola säi.

<sup>16</sup> Amalebe Yesuea ema sähalea, Dia die dolödale dafidi bea awälahlilä, haligila wi misialola säi. <sup>17</sup> Amala säsebegi, udia amea säla obëgësalea, Neda dolö maadela säi. Amalebe Yesuea ema sähalea, Dia di dolö maadela säi amoda mogola säimelë. <sup>18</sup> Dafidi die dolö bia sulo.

Amase, dolô afädëbalä di walio sebegoda, dihile dolô made. Dolô maadela säsebegoda, dofä säimelëla säi. <sup>19</sup> Amala säsebegi, udia amea ema säla obëgësalea, Dafidilo-o, na walio helësësa, dida bea sälo afädë gabumelë. <sup>20</sup> Nilile mäu iliada segebi wedaia Godeie ëi gauia adalo. Gaso, Yu udia dolô diliada Yalusaleme amimu gauia adamolô dialeala sälomelëla säi.\*

<sup>21</sup> Amalebe, Yesuea ema sähalea, Udia-o, na ado säsebewe dia nimalo. Segeyo afädë besela galasegi, dilia segebidaiawi neamuge, amase, Yalusaleme neamuge, Naadoie ëi made gauia adamolomelë. <sup>22</sup> Samelia diliada nelebo dawa made amoe ëi gauia adalo. Gaso, niliada nelebo dawa amoe ëi gauia adalomalë. Mida, damula auloda Yu fii ilimadila mulomalë. <sup>23</sup> Godeie ëi gauia adalofali amoliada ilile gesamia Naadoie ëi dofä gauia adamolomelë.\* Amala hamomolô segeyo besela galasegi hamomolô amo hä, besela galai dialeala. Naadoea ie ëi gauia adaloda amoli gadoi hamesa neamelë. <sup>24</sup> Gode hi eda gesami nea. Ie ëi gauia adalo amolia ilile gesamia Naadoie ëi dofä gauia adamolô dialeamelëla säi. <sup>25</sup> Amala säsebegi, udia amea Yesuma sähalea, Mesaea moholô amoda na helësësamelë. Ema Gelesolage sälo amo. E maaseda, ea nelebo sulubadela awala säla imolöla säi. <sup>26</sup> Amala säsebegi, Yesuea ema säla obëgësalea, Walio dibalä adosa neebeweda, neda amo neawemelëla säi.

<sup>27</sup> Amala säha nebegi, ie bëgëla aulo amoli obëgëla mofiahamelebe, Yesu e udiabalä adosa neebe amo bealahilä, ili fudugi. Fudugilahilä, dia edo hogosalage, amase, edoie udia gobalä adosa nelolage made säi. <sup>28</sup> Amalebe, udia amea ödä i amo ami digila, e bu gaamugi obëgëlahilä, udia dolô amolima sähalea, <sup>29</sup> Dolô afädë neebe amea nelebo na hamoi amo sulubadela säla iaha maadei amo, bea mofiamo. Eda Gelesoledula säi. <sup>30</sup> Amala säsebegi, ili gaamugi amila Yesu neebea afiai.

<sup>31</sup> Udia amo asibua, ie bëgëla aulo amolia Yesuma sähalea, Säla Olelelo-o, di hä molô muöla säi. <sup>32</sup> Amala säsebegi, ea ilima säla obëgësalea, Na molô molô galebe amoda, dilia dawa mademelëla säi. <sup>33</sup> Amala säsebegi, ie bëgëla aulo amolia hilidomu didiähalea, Amai afädëa egali molô gaula maala iledula didiäi. <sup>34</sup> Amala didiäsebegi, Yesuea ilima sähalea, Nie molöda ne misialala sälo amea hamesebe amo gadola bëgëla, ie hamoi amo hamola wagamolô amomelë. <sup>35</sup> Dilia sähaleada, Aube biyidia nelolahilä, molô nelo segeyo amo besela galamolô gabula sälo madele. Gaso, nabuö. Na dilima sähago. Dilia hä, sagai dibeadi hedabola sidawewela bimo. Molô amolida mumului hä, nimoloi gabuwe. <sup>36</sup> Waliöda, failoea bidi neahawe. Waliöda, ea namoloi namolöie molô faisa nea. Mida, afädëa hawa fëfësa neebe amoge, elöea faisa neebe amoge, ele helegela gedola nea obeägimäimelë. <sup>37</sup> Ado goda dofäimelë. Afädëa sagasegi, elöea molô amo faila nelomalë. <sup>38</sup> Dilia dafidi sagaia made ami, na dilima molô nea mosalaimelë. Odoea ilia häuala sagai dibeami, dilia ilia hamoi amoe molô niimelëla säi.

<sup>39</sup> Samelia udia amea säse amo nabalahlilä, gaamugi ami fii yafiea Yesuma asigi afädë negei. Amoe mida, udia amea na nelebo hamoi amo sulubadela säla iaha maadeimelëla säi amogi. <sup>40</sup> Amalebe, Samelia ili Yesu neebea ami maalahlilä, e ilibalä neadula säi. Amasebegi, segea ami e segeyo äudä nelo. <sup>41</sup> Amalebe, udia dolô odoo yafieage ie ado nabala asigi afädë negei. <sup>42</sup> Iliä udia amoma sähalea, Nilia dia säse nabi ameamu asigi afädë negesa mademelë. Nihilii ie ado amo nabala helësësaleada, dolô goweda dofä nagadaia udia dolô neebe amolile damula aulo gabula helësësa neamelëla säi.

#### *Yesuea ginie gusigusië malö wahilasi*

<sup>43</sup> Yesu e segeyo äudä Samelia ilibalä nelolahilä, sege amo digila Disiligi Galili asi. <sup>44</sup> Dafidi Yesu hi sähalea, Bea sälo neebe amoda hile segeafali ëi maade neala säi. <sup>45</sup> E awäla Galili besela galasebegi, Galili udia dolô ilia e säla olela gausiai. Mida, ilige dafidi Yalusaleme awäla, Segeyo Edefade amoe molô molô gedosolo amo gala, ea nelebo hamose meli amogi.

<sup>46</sup> Yesu e Disiligi Galiliië gaamu Gaina ami dafidi ödäfali neala wani ödä hamoia ami bu awäla besela galai. Segeyo amo galada, ginie gusigusië efège Gabaniama gaamugi ami oloi dilo. <sup>47</sup> Dolô amea nabelebe, Yesu e Yudia digila Galili misi neala säi amo nabi. Amalebe, ie malö oloi amo baagomolöfali dibe amea, e Yesu neebea awälahilä sähalea, Nie malö wahimäia di Gabaniama awähadula säi. <sup>48</sup> Amala säsebegi, Yesuea ema sähalea, Dolöea hamomoloi made gadoige, hido elöige hamose amo made bealada, dofä dilia asigi afädë negelo made gabumelëla säi. <sup>49</sup> Amala säsebegi, gusigusi amea ema sähalea, Dafidilo-o, nie malö baagoloea, awähadula säi. <sup>50</sup> Amalebe, Yesuea ema sähalea, Di mosalo. Die malöda hä, wahi saleamelëla säi. Dolô amea Yesuea ado säsebe amo dofä gabula helësëla e hä, asi. <sup>51</sup> Dolô amo made besela galala awäha nebegi, ie hamoi hamolasilo amolia maala, idiafa

\* **4:20:** Udia amea segebi Gelisimila säi amoda, Disiligi Samelia segea ami dilo. Samelia iliada segebi amodaia amimu Godeie ëi gauia adaha aligilo. Ulugu 9.53gi gasumili dibe amo bimalo. \* **4:23:** Damo 23gige, 24gige dolô odoaea gesamiala besusaleada, Godeie Gesamiala säla besui.

gausiala digalahilä sähalea, Die malöda hä wahi saleamelëla säi. <sup>52</sup> Amala säsebegi, ea ilima nabahalea, Aoa nowëgi wahisiola nabi. Amalebe ilia säla obëgësalea, Aiyo eso si agegi olo amo hä, damuimelëla säi. <sup>53</sup> Amalebe, eedoea helësësaleada, aiyo aoa amogimu Yesuea ema die malöda wahi saleamelëla säi amo gadola, wahi gabula helësëi. Amalebe, eege, e sosogo amoli sulubadelaeeage, asigi afädë negei.

<sup>54</sup> Amoda Yesu e Yudiala Galili maala nea, ea dolöea hamomolöi made gadoi bu agedu hamoida amo.

## **Yesuea hi hamoi hamola digi, amase, Sabada segeyo edefade amo udia dolöma säla olelela digisa nelo\***

### 5

(Yone 5-10)

*Ödä Bedeseda nudugu dibea ami Yesuea dolö afädë wahi*

<sup>1</sup> Hobeala, Yu ilile segeyo edefade afädëgi gedolo amo gadola, Yalusaleme gedosebea ami Yesu eege asi. <sup>2</sup> Yalusaleme amida yala edefade amoie idi afädëda Sugua Sibiië idila sälo dibe amo ga madela amida, ödä nudugu afädë dilo. Ödä nudugu amoda Hibulu adeoda Bedesedala sälo. Amo amalelada holöbö mosö gadoiie hadai bia dilo. <sup>3-4</sup> Amolidaada, udia dolö oloi yafie difolalo, si golaige, emo nafadeige, fii sige.\* <sup>5</sup> Hadai amodaiada dolö afädë dilo. Dolö amo oloi dialeamu gäheo i nabülasi ohodoaie odoi gödölasi asi dilo. <sup>6</sup> Yesuea dolö oloi dibe amo beahamelebe, e siibafali amo wälasi dilo gabula helësëlahilä, ema nabahalea, Di wahimäia hamesebelela nabi. <sup>7</sup> Amala nabasebegi, oloi amea säla obëgësalea, Dafidilo-o, ödä bebedägisebea ami ne ugila negela, ödägi gelasimolö dolö madesalea. Nihido geleä fifilila awäha neëgi, odoa iliada ne baagila ilidale digafulomelëla säi. <sup>8</sup> Amala säi amo nabalahilä, Yesuea ema sähalea, Di nowelahlilä, die fëogo gaula mosalola säi. <sup>9</sup> Amala säi amole, dolö oloi amo wahisebegi, ie fëo amo hi neala gaula asi. Dolö wahi amoda, segeyo Sabada gafegi wahi. <sup>10</sup> Amai gabugi, Yu ilia dolö wahilasi amoma sähalea, Walio Sabada segeyo gafego. Mala säla negei amea dia fëogo gaula mosabiola säi dialeala säi. <sup>11</sup> Amala säsebegi, ea säla obëgësalea, Dolö ne wahilasilo amea die fëogo gaula mosalola säimelëla säi. <sup>12</sup> Amala säsebegi, ilia ema nabahalea, Dolö nowëa die fëogo gaula mosalasiola nabi. <sup>13</sup> Dolö wahi amea nowëa e wahilasi dula dawa made nelo. Amoie mida, udia dolö yafie gegedoi dibea ami, Yesu e asi amea amai. <sup>14</sup> Hobeala, Yesuea Godeie mosöa ami beahamelebe, dolö amo neebe bealahilä ema sähalea, Nabuö. Walio di hä, wahi gomelë. Dia nafade bu elö made hamolamo. Oböla, yöi elö dia dafidi gausiai amo baagila awäla dima besela galaloeamelëla säi. <sup>15</sup> Amalebe, dolö amo awälahlilä, Yu amolima sähalea, Ne wahilasi amoda Yesuea gabiola säi.

<sup>16</sup> Yesuea Sabada segeyo gafegi amala hamolo gabugi, Yu ilia e sälasisa nelo. <sup>17</sup> Amasebegi, Yesuea ilima säla obëgësalea, Nie Naadoea hamoi hahamolamu maaha nelo amo gadola, nage walio hamosa neamelëla säi. <sup>18</sup> Amala säi amo nabalahilä, Yu amolia Yesu e nufulö gelola helësëi. Amoie mida, Yesuea segeyo Sabada gafëie mala damulo amogimu made. Nie Naadoda Godela säi ameada, e hi Gode gadoi hamosebela helësëlahilä, ilia e nufulö helësësa nelo.

*Eedoea hamosebe amo gadola wäla, Malöeage hamosa neamelëla säi*

<sup>19</sup> Amala helësësa dibegi, Yesuea ilima säla obëgësalea, Na dilima dofä gelola sähago. Malöea hido asigiamu nelebo afädë hamomolöi mademelë. Eedoea hamose amo bealahilä, Malöeage amomu hamomolömelë. Mida, Eedoea nelebo sulubadela hamosebe amo gadola, Malöeage amo gadola wäla hamosamelë. <sup>20</sup> Eedoea ie Malö boba hamolahilä, ea hamosebe amo sulubadela Malöma olesa. Dili sulubadela fudugimäia, hamoi geloi hido elöi walio hamosebe meli amo gadoi made, edefademalä hamomäia ea ie Malöma olemolömelë. <sup>21</sup> Eedoeada udia dolö baagoi amoli nowela ifosilahilä, namolö ilo amo gadola, Malöeage amo gadola wäla namolö imolö helësëse amogali imolömelë. <sup>22</sup> Amase, Eedo hida udia dolöea hamosebe amoieda made mogemolömelë. Sulubadela ie Malöeamu mogemäia ifosimelë. <sup>23</sup> Amala ifosi amoie mida, udia dolö sulubadela Eedoie ei gauia adalo amo gadola, ie Malöie eige gauia adamäia ifosi nea. Afädëa Malöie ei made gauia adalo neebe ameada,

\* 5:: Yone beba gowegida, Yesuea segeyo Sabada gafegi nelebo yafie amo hamoi dëdëi dialea. Amase, Yu ilile Sabada segeyo edefadegige. Damo 5.1, 5.9, amase, 6.4, 7.2, amase, 10.22ge bimalo. Dawadigi dolö yafeia helësësalea, Yonea olesaleada, Yesu hi eda Sabada segeyo edefade amoie mifali neala olei gabula helësëi. Damo 2.13, 2.23, 11.55 amolige bimalo. \* 5:3-4: Dawadigi dolö odoaea helësësaleada, damo gowelegida ado odoa dialeala helësëi. Ado amoda gowe, [Iliada ödä amo bebedägimäia beaha fifigilo. Segeyo odoagi Dafidilo Geloie selesafia fi afädë ödä nudugu amogi nogila digalahilä bebedägilasilo. Bebedägilasisa neëgi, dafididale digase amoda, e olo abodo gadoi dilo amo gadoida wahilasisa aligilo.]

Eedoea Malö misialala sälo amoie ëige made gauia adalo nea. <sup>24</sup> Na dilima dofä gelola sähago. Afädëa na ado säsebe amo nabala, ne misialala sälo amoma asigi afädë negei neebe amea namolöi namolö gaula neëgi, ea hamoi amoieda made mogemolömelë. Eda dafidi baagomolömadi nelo amo, walioda e namolöi namolömadi dëgëla aligi nea. <sup>25</sup> Na dilima dofä gelola sähago. Segeyo afädë besela galamolö amoda hä, walio besela galai dialeamelë. Segeyo amogi, udia dolö baagoi difolalebe amolia Godeie Malöie ado nabolömelë. Nabase amolida, hä, namolömelë. <sup>26</sup> Eedo hi ema namolö dibe amo gadola, Malömage namolö diamiaia ea geloi i. <sup>27</sup> Amase, eda Dolöie Malö neebe amea, Eedoea udia dolöea hamosebe amoie mogemäiada, ema geloi i.

<sup>28</sup> Na ado säsebewegida, dilia fudugimabio. Segeyo afädë besela galamolö amo, besela gelasolo amo galada, udia dolö baui dibe amoli sulubadelaea Malöie ado nabala, <sup>29</sup> bauia amila nowela galaha maademolömelë. Udia dolö mala hedabi hamosa nefolalo amolida, namolöi namolöie nowela galamolömelë. Amase, udia dolö nafade hamosa nefolalo amolida, ilibalä gudilahlä ilima asiala hamoila sämolöie nowela galamolömelëla säi.

*Odoa ilia Yesu eda gowe neala säla ulufai*

<sup>30</sup> Yesuea aso, sähamu neamu sähalea, Na nihido asigiamu nelebo afädë hamomolöi mademelë. Ado na nabelo amo gadolamu mogelomelë. Na mogelo amoda mogola hamolomelë. Mida, na nihile hamelo amo fisila, ne misialala sälo amea hamelo amo gadola mogelomelë. <sup>31</sup> Na gomalä hamolomelëlage, amase, ne gowe gadoi neamelëlage säha galebada, amoda dofä made säsebela sämolö dialea.\* <sup>32</sup> Be, nelebo na hamosebe amo, afädëa gomalä hamosamelëla säla iaha nea. Na ea säsebe amoda dofä sähala helësësamelë.\* <sup>33</sup> Dilia Yonema ado naba mosäia dolö fisiga gasebegi, Yonea dolö amolima ado dofä amoie ulufala säla i. <sup>34</sup> Na helësësaleada, dolöfäea ado ulufala säla iase amoda, na ado säsebeweie gelolasimolöi madela helësësamelë. Gasoda, dili sigi obëgëmäia, na dilima amala sähawe. <sup>35</sup> Yone eda gele wai gadoi nea, ea gele wala yo digaha nelo. Dilia segeyo ede madegi ie yo digalo neebe amo beahalea, obeägisa nelomelë.

<sup>36</sup> Yoneada ne dilima holöfali oleimelë. Nie Naado hi gelolasisa neëgi, hamoi hamosa maademäia i amo hamosa neebe amead, edefadeda ne amea olesamelë. Amo bealahilä, nie Naadoea ne misialala säsebegi misi gabula helësëmolö dialea.

<sup>37</sup> Naado ne misialala sälo amohida dofä ne neebe amo gadoi ulufala sälo nea. Dilia ie adoge dofä nabelo made, ie odagige melëlo made, amase, <sup>38</sup> ie ado malage dilile iso asigigi made dibego. Mida, ea misialala säsebegi misi amoma asigi afädë negei nefolalebe goea.\* <sup>39</sup> Dilia Godeie behagi ado säla dëdëla negei dibe amogi namolöi namolö beagolemölöila helësëlahilä, nidesamu aligilomelë. Be, ado säla dëdëla negei dibe amead, ne dilima ulufala säla ilo <sup>40</sup> gaso, dihili namolöi namolö nimolöie ne neebaa moholö habosebego.

<sup>41</sup> Nada dolöfäea nie ëi gauia adamäiala helësëla säha made <sup>42</sup> gaso, dilile iso asigigi dibe amoda na dawadigi nea. Godeie boba hamolo amo dilima maade gabula helësësa neamelë. <sup>43</sup> Neda Naadoie ëigi misi neebewegida, dilia ne säla olela made gausiamelë. Amai gaso, dolö elö hile ëigi maaseda, dilia e säla olela gausiamolömelë. <sup>44</sup> Gode afädëfali neebe amea dilile ëi gauia adamäiala aligila madeda, dihilimu dihilile ëi gauia adadaha aligilo nebego. Amalamu hamolo neada, dilia asigi afädë abeahäla negemolöi gabu.

<sup>45</sup> Na Naadoie siigi nea, dilia hamosebegoie asiala hamoila sämolö gabula helësëmabio. Dihili Mosese e sisiläfülo amea, dilia asiala gomalä hamosa nelomelëla Naadoma säla imolömelë. <sup>46</sup> Diliada Moseseie ado nabala asigi afädë negei galebada, amai nemage asigi afädë negelabio. Mida, ado ea dëdëi dibe amoda nie säla dëdëi dialea. <sup>47</sup> Ea säla dëdëla negei dibe amoda dofä gabula made helësëi nefolalebegoead, amai nie ado säsebeweda dofä gabula abeahäla helësëmolödula säi.

## 6

*Yesuea udia dolö dausini biagali molö i*

*(Madiu 14.13-21, Maga 6.30-44, Ulugu 9.10-17)*

<sup>1</sup> Hobeala, Yesu e Galili oeabo amo dëgëla alömodi asi. Galili oeabo amoie ëi elöda Dabeliasa. <sup>2</sup> Udia dolö yafie gegegdola, e awäsebe amo gadola bëgëla afiai. Mida, ea dolöea hamomolöi made gadoi hamola, udia dolö oloi difolalo amoli wahisebe meli amogi. <sup>3</sup> Yesuea ie bëgëla aulo amolali segebidaia ami fedafula sefolalo. <sup>4</sup> Segeyo amo galada, Baagila Asi Segeyo amo besela galamolö dilo. Segeyo edefade amoda Yu ilile gedola molö nulo segeyo dilo.

\* 5:31: Mala Bu Eegei 19.15 bimalo.

\* 5:32: Yesuea afädëala säi amoda Gode e helësëla säi.

\* 5:38: Ea misialala

säsebegi misila säi amoda Yesu hi e säi.



<sup>5</sup> Amala sefolalea, Yesuea busa fädägäia adogola beahaleamelebe, udia dolö yafie e sebea ami mofiasebe amo bealahilä, ea Filibima nabahalea, Mofiasebe gowe ili molö muäia abidi bidia nimolödula nabi. <sup>6</sup> Eada gomalä hamomolöla dawadigi nea gaso, ea Filibi fedogola nabi. <sup>7</sup> Amala nabasebegi, Filibia ema säla obëgësalea, Muni gina hädali äüdäea molö bidia neaseda, udia dolö sulubadalea holöfali holöfalila molöi made gabumelëla säi. <sup>8</sup> Yesu bëgëla aulo Saimono Fidaie edoo Äduluea Yesuma sähalea, <sup>9</sup> Malö maalibu neebe gowea eladi gadoi balia beledi hamoi biage, amase, seme äüdäge ägülea gaso, udia dolö yafie gegedoi welibalä dofea made gabula säi. <sup>10</sup> Amala säsebegi, Yesuea sähalea, Udia dolö ffigimalamalola säi. Sege amogida giisi hedabi yafie dilo. Udia dolö amoli amodaia ffigisa maadei. Dolömu nidelada dausini bia gadoi sefolalo. <sup>11</sup> Sefolalebegi, Yesuea beledi amo neala gaula nea, Godema nesegelahlilä, udia dolö sefolalebe amoligali sogomalai. Seme äüdä amoge amo gadolamu hamosebegi, ilia helësëi amo gadola mai. <sup>12</sup> Ili sulubadela dofea gaalula nasebegi, ea ie bëgëla aulo amolima sähalea, Fea digai amo sofäloea, sulubadela neala gegedola negemalola säi. <sup>13</sup> Ili neala gegedola negei amo, beledi bia amea naala fea digai amo adu giwilasi salala nobai.

<sup>14</sup> Udia dolö amolia Yesuea dolöea hamomolöi made gadoi hamosebe amo bealahilä, säla didigahalea, Bea sälo nagadaiawi moholömelëla säha dilo amoda dofä go gabumelëla säi. <sup>15</sup> Yesuea ilia e gini namiäiaie e gaula fëdömolö gabula helësëlahilä, ea sege amo digäla hüdofali segebidaia ami bu obëgëla asi.

*Yesu e ödädabodo asi*

*(Madiu 14.22-33, Maga 6.45-52)*

<sup>16</sup> Deadi eso digase gaalu, ie bëgëla aulo amoli oeaba daala aligilahlilä, <sup>17</sup> ödä duugi fila Gabaniama moholö asi. Awäha dibegi, Yesu e ili sebea ami made maala nebegimu, hä, gasimi sagai. <sup>18</sup> Amase amo gaalu, fo gelola guula maalahlilä, ödä aidagula fedai. <sup>19</sup> Ili ödä adelo amea ödä adada awäha nea, giломida bia gafeia gadoi baagise amo gaalu, Yesu e ödädabodo maala ödä du amo ga madela maaha neebe meli. Amo bealahilä, ili edefademaalä bedäi. <sup>20</sup> Amala bedäsebegi, ea ilima sähalea, Weda nemelë. Bedämabiola säi. <sup>21</sup> Amala säsebegi, ilia e dudaia ami misiäia nabeledelä hamose amo gaalu, du amoda hä, waliomu sege ili moholöia ami besela galai neebe meli.

*Udia dolöea Yesu hogoi*

<sup>22</sup> Amo aiyu amogi, ödä dëgëla alömodi adidi amolia helësësalea, aiyu ödä du afädëmu dilo amogida ie bëgëla aulo amoli fila afiasie amogi, Yesu eda fila made awäla ili hilidomu fila afiaüla helësësa dilo. <sup>23</sup> Amala helësësa dibegi, ödä du odoa Dabeliasa gaamuala, Dafidilo Geloia nesegesebegi, udia dolö molö maia ami ga madela maala negei. <sup>24</sup> Udia dolö gegedoi amolia Yesuge ie bëgëla aulo amolige, ami maade, awäha maadei amo bealahilä, ödä du amoligi ffigila Yesu hogola Gabaniama afiai.

*Yesuea neda namolöie beledi neawela säi*

<sup>25</sup> Udia dolö amoli afiala ödä dëgëla alömodi Yesu beagolelahilä, ema nabahalea, Säla Olelelo-o, dida wi abola misila nabi. <sup>26</sup> Amala nabasebegi, Yesuea ilima säla obëgësalea, Na dilima dofä gelola sähago. Ne hogola mofiaigoda, na dolöea hamomolöi made gadoi hamoi amo bealahilä, ne hogola mofiai mademelë. Dilia beledi amo dofea naala gaalui amoiemu, ne hogola mofiai gabumelë. <sup>27</sup> Sigälo molö amo nimolöie hamoi hamosa namiabio. Diamolöi diamolö molö amöie hamoi hamosa namialo. Molö amoda namolöi namolö ilo molö. Dolöie Malö amea diligali molö amo imolömelë. Naado Godea e amala namiäia memelela ifosi neamelëla säi.

<sup>28</sup> Amala säsebegi, ilia ema nabahalea, Nilia Godeie hamoi amo hamomolöie edo hamomolödula nabi. <sup>29</sup> Amala nabasebegi, Yesuea ilima säla obëgësalea, Godeie hamoi amoda gomälämelë. Ea misialala säsebegi misi amoma asigi afädë negemäiamelëla säi. <sup>30</sup> Amala säsebegi, ilia ema säla obëgësalea, Dia dolöea hamomolöi made gadoi hamose amo bealahilä, nilia dima asigi afädë negedeläie, dia edo hamomolö. Diada hamoi abodo gadoi hamomolö gabu. <sup>31</sup> Nilile mäula iliada sege nafadeia udia dolö aligilo made dibea ami nea, mena naha nelo. Amala hamoi amöie ado säla dëdëla negei dibe amoda gomalä. Eada iligali muäia selesaiala beledi ila säla dëdëla negei dialeala säi. <sup>32</sup> Amala säsebegi, Yesuea ilima säla obëgësalea, Na dilima dofä gelola sähago. Selesaiala beledi diligali i amoda, Mosesea i mademelë. Nie Naadoea selesaiala beledifali amo diligali ilo neamelë. <sup>33</sup> Selesaiala digai neebe amea udia dolö nagadaiawi nefolalebewe iligali namolö amo iaha neebe amoda, Godeie beledifalida amomelëla säi. <sup>34</sup> Amala säsebegi, ilia ema sähalea, Dafidilo-o, dia beledigo niligali iahamu namialola säi. <sup>35</sup> Amala säsebegi, Yesuea ilima säla obëgësalea, Namolöie beledida nemelë. Ne nebea maaha neebe amolida sidëa dofä made baagomolö. Nema asigi afädë negesa neebe amolida, ödä bu elö dofä made halämolömelë.

<sup>36</sup> Amaimo, na dilima säi amo gadola, dilia hä, ne meli gaso, oböla nema asigi afädë made negela nebego. <sup>37</sup> Nie Naadoea udia dolö sulubadela nema iase amolida nema moholömelë. Ne neebee mafuse amoligida, afädë na dofä made nesila digimolömelë. <sup>38</sup> Mida, ne selesaiala misi amoda, nihi hamese amo gadola hamomolö misi made. Ne misialala sälo amea hamese amo gadola hamomolöie misimelë. <sup>39</sup> Ne misialala sälo amea, na hamömäia hamesa neebe amoda gowe. Nema i amoligi afädë fisila made, aligila wagamolö segeyo besela galasolo amo gala, sulubadela nowelasisa maademäia hamesa neamelë. <sup>40</sup> Nie Naadoea hamesa neebe amoda gowe. Udia dolö sulubadela Malö siia bealahilä, ema asigi afädë negei nefolalebe amoliada namolöi namolö neala gausa maademäia hamesa nea. Aligila wagamolö segeyo besela galasolo amo gala, nada udia dolö amoli nowelasimolömelëlä säi.

<sup>41</sup> Yesuea säi amo nabalahlilä, Yu dolö ilia habobalahilä hildomu didiäha difolalo. Mida, beledi selesaiala digai amoda ne neawela säi amogi. <sup>42</sup> Iliä sähalea, Goweda Yosebeie malö Yesu made. Ie eme eedolela nilia dawadigi amo. Oböla, ea sähalea, Selesaiala digaila säi amoda abeahäladula säla didiäha difolalo.

<sup>43</sup> Amala säla didiäha difolalebegi, Yesuea ilima sähalea, Dilia habobalahilä, dihilido didiäha dibegoda gafisimo. <sup>44</sup> Nie Naado ne misialala sälo amea, afädë nemadi sigi made maaseda, hïdomuda ne neebee moholöi mademelë. Naadoea ne neebee sigi maase amoda, aligila wagamolö segeyo besela galasolo amo gala, na nowela ifosimolömelë. <sup>45</sup> Bea sälo amolile bebägi säla dëdëla negesalea, Godea ili sulubadelama säla olelemolömelëlä säla dëdëla negei. Naadoea säla olelesebe amo nabalahlilä, e dawadigila helësësebe amolida, sulubadela hä ne neebee maahamelë. <sup>46</sup> Afädëä Naado melimelëlä säha made. Naado melida afädëfali e Gode neebeala digai neebe ameamu hïdo, Naado meli nea. <sup>47</sup> Na dilima dofä gelola sähago. Nema asigi afädë negei nefolalebe amoliada namolöi namolö gaula nea. <sup>48</sup> Namolöie beledida nemelë. <sup>49</sup> Dilile diadolalia sege nafade udia dolö aligisia made ami nea, mena naha nelo amolida baagosa maadei. <sup>50</sup> Gasoda, beledi selesaiala digasebe amoda wi dialea. Beledi amo nase amolida made baagomolömelë. <sup>51</sup> Namolöie beledi selesaiala digai amoda nihinemelë. Beledi amo afädëä naseda, eda namolöi namolö. Beledi amoda nihile domalomelë. Sege föi sulubadelagi nefolalebe amolia namolö gausa maademäia, na nie domalo ïmolömelëlä säi.

<sup>52</sup> Amala säi amo nabalahlilä, Yu dolö amolia hildomu gëgëla didiähalea, Dolö gowea ïe domalo amo nilia muäia ïmolömelëlä säha neebe goweda, abilia ïmolöiedula didiäha difolalo. <sup>53</sup> Amala didiäha difolalebegi, Yesuea ilima sähalea, Na dilima dofä gelola sähago. Dolöie Malö amoie domaloge healege made naseda, namolö amoda dili isogi maademelë. <sup>54</sup> Nie domaloge healege naha neebe amoda, namolöi namolö gaula nea. Amoda aligila wagamolö segeyo besela galasolo amo gala, na e nowelasimolömelë. <sup>55</sup> Mida, nie domalo amoda molö dofäfalimelë. Amase, nie heale amoda ödä dofäfalimelë. <sup>56</sup> Amase, nie domaloge healege naha neebe amoda nie isogi nea, amase, nege ïe isogi nea. <sup>57</sup> Naado namolöi neebe amea ne misialala säi. E namolöi neebe amea, nege namolöi neawe. Amo gadolamu, ne naha neebe amoge, ne namolöi neebe amea eege namolöi namolömelë. <sup>58</sup> Goda beledi selesaiala digai. Dilile diadolalia mena naha difolalohilä baagoi amo gadoi made, beledi gowe afädëä naseda, eda namolöi namolömelëlä säi. <sup>59</sup> Ea säi amoda, Gabaniama gedolo mosö ami nea, säla olesesolo amo gala amala säi.

### *Yesuda namolöie mi nea*

<sup>60</sup> Amala säi amo nabalahlilä, e bëgëla nawialo yafiea sähalea, Ado ea säsebe goweda yöi gabu. Nowëa nabolöidula säha difolalo. <sup>61</sup> E bëgëla nawialo amolia ea säi amoie habobalahilä, hildomu didiäha difolalebe amo Yesuea asigia dawadigila nea, ilima sähalea, Na ado säi amea dili neala habobalasisiole. <sup>62</sup> Dolöie Malö amo dafidi neloa ami fedase beaseda, abilia helësëmolö gabu. <sup>63</sup> Godeie Gesamia udia dolögali namolö ilo. Domaloda galone mademelë. Ado na dilima säla ïase amoda gesamile, namolöi namolömelë. <sup>64</sup> Amai, dili odoaea asigi afädë made negela nebegola säi. Yesueada ema asigi afädë made negesebe amolige, e hololömolö amoge, mi gäwilafali dawadigi nelo. Amala nea, ado amo amala säi. <sup>65</sup> Amala sälahilä sähalea, Mi amo helësëla na dilima sähalea, Nie Naadoea afädë ne neebee misiäiala made helësëlasiseda, eda moholöi mademelëlä dafidi säla i amomelëlä säi.

<sup>66</sup> Segeyo amila nofela, e bëgëla nawialo yafiea e bëgëla made awäla, bahila obëgësa maadei. <sup>67</sup> Amala hamosebegi, Yesuea giwilasi amolima nabahalea, Dilige bahila äuduläla helësësalela nabi. <sup>68</sup> Amala nabasebegi, Saimono Fidaea säla obëgësalea, Dafidilo-o, nili nowëma moholö. Namolöi namolö amoie adoda dima dialea. <sup>69</sup> Dida mogoi hedabifali, Gode neebeala misi neebe amo helësëlahilä, nilia asigi afädë negei neawemelëlä säi. <sup>70</sup> Amala säsebegi, Yesuea ilima säla obëgësalea, Nada dili giwilasi memelei madele. Amai gaso, diligi afädëä mugabe busa neebemelëlä säi. <sup>71</sup> Eada Saimono Isagaliadaie malö

Yudasa helësëla amala säi. Mida, Yudasa eda giwilasi amoligi nelo amea hobeala e hololölo amo.

## 7

### *Yesuie edoolalia asigi afädë made negei nelo*

<sup>1</sup> Hobeala, Yu ilia e nufidedelä hamosebegi, Yesu e Yudiamadi nawela made, Galilimadimu nawesa nelo. <sup>2</sup> Yu ilile segeyo edefade idia dilo mosö gadoi uligi molö nülo amo ga made dibegi, <sup>3</sup> Yesuie edoolalia ema sähalea, Dia hamoi hamosa nebege, di bögëla maasebe amolia bimäia, segewe dögila Yudia mosalo.\* <sup>4</sup> Afädëa ea hamosebe amo sulubadelaea dawadigimäiala asigiseda, musügä negela hamolo made, ulufala hamolomelë. Dia hamoi amo hamosa galëda, sege sulubadelagi nefolalebe amolima olela hamomolö mosöla säi. <sup>5</sup> Ie edoola iliage ema asigi afädë made negesalea, amala säha nelo. <sup>6</sup> Amala säsebegi, Yesuea ilima sähalea, Segeyo sulubadelada, hä, dilile segeyo dialea. Nie segeyoda, aso, made besela galaimelë. <sup>7</sup> Udia dolö sege sulubadelagi nefolalebe amoliada, dilima bimolö habobamolöi mademelë. Be, na ilima nafade hamosa neebela säla iahamu neebewegida, ili sulubadelaea nema bimolö habobaha nebegomelë. <sup>8</sup> Dilida segeyo edefade amoie molö molö afiamo. Nie segeyoda, aso, made besela galai gabugi, neda saleamelëla säi. <sup>9</sup> Amala sälahilä, e made awäla, Galili ami nelo.

<sup>10</sup> Yesuie edoolali segeyo edefade amoie molö molö afiasebegi, Yesu ege, udia dolöea e melëloalahlilä, musügä hobeala asi. <sup>11</sup> Segeyo edefade gedosolo amo gala, Yu dolö amolia e hogosalea, dolö amoda abidi neadula naba hogosa nelo. <sup>12</sup> Udia dolö gegedoi amoligi yafiea sädäwala säla didigaha dilo. Odoaea e hedabimelëla säla digi, amase, odoaea sähaleada, Amala made. Eada udia dolö dhahila neaha neala säla digisa dilo. <sup>13</sup> Ili sulubadelaea, Yu dolö amolibalä bedähalea, ulufadigila ea gomalä hamolomelëla made sälo nelo.

<sup>14</sup> Idia Dilo Mosö Segeyo amoie segeyo odoa baagilahilä mogogi nebegi, Yesu e Godeie mosöa ami awälahilä, säla olelesa nelo. <sup>15</sup> Amala olelesa neebe amo bealahilä, Yu dolö amoli fudugilahilä sähalea, Dolö gowe sugulu made hamoi amea, dawa hido elöiweda abeahäla dawa niidula säi. <sup>16</sup> Amala säsebegi, Yesuea ilima säla obögësalea, Mala säla olelesa neebeweda, nie mademelë. Ne misialala sälo amomadila säla olelesa neawe. <sup>17</sup> Afädëa Godea hamesebe amo gadola hamomolöila helësësedä, na säla olelesa neebewe, Godeie helësëlogi nea olelesa nealedu, ma nihile helësëlogi nea olelesa nealedula amohi bimolömelë. <sup>18</sup> Afädëa hile helësëloeamu säla olelesa neebe ameadä, hile ei gauia adala säla olelelo nea. Amai gaso, e misialala sälo amoie ei gauia adamäialahlilä, eada ado dofä sälo nea. Emada wäfalä sälo afädë maade neamelë. <sup>19</sup> Siiba, Ado säla negei amoda Mosesea diligali i madele. Amai gaso, diligi afädëa gaula mogoloda maade gabu. Mi edoie oböla ne nufulöie hamosa dialeala nabi. <sup>20</sup> Amala nabasebegi, udia dolö gegedoi amolia säla obögësalea, Dida mugabe fedai nebege. Di nowëa nufulö hamosa neebela säi. <sup>21</sup> Amala sälebegi, Yesuea ilima säla obögësalea, Na hamoi afädë hamoi amogi, dili fudugisa dialeamelë.\* <sup>22</sup> Amaha gaso, gafodo damulo mala Mosesea hamomalaila helësëla, Sabada gafegi dilia dilile malölali gafodo damulomelë. Gafodo damulo mala amoda, dofä Mosesea negei made. Amoda mi gäwilafali dilile mäulalia siibafali mi gäwimelë. <sup>23</sup> Mosese nebegi Ado säla negei amoda, dofä made damumolöla sälahilä, dilia Sabada gafegi dolö malësäie gafodo damusa aligilo amo gadola, nage, dolö afädëie domalo hulu wahilasisa maadei amogi nema mihaläsebele.\* <sup>24</sup> Memalä siamu beala mogelo amo fisimalo. Mala mogoi amo hogosa nea, hedabola mogesa namialola säi.

### *Udia dolö ilia Yesu e nowëdula helësëi*

<sup>25</sup> Amala säi amo nabalahlilä, Yalusalame udia dolö odoaea sähalea, Ili nufidedelä hamosa neebe amoda, dolö go madele. <sup>26</sup> Amai gaso, bimo. Ea udia dolö sidaia mala olelesa

\* **7:3:** Segeyo edefade idia dilo mosö gadoi uligi molö nülo säi amoda, Yu ilia gomalä hamolo. Segeyo edefade amoda molö bëi faila gaula gegedolo fu amogi besela galalo. Amase, Baagila Asi Segeyo molö nahilä aube gafeia baagilahiläda, amo besela galalo. Idia dilo mosö gadoigi aligilo amoie mida, Yu ilia ilile mäulali sege nafade udia dolö aligisia made ami gäheo i yafegi afiaha dilo amo helësëlahilä, amala hamosa aligilo. Ili segeyo gödögi amo gadola hamosa aligilo. Segeyo edefade amoie ëida Idia Dilo Mosö Segeyola sälo. Gobela İlo 23.33-36ge, Mala Bu Eegei 16.13-16ge bimalo. \* **7:21:** Amala säi amoda, Yesuea ödä Bedeseda nudugu besela galasebea ami hamoi amo helësëla säi. Yone 5.1-18ge, Sigi Obögëi 31.14-15ge bimalo.

\* **7:23:** Yu ilile Ado säla negei amea sähaleada, udia ilia dolö malö ägüsedä, ägüla misia amila segeyo nidela fedai gödö besela galasolo amo gala malö dubo amoie gafodo damusa aligilo. Gobela İlo 12.3ge, Ulugu 1.59ge, 2.21ge bimalo. Segeyo Yesu digala nelo amo gaaluda Sabada gafe segeyogida, neleho afädë hamomolö madela säla negei dilo. Gaso, hilida Sabada gafegi gafodo damusa aligilo amoge hamoi hamolo amo gadoimu gabula helësëlahilä gaso, oböla Sabada gafegi gafodo damusamu aligilo.

neebe amogida, ilia ema ado afädë made säla neebe amoda, sigi aligilo amolia goweda dofä Afädë Memelei amola helësësa nealedu. <sup>27</sup> Amalada abidi. Afädë Memelei misi amo galebada, e gowegila maasebela made helësëlabio gaso, dolö goda guwila misi neala nilia dawadigi nea madelela säi. <sup>28</sup> Amala säsebegi, Yesuea Godeie mosöa ami nea, udia dolö amolima säla olelesalea, gelola sähalea, Ä. Dilia nege, sege gowegi fii misilaga, helësësa neago gaso, nihile asigia misi mademelë. Ne misialala sälo amoda dofä sälo mi nea. Gasoda, dilia e dawwa made nebege. <sup>29</sup> Ne emadila misi neebe ameage, amase, ne misialala säi ameage, na e dawadigi neala säi. <sup>30</sup> Amala säi amo nabalahlilä, ilia e gaudelä hamoi gaso, ie segeyo amo gala made amea, afädëa ie naabogi made gaui. <sup>31</sup> Amai gaso, udia dolö gegedoi amoligi yafiea ema asigi afädë negei. Amolia sähalea, Afädë Memelei amo maalahlilä, ea dolöea hamomolöi made gadoi hamomolö amoda, dolö gowea hamosa neebe amo gadola, baagila awäla hamomolölela säi.

#### *Yesu nafodola mosalai*

<sup>32</sup> Udia dolö gegedoi amolia Yesu helësëla sädäwala säla didiäha dibe amo Felesi dolö amolia nabalahlilä, iliage, gobela ilo busa nefolalo amoliage, Godeie mosö idihë nefolalo amolima e nafodola mosalola säi. <sup>33</sup> Amalebegi, Yesuea sähalea, Ne dilibalä segeyo obobamelë nelolahilä, ne misialala sälo neebea ami obögëmolömelë. <sup>34</sup> Obögësedä, dilia ne hogomolö gaso, made beagolemömelë. Sege ne moholöia amida, dili moholöi made nebegola säi. <sup>35</sup> Amala säi amo nabalahlilä, Yu nefolalo amolia hilidomu didiähalea, Ne made beagolemömelëla säha neebe goweda, eda abododi moholö nea sähadu. Nilä sosogo odoa Giligi sege elö elöla dibeami afufui amoli neebea ami awälahilä, Giligi udia dolö amolima mala säla olelela moholö nea sähaledu. <sup>36</sup> Ea sähalea, Dilia ne hogomolö gaso, made beagolemömelëla säi amoge, amase, ne moholöia amida, dili moholöi made nebegola säi amoge, mida edo helësëla sähadula säi.

#### *Yesuea namolö ödäie säi*

<sup>37</sup> Idia Dilo Mosö Segeyo amo wagamolöie segeyo edefadegi Yesuea nowela nea gelola sähalea, Afädë ödä haläi nea galëda, nema naa misialo. <sup>38</sup> Nema asigi afädë negei neebe amolia bebägi säla dädëla negei dibe amo gadola hamomolömelë. Ado säla dädëla negei dibe amea sähalea, ie isogila namolöie ödä amo bugagila awäha namolömelëla säla dädëla negei dialeala säi <sup>39</sup> Ea amo säi amoda udia dolö ema asigi afädë negei nefolalo amolima hobeala Gesami imolö amo helësëla amala säi. Yesu e yo hido elöi digalomadi gauia adogoi amo, aso, made gauia adogoi amea, Gesami made digala nebegi, amo gala amala säi.

#### *Udia dolö ili moge mogela nefolalo*

<sup>40</sup> Ea ado säi amo nabalahlilä, udia dolö gegedoi amoligi odoaea sähalea, Dolö goda dofä bea sälo amo gabumelëla säi. <sup>41</sup> Amase, odoaea sähaleada, Afädë Memelei amoda emelëla säi. Oböla odoaea sähaleada, Afädë Memelei amoda amai, Galilila made moholö madele. <sup>42</sup> Godeie bebägi gomalä säi dialea. Afädë Memelei amoda, beaha aligilo Gini Debidiie sosogogila moholömelë. Amase, gaamu Bedeleheme Debidi neloala moholömelëla säla dädëla negei dialea madelela säi. <sup>43</sup> Udia dolö gegedoi nefolalo amolia Yesu helësëla moge mogela nefolalo. <sup>44</sup> Odoaea e gaudelälä helësëi gaso, iligi afädëa e made gaui.

#### *Yu ilile busa nefolalo amolia Yesuma asigi afädë made negei*

<sup>45</sup> Amasebegi, Godeie mosö idihë aligilo amoli maala Felesi dolöge, gobela ilo busage nefolalebea ami bu obögëi. Obögësebegi, ilia amolima nabahalea, E sigi made misigoda edoie la nabi. <sup>46</sup> Amala nabasebegi, ilia säla obögësalea, Siiba dolö afädëa ea säse amo gadola säloda maademelëla säi. <sup>47</sup> Amala säi amo nabalahlilä, Felesi dolö amolia ilima säla obögësalea, Dilige ea neala golisebegi mofiaile. <sup>48</sup> Nilä sigi aligilo busa afädëage, amase, Felesi dolö afädëage, ema asigi afädë negei neebe dilia melile. <sup>49</sup> Amai gaso, udia dolö amolia Mosese nebegi Ado säla negei amo hedabola helësëla made, ilia ema asigi afädë negesebegoda, Godea ili së imolö dialeala säila säi. <sup>50</sup> Amala säsebegi, Felesi dolö afädë Nigudimusi, dafidi Yesu neebea mulo amea, e sosogo amolima sähalea, <sup>51</sup> Nilile Ado mala säla negei dibe ameada, dafidi afädëa ado sähalea, Na gomalä hamoila säse amo nabalahlilä, gudi mogelo amo, ie ado made nabalada, gudi mogelolela nabi. <sup>52</sup> Amala nabasebegi, ilia ema säla obögësalea, Diğe Galilila misi neale. Bebägi säla dädëla negei dibe amo hedabola nidela beaseda, bea sälo afädë Galilila moholömelëla säla dädëla negei diëda, made bimolömelëla säi.

<sup>53</sup> \* [Amala sälahilä, ili sulubadela dusula mosöa bahila awäha maadei.

\* **7:53:** Dawadigi dolö odoaea helësësaleada, ado [gomalä] hولة negei amoda, Yone hi dädëi made, goda hobeala dolö lölea dädëla helësëi.

## 8

<sup>1</sup> Yesu eda Olibebidaia ami fedai.

*Ilia udia afädë nafade hamosa nebegi, Yesu neebee sigi misi*

<sup>2</sup> Yesu e hä, yosefali obëgëla awäla Godeie mosöa ami besela galala nebegi, udia dolö sulubadela e neebee ami mafula gegedoi. Amalebe, e ami fia idogola salea, ilima säla olelesa sulo. <sup>3</sup> Mala dawadigi dolö amoliage, amase, Felesi dolö amoliage, udia dolö fii afädëa, dolö fa neaha nebegi beagolelahilä, ilia udia amo sigi misi. Sigi maalahlilä, udia amo gegedoi amoli mogogi ifosilahilä, <sup>4</sup> Yesuma sähalea, Säla Olelelo-o, udia egoweä, dolö fa neaha nebegi beagoleimelë. <sup>5</sup> Ado säla negei dibe amogi Mosesea sähaleada, Egowe gadoi hamosebe amoda, igia nufudala baagomolola säi dialea. Amai diada, abilia sämolö gabula nabi. <sup>6</sup> Ilia ea nafadela säimelëla sädeläie, ea nafadela sämabelela nufigila nabaha dilo. Amalebe, Yesu e dosogägila fia idogola salea, ie naabo sögöea nagagi dëdësa sulo. <sup>7</sup> Amala bu eegela nabahamu nebegi, e noweia adogola nea ilima sähalea, Diligi afädë nafade made hamolo neebe amedale igia udia go nidimalola säi. <sup>8</sup> Amala sälahilä, e dosogägila fia idogola salea, naabo sögöea nagagi bu dëdësa sulo. <sup>9</sup> Ado amala säi amo nabalahlilä, dolö asigi fädäi nefolalo amoligedeleä afädë afädëla doadigila awäha maadeibua, hobeala malisä nefolalo amoligedeleä doadigila awäha maadei. Asibua, Yesu hido sulo, amase, udia amoge mogogi ifosia ami nelo. <sup>10</sup> Amalebe, Yesu e noweia adogola nea, udia amoma nabahalea, Udia-o, ilida hä, abilisio. Di së imolö dialeala säi amoligedeleä afädë made gabulela nabi. <sup>11</sup> Amala nabasebegi, udia amea säla obëgësalea, Dafidilo-o, afädëge maade gabuwela säi. Amala säsebegi, Yesuea ema sähalea, Nage di së imolö dialeala säha mademelë. Mosalo. Segeyo walio neebeweä nofela, dia nafade bu elö made hamomalola säi.\*

*Yesuea eda sege föi sulubadelaie yo digalo neawela säi*

<sup>12</sup> Yesuea udia dolö amolima bu elö sähalea, Nihineda sege föi sulubadelaie yo digalo neawe. Afädëa ne bëgëla maasebe amoda, gasimi sagaïdo dofä made awäla, namolöie yo digalo gaula namolöimelëla säi. <sup>13</sup> Amala säi amo nabalahlilä, Felesi dolö amolia Yesuma sähalea, Dia hamosebego sulubadela dihimu säla ulufadigisa neebe goeada, dia säsebe amo udia dolöea dofä gabula nabolöi made gabumelëla säi.\* <sup>14</sup> Amala säsebegi, Yesuea ilima säla obëgësalea, Na hamoi amo nihä säla ulufadigisa neëda, udia dolö na säse nabase amoliada dofä gabula nabolöimelë. Mida, neda guwila misi, hä, guwi moholö nealage, nihä dawadigi neamelë. Amai, ne misi amoge, ne obëgëmolö amoge, dilia dawa made nebego. <sup>15</sup> Diliada nagadaia dolöea mogelo amo gadola mogelomelë. Nada afädë made mogelomelë. <sup>16</sup> Afädëa hamosebe amo na mogeseda, udia dolö na säse nabase amoliada dofä gabula helësemolöimelë. Mida, ne nihidomu nea mademelë. Naado ne misialala sälo amo haligila neamelë. <sup>17</sup> Dilile mala säla negei dibe amea sähaleada, Dolö elöea säi amo gadola, dolö elö ameage, amo gadola wäla säseada, elea säse amoda dofä gabula helësemolö dialeamelëla säla dëdëla negei dialea. <sup>18</sup> Nie malage, na hamolo amoge, nihimu neala säla ulufadigisa neebeweä gadola, Naado ne misialala sälo ameage, nie säla ulufadigisa neamelëla säi.

<sup>19</sup> Amala säi amo nabalahlilä, Felesi dolö amolia ema nabahalea, Amai die Diadoda abidi neala nabi. Amala nabasebegi, Yesuea säla obëgësalea, Dilia nege dawa made, amase, Naadoge dawa made nebego. Ne dawa galebeda, Naadoge dilia dawadigilabiomelëla säi. <sup>20</sup> Yesuea ado amo säha nelo amoda, Godeie mosöamadi Godegali muni odala ilo hogoli ga madela ami nea, amala säha nelo. Ie segeyo aso, amo gala made amea, afädëa e made gau.

*Yesuea ne awäsebe amogida, dili moholöi mademelëla säi*

<sup>21</sup> Yesuea ilima sähamu neamu sähalea, Neda moholö. Dilia ne hogomolömelë. Amase, dilia nafade hamoi amo diëgi wäla dili baagomolömelë. Sege ne moholö awäsebea amida, dili moholöi mademelëla säi. <sup>22</sup> Amala säi amo nabalahlilä, Yu ilia sähalea, Ne awäsebea amida, dili moholöi mademelëla säi amogi, e himu nufudala baagomolöledula säi. <sup>23</sup> Amala säha dibegi, Yesuea ilima sähalea, Dilida gidogola. Neda gadogolamelë. Dilida nagadaiala. Neda nagadaiala mademelë. <sup>24</sup> Amoië mida na dilima sähalea, Dilia nafade hamoi amo diëgi wäla dili baagomolömelëla säi amomelë. Ne Nelo Neebe amo dofäla made helëseseda, dihili nafade hamoi amo diëgi wäla dili baagosa maademolömelëla säi.\* <sup>25</sup> Amala säi amo nabalahlilä, ilia ema nabahalea, Dida nowë neala nabi. Amala nabasebegi, Yesuea säla obëgësalea, Neda gowe neamelëla dilima dafidi säla i amomelë. <sup>26</sup> Dilia hamosa nebegoda, gowe hamoimelëla na säla imolöge mogemolöge yafie gaulea. Gaso, ne misialala sälo

\* **8:11:** Dawadigi dolö odoeaa helësesaleada, ado [gomalä] holela negei amoda, Yone hi dëdëi made, goda hobeala dolö elöea dëdëla helësesi. \* **8:13:** Mala Bu Eegei 19.15 bimalo. \* **8:24:** Sigi Obëgëi 3.14gi, siiba Godea Mosesema eda gowe gadoimelëla sähalea, Ne Nelo amo Neamelëla säi. Yesueage amo gala amo gadola wäla säi gasoda, udia dolöea Yesuea säi amoië mi fädäla made helësesi nelo. Yone 8.28ge, amase, 8.58ge, amase, 13.19ge bimalo.

amoda dofä neebe amea, sämola säse amo gadola nagadaiawi nefolalebe amolima säla äaha neawemelëla säi. <sup>27</sup> Amala säi amoda, ea ie Eedoie säla äasebelada ilia made dawadigi nelo. <sup>28</sup> Dawa made nebegi, Yesuea ilima bu sähalea, Hobeala dilia Dolöie Malö amo gauia adasolo amo gala dilia helësesalea, Ne Nelo amo Nea gabulage, amase, nie asigiamu nelebo afädë made hamola, Naadoea nema olelei amo gadola, na ado sälo gabulage dawadigimolömelë. <sup>29</sup> Ne misialala sälo amo nebalä nea. Nada ea hamesebe amo gadola hamosamu aligilo ameadä, ea ne digila aulo made neamelëla säi. <sup>30</sup> Ea amala säi amo nabalahlilä, udia dolö yafiea ema asigi afädë negei.

*Ado dofä amea udia dolö fisigämolömelëla säi*

<sup>31</sup> Yesuea Yu dolöea ema asigi afädë negei nefolalo amolima sähalea, Dilia na ado säsebewe nabala, bögëla hamosa aligiseda, dilida dofä nie bögëla aulo nea, <sup>32</sup> amase, dilia ado dofä amo dawadigisegi, ado dofä ameadä dili fisigäha maademolömelëla säi. <sup>33</sup> Amalebe, ilia ema säla obögësalea, Nilida Abalahamaie yualali aliligi misi amogi neebe amo. Niliada afädëie galabaia hamoi gadoi made hamolasilo nelo ameadä, dia dili fisigäha maademolömelëla säi amoda abeahäladula nabi. <sup>34</sup> Amala nabasebegi, Yesuea ilima säla obögësalea, Na dilima dofä gelola sähago. Udia dolö nafade hamolo neebe amoli sulubadelada, nafade hamoloie galabaia hamoi gadoi hamolasilo nea. <sup>35</sup> Galabaia hamoi gadoi hamolasilo neebe amoda, mosöa namolöi namolö mademelë. Malöda namolöi namolömelë. <sup>36</sup> Amai gabugi, Malöea dili fisigäsa, amoda dili dofä fisigäi namolömelë. <sup>37</sup> Dilida Abalahamaie yaua aliligi misi neebe amoda na dawa. Gaso, nie adoda dilile isogi fu made äala neada, oböla ne nufidedelä hamosa nebege. <sup>38</sup> Ne Naadobalä nea meli amoda säla ilo. Amase, diliada dilile diadoea säse nabi amo gadola hamosa nebegola säi. <sup>39</sup> Amala säi amo nabalahlilä, ilia ema säla obögësalea, Nilile naadoda Abalahamamelëla säi. Amala säsebegi, Yesuea ilima säla obögësalea, Dili Abalahamaie malö galebeda, Abalahamaie hamosa nelo amo gadola, diliage hamosa aligilabiomelë. <sup>40</sup> Godea nema ado säla äasebe amo gadola na dilima ado dofä na nabi amo säla äaha nebegida, oböla dilia ne walio nufidedelä hamosebege. Abalahamaie amo gadola made hamoimelë. <sup>41</sup> Diliada dilile diadoea hamolo amo gadola hamosebegola säi. Amala säsebegi, ilia ema sähalea, Nemelalia fofalösa malö sogobaida nili mademelë. Nilile Naado afädëfali neebe amoda Godemelëla säi. <sup>42</sup> Amala säsebegi, Yesuea ilima sähalea, Dilile diado dofä Gode e nea galebeda, dilia nebalä boba hamolabio. Mida, ne Gode e neebeala misi neawe. Neda nihä asigia misi made, ea ne misialala säimelë. <sup>43</sup> Dilia na ado säsewe made helësesäe goda, mi edoea. Amoda, na ado säse dilia nabalöi made neebe goemelë. <sup>44</sup> Dilida dilile diado mugabe Saidaniie malö nea. Ea hamese amo gadola, diliage amo gadola hamela hamosa nebege. Siiba, mi gäwia amila ea dolö nufudadigilo nelo. Amase, ema dofä sälo maade ameadä, eda dofä sälomadi aligilo made nelo. Ea wäfali säseada, ea hile mala amo gadola wäla sälo. Eda wäfali sälo nea, amase, wäfali sälo neebe amoie eedoge e neamelë. <sup>45</sup> Amalebe, na dilima ado dofä amo säla äaha nea gaso, dilia dofä gabula made helësesäebege. <sup>46</sup> Diligi nowëa na nafade hamoi amo säla ulufamolöi gabu. Be, na ado dofä säla äasewegi, dilia dofä gabula made asigi amoda mi edoea amai. <sup>47</sup> Udia dolö Godeie nefolalebe amoliada, Godeie ado nabelo nea. Dilida Godeie made neebe ameadä, dilia made nabasebegola säi.

*Yesu e Abalahama maadeia nelo neamelëla säi*

<sup>48</sup> Yu ilia Yesuma säla obögësalea, Nilia dida Samelia dolölage, amase, dima mugabe fedai nealage sälo amoda dofä sälo madelela säi. <sup>49</sup> Amala säsebegi, Yesuea säla obögësalea, Neda mugabe fedai na mademelë. Nada Naadoie äi gauia adaha neebewegida, dilia ne gagadesa nebege. <sup>50</sup> Na nihile äi gauia adamolöda made helësesäemelë. Afädë neebe amea nie äi gauia adamolö helëselä, mogelo nea. <sup>51</sup> Na dilima dofä gelola sähago. Afädëa na ado säsebe amo nabala bögëla hamosa neebe ameadä, baagomolöda dofä made bimolömelëla säi. <sup>52</sup> Amo nabalahlilä, Yu ilia ema sähalea, Di mugabe fedai neebe amoda nilia hä, dawadigimelë. Abalahamage baagoi, amase, bea sälo amolige hä, baagosa maadei amo. Oböla, dia sähalea, Na ado säsebe amo nabala bögëla hamosa neebe ameadä, baagomolöda dofä made bimolömelëla säsi. <sup>53</sup> Nilile mäu Abalahama baagoi amo, dia e baagile. Amase, bea sälo nefolalo amolige baagosa maadei amo. Dia dihida di nowëla asigisebela nabi. <sup>54</sup> Amala nabasebegi, Yesuea säla obögësalea, Na nihile äi gauia adaha nea galebeda, nihimu nie äi gauia adai amo memalä gadoi hamolabio goda. Naadoma dilia dilile Godela sälo ameadä nie äi gauia adaha nebege <sup>55</sup> Gaso, eda dilia dawa mademelë. Nada e dawadigi nea. Na e dawa mademelëla säha galebeda, nege dili wäfali sälo nebege gadoi aligilabio. Na e dawadigilahilä, ea hamomola säse amo gadola hamosa neawe. <sup>56</sup> Dilile diado Abalahamaie amo moholö segeyo amo bimolöila helëselahlilä, obeägila nelo. Amo besela galasebegi, obeägila melimelëla säi. <sup>57</sup> Amala säi amo nabalahlilä, Yu ilia ema sähalea, Dida gäheo i nabülasi bia made baagi nebege gabu. Amai Abalahamada dia meli nealela nabi.

<sup>58</sup> Amala nabasebegi, Yesuea ilima sähalea, Na dilima dofä gelola sähago. Neda Abalahama maadeia Ne Nelo amo Neawemelëla säi.\* <sup>59</sup> Amala säi amo nabalahlilä, ilia igi neala e nufulö hamosebegi gaso, Godeie mosöamadila geleä musügä segea doadigila asi.

## 9

### *Dolö si golai afädë si fisigälasi*

<sup>1</sup> Yesu e awäha nea beahamelebe, dolö afädë si golai neebe meli. Amoda neegela ägüsolo amo gala, emea si golai amo gadoi wäla ägüla misi sulo amo neebe meli. <sup>2</sup> Amo bealahilä, ie bégëla aulo amolia ema nabahalea, Säla Olelelo-o, dolö gowe nowëa nafade hamoia emea neegela ägüsolo amo gala si golai amola wäla neegela ägüidu. Hi nafade hamoialedu ma, eedole emeala nafade hamoialedula nabi. <sup>3</sup> Amala nabasebegi, Yesuea säla obëgësalea, Eedo emeage nafade made hamoi, amase, dolö go hige nafade made hamoi. Goda Godeie geloi ulufala olemäia hamoimelëla säi. <sup>4</sup> Walio segeyo dibewegi, nilia ne misialala sälo amoie hamoi hamosa namolöla. Gasimi sagaloda hä, besela galasebe. Amo besela galaseda, afädëa hamoi hamomolöi mademelë. <sup>5</sup> Ne nagadaiaawi neebewe gaaluda, sege föi sulubadelaie yo digalo ne neawemelëla säi. <sup>6</sup> Amala sälahilä, ea nagadaia gofedela sadia idogolahilä, naga amobalä dädalahlilä, dolö si golai amoie sihidoo häi. <sup>7</sup> Amalahilä, Yesuea dolö amoma sähalea, Di awälahlilä Sailoama nudugu dibeami häi hemolö mosalola säi. Sailoamada, Hibulu ado. Amoie mida, Mosaloi. Amala säi amo nabalahlilä, dolö amo awäla, ödägi ami häi. Hëlahilä hä, nelebo sulubadela fädäla bebea obëgëi. <sup>8</sup> Amalebe, ebalä gedola aligilo amoliage, amase, dafidi ea muni ëdëgëse melëlo amoliage sähalea, Wae! Dolö goweda udia dolöma muni imola säha seë melëlo amo madelela säi. <sup>9</sup> Odoaea sähalea, Amo gabula säi. Amase, odoeada, Ai. Goda amo gadoi elö gabula säha dibegi, dolö amo hi sähalea, Amoda nemelëla säi. <sup>10</sup> Amalebe, ilia hä ema nabahalea, Die si goda abeahäla fisigälasi nabi. <sup>11</sup> Amala nabasebegi, ea säla obëgësalea, Dolö ëi Yesuea nagadaia gofedela sadia idogolahilä nagabalä dädalä, nie sihidoo hëlahilä sähalea, Sailoama nudugu dibeami häi hemolö mosalola säsi. Amala säsebegi, ne hä awäla hëlahilä, siia melimelëla säi. <sup>12</sup> Amala säsebegi, ilia ema nabahalea, Amai dolö amoda abidi neala nabi. Amala nabasebegi, ea säla obëgësalea, Na dawa mademelëla säi.

<sup>13</sup> Amalebe, dolö si golai nelo amo ilia Felesi dolö ili neebeami sigi asi. <sup>14</sup> Yesuea gofedela nagabalä dädalä amea, dolö amoie sihidoo hësebegi, si fisigäi amoda, segeyo Sabada gafegi amai. <sup>15</sup> Felesi dolö amoliage ema bu nabahalea, Dia siia beasegoda abeahälala nabi. Amala nabasebegi, ea ilima säla obëgësalea, Ea gofedela nagabalä dädalä amo nie sihidoo negesebegi, na ödägi hëlahilä, siia beahamelëla säi. <sup>16</sup> Amala säi amo nabalahlilä, Felesi dolö odoaea sähalea, Segeyo Sabada gafe dialeala made asigi goeada, dolö goda Godemadila misi made gabula säi. Amalebe, odoaea sähalea, Dolöea hamomolöi made gadoi amoli nafade hamolea abeahäla hamomolöi gabula sälahilä, hilimu moge mogei nelo. <sup>17</sup> Amasebegi, ilia dolö si golai nelo amoma bu nabahalea, Ea die si fisigäi goeada, dia äda abilia sähala nabi. Amala nabasebegi, ea säla obëgësalea, Eda bea sälo afädë gabiola säi.

<sup>18</sup> Amala säsebegi gaso, dolö amoda dafidi si golai sulo amo, hä, siia beahamelëla säi amo, Yu ilia dofä gabula made helësëlahilä, dolö si fisigäi amoie eedole emele misialola wei. <sup>19</sup> Maasebegi, ilia elema nabahalea, Alile malö si golai neegela ägüila säi amoda gole. Ea beasebegoda abilia beahadula nabi. <sup>20</sup> Amala nabasebegi, eedole emele säla obëgësalea, Goda alile malö amoge, amase, e si golai neegela ägüi amoge alia dawa. <sup>21</sup> Ea walio beaha neebe amo abeahäla beahadu. Amoge alia dawa mademelë. Amase, nowëa ie si fisigälasi. Amoge alia dawa mademelë. E malësä made ameadä, hïma fädäla nabualo. Ea hi e hi fädäla sämolömelëla säi. <sup>22</sup> Elea Yu dolö amolibälä bedälo amea amala säi. Mida, ilia ado säla negesalea, afädëa Yesu eda Afädë Memelei amo gabiola säla ulufadigiseda, gedolo mosöa amila segea beselala fisimolömelëla säla negei. <sup>23</sup> Amala säla negei amogi, eedole emelea sähalea, Eda malësä made. Hïma nabualola säi.

<sup>24</sup> Yu dolö amolia dolö si golai nelo amo bu elö welahlilä ema sähalea, Dia Godeie ëi gauia adala, mogolafali sämalö. Niliäda dolö goda nafade hamolo neala helësësamelëla säi. <sup>25</sup> Amala säsebegi, ea säla obëgësalea, Eda nafade hamolo nealedu. Na dawa made. Gaso, na afädë helësësebe amoda gowe. Ne si golai nelo amoda, na walio siia beahamelëla säi. <sup>26</sup> Amala säsebegi, ilia ema bu elö nabahalea, Ea dima abilia hamosio. Die si amo abeahäla fisigälasiola nabi. <sup>27</sup> Amala nabasebegi, ea ilima säla obëgësalea, Na dilima dafidi säla i amo made nabile. Edoie nali nabahamu nea. Dilige ie bégëla aulo namolöie sähalela säi. <sup>28</sup> Amala säsebegi, ilia e gagadela sähalea, Dolö amoie bégëla auloda di nebebo. Nilida Mosesëie bégëla aulo neamelë. <sup>29</sup> Godea Mosesema ado säla i amoda nilia dawadigisa maadei nea. Gaso, dolö goda abidila misi neadu, nilia dawa made neamelëla säi. <sup>30</sup> Amala säsebegi, dolö amoda

\* 8:58: Yone 8.24 amogi gasumili dibe amo bimalo.

ilima sāla obēgēsalea, Neme, ne bedāi! Dilia ado elōla sāseogogi. Ea ne si golai fisigālasī amogi, dilia e abidila misidula asusugai nebeo. <sup>31</sup> Nafade hamoloie adoda Godea nabelo made neebe amo nilia dawadigi nea. Gasoda, afādēa iē ēi gauia adaha nea, Godea hamese amo gadola bēgēla hamosa neebe amoie adoda, ea nabelo nea. <sup>32</sup> Dafidi nelebo afādē maadeia amila, dolō afādē erna si golai neegela āgūi amo dolō elōea egomalā si fisigālasimelēla sāida, dofā made nabimelē. <sup>33</sup> Dolō go Gode neebeala misi made galebeda, ea nelebo afādē hamomolōi mademelēla sāi. <sup>34</sup> Amala sāsebegi, ilia ema sāla obēgēsalea, Dida diemea nafadeia nea di neegela āgūsebegi, nafadebalā ēdēla aligi nebeo gabu. Di gadoiada nili olemolō helēsēsebelela nabi. Amala nabalahlā, ilia e gedolo mosōa amila segea beselala fisi.

*Asigi besui made neebe amolida, si golai gadoi neala sāi*

<sup>35</sup> Iliā e amala beselala fisimelēla sāi amo nabalahlā, Yesuea dolō amo beagolelahilā, ema nabahalea, Diada Dolōie Malō amoma asigi afādē negeilela nabi. <sup>36</sup> Amala nabasebegi, ea sāla obēgēsalea, Dafidilo-o, Dolōie Malō amoda nowē. Na ema asigi afādē negedelāla sāi. <sup>37</sup> Amala sāsebegi, Yesuea ema sāhalea, Diada e melimelē. Amase, amohida walio dibalā adosa nebegomelēla sāi. <sup>38</sup> Amala sāsebegi, ea sāhalea, Dafidilo-o, na dima asigi afādē negesagola sālahilā, Yesuie emo mia gumusulahlā, iē ēi gauia adaha sulo.

<sup>39</sup> Yesuea sāhalea, nada mogelasimolōie nagadaiaawi misi neawemelē. Dolōea siia made beaha nefolalebe amolia bimāiage, beaha nefolalebe amolida, obōla, si golamāiage, ne misi neawemelēla sāi. <sup>40</sup> Amala sāi amo, Felesi dolō odoa ebalā nefolalo amolia nabalahlā, ema nabahalea, Nilige hā, si golai neebelela nabi. <sup>41</sup> Amala nabasebegi, Yesuea ilima sāhalea, Dili si golai nea galebeda, nafade dilima made dialealabio. Gaso, dilia sāhalea, Nilia siia beahamelēla sālo ameadā, dilile nafadedā dialeamelēla sāi.

## 10

*Yesu eda sugua sibi sigi aligilo hedabi nea*

<sup>1</sup> Yesuea ado aso, sāhamu neamu sāhalea, Na dilima dofā gelola sāhago. Dolō afādēa sugua sibiie yala idi galogi dogala digala made, obōla yala dabiala fedalo neebe amoda, musūgā awāla fa neloge, idiafa naabo gauia adogola fa neloge nea. <sup>2</sup> Amalo gaso, yala idi galo dogala digalo neebe amoda, sugua sibi sigi aligiloda amomelē. <sup>3</sup> Idi galo idihē aligilo neebe amea, sigi aligilo misiāia idi galo dogā negesisegi, sugua sibia sigi aligiloie ado nabelo. Ea hile sugua sibi hīdo hīdola iē sāla welahlā, hī sigi segea doadigila aulo. <sup>4</sup> Ea hile sugua sibi sulubadela segea sigi awālahilā, ilia e bēgēla misiāia, hī e dafidila aulomelē. Iē sugua sibia iē ado nabelo amea, e awāse amo gadola bēgēla aulo nea. <sup>5</sup> Sugua sibi amolia dolō dawa made amoda dofā made bēgēla aulo. Dolō elōie ado made dawa amea, ili ebalā fisāla aulomelēla sāi. <sup>6</sup> Yesuea ilima amala ado besula sāsebegi gaso, ilia amoie mi dawadigi made nelo.

<sup>7</sup> Amala hamosebegi, Yesuea ilima bu sāhalea, Na dilima dofā gelola sāhago. Nihineda sugua sibiie idi galo neawe. <sup>8</sup> Ne made maala dafidila misi amoli sulubadelada, musūgā awāla fa neloge, idiafa naabo gauia adogola fa neloge misimelē. Misi gaso, amolile adoda sugua sibia made nabimelē. <sup>9</sup> Nihineda idi galo neawe. Ne mia maala nogila digase amoda damula moholō. Ea mumusogi digala digi segea doadigila fedala digisa nea, molō hedabi dibe amo beagolemolōmelē. <sup>10</sup> Fa neloeada fa nimolōge, nufudadigimolōge, neala nafademolōge, amoieumu mulomelē. Neda ilia namolō gaumāiage, amase, namolō amo ilima nobamāiage misi neawemelē. <sup>11</sup> Sugua sibi sigi aligilo hedabida nihine neawe. Sugua sibi sigi aligilo hedabida sugua sibi amoligali hile namolō amo fisiga galomelē. <sup>12</sup> Dolō hamoi hamola bidi nelo neebe amoda sugua sibi sigi aligiloge, eedoge made nea. Iliua ūgūlo maase beaseda, ea sugua sibi digila fisāla asibua, ilia ūgūloea sugua sibi nufudala balālelomelē. <sup>13</sup> Dolō amo fisāla aulo amoie mida, eda bidi nelo nea, sugua sibi made helēsēlo amea. <sup>14-15</sup> Sugua sibi sigi aligilo hedabida nihine neawe. Naadoea ne dawadigila, amase, nage Naado dawadigi amo gadola, sugua sibi nihile nefolalebe amolida nihī dawadigi. Amase, sugua sibi nihile nefolalebe amoliage ne dawadigi nea. Amala hamola nea, na sugua sibi nefolalebe amoligali nīe namolō fisiga gamolōmelē. <sup>16</sup> Yala goweie isogi sugua sibi nefolalebe welimu made, nada sibi odoage galeamelē. Amolige na sigi moholō dialea. Iliage nīe ado nabala, sosogo afādēfali hamola, sigi aligiloge afādēfali namolōmelē. <sup>17</sup> Naadoea ne edefade boba hamosa neebe amoie mida, na nīe namolō fisiga galahlā, bu nea obēgēmōlō amogi. <sup>18</sup> Nīe namolō amoda afādēa made neahamelē. Nihī fisiga gamolō hamei amo gadola fisiga gaha. Namolō fisiga gamolō amoie geloige, bu nea obēgēmōlō amoie geloige, nihī gaulea. Naadoea nema amala hamomalola sāimelēla sāi.

<sup>19</sup> Ea amala sāi amo nabalahlā, Yu ili bu āudāla mogela damula gogoi nelo. <sup>20</sup> Ili dolō yafiea sāhaleada, Eda mugabe fedai nea, gagaola sāsebeogōie dilia nabasebegoda edōie nabahala sāi. <sup>21</sup> Amala sāsebegi gaso, odoaea sāhalea, Ea ado sāsebegoda mugabe fedaiā sālo



amo gadola made gabu. Amai mugabeada si golai nefolalebe amoli fisigälasimolöi gabulela säi.

*Yu ilia Yesubalä ado nii nelö*

<sup>22</sup> Amo baagiada, segeyo edefade siiba Godegali mosö i amo helësëla, amoie Yalusaleme gegedolo segeyo dilo. Mugia i bäu gisalea gögi mulo segeyo amogi, <sup>23</sup> Yesu eda Godeie mosöa Solomonöie hadaila sälo dibeadi amogi awäha nelö. <sup>24</sup> Awäha nebegi, Yu ili maala e amalela digilahilä ema nabahalea, Neda gowe neamelëla abola sämolö gabu. Dida Geleso nea galëda, nilima ulufala mogola sämola säi. <sup>25</sup> Amala säsebegi, Yesuea ilima säla obëgësalea, Na dilima säla i. Gaso, amo dilia dofä gabula helësëla made nebego. Na Naadoie äigi nea hamoi hamosa neebeweada, ne dilima olesa. <sup>26</sup> Gaso, dilida nie sugua sibi made amead, dilia asigi afädë made negei nebego. <sup>27</sup> Nie sugua sibi nefolalebe amolia nie ado nabelo. Na ili dawadigi neëgi, ilia ne bëgëla mulomelë. <sup>28</sup> Na iligali namolöi namolö iasegi, ili dofä made baagomolömelë. Ili nie naaboea gaula neebe amoda afädëa fedemolöi made bimolömelë. <sup>29</sup> Naadoea amolida nema i. Nelebo sulubadela holöbö gidogolahilä, eda dofä dafidilo gelolamelë. Amaimo, Naadoie naaboea gaula neebe amolida afädëa fedemolöi made bimolömelë. <sup>30</sup> Naado alida afädëfali neamelëla säi.

<sup>31</sup> Amala säi amo nabalahlilä, Yu ilia e bu nufidedelä igi nii. <sup>32</sup> Amala neasebegi, Yesuea ilima nabahalea, Na hamoi hedabi yafie Naadomadila misä amolida dilima olei. Hamoi amoligi na abodo hamoi amoie oböla ne nufidedelä hamosala nabi. <sup>33</sup> Amala nabasebegi, Yu ilia säla obëgësalea, Dia hedabi hamola nowei amogi mademelë. Di dolöfä nea oböla, di dihümu Gode hamola, e gagadei amogi nilia di igia nufidedelä hamoimelëla säi. <sup>34</sup> Amala säsebegi, Yesuea ilima säla obëgësalea, Dilile Ado mala säla negei dibe amogida, ado afädë dëdësalea, Nada dili godemelëla säila säla dëdëla negei dialea madele. <sup>35</sup> Siiba Godeie adoda udia dolöma misi. Ea udia dolö amolima dili godemelëla säi galëda, amase, ado säla dëdëla negei amoda neadigimolöi made galëda, <sup>36</sup> na ne Godeie malö neawela säha neebe amea, dilia Naadoea afädë hile nafolalahilä, nagadaiawi fisiga wei amoma, dia Gode gagadesebegola sähale. <sup>37</sup> Na Naadoie hamoi amo made hamosa neëda, dilia na ado säsebewe dofä gabula made helësëmalö. <sup>38</sup> Gaso, ie hamoi na hamosa neëda, dilia na ado säsebewe dofä gabula made helësësa galëda, na hamoi hamosewegi dofä gabula helësëmalö. Amala säsebe amoie mida, ne Naadoma aligila, amase, Naadoge nema aligilalahilä neebe amo dilia dofä helësëmäiamelëla säi. <sup>39</sup> Amala säi amo nabalahlilä, ilia e bu gaudelä hamosebegi, e fisäla doadigila asi.

<sup>40</sup> Amalebe, Yesu e ödä Yodona dëgëla alömodi bu obëgëlahilä, sege dafidi Yonea udia dolö ödägi gesa neloa ami awäla nelö. <sup>41</sup> E ami awäla nebegi, udia dolö yafie e neebea ami mafulahilä sähalea, Yoneada dolöea hamomolöi made gadoi afädë made hamola nelö gaso, ea dolö goweie säi amo sulubadelada dofä gabumelëla säi. <sup>42</sup> Hä, ami yafiea ema asigi afädë negei.

## **Yesu e Yudiage Yalusalemege awäsebegi, busa dolö nefolalo amolia e nufidedelä hamoi**

### **11**

*(Yone 11-12)*

*Elasalusi baagoi*

<sup>1</sup> Dolö afädë Bedani gaamugi ami fii Elasalusi oloi dilo. Gaamu amoda Melile ie esama Madalele sege dilo. <sup>2</sup> Meli ameadada Dafidilo Geloie emogi weli gafisigäi söga negelahilä, hile busa hilia hësa sulo, amoie elefi Elasalusi oloi dilo. <sup>3</sup> Oloi dibegi, elefi äudä amolea Yesuma säsisalea, Dafidilo Geloie-e, dolö dia boba hamolo amoda, hä, oloi dialeamelëla säsi. <sup>4</sup> Amala säsi amo nabalahlilä, Yesuea sähalea, Oloi goda, baagomolöie oloi mademelë. Udia dolöea Godeie geloi beala ie äi ilibila amo gauia adamäia oloi dialea. Amead, Godeie Malöie äige gauia adamäiamelëla säi. <sup>5</sup> Yesueada Madage, esamage, amase, Elasalusige, boba hamoi nelö. <sup>6</sup> Elasalusi oloi dialeamelëla säsi amo nabalahlilä gaso, Yesu e segeyo äudä bu ya aligi. <sup>7</sup> Ya aligilahilä, oböla hobeala ea ie bëgëla aulo amolima sähalea, Nilä Disiligi Yudiamadi obëgëdila säi. <sup>8</sup> Amala säsebegi, ie bëgëla aulo amolia säla obëgësalea, Säla Olelelo-o, Yu dolö ilia di hadamade igia nufulö hamoia ami bu äudulälela nabi. <sup>9</sup> Amalebe Yesuea ilima säla obëgësalea, Segeyo afädëgi esoea yo digaha neebe amoieda aoa giwilasi dialea madele. Amai dolö yoba nawesa aligiseda, ea nagadaiaweie yo digalo meli neebe ameadada digalo mademelë. <sup>10</sup> Gaso, dolö amohima yo digalo maade nea, gasigi nawesa aligiseda, digalomelëla säi. <sup>11</sup> Yesuea amala sälahilä ilima hobeala sähalea, Nilile damelë Elasalusi adi dialea. Ne awäla e didigimolömelëla säi. <sup>12</sup> Ea amala säi amo nabalahlilä, bëgëla aulo amolia ema sähalea, Dafidilo Geloie-e, e adi dialea galëda, e oloi amo wahimolömelëla säi. <sup>13</sup> Yesueada e baagoi dibe amoie säi gasoda, iliada e dofä adi dialeala säha gabula helësëi. <sup>14</sup> Amala

säsebegi, Yesuea ilima fädäla sähalea, Elasalusida hä, baagoimelë. <sup>15</sup> Dili helësëla, ne amo gala ebalä ami made nebegi baagoi amogi obeägisawe. Mida, dilia asigi afädë negemäiaie amai. Nilä hä, e dibeä ami afiadila säi. <sup>16</sup> Yesuea amala säi amo nabalahlilä, Domasa, ie ëi elö Didimusila sälo amea, bëgëla aulo odoa amolima sähalea, Nilige ebalä baagomolö afiadila säi.

*Yesuea nowelasiloë miige, namolöie miige ne neawela säi*

<sup>17</sup> Amala sälahilä awäla, besela galamolö suägila nea, Yesuea nabelebe, Elasalusi baula asi segeyo ohodoa asi, walioda biyidumelëla säse nabi. <sup>18</sup> Yalusalemela Bedanida holöbö ga madela, gilomida ohodoa gadoi dilo. <sup>19</sup> Yu udia dolö yafiea Melile Madalele elefi baagoi amogi asigiisa sebe amobalä aofila sigi samolö asi. <sup>20</sup> Madaea Yesu maahamelëla säi amo nabalahlilä, e idiafa gausiamolö asi. Gaso, Melida mosöa sulo. <sup>21</sup> Madaea hä, Yesuma sähalea, Dafidilo Geloï-e, di yawe nelo galebada, nie nalifi made baagolabio. <sup>22</sup> Gaso, walioge dia Godema afädë ëdëgëseda, ea imolöla helësësamelëla säi. <sup>23</sup> Amalebe, Yesuea ema säla obëgësalea, Dä dialifi amoda hä, nowela galamolömelëla säla i. <sup>24</sup> Amalebe, Madaea ema säla obëgësalea, Ä, segeyo aligila wagasegi, baagoi amoli nowela galasolo amo gala, eege nowela galamolöla helësësamelëla säi. <sup>25</sup> Amalebe, Yesuea ema säla obëgësalea, Nowelasimolöie miige, amase, namolöie miige ne neawe. Afädëa nema asigi afädë negei nea baagoseda, gamelä eda namolömelë. <sup>26</sup> Amase, made baagoi sefolalebe amoli sulubadelaea nema asigi afädë negei amolida, dofä made baagomolömelë. Dia dofä säsebelä helësësebelä nabi. <sup>27</sup> Amala nabasebegi, Madaea ema säla obëgësalea, Ä, Dafidilo Geloï-e. Dida Geleso, Godeïe malö nagadaiawi digamolömelëla säi amo gabugi, na asigi afädë negei neawela säi.

*Yesuea Elasalusi baagoi amogi bobasëla dui*

<sup>28</sup> Amala sälahilä, Mada e obëgëla awäla esama Meli welahlilä, geleä musügä gëhegi sähalea, Säla Olelelo amo hä, misi nea. Ea di misialaimelëla säla i. <sup>29</sup> Amala säi amo nabalahlilä, Meli e fodolofali nowela Yesu neebea ami asi. <sup>30</sup> Yesu e gaamugi ami made besela galala, aso, Mada gausiaia amimu nelo. <sup>31</sup> Yu ili mafula Melibalä mosöa ami aofila asigiisa sefolalo amolia Meli e fodolofali nowela awäse amo bealahilä, elefi bauia ami diila awäsebelä helësëlahilä, ilige e bëgëla afiai. <sup>32</sup> Meli e Yesu neebea ami awäla besela galala e bealahilä, ie emo mia gumusula dia idogola ema sähalea, Dafidilo Geloï-e, di yawe nelo galebada, nie nalifi made baagolabiola säi. <sup>33</sup> Amala säsebegi, Meliige, Yu ebalä misi amoliage didigaosebe amo bealahilä, Yesuie isogi edefademalä sogofalala säosäosa nelo. <sup>34</sup> Amala nelolahilä ea sähalea, Dilia e abidi bauli dialeala nabi. Amala nabelebe ilia ema säla obëgësalea, Dafidilo, dia bimolö misiëla säi. <sup>35</sup> Amalebe afialahlilä, Yesueage dui. <sup>36</sup> Amala duiisebegi, Yu ilia sähalea, Ea Elasalusi edefade boba hamoi nelogo beasebelä säi. <sup>37</sup> Amase, odoaea sähaleada, Dolö si golai nelo wahilo amea dolö gowe made baagomäia, hamomolöi made beala amailetdula säi.

*Yesuea Elasalusi nowelasi*

<sup>38</sup> Yesuie isogi bu elö edefademalä sogofalala säosölahilä awäla, Elasalusi bauli dibeä ami besela galai. Bauli amoda igi äbägi bausilahilä, igi edefademalä afädëa dofogai dilo. <sup>39</sup> Yesuea sähalea, Igia gaigo dogala bebugula nigia gamola säi. Amala säsebegi, baagoi amoie elefi Madaea Yesuma sähalea, Dafidilo Geloï-e, e bauli segeyo walio biyidu ameadä, sigä gäha moholömelëla säi. <sup>40</sup> Amala säsebegi, Yesuea ema sähalea, Dia asigi afädë negeseda, Godeïe geloi edefade amo bimolömelëla na dima dafidi säla i madelela säi. <sup>41</sup> Amalebe, ilia igia idi gai dilo amo dogala bebugula negesisebegi, Yesuea sida adogola nea sähalea, Naado-o, na säi amo dia nabi amogi dima nesegesawe. <sup>42</sup> Na ado säse amo dia nabahamu aligilola helësësa. Ado säi amoda udia dolö nefolalebe gowe ili helësëla säimelë. Iliä nabalahlilä, dia ne dofä fisiga wei gabula helësëmäia säimelëla säi. <sup>43</sup> Amala sälahilä, ea gelolafali sähalea, Elasalusi, di segea doadigila misiëla säi. <sup>44</sup> Amala säsebegi, e baagoi dilo amo nowela maahalea, ie naaboge emoge fagulo gadelaia neleegila, busage faguloea usulala bausi dilo amola wäla nowela doadigila fedai. Amasebegi, Yesuea ilima sähalea, E mosäia bausi fagulo goli fisigälasimola säi.

*Busa dolö amolia Yesu nifulö daiai*

<sup>45</sup> Yu udia dolö yafie Meli sebea misi sefolalo amolia, Yesuea hamosebe amo bealahilä, ema asigi afädë negei. <sup>46</sup> Iligi odoa Felesi dolö neebea afialahlilä, Yesuea hamoi amo säla i. <sup>47</sup> Amalebe, Felesi dolöfulo gobela ilo busafulo amolia Galisölo dolö amoli mofiala geedomalolahilä didiähalea, Dolö gowea hamomolöi made gadoi yafie hamosebeweie, nilia edo hamomolödu. <sup>48</sup> Nilia ea amala hamomäia guilaisedä, udia dolö sulubadelaea ema asigi afädë negesa maademolö gabu. Amala hamoseda, Olomo dolö ili maala, udia dolö nufudaha maadelahlilä, nilile gobela ilo mosö amoge haila hësögudumolö gabumelëla säi. <sup>49</sup> Amala sälahilä, iligi dolö afädë Gaiafasa gäheo i amogi gobela ilo Busa Edefade nelo

amea sähalea, Dilida dofä asigi maade gabu. <sup>50</sup> Asiala nili sosogo neebe amo sulubadela nufideloead, afädëa udia dolö baagomolö amo bedefala baagomolö dofeada amo gabu, dilia made helësësalela säi. <sup>51</sup> Ado amoda Gaiafasaie asigiamu made säi. Eda gäheo i amogi gobela ilo Busa Edefade neada, Yesuea Yu udia dolö sulubadelaie baagola bedefamolö amoie bea säi. <sup>52</sup> Yesuea Yu ililemu baagomolöie made. Godeie malölali sege sulubadelagi fifi asi sefolalebe amoli neala gegeedolasila, afädëfali hamolasimäiege baagola bedefamolö amoie bea säla, säla negei. <sup>53</sup> Hä, segeyo amo gala mi gäwila, ilia Yesu nufulöie idi hogola didiäha dilo. <sup>54</sup> Amasebegi, Yesu e Yu ilile siigi ulufa made nowela, gaamugi amila awäla sege udia dolö aligilo made dibe amo ga madela, gaamu afädë Efalaimula sälo dibeami, ie bégëla aulolali awäla nelo.

<sup>55</sup> Yu ilile Baagila Asi Segeyo amo besela galamolö dibegi, udia dolö sege elö elölagi nelo amoli sulubadela Yalusalemu afiai. Godeie siigi nigime baai made namolöie hamolo mala dilo amo hamomolöie, Baagila Asi Segeyo made besela galala dibegi, afiai. <sup>56</sup> Ili afilahlilä, Yesu e hogosamu nelo. Godeie mosöamadi ami nefolalea hilidomu naba hogosalea, Dilia edo helësësa. Eda molö nülo segeyo edefade gedosebeawi made moholöledula naba hogosa dilo. <sup>57</sup> Dafidi gobela ilo busa nefolalo amoliage Felesi dolö nefolalo amoliage gelola sähalea, Afädëa Yesu neë beaseda, nihili nafodola moholöie säla ia misialola säla iäha maadei.

## 12

*Melia Yesuie emogi weli gafisigäi söga negei*  
(Madiu 26.6-13, Maga 14.3-9)

<sup>1</sup> Segeyo gafeia negesilahlilä, Baagila Asi Segeyo edefade amo hä, besela galamolö dibegi, Yesu e Bedani asi. Elasalusi, Yesuea baagoiala nowelasi amoda, Bedani gaamugi ami nelo. <sup>2</sup> Ili ami Yesu e obeägilasimolöie molö daiaha dilo. Madaeada molö mogesa nebegi, Elasalusi eda dolö Yesubalä molö naha sefolalo amolibalä sulo. <sup>3</sup> Amala sefolalebegi, Melia weli gafisigäi hido elöi muni edefade nii ödä i hasegi usi dilo amo gaula maala, Yesuie emodia söga negelahlilä, hile busa hilia hësa sulo. Weli amoda nadaeamu hamoi. Amala hamosebegi, weli gafisigäi amea mosö amo negegi dilo. <sup>4</sup> Amala hamosebegi, Yesuie bégëla aulo afädë, ie ëida Yudasa Isagaliada, hobeala ea Yesu hololömolö amea sähalea, <sup>5</sup> Weli gafisigäi hedabi gowea muni giwi siliba hädali ohodoa gadoi nealahilä, busadäoi nefolalebe amoligali iäla made, abisigi waeasesadula säi. <sup>6</sup> Eada busadäoi nefolalebe amoli helësëla säi made. Eda fa nelo nea amala säi. Ilile muni salelo adu amo ägüla nawesalea, ilia muni negesebe amogi ea odoa fa somodala nelo. <sup>7</sup> Amala säi amo nabalahlilä, Yesuea sähalea, Udia goea hamosebego hamomäia guilasimalo. Goda ea ne baagosegi baumulö amoie hamosamelë. <sup>8</sup> Busadäoi nefolalebe amolida segeyo sulubadelagi dilibalä namolömelë. Be, neda segeyo sulubadelagi dilibalä namolö mademelëla säi.

*Gobela ilo busa ilia Elasalusi nufudala baagomolöie didiäi*

<sup>9</sup> Yesu e Bedani neala helësëlahilä, Yu ili yafie e neebea ami afiai. Ili afiai amoda, Yesumu helësëla made, Elasalusi e, Yesuea baagoiala nowelasi amoge bimolö afiai. <sup>10</sup> Amase, gobela ilo busa nefolalo amolia didiähalea, Elasalusige nufidedelämelëla säla didiäi. <sup>11</sup> Mida, Yesuea Elasalusima hamoi amo helësëla, Yu ili yafiea gobela ilo busa amoli fisila awäla, oböla, Yesuma asigi afädë negei amogi.

*Yesu e gini gadoi hamola Yalusalame besela galai*  
(Madiu 21.1-11, Maga 11.1-11, Ulugu 19.28-40)

<sup>12</sup> Amo aiyu amogi, udia dolö yafie segeyo edefade amo bimolö Yalusalame mafula gegedoi amolia Yesu e hä, Yalusalame maahamelëla säi amo nabalahlilä, <sup>13</sup> waibo häu gadoi damula gagaula e idiafa gausiamolö afiai. Gausiala digalahilä obeägila uuala säsäla afiahalea,

Agua. Nesege.

Afädë Dafidilo Geloie äigila maasebego, Isilaleie Gini go, neala hedabolasiämäia.

Nilia ie ëi gauia adadi. Hosanala

säsäla afiai.

*Gë Udälo 118.25, 26*

<sup>14</sup> Yesu e sugua dögi üdili afädë beagolelahilä, e amodaia fila misi. Amoie Godeie bebagi säla dëdëla negei dibe amoda gowe.

<sup>15</sup> Saionioie idiwie, dia bedämabu. Die gini hä, sugua dögi üdilidaia fila maasebego bimalola säla dëdëla negei dialea.\*

*Aisaea 62.11, Segelaea 9.9*

\* **12:3:** Weli gafisigäi amoda hawa gadoi afädë ëi nadaie difia hamolo. \* **12:5:** Muni giwi silibala säi amoda dolö afädëa segeyo afädëgi hamoi hamola muni bidi nelo amo gadoi. Giligi adoeada *denalusalä* sälo. \* **12:15:** Saionioie idiwila säi amoda, Yalusalame udia dolö helësëla säi.

<sup>16</sup> Segeyo amo gala, ie bēgēla aulo amolia amo hamoi amoie mi fādāla helēsēi made nelo. Gaso, hobeala Yesu e baagola nowelahilā, fedala ie yo digalomadi sebegi, Godeie bebagi hi ēie amala sāla dēdēla negei dibe amoge, amase, ilia ema amo hamoi amoge, helēsēla obēgēi. <sup>17</sup> Dafidi Yesuea Elasalusi bauia amila welahilā, e baagoiala nowelasise melēlo amolia sāla daidosamu nelo. <sup>18</sup> Udia dolō gegedoi amolia ea dolōea hamomolōi made gadoi hamoimelēla sāi amo nabalahlilā, e idiafa gausiamolō afiai. <sup>19</sup> Amasebegi, Felesi ilia hilidomu didiāhalea, Nilia hamomolōi madego beasebele. Hā, udia dolōda sulubadela e bēgēla awāha maadesebego bimola sāla didiāha dilo.

*Giligi dolō odoaea Yesu bimolō misi*

<sup>20</sup> Udia dolō ilia segeyo edefade amogi Godeie ēi gauia adamolōie Yalusalame gegedoi amoligi Giligi odoa ilige maala sulo. <sup>21</sup> Amo gala Giligi ili Filibi neebee ami misi. Filibi eda Galiliie gaamu Bedesaida ami fii dolō. Iliā ema sāhalea, Dafidilo, nilia Yesu melēdelāla sāi. <sup>22</sup> Amala sāsebegi, Filibi e awāla Āduluma sāla ilahlilā, ele helegela awāla, Yesuma sāla ī. <sup>23</sup> Amo sāla īasebegi, Yesuea ilima sāla obēgēsālea, Dolōie Malō ēi sālo namolō amoda hā, besela galai gabuwe. <sup>24</sup> Na dilima dofā gelola sāhago. Widi gāgā afādē nagadaia dufigila digala made baagosedā, gāgā afādēfalimu diē bimolōmelē. Gaso, nagadaia dufigila digala baagosedā, amea gāgā yafie negemolōmelē. <sup>25</sup> Amaimo, afādēa hīle namolō amomu mi hamosa aligiseda, ie namolō amo hogosa helemolōmelē. Amase, afādēa nagadaiaivi nea, ie namolō amoma baagi īala fisiseda, namolō amo gaula nea namolōi namolōmelē. <sup>26</sup> Amaimo, afādēa nīe hamoi hamolasilo nea galēda, ea ne bēgēla moholō dialea. Ne neebee ami nīe hamoi hamolasiloge namolōmelē. Nīe hamoi hamolasiloda, Naadoea e ēi sālo namialamolōmelēla sāi.

*Iliā hā Dolōie Malō gauia adogomolō dialeala sāi*

<sup>27</sup> Yesuea aso, sāhamu neamu sāhalea, Walio nīe iso asigigi yōia idogola sāosāosebemelē. Amāi na edo sāmolōdu. Na gomalā sādule. Naado-o, nelebo walio nema hamomolō amo dia neadigimalo. Ai, amala made gabu. Ne wi misi amoie mida, amo gausiala digamāia misi nea. <sup>28</sup> Naado-o, dia diē ēi edelasimalola sāi.

Yesuea amala sāla wagaia gai amole, ado afādē Hebenila sāia idogosālea, Na nīe ēi edelasimelē. Amase, amo gadola wāla bu edelasimolōmelēla sāi. <sup>29</sup> Udia dolō amala sāse nabelo ami nefolalo amolia sāhalea, Gomoda sege gudusebegola sāi. Amase, odoaea sāhaleada, Selesaia fii afādēa ebalā adosebegola sāi. <sup>30</sup> Amala sāsebegi, Yesuea sāhalea, Ado walio sāi ameadā, ne ugila negemolōie sāi mademelē. Amoda dili ugila negemolōie sāasio. <sup>31</sup> Walioda, Godea nagadaia udia dolō nefolalebe amoli gudila mogemolōmelē. Ea aso, waliomu nagadaiaie busa neebee amoge haila digimolōmelē.\* <sup>32</sup> Iliā ne nagadaia nea gauia adogosedā, amo galada na udia dolō sulubadela nemadi dusugamolōmelēla sāi.\* <sup>33</sup> Yesuea ado amala sāi amoda, ema gomalā hamosegi baagosolō gabula ulufala olela amala sāi. <sup>34</sup> Amala sāsebegi, udia dolō amolia ema sāla obēgēsālea, Nilia Godeie Ado sāla negei dibe amogida gomalā sāi nabelo. Gelesoda namolōimu namolōmelēla sāi nabi. Gaso, dia sāhalea, Dolōie Malō gauia adogomolō dialeala sāi amoda abeahāladu. Amāi Dolōie Malōla sāsebegoda nowēla nabi. <sup>35</sup> Amala nabasebegi, Yesuea ilima sāla obēgēsālea, Fu holōfali dibewegida yo digalo e dilibalā namolōmelē. Dili gasimi sagaloea dabeloeada, yo digalo neebewe gaalu nawesa namialo. Dolō gasimi sagaia nawelo ameadā, idi gowegi awāhala helēsēla made nawelo nea. <sup>36</sup> Yo digaloie malō namolōie, yo digalo neebewegi wāla dilia yo digaloma asigi afādē negemalola sāi.

*Yu ili yafiea Yesuma asigi afādē made negei nelo*

Yesuea ado amo sāha maadelahlilā, udia dolōea e melēloea musūgā namolō asi. <sup>37</sup> Yesuea ilile sidaia dolōea hamomolōi made gadoi yafie hamosa nelo gaso, ilia ema asigi afādē made negei nelo. <sup>38</sup> Aisaeaea bea sāla negei amo gadola gausiala digamāiaie amala hamoi. Aisaeaea bea sāla negei amoda gowe. Dafidilo Geloī-e, nilia ado sāsebeweda nowēa dofā gabula helēsēidu. Amase, Dafidilo Geloīie geloi amoda nowēma oleidula

sāla dēdēla negei dialea.

*Aisaea 53.1*

<sup>39</sup> Iliā Yesuma asigi afādē negemolō uli nelo. Amoie mida, Aisaeaea ado elō sāla negei dibe amoda gowe.

<sup>40</sup> Iliā siia beala, asigia helēsēla besuseda, na ili wahilasiloa, Godea ilile si dofogalasila asigia galā digimelēla

\* **12:31:** Nagadaiaie busa neebela sāi amoda Saidani helēsēla sāi. \* **12:32:** Yesuea amala sāi amoda, dolō ilia e gauia adogola i fūgāigi baala negemolō amo helēsēla amala sāi. Ameamuda Godea e gauia adogolasisegi, e Hebeni fedalahilā ilibiafali ilibia namolōmelē. Filibiai 2.9-11 bimalo.

sála dëdëla negei dialea.

*Aisaea 6.10*

<sup>41</sup> Aisaeaea amala sai amoië mida, ea dafidi Gelesoië yo digalo hido elöi amo bealahilä, Gelesoië amala säimelë.

<sup>42</sup> Amala sai gaso, busa dolö nefolalo amoli yafiea Yesuma asigi afädë negei. Gasoda, Felesi ilia ili gedolo mosöa amila segea beselala fisiloea, ilia Felesi amoli helësëlahilä, asigi afädë negei amo ulufala made sai. <sup>43</sup> Mida, ilia dolöea ilile ëi gauia adamäiala helësëlo ameada, Godea ilile ëi gauia adamäiala helësëlo amoda baagi.

*Yesuea ado sai amea udia dolö mogemolömelëla sai*

<sup>44</sup> Yesuea gelola sähalea, Afädëa nema asigi afädë negei neebe ameada, nemamu made, ne misialala sälo neebe amomage asigi afädë negei nea. <sup>45</sup> Amase, afädëa ne bease ameada, ne misialala sälo neebe amoge beaha nea. <sup>46</sup> Afädëa nema asigi afädë negei neebe amo gasimi sagaia aligiloea, neda yo digalo nagadaiawi namolö misi. <sup>47</sup> Afädëa na ado säsebewa nabalahlilä gaso, bögëlo made neebe amoda, na e made mogemolömelë. Nada udia dolö sege sulubadelagi nefolalebe amoli mogemolö misi made. Nada ili sigi obögëmolö misimelë. <sup>48</sup> Be amai gaso, afädëa nema baagi iala, nie ado made nabaseda, amoië gudi mogelo afädë nea. Amoda segeyo aligila wagasolo amo gala, ado na säla iasebe wea wäla gudila mogemolömelë. <sup>49</sup> Mida, na nihile asigiamu säha mademelë. Ne misialala sälo Naadoea ado gowe sämalola säla imelë. <sup>50</sup> Hamomalalo ameada namolöi namolö amo ulufadigilola helësësamelë. Amala helësëlahilä, na ado säsebeweda, Naadoea nema sämalola sai amo gadolamu säha neawemelëla sai.

## **Yesuea ie bögëla aulo amolima, Dili digila ne Naado neebea obögëmolö gabumelëla sai**

### **13**

*(Yone 13-17)*

*Yesuea ie bögëla aulo amolile emo nigime hëi*

<sup>1</sup> Baagila Asi Segeyo amo hä, ga madesebegi, Yesuea asigia helësësalea, segewe digila ie Eedo nebea moholö amoda, ga madesebela helësësa nelo. Ea hile udia dolö nagadaia nefolalebe amoli boba hamosa nelolahilä, e baagosaleage boba hamoi amo wälasimu nea baagol.

<sup>2</sup> Hä deadifali, ili molö naha sefolalebegi, mugabe Saidania Saimonoie malö Yudasa Isagaliadaie asigigi Yesu hololömolö amo hä, helësëläsi. <sup>3</sup> Yesuea helësësalea, Eedoea nelebo sulubadela ie naabogimu gauseibegi, Gode neebeala misi amo, bu Gode neebea ami obögëmolö gabula helësësa nelo. <sup>4</sup> Amala helësëlahilä, Yesu e molö negela nulo auli mia ami nowela nea, ie fagulo daia gai amo gilahlilä, dawila neala bului. <sup>5</sup> Amalahilä, ea falodaia ödä söga negelahlilä, ie bögëla aulo amolile emo nigime hëla didigila awäla, dawila hi bului amoië bidia dogadigila digisa nelo. <sup>6</sup> Amala hëla didigila awäla, Saimono Fida sebeamadi maasebegi, ea sähalea, Dafidilo Gelo-i-e, dia nie emo nigime hësälela sai. <sup>7</sup> Amala säsebegi, Yesuea ema säla obögësälea, Na walio hamosebeweida, dia made helësësebege. Gaso, dia hobeala helësëmolömelëla sai. <sup>8</sup> Amala säsebegi, Fidaea ema sähalea, Dia nie emo nigime dofä made hëmolömelëla sai. Amala säsebegi, Yesuea ema säla obögësälea, Na di made hëseda, dida nebalä made dila namolögodala sai. <sup>9</sup> Amala säsebegi, Saimono Fidaea ema sähalea, Dafidilo Gelo-i-e, nie emomu made. Nie naabo busala hëmalola sai. <sup>10</sup> Amala säsebegi, Yesuea ema säla obögësälea, Dolö afädë nigime hësä maadei neebe amoda, emomu hëmolö dialea. Ie domalo sulubadela nigime made baai nea. Dilida hä, nigime made baai neamelë. Amai gaso, na dili sulubadela sähalea säha mademelëla sai. <sup>11</sup> Ea ili sulubadela nigime baai made nealada made sai amoië mida, eda dolö gowea hololömolö neala hi dawadigi nelo.

<sup>12</sup> Yesuea ilile emo nigime hësä maadelahlilä, ie fagulo gii amo bu salugala, hi suloa ami bu fila obögëlahilä salea ilima nabahalea, Na walio dilima hamosebeweida, dilia helësësebele. <sup>13</sup> Dilia nema sähalea, Säla Olelelodge, Dafidilo Geloilage, säsebe amoda dofä sähamelë. Amai, neda dofä amo neamelë. <sup>14</sup> Dilile Säla Olelelodge, Dafidilo Geloige nea, na dilile emo nigime hëläsisewe gadola, diliage dihilimu amala hamosa namolö dialea. <sup>15</sup> Na dilima hamola olelesewe gadola, hobeala diliage amo gadola hamomäia olelesamelë. <sup>16</sup> Na dilima dofä gelola sähago. Hamoi hamolasilo neebe ameada, ie busa neebe amo made baagilo. Amase, ado gaula aulo neebe ameada, e mosalalo amo made baagilomelë. <sup>17</sup> Hä, walio na olelei amo gadola helësëla hamosedä, dili obeägisa namolömelë.

<sup>18</sup> Na dili sulubadelama sähalea säha made. Dolö na memelei amolida nihä dawadigimelë. Gaso, Godeie bebägi ado säla dëdëla negei dibe amo gadola gausiala digamäiaie amala sähamelë. Ado säla dëdëla negei amoda gowe. Dolö nie molö naha filo amea, ne emesala egeimelëla säla dëdëla negei dialea. <sup>19</sup> Walio na dilima säla iasebeweda, made hamola

neebe amo gaalu sāla iahago. Hobeala na ado sāsebewe gadola hamola besela galaseda, amo bealahilā, Ne Nelo amo Neebela dawadigila, dilia nema asigi afādē negesa maademāia, sāla iahagomelē.\* <sup>20</sup> Na dilima dofā gelola sähago. Afādē na mosalosegi awāse amo neawela sigi aligise ameadā, nege neawela sigi aligisagomelē. Amase, ne neawela sigi aligise ameadā, ne misialala sālo amoge neawela sigi aligisagomelēla sāi.

*Yesuea diligi afādēa ne hololōmolōmelēla sāi*

*(Madiu 26.20-25, Maga 14.17-21, Ulugu 22.21-23)*

<sup>21</sup> Yesuea amala sālahilā, ie iso asigigi edefademalā yōi nea sāla ulufadigisalea, Na dilima dofā gelola sähago. Diligi afādēa ne hololōmolōmelēla sāi. <sup>22</sup> Amala sāi amo nabalahlilā, ie bēgēla aulo amolia gowema sāila dawa made ameadā, elōea elōma beala, elōea elōma bealai. <sup>23</sup> Bēgēla aulo amoligi Yesuea boba hamolo afādē Yesu hī e miafalī ami sulo. <sup>24</sup> Amoma Saimono Fidaea odagi nigila sähalea, Ea nowē helēsēla sähala dia nabuōla sāi. <sup>25</sup> Amalebe, bēgēla aulo amea, Yesuē bidagia golōgīa alogolahilā nabahalea, Dafidilo Geloie, nowēa amamolō gabula nabi. <sup>26</sup> Amala nabasebegi, Yesuea sāla obēgēsalea, Na wahalo dagaboi amo neala hēhei gobei ödāgi geagilahilā, afādēgali iaseda, amea amamolōmelēla sāi. Amala sālahilā, ea wahalo dagaboi amo geagilahilā, Saimono Isagaliadaie malō Yudasagali i. <sup>27</sup> Yudasaea wahalo amo nii amole, mugabe Saidani ema fedai. Amasebegi, Yesuea ema sähalea, Dia afādē hamomolō neebe amo hā, aabela hamomalola sāi. <sup>28</sup> Ami sefolalo amolia, Yesuea sāse amo nabi gasoda, mi goweie sāsebelā helēsēi made sefolalo. <sup>29</sup> Odoaea helēsēsaleda, Yudasaea muni adu āgūlo ameadā, molō nūlo segeyo edefade gedosebe amoe nelebo odoa bidia nea mosalahaledu, ma busadāoi nefolalebe amoligali, gui nelebo afādē ia mosalahaledula helēsēi. <sup>30</sup> Amalebe, Yudasa e wahalo geagi amo nealahilā, fodolofali doadigila asi. Amo gaalu hā, gasimi sagala gasi.

*Yesuea ilima mala gāhe sāla negei*

<sup>31</sup> Yudasa e doadigila asibua, Yesuea sähalea, Walioda hā, Dolōie Malō amōie ēi ilibia amo olesebemelē. Amase, ea hamosebe amea Godeie ēi ilibia amoge olesagomelē. <sup>32</sup> Amaimo, Malōea hamosebe amea Godeie ēi ilibia amo oleseda, Gode hī Dolōie Malō amōie ēi ilibia amoge walio wegi wāla olemolōmelē.

<sup>33</sup> Nie malōla dili-e, neda dilibalā holōbō ede made namolōmelē. Ne awāseada, dilia ne hogomolōmelē. Na Yu udia dolō nefolalebe amolima sāla i amo gadola wāla, walioge na dilima sāla iahago. Ne awāse amogida, dili moholōi mademelē. <sup>34</sup> Dilia hamomāia na dilima mala gāhe sāla negesebe amoda gowe. Dilia dihilimu boba hahamosa namialo. Na dili boba hamoi amo gadola, diliage dihilimu boba hahamosa namialo. <sup>35</sup> Dilia dihilimu boba hamose ameadā, udia dolō sulubadelaea dilida nie bēgēla aulo neala helēsēmolōmelēla sāi.

*Yesuea Fida dia ne dawa madela sāmōlōmelēla sāi*

*(Madiu 26.31-35, Maga 14.27-31, Ulugu 22.31-34)*

<sup>36</sup> Amala sāsebegi, Saimono Fidaea Yesuma nabahalea, Dafidilo Geloie, dida abidi moholō nea sähala nabi. Amala nabasebegi, Yesuea ema sāla obēgēsalea, Sege ne moholō amogida walio dia bēgēla moholōi mademelē. Hobeada dia bēgēla moholōmelēla sāi. <sup>37</sup> Amala sāsebegi, Fidaea ema sāla obēgēsalea, Dafidilo Geloie, edoea na walio di bēgēla moholōi madedu. Nie namolō amo digali fisiga gamolōi neamelēla sāi. <sup>38</sup> Amala sāsebegi, Yesuea sāla obēgēsalea, Die namolō amo dofā negali fisiga gamolōle. Na dima dofā gelola sähago. Haea gagalugo gawalia gāla made neēgi, nafi bu ohodoala dia ne dawa madela sāmōlōmelēla sāi.

## 14

*Yesuea Naado neebēa moholō idi, ne neawela sāi*

<sup>1</sup> Yesuea ado aso, sāhamu neamu sähalea, Dilia yōia idogola sāosōla namiabio. Godema asigi afādē negemalo. Amase, nemage asigi afādē negemalo. <sup>2</sup> Nie Naadoie mosōa hogoli yafie dialea. Amoli maade galebeda, na dilima made sālābio. Dili namolō sege amo daiamolōie, ne ami moholōmelē. <sup>3</sup> Awāla dili namolō sege amo daiala negesilahilā, sege ne namolōia ami dilige nebalā nihilīgila namolōie, na dili bu bea obēgēmolōmelē. <sup>4</sup> Ne moholō idi amoda dilia dawadigi nebegomelēla sāi. <sup>5</sup> Amala sāsebegi, Domasaēa ema nabahalea, Dafidilo Geloie, sege di moholō amoda nilia dawa made. Hā, di idi gowegi moholō neala nilia abilia helēsēmolōi gabula nabi. <sup>6</sup> Amala nabasebegi, Yesuea ema sāla obēgēsalea, Idige, ado dofāge, amase, namolōge, nihine neawe. Afādē Naado neebēa moholō, ne neebēa made maaseda, moholōi mademelē. <sup>7</sup> Dilia ne dawa galēda, Naadoge dawadigi. Giso, dilia walio mi gāwila, e bealahilā dawadigisagomelēla sāi. <sup>8</sup> Amala sāsebegi, Filibia ema sähalea, Dafidilo Geloie, Diado nilima olemo. Oleseda, nilia dofeala helēsēmolōmelēla sāi. <sup>9</sup> Amala sāsebegi,

\* 13:19: Yone 8.24gi dibe amo bimalo.

Yesuea ema sähalea, Filibi, segeyo sedade ne dilibalä nelo amo, dia aso, ne dawa made neale. Afädëa ne meli neebe ameadä Naadoge meli nea. Amala hamolo dibe amo, dia diado nilima olemola säi amoda, abeahäladu. <sup>10</sup> Ne Naadoma aligila, amase, Naadoge nema aligilala neebewegi, dia dofä gabula made helësësale. Na dilima ado säla iaha neebeweda, nie asigiamu säla iaha made. Naado e nema neebe amea ie hamoi amo hamosamelë. <sup>11</sup> Ne Naadoma aligila, amase, Naadoge nema aligilala neamelëla säsewe nabalahlilä, dofä gabula helësëmalo. Dofä gabula made helësësa galëda, hamoi hamosa neebewe beala dofä gabula helësëmalo.

<sup>12</sup> Na dilima dofä gelola sähago. Afädëa nema asigi afädë negei neebe amea na hamoi hamosa neebewe gadola hamomolömelë. Ne Naado neebe awäse ameadä, nema asigi afädë negei neebe amea na hamosa nelo amo baagila awäla, hamoi edefade hamomolömelë. <sup>13</sup> Malöea hamosebe amea Eedoie ëi gauia adamäia, dilia nie ëigi nea nelebo afädë ëdëgëseda, na hamomolömelë. <sup>14</sup> Dilia nie ëigi nea nelebo sulubadela ëdëgëseda, na hamomolömelëla säi.

#### *Yesuea Eleloi Gesami moholömelëla säi*

<sup>15</sup> Yesuea ado aso, sähamu neamu sähalea, Dilia ne boba hamoi nea galëda, na hamomalola säsebewe gadola bëgëla hamosa namolömelë. <sup>16</sup> Dili Ugila Negela Gelolasilo elö, na Naadoma nabulömelë. Eada diligali imolömelë. E maalahlilä, dilibalä namolöi namolömelë. <sup>17</sup> Ugila Negela Gelolasilo amoda dofä sälo Gesamimelë. Nagadaia udia dolöea e made melëlo, dawa made amea, e nimolöi mademelë. Gasoda, e dilibalä neebe ameege, amase, dilima nogila digala namolö ameege, dilia e dawadigimelë.

<sup>18</sup> Na dili guluba gadoi namiäia digila moholö mademelë. Neda dili neebea obëgëmolömelë. <sup>19</sup> Holöfali nelolahilä, nagadaia udia dolöea ne made bimolö. Gaso, diliamu bimolömelë. Ne neebe ameadä, dilige namolömelë. <sup>20</sup> Ne Naadoma neebe amoge, dili nema neebe amoge, amase, ne dilima neebe amoge, segeyo amo gala dilia dawadigisa maademolömelë. <sup>21</sup> Afädëa na hamomalola säsebe amo nealahilä, bëgëla hamosa neebe ameadä, ne boba hamoi nea. Afädëa ne boba hamoi neebe amoda, Naadoeage e boba hamoi namolömelë. Amase, nage e boba hamolahilä, nihine ema ulufala olemolömelëla säi.

<sup>22</sup> Amala säi amo nabalahlilä, Isagaliada made, Yudasa elöea ema nabahalea, Dafidilo Geloie, nilimada di ulufala olesalea, oböla, nagadaia udia dolö nefolalebe amolimada, di made ulufala olemolömelëla säi amoda, mi edoïela nabi. <sup>23</sup> Amala nabasebegi, Yesuea ema säla obëgësalea, Afädëa ne boba hamoi neebe ameadä, nie ado bëgëla hamosa namolömelë. Naadoea e boba hamoi nea, e neebea ami Naado alï haligila maalahlilä, ebalä aligimolömelë. <sup>24</sup> Afädëa ne boba made hamoi neebe ameadä, nie ado bëgëla made hamomolömelë. Dilia ado nabaha nebegoda, nie ado made. Naado ne digamalala sälo amoïe adomelë.

<sup>25</sup> Ne made awäla, dilibalä neada, ado amo na dilima säla iaha nelo amomelë. <sup>26</sup> Gasoda, dili Ugila Negela Gelolasilo, Eleloi Gesami Naadoea nie ëigila fisiga wemolö amo maalahlilä, ea dilima nelebo sulubadela olelesa maademolömelë. Na dilima säla iaha nelo amo sulubadela, ea dilima helësëlasimolömelë.

<sup>27</sup> Na dalulasilo dilibalä diamäia dilima iahagomelë. Nie dalulasilo amo diligali iahago. Na iase amoda, nagadaia udia dolöea ilo amo gadoi iaha mademelë. Hä, dilia yöia idogola säosäolage, bedälage namiabio. <sup>28</sup> Na dilima sähalea, Ne awälahlilä, dili neebea bu obëgëmolömelëla säi amoda dilia nabi amomelë. Amo nabala nema boba hamoi galebada, ne Naado neebea awäsewégi dilia obeägilabio. Mida, Naado eda ne baagila, edefademalä nea. <sup>29</sup> Nelebo amo made besela galala neebe amo gaalu, na dilima säla iaha nelo amomelë. Säla i amo gadola hamose beaseda, dilia asigi afädë negemäiaiemelë.

<sup>30</sup> Na dilibalä ado sedade säha namolö made gabumelë. Mida, nagadaiaie busa neebe amo moholö ga made dialea. Ea nema nelebo afädë hamomolö made bimolömelë. <sup>31</sup> Gasoda, nagadaia udia dolöea na nie Naadoma boba hamoi neebe amo helësëmäia, na Naadoea hamomalola säse amo gadolamu hamolomelë.

Hä, nowemo. Afiadila säi.

## 15

#### *Yesuea i gägä negelo gelebi ëfë dofäda nihine neamelëla säi*

<sup>1</sup> Yesuea ado aso, sähamu neamu sähalea, I gägä negelo gelebi ëfë dofäda nihine neawe. Amase, gelebi sagai sigi aligiloda Naado neamelë. <sup>2</sup> Nema adomo dila neebe amogi, afädë gägä made negelo neebe amoda, Naadoea damula fisilomelë. Adomo elö gägä negelo neebe amoda, gägä yafie negemäia, Naadoea dagabola digila hahamogisa aligilo nea. <sup>3</sup> Na dilima ado säla i ameadä, dili nigime hësa maadei nefolaleagomelë. <sup>4</sup> Dilia nema dila namialo. Nage dilima dila namolömelë. Adomo afädëa i gelebi ëfë mima dila made hido nea, gägä negelo made amo gadola, dilia nema dila made aligiseda, gägä negemolöi mademelë. <sup>5</sup> I

gägä negelo gelebi efēda ne neawe. Dilida adomo gadoi nebeگو. Afādēa nema dila, amase, nage ema dilala aligiseda, eada gägä yafie negemolōmelē. Dilia ne fisila dihilidomu nea, nelebo afādē hamomolōi made nebeگو. <sup>6</sup> Afādēa nema dila made aligiseda, eda i adomo dagala fisisegi bausolo amo gadoi nea. Adomo dagala digai bausoi diēgi, ilia gafedelahlilā, nulo wisebea ami sadia idogola gobemolōmelē.

<sup>7</sup> Dilia nema dila, amase, nīe adoeage dilima dilala nea, dilia hamesebe amo gadoi ēdēgēseda, ēdēgēse amo gadoi diligali imolōmelē. <sup>8</sup> Dilida ne bēgēla aulo nea, gägä yafie negeseda, Naadoie ēi gauia adogomolōmelē.

<sup>9</sup> Naadoea ne boba hamose amo gadola, nage amo gadola wāla dili boba hamosa nelomelē. Nīe boba hamolo amogida dili namialo. <sup>10</sup> Na nīe Naadoea hamomalola sāse amo bēgēla hamosa nea, īe boba hamolo amogi ne neebewe gadola, dilia na hamomalola sāse amo bēgēla hamosa aligiseda, nīe boba hamolo amogi dilige namolōmelē. <sup>11</sup> Na helēsēsaleada, nīe obeāgilo dilima negemāiage, amase, dilile obeāgilo dilile isogi nobamāiage, na dilima ado sāla īaha neawemelē. <sup>12</sup> Na dilia hamomāia sāsebe amoda gowemelē. Na dili boba hamoi amo gadola, diliage dihilimu boba hahamosa namialo. <sup>13</sup> Afādēa īe damelēgali īe namolō amo fisiga gaseda, ea īe damelē boba hamose ameada, boba hamolo sulubadela baagila aulomelē. <sup>14</sup> Na dilima hamomalola sāse amo gadola hamoseda, dilida ne damelēmelē. <sup>15</sup> Na walio dili hamoi hamolasilo neala sāhalea sāha hama. Hamoi hamolasilo neebe ameada, īe busa neebe amea abodo gadoi hamosadula dawa made aligilo. Gaso, na dilima damelēla sāha. Mida, Naadoea sāse nabi amo sulubadela na dilia helēsēmāia sāla īaha maadei amomelē. <sup>16</sup> Dilia ne memelei made. Na dili memelela, dilia awāla gägä yafie negemāia nafolala memelasimelē. Amase, dilia gägä negela diamolō diamiāia hamogilasimelē. Amala hamoi nea, dilia nīe ēigi Naadoma nelebo afādē ēdēgēseda, ea īaha maademolōmelē. <sup>17</sup> Amaimo, na dilia hamomāia sāsebe amoda gowe. Dilia dihilimu boba hahamosa namialola sāi.

*Nagadaia udia dolōea īe bēgēla aulo nefolalo amolima bimolō habobamolōmelēla sāi*

<sup>18</sup> Yesuea ado aso, sāhamu neamu sāhalea, Nagadaia udia dolōea dilima bimolō habobaseda, dafidi nemadale bimolō habobai nelo amo helēsēmalo. <sup>19</sup> Dilige nagadaia udia dolō amoli gadoi nelo galebeda, nagadaia udia dolō nefolalebe amolia, ili sosogo nefolalebe amolibalā boba hamolo amo gadola, dilibalāge boba hamola aligilabiomelē. Amai gaso, dili nagadaia udia dolō nebeigi na besela neala memelelasi. Ameada, dili nagadaiaie made nefolalebe goeada, nagadaia udia dolō nefolalebe amolia, dilima bimolō habobasebemelē. <sup>20</sup> Na dilima ado sāla ī amo helēsēla obēgēmalo. Hamoi hamolasilo neebe ameada īe busa neebe amo made baagilo. Ili ne neala sēlasi ameada, dilige neala sēlasimolōmelē. Ili nīe ado bēgēla hamoseda, amase, dilile adoge bēgēla hamomolōmelē. <sup>21</sup> Amolia dilima hamomolōmelēla sāi amo sulubadelada, dili nīe ēigi neebe ameage, amase, ne misialala sālo neebe amo dawa made nefolalebe ameage, amala hamomolōmelēla sāla ī amomelē. <sup>22</sup> Na ilima ado mala sāla imolō made misi galebeda, ilia nafade hamosala helēsēla made hamosa aligilabio. Gaso, walio ilia, nīli dawa made nea hamoimelēla sāmolō uli bimolōmelē. <sup>23</sup> Nema bimolō habobaha neebe ameada, Naadomage bimolō habobaha nea. <sup>24</sup> Amaimo, ne ili adebawī nea, afādēa siiba hamolo made gadoi hamosa nelo amo ilia bimāia, made hamosa nelo galebeda, ilia nafade hamosala helēsēla made hamosa aligilabio. Be, na hamoi amo ilia bealahilā gaso, nemage Naadomage bimolō habobaha neagomelē. <sup>25</sup> Ili amala hamoi amoīe, ilile Ado sāla negei dibe amogi, sāla dēdēla negei dibe amoda gowe. Habobamolō mi madegi, memalā ilia nema bimolō habobaimelēla, sāla dēdēla negei dibe amo gadola gausiala digamāiaie amai.

<sup>26</sup> Dili Ugila Negela Gelolasilo, Naadobalā neebe amoda, na e dilima fisiga idamolōmelē. Eda dofā sālo Gesami, Naado neebeala moholōmelē. E maalahilāda, ne ulufala sāla īaha namolōmelē. <sup>27</sup> Amase, mi gāwīafalī amila dili nebalāmu nelo ameada, diliage ne ulufala sāla imolō galeamelēla Yesuea sāi.

## 16

<sup>1</sup> Dilia asigi afādē negei nebeگو digīla made mosāia, na dilima ado we sāla īahawemelē. <sup>2</sup> Ili dili gedolo mosōa amila seega beselala fisimolōmelē. Amase, segeyo afādē besela galamolō amogi, afādēa dili nufudahalea, eada Godeīe hamoi hamolasisala helēsēla, dili nufolōmelē. <sup>3</sup> Ili Naadoge nege dawa made amea, amala hamomolōmelē. <sup>4</sup> Amala hamomolōmelēla sāsebewe hamoseda, sāi amo gadola hamosa gabula helēsēmāia sāla īahagomelēla sāla ī.

*Yesuea Eleloi Gesamia hamoi hamomolō amoīe sāi*

Yesuea ado aso, sāhamu neamu sāhalea, Nelebo amala hamomolōmelēla, na dafidi mi gāwīa amila made sāla īala nelo amoda, ne dilibalā nelo amea, made sāla īala nelomelē. <sup>5</sup> Amai gaso, walioda, ne misialala sālo amo neebea moholō neamelē. Amai, nema



diligi afädëa di abododi moholö neala made nabasebego. <sup>6</sup> Amala säsewegida, oböla dilile asigigi edefademalä bobailösebego. <sup>7</sup> Bobailösa gaso, na dilima dofä säla iahago. Ne moholö ameada, dili ugila negesalea ne moholö neamelë. Na dili digila moholö made galebeda, Ugila Negela Gelolasilo amo dilibalä namolö made maalabiomelë. Ne awäседа, e dili neebee digamalomömelë. <sup>8</sup> E maalihilä, nagadaia udia dolöma nafadeda gowe gadoimelëlage, mala mogoida gowe gadoimelëlage, amase, Godea gomalä mogemömelëlage ea fädäla säla imolömelë. <sup>9</sup> Iliä nema asigi afädë made negei neebee ameada, nafadeda gowe gadoimelëla fädäla säla imolömelë. <sup>10</sup> Ne Naado neebee awäседа, dilia ne bu elö made bimolö ameada, mala mogoida gowe gadoimelëla fädäla säla imolömelë.\* <sup>11</sup> Sege sulubadelagi nefolalebe amolile beaha aligilo neebee amobaläda, Godea gudila mogei neebee ameada, Godea gomalä mogemömelëla fädäla säla imolömelë.\*

<sup>12</sup> Na dilima ado sämolö yafie gaulea gaso, dilia waliomu neala gaumulöi made gabu. <sup>13</sup> Amai gasoda, dofä sälo Gesami e maaseda, ea dilile asigi neala mogolasila, ado dofä amo sulubadela helësäläsa maademolömelë. Ea hile asigia säla imolö mademelë. Ea säse nabase amomu säla imolömelë. Amase, nelebo hobeala hamomolö amoië fädäla säla imolömelë. <sup>14</sup> Ea nie ado gaula maala, dilima säla imolömelë. Amala hamose ameada, nie ëige, nie geloiige gauia adogomolömelë. <sup>15</sup> Nelebo hulu sulubadela Naadoie dibe amoda, nie dialea. Amala dibe ameana na sähaleada, Nie dibe amo Gesamia gaula maalihilä, dilima säla imolömelëla säla i amomelëla säi.

*Yöi dibeä amila hobeala obeägimolöla säi*

<sup>16</sup> Yesuea ado aso, sähamu neamu sähalea, Segeyo ede made nelolahilä, dilia ne made bimolömelë. Oböla, segeyo ede made nelolahilä, hobeala bu bimolömelëla säi. <sup>17</sup> Amala säi amo nabalahlilä, ie bëgëla aulo odoaea hilidomu didiähalea, Ea nilima säsebe amoda edodu. Ea ede made nelolahilä dilia ne made bimolömelëla säi amoge, ede made nelolahilä, dilia hobeala bu bimolömelëla säi amoge, amase, ne Naado neebee moholö ameala säi amoge, ea edo helësëla säidu. <sup>18</sup> Aso, sähalea, Ea ede made nelolahiläla säi amoda, edo helësëla säidu. Amoië mida, nilia made helësësebela säla didiäha dilo. <sup>19</sup> Iliä Yesu ema naba obëgëdeläla helësësebe amo hë dawadigilahilä, ea ilima sähalea, Dihilimu ado na säi amoië mi hogola didiäha dibegoda, na sähalea, Ede made nelolahilä dilia ne made bimolömelëla säi amogige, amase, ede made nelolahilä hobeala ne bu bimolömelëla säi amogige mi hogola didiäha dialeale. <sup>20</sup> Na dilima dofä gelola sähago. Dilida didigaola diisa neëgi, udia dolö nagadaia mala hamolo amolida obeägisa namolömelë. Dilida yöi edefade namolömelë. Oböla hobealada, dili yöi nelo amo bu obeägilo bedefamolömelë. <sup>21</sup> Udiaea malö ägümolö salea sämolö fu besela galase gaaluda, asigi säosa filo. Gaso, ea hä malö ägüla maala saleada, dafidi sei amo elabolahlilä, ea hä, nagadaiaawi malö ägüi amogi obeägilo. <sup>22</sup> Amo gadola wäla, walioda hä dili yösa nefolalea. Hobeala na dili bu beasolo amo galada, dilile iso asigigi obeägimolömelë. Dilia obeägimolö amoda afädëa neala hogosa helemolöi made bimolömelë. <sup>23</sup> Segeyo amogida, dilia nema afädë made nabolömelë. Na dilima dofä gelola sähago. Dilia nie ëigila Naadoma nelebo afädë ëdëgësedä, ea nabala imolömelë. <sup>24</sup> Dafidi dilia nie ëigila nelebo afädë ëdëgëla made nelo gasoda, ëdëgëmalö. Obeägilo dilima nobamäiaie, nelebo afädë ëdëgësedä, dilia gaula namolömelëla säi.

*Yesuea nagadaia galu sulubadela nufuda salalahilä, baagila asi neawemelëla säi*

<sup>25</sup> Yesuea ado aso, sähamu neamu sähalea, Na dilima säla iaha nelo amoda, ado besulamü säla iaha nelomelë. Hobeala segeyo afädë besela galasegida, na dilima ado besula made, Naado gowe gadoi neamelëla säla ulufadigimolömelë. <sup>26</sup> Segeyo amo gala neada, dilia nie ëigila Naadoma ëdëgëmolömelë. Na Naadoma dilile säsimolömelëla säha mademelë. <sup>27</sup> Naadoea dili boba hamosa neamelë. Mida, dilia ne boba hamola, ne dofä Gode neebeala misi gabula helësëi neebee gogi. <sup>28</sup> Naado neebeala maala nagadaiaawi digala neawe. Oböla walioda, sege we digila Naado neebee bu obëgësamelëla säi.

<sup>29</sup> Amala säi amo nabalahlilä, ie bëgëla aulo amolia sähalea, Agua, dia besula made säla, dofä ulufadigila säsebego. <sup>30</sup> Nilia walio helësësalea, diada nelebo sulubadela dawadigisa maadei ameada, afädëa dima nabulöi madela helësësawemelë. Ameada, nilia dida dofä Gode neebeala misi gabula helësësa neamelëla säi.

<sup>31</sup> Yesuea ilima säla obëgësalea, Walioda dilia asigi afädë negei neago gaso, <sup>32</sup> nabuö. Segeyo afädë besela galamolö amoda, hä, besela galahagomelë. Amo gala dili sulubadela

\* **16:10:** Nagadaia udia dolö ilia Yesubälä gudilahilä sähalea, Ea mala mogoi made hamoi ameada, eda nufudala baagomolö dialeala säi. Amala säi gasoda, Godea Yesu neala nowela ifosisebegi, e ebalä samolö fedai. Ameada, Godea udia dolöma Yesuea mala mogoi hamoimelëla ulufala olei dialea. \* **16:11:** Nagadaia udia dolö amolia Yesu baagose amo bealahilä, Yesu eda hä gudi digai gabula helësëi. Gaso, Godeie siia Yesu eda gudi digai made. Yesu e baagoi ameada, Godea mugabe Saidanibalä gudilahilä, ie geloi amo haila fisi.

dusudasila sege dihili nelo ami afufula, ne nihidofali digila fisala dusudasila afiaha maademolomelē. Amamolō gaso, ne nihido made, Naado haligila neamelē. <sup>33</sup> Na dilima ado amo sāla iaha nelo amoda, dilia nema dilahlilā dalulo gaula namiāiaie, sāla iaha neawemelē. Nagadaiawi neada, dili yōi bimolōmelē. Gaso, asigi gelomalo. Na nagadaia galu sulubadelabalā nudula salolela baagila asi neawemelēla sāi.

## 17

### *Yesuea iē bēgēla aulo amoli helēsēla Eedoma adolasi*

<sup>1</sup> Yesuea iē bēgēla aulo amolima ado amoli sāla iaha maadelahlilā, selesaia mosōa sida adogola nea sāhalea, Naado-o, segeyo amoda hā, besela galai gabuwe. Die malōea die ēi ilibia amo olemāiaie, dia malōie ēi ilibia amo olemalo. <sup>2</sup> Mida, dia udia dolō ema ī amoligali, ea namolōi namolō imāiaie, ea udia dolō sulubadelaiē busa namiāia, dia egali geli ī gabumelē. <sup>3</sup> Namolōi namolō amoda gowe gadoi. Gode dofāda dimu neebela helēsēlo, amase, Yesu Geleso dia fisiga wei gabula helēsēlo amomelē.

<sup>4</sup> Hamoi dia hamomalola sāla ī amoda na hā, hamosa maadeimelē. Amala hamosa nelo ameada, ne nagadaiawi nea, die ēi ilibia amo ilima oleimelē. <sup>5</sup> Naado-o, siiba naga fōi we made hamola ne dibalā nea, nīe ēi ilibia nelo amo gadola, die siigi ēi ilibia nelo amo bu imalo.

<sup>6</sup> Nagadaiawi nelo dolō odoa, dia nema ī amolima die ēi olesa nelomelē. Die nelo amoli dia nema iasio. Iliā die ado nabala dia sāi amo bēgēla hamoimelē. <sup>7</sup> Nelebo sulubadela dia nema ī amoda, dimadila misi gabula ilia hā, helēsēsa maadei neamelē. <sup>8</sup> Mida, dia nema ado sāla ī amolida, na ilima sāla iaha maadesebegi, ilia hā, niimelē. Nealahilā, ne dofā di neebela misi gabula helēsēsa maadei nea. Amase, dia ne dofā fisiga wei gabula helēsēsa maadei neamelē.

<sup>9</sup> Na ili helēsēla dima adolasisawe gasoda, nagadaia udia dolō sulubadela helēsēla adolasisa mademelē. Na adolasisebeweda dia negali ī amolimu helēsēla adolasisamelē. Amoiē mida, ilida die neebe amoiē. <sup>10</sup> Udia dolō nīe neebe amoli sulubadelada die neamelē. Amase, die neebe amoli sulubadelada nīe nea. Iliā mala hamosebe amea, nīe ēi ilibia amo olesebemelē.

<sup>11</sup> Hā, walioda ne di neebēa moholō neawe. Neda nagadaiawi made namolō. Ilimu wi namolōmelē. Naado Hedabi Eleloifali-ē, ali afādēdi neebewe gadola, ilige afādēdi namiāia, dia die ēi nema ī amoiē geloia ili sigi namialo. <sup>12</sup> Ne ilibalā nelo amogida, die ēi nema ī amoiē geloia ili sigi nelomelē. Na ili sigi nebegida, afādē dabadiği mademelē. Be, dolō afādē dabadiğimolō nelo amomuda hā, dabadiğimelē. Amala hamoi amoda ado Godeiē bebāgi dēdēla negei dibe amo gadola gausiala digamāia. <sup>13</sup> Walioda hā, ne di neebēa maahago. Gaso, nīe obeāğilo ilile isogi nobamāia, ne nagadaiawi nea dima adolasisamelē.

<sup>14</sup> Na ilima die ado sāla iaha nebegi, nagadaia malamū hamolo neebe amolia ilima bimolō habobaha nelomelē. Mida, ne nagadaia sosogo made neebe amo gadola, ilige nagadaia sosogo made neebe amea. <sup>15</sup> Na dima adosebe amoda, nagadaiawila dia ili sigi mosāia made adosamelē. Nafade hamolo busaea ili neala nafadelasiloēa, dia sigi namiāiaie adosamelē. <sup>16</sup> Ne nagadaia sosogo made neebe amo gadola, ilige nagadaia sosogo made nea. <sup>17</sup> Die adoda dofā sālo dialea. Ili nafolala dihile namiāia, dofā sālo ado amea, dia ilile isogi hamoi hamolasimalola sāhago. <sup>18</sup> Dia nema nagadaiawi udia dolō nefolalebe welibalā namiāia fisiga wei amo gadola, nage ili udia dolō nefolalebea ami afufumalaimelē. <sup>19</sup> Na ili helēsēla, ili dihilefali dofā nafolala namiāiaie, nege dima odala iala neawe.

<sup>20</sup> Dima dolō amolimu helēsēla adolasisa mademelē. Iliā ado sāla iase amo nabala, nema asigi afādē negemolō amolilege gedola adolasisagomelē. <sup>21</sup> Nada ili afādēdi namiāiala helēsēla adolasisago. Naado-o, di nema neebe amo gadolage, amase, dima ne neebe amo gadolage, ilida alima namiāiala hamesa. Nagadaiawi udia dolō nefolalebe amolia, dia ne dofā fisiga wei gabula helēsēmāiaie amala adolasisago. <sup>22</sup> Ali afādēdi neebe amo gadola, ilige afādēdi namiāia, dia nema geloile, ēi ilibiale ī amo, na iligali imelē. <sup>23</sup> Ne ilima neebe ameage, amase, di nema neebe ameage, ili dofā afādēdi namiāiaie. Amoiē mida, nagadaiawi udia dolō nefolalebe amolia dia ne fisiga wei gabula helēsēmāiaie, amase, dia ne boba hamose go gadola, ilige boba hamoi gabula helēsēmāiaiemelē.

<sup>24</sup> Naado-o, dia udia dolō nema ī amoli ne namolōia ami ili nihiligila namiāiaie, amase, nīe ēi ilibiale, yo digalole dia nema ī amo bimāiaie hamesamelē. Naga fōi made hamola nea, dia ne edefademalā boba hamosa nelo amea, ēi ilibia amoge, yo digalo amoge imelē. <sup>25</sup> Mogoi neebe Naado-o, nagadaia sosogo nefolalebe amoliada di dawa made gaso, nada di dawadiğimelē. Amase, ne sosogo nefolalebe ilia dia ne fisiga wei gabula dawadiğisa maadeimelē. <sup>26</sup> Na ilima die ēi ulufalasi. Dia ne boba hamoi amo gadola, boba hamolo amo

ilima diamiäiage, amase, nihine ilima namiäiage, die ei, hä, ulufalasisa namolömelëla adola wagai.

## Yesuea yöi gaula së naala baagola nowei

### 18

(Yone 18-20)

*Yudasaea Yesu hololöi*

(Madiu 26.47-56, Maga 14.43-50, Ulugu 22.47-53)

<sup>1</sup> Yesuea Godema adosa maadelahilä, ie bégëla aulo amolalibalä segea doadigila awäla ödä Gidolono dëgëla alömodi asi. Sagai afädë dibeä ami ie bégëla aulo amolali awäla besela galai. <sup>2</sup> Sagaia amida dafidi Yesuea ie bégëla aulo amolibalä segeyo yafiegi ami gedosa aligilo. Amala gedolo ameada, Yudasa e hololölo amea dawadigi nelo. <sup>3</sup> Amäi ameada, Olomo ami dolö odoage, Godeie mosö idihë aligilo odoage, Felesi dolö odoaeage gobela ilo busa amoliage mosalosebegi, ilia gele gamalige gaula, amase, nufidelo neleboge gagaulahilä, sagaia ami Yudasaea ili sigi asi. <sup>4</sup> Maasebegi, Yesuea ema hamomolö amo sulubadela hü dawadigilahilä, doadigila awäla ilima nabahalea, Dilia nowë hogola mofailla nabi. <sup>5</sup> Amala nabasebegi, ilia ema säla obëgësalea, Niliäda Nasalese dolö Yesu hogola misila säi. Amalebe, Yesuea ilima säla obëgësalea, Amoda nemelëla säi. E hololölo Yudasa amoge ilibalä misi nelo. <sup>6</sup> Yesuea, amoda nemelëla säi amo nabalahilä, ili badadi gasia imomogola nagadaia fila didigafui. <sup>7</sup> Amasebegi, Yesuea ilima bu nabahalea, Dilia nowë hogola mofailla nabi. Amalebe ilia sähalea, Niliäda Nasalese dolö Yesu hogola misila säi. <sup>8</sup> Amala säsebegi, Yesuea säla obëgësalea, Na dilima dafidi säla i amo, amoda nemelë. Dilia ne hogosa galëda, dolö nefolalebe gowe ili mosäia fu imola säi. <sup>9</sup> Dafidi hü sähalea, Naado-o, dia dolö negali i gowe ili afädë made dabadigila säi amo gadola gausiala neawelahlilä, gobela ilo Busa Edefadeie hamoi hamolasilo amo nufi. Nufudasebegi, gëhe dafädimadi amo dagala salisi. Hamoi hamolasilo amoie ëida Malagusi. <sup>11</sup> Amala hamosebegi, Yesuea Fidama sähalea, Dia helebego dihi salelo amogi sala obëgëmo. Dia helësäsaleada, Naadoea ödä iigi usi i gowe na made molö gabula helësäsalela säi.

*Ilia Yesu Anasa neebeeä sigi asi*

<sup>12</sup> Amalebegi, ami dolö amoliage, ilile beaha aligilo busaeage, amase, Yu ilile idihë aligilo amolaliage, Yesu gaulahlilä ëfëa nafodoi. <sup>13</sup> Amalahilä, ilia e Anasa neebeeäde sigi asi. Anasa eda Gaiafasaie esöa nelo. Gäheo i amogida, Gaiafasa eda gobela ilo Busa Edefade nelo. <sup>14</sup> Dolö ameada Yu ilima dafidi sähalea, Afädëa udia dolö baagomolö amo bedefala baagomolö dofea gabumelëla säi.

*Fidaea Yesu dawa madela säi*

(Madiu 26.69-70, Maga 14.66-68, Ulugu 22.55-57)

<sup>15</sup> Saimono Fidage bégëla aulo elöge Yesu awäse amo gadola bégëla hobeala asi. Bégëla aulo elö amoda gobela ilo Busa Edefade amea dawadigi nelo. Ameada, e Yesubalä gobela ilo Busa Edefade amoie yala isogi nogila digai <sup>16</sup> gaso, Fida eda yala idi galo baagido nelo. Amala nebegi, bégëla aulo elö, gobela ilo Busa Edefade dawadigi amea udia dolisä idi galo beaha aligilo amoma sälahilä, ea Fida yala isogi sigi digai. <sup>17</sup> Sigi digasebegi, udia dolisä idi galo beaha aligilo amea Fidama nabahalea, Dige dolö goweie bégëla auloletdula nabi. Amala nabasebegi, ea säla obëgësalea, Ne mademelëla säi. <sup>18</sup> Gögisebegi, hamoi hamolasilofulo, idihë aligilofulo amolia nulo gobelahlilä, gögi hausa nefolalebeä ami, Fida eege ilibalä ami gögi hausa nelo.

*Gobela ilo Busa Edefade amea Yesubalä gudi nabi*

(Madiu 26.59-66, Maga 14.55-64, Ulugu 22.66-71)

<sup>19</sup> Amo gala, gobela ilo Busa Edefade amea Yesuma ie bégëla aulo amolilege, ea ado säla olelei amoiege nabi. <sup>20</sup> Amala nabasebegi, Yesuea säla obëgësalea, Nada udia dolö nefolalebe amoli sulubadelama ulufala säla olelesa nelo. Segeyo sulubadelagi gedolo mosöage, Godeie mosöage, sege Yu ili gedosia ami olelesaleada, afädë musügä negela made olelesa nelomelë. <sup>21</sup> Edoie dia nema nabaha. Na mala säla iäse nabelo amolima nabualo. Na säi amo ilia dawadigi neagomelëla säi. <sup>22</sup> Yesuea amala säsebegi, idihë aligilo dolö afädë ga made nelo amea nabalahilä, Yesu e naabo gafea nufudalahilä nabahalea, Dia gobela ilo Busa Edefade egowe gadoima egomalä säla obëgëmolöi gabulela nabi. <sup>23</sup> Amala nabasebegi, Yesuea säla obëgësalea, Na nafade säi galëda, gowe asiala säimelëla nefolalebe gowe ilia nabuäia fädäla sämalö. Be, na mogola säi amogi galëda, dia ne edogi nufudahala nabi. <sup>24</sup> Amalebe, Anasaea Yesu e gobela ilo Busa Edefade Gaiafasa neebeeä sigi mosalola säsebegi, Yesu e ëfëa nafodoi amola wäla sigi asi.

*Fidaea Bu elö Yesu dawa madela säi**(Madiu 26.71-75, Maga 14.69-72, Ulugu 22.58-62)*

<sup>25</sup> Saimono Fida e nulo gobeia ami gögi hausa nebegi, ilia ema nabahalea, Dige ie bëgëla aulolledula nabi. Amala nabasebegi, ea säla obëgësalea, Ai. Ne mademelëla säi. <sup>26</sup> Amala säsebegi, gobela ilo Busa Edefade amoie hamoi hamolasilo afädë ami nelo amoda, dafidi Fidaea gëhe dagala sali amoie sosogo nelo, amea Fidama sähalea, Sagaia ami ebalä neebe na meli amoda di madelela nabi. <sup>27</sup> Amala nabasebegi, Fidaea bu elö sähalea, Ai. Ne mademelëla säi. Amala säia gai amole, haea gagalugo gawalia gäi.

*Ilia Yesu e Bailadi neebaa sigi asi**(Madiu 27.1-2, 27.11-14, Maga 15.1-5, Ulugu 23.1-5)*

<sup>28</sup> Amala hamolahilä, ilia Yesu e Gaiafasa neebaa amila Beledoliama mosöa ami sigi asi. Yosefali sigi asi amoda, Yu dolö ilida Godeie siigi nigime baai made aligilo amo damumolöi made gabugi, ili mosöa ami nogila digala made, segea nelo. Mida, ilia Baagila Asi Segeyo amoie molö molöie amai.\* <sup>29</sup> Ili segea ami nebegi, Bailadi e segea fedalahilä ilima nabahalea, Dolö goweada edo nafade hamosebegi gudimolöie sigi misila nabi. <sup>30</sup> Amala nabasebegi, ilia ema säla obëgësalea, Ea nafade made hamoi galebeda, nilia e sigi made maalabiomelëla säi. <sup>31</sup> Amalebe, Bailadia säla obëgësalea, Dihilile mala dibe amo gadola gudimolöie, dihili e sigi obëgëmalola säi. Amala säsebegi ilia ema sähalea, Nilia gudilahiläda, dolö afädë nufulöi mademelëla säla negei dialeamelëla säi.\* <sup>32</sup> Amala säi amoda, dafidi Yesuea sähalea, Nema gomalä hamosegi baagomolö gabula ulufala olei amo gadola gausiala digamäiaie säi. <sup>33</sup> Amala säsebegi, Bailadi e Beledoliama mosö isogi bu nogila digala, Yesu welahilä ema nabahalea, Dida Yu ilile ginilela nabi. <sup>34</sup> Amala nabasebegi, Yesuea ema säla obëgësalea, Dia dihi asigia helësëla nabahale, ma, odoaea nieie säi nabala nabahalela nabi. <sup>35</sup> Amala nabasebegi, Bailadia säla obëgësalea, Neda Yu dolö gabule. Dihile fiifali amoliage, gobela ilo busa amoliage di nie naabogi gausi amoda, dia edo hamoi amea amahala nabi. <sup>36</sup> Amala nabasebegi, Yesuea säla obëgësalea, Na beaha maadela sigi neebe amoda nagadaiaie mademelë. Be, nagadaiaie galebeda, Yu dolö ilia ne gauloea, nie hamoi hamolo amolia nudulabiogoda. Na beaha maadela sigi neebe amoda, hä, nagadaiaie mademelëla säi. <sup>37</sup> Amala säsebegi, Bailadia ema sähalea, Hä, di dofä beaha aligilo gini madelela säi. Amala säsebegi, Yesuea säla obëgësalea, Dihili ne beaha aligilo gini neala säsebegomelë. Ado dofä amo säla iaha maademäia nagadaiaawi digasebegi, ne nemea neegela ägüi amo neawe. Udia dolö dofä sälo sosogo nefolalebe amoli sulubadelaead, nie ado nabelo neamelëla säi. <sup>38</sup> Amala säsebegi, Bailadia ema nabahalea, Ado dofä amoda edodula nabi.

*Bailadia Yesu e i fūgāigi baala negemalola säi**(Madiu 27.15-31, Maga 15.6-20, Ulugu 23.13-25)*

Bailadia ado säha maadela, segea bu doadigila fedala Yu dolö amoli neebaa awälahilä, ilima sähalea, Ema nafade afädë made beagoleimelë. <sup>39</sup> Amai gaso, na dilile mala dibe amo gadola, Baagila Asi Segeyo besela galaseda, galabaia dolö afädë dihilima fisigälo. Amo gadola, na walio Yu udia dolöie beaha aligilo gini gowe dihilima fisigädulela nabi. <sup>40</sup> Amala nabasebegi, ilia gelola uuala säla didigahalea, E mademelë. Balabasa fisigämalola säi. Balabasa eada fa neaha aligilo nelo.\*

**19**

<sup>1</sup> Amala säi amo nabalahlilä, Bailadia Yesu sigi awäla e fëgämaloi. Fëgälahlilä, <sup>2</sup> ami dolö amolia ëfë äyo gägäi gadoia gini busa gadoi nasigila amalela ie busagia salugasilahilä, fagulo bëi didiga salugalo afädëge salugasi. <sup>3</sup> Salugasi nebegi, ili e mia ga madela mafulahilä sähalea, Yu udia dolöie beaha aligilo gini-e, di go gabiola sälahilä, naabo gafea fadaha nelo.\*

<sup>4</sup> Bailadi e bu elö doadigila fedalahilä, ilima sähalea, Dolö gowema nafade afädë made beagolei gabula helësëmäia, na dili neebaa gui sigi segea doadigila fedahagola säi. <sup>5</sup> Yesu

\* **18:28:** Beledoliama mosöda Gabenaie mosö edefade. Amogida ami dolö amoli aligilo. Gamane dolö busa Bailadige, amase, ie sosogo amolige Olomo dolö ameadä, Yu ilia Godeie siigi nigime baai made aligilo amoda, ilia bëgëla hamolo made nelo. Amala hamolo ameadä, Yu ilia asigisaleada, ilia fii odoa ilile mosöa nogila digaseda, Godeie siigi ili nigime baamolö gabula asigi. Udia dolö Godeie siigi nigime baai amolia Baagila Asi Segeyo amoie molö nulo made. \* **18:31:** Yu ilile sege amoda Olomo ilia beaha nelo. Ado odoa gudimolö galëda, Yu hili gudila hamogimalola säsegi, gudisa aligilo. Gasoda, Yu ilia gudisaleada, dolö afädë nufudala baagomalolada sälo made dilo. Mida, Olomo ilia sähaleada, Yu ilia dolö nufuabiola säla negei dilo. Dolö i fūgāigi baala negela nufidelo mala amoda, Olomo iliamu amala hamolo negei dilo.

\* **18:40:** Dawadigi dolö ili yafiea helësësaleada, Balabasa eda Olomoge, Yuda gädilige, hailsa digimolöie nudulo amoligi afädëda e nelola helësëi. \* **19:3:** Madiu 27.29gi säi dibe amo bimalo.

e eře äyo gägäi gadoia gini busa gadoi amalela salugasi amola, fagulo bëi didiga salugasi amola wäla fedasebegi, Bailadia ilima sähalea, Dolö amoda gowemelë. Bimola säi.

<sup>6</sup> E bealahilä, gobela ilo busa amoliage, idihë aligilo amoliage, uuala säla didigahalea, Eda i fügäigi baala negemalola säla didigai. Amala säla didigasebegi, Bailadia ilima säla obëgësalea, Dihili e sigi awäla, i fügäigi baala negemolö mosalo. Nada ema nafade afädë made beagoleimelëla säi. <sup>7</sup> Amala säsebegi, Yu ilia ema säla obëgësalea, Nilia ado afädë säla negei galea. Ea e Godeie malöla sälo ameada, ado säla negei dibe amo bëgëla, e nufulo dialeala säi.

<sup>8</sup> Ado amo nabala Bailadi e edefademalä bedälahilä, <sup>9</sup> Beledoliama mosö amoie mumugi bu nogila digalahilä, Yesuma nabahalea, Dida abidi fii dolöla nabi. Amala nabasebegi, Yesuea ema made säla obëgëi. <sup>10</sup> Made säla obëgësebegi, Bailadia ema sähalea, Dia made säla obëgësalea. Di fisigämolä sämolöie geloige, i fügäigi baala negemola sämolöie geloige na gaulube amo, dia made helësësalea nabi. <sup>11</sup> Amala nabasebegi, Yesuea ema säla obëgësalea, Gode ilibia neebe amea dia nema hamomäia geloi made i galebeda, dia nema hamomolö amo, hamomolöi made bealabio. Be, dolö die naabogi gausilo amea nafade hamoi amoda dia hamoi amo baagila, nafade edefademalä hamoimelëla säi. <sup>12</sup> Bailadia amala säi amo nabalahlilä, Yesu fisigämolöie idi hogoi. Gasoda, Yu ilia uuala didigala sähalea, Dia dolö go fisigäla fisiga gaseda, dida Sisaie damelë mademelë. Dolö afädëla hi e ginila säsebe amoda Sisabalä ado niimelëla säla didigai. <sup>13</sup> Amala säi amo nabala Bailadia Yesu sigi segea doadigila fedalahilä, sege ëi Igi Bealë Baledëi difolalebea ami gudi mogesalea filo amodaia sulo. Sege amoie ëi Hibulu adoeada, Gabadala sälo. <sup>14</sup> Baagila Asi Segeyo amoie helësëla molö daialo segeyo amo gala eso mogosebegi, Bailadia Yu udia dolö ilima sähalea, Dilile beaha aligilo gini amoda gowemelë. Bimola säi. <sup>15</sup> Amalebe, ilia uuala didigahalea, Nufualo! Nufualo! Eda i fügäigi baala negemalola uuala säla didigai. Amalebe, Bailadia ilima nabahalea, Diliada na dilile ginigo i fügäigi baala negemäialea nabi. Amala nabasebegi, gobela ilo busa amolia säla obëgësalea, Nilile gini elöda maade. Sisa afädëmu neamelëla säi. <sup>16</sup> Amala säsebegi, Bailadia Yesu e i fügäigi baala negemäia, hilile naabogi gausi.

*Ami dolö amolia Yesu e i fügäigi baala negei*

*(Madiu 27.32-44, Maga 15.21-32, Ulugu 23.26-43)*

Amalebe, ami dolö amolia Yesu e sigi asi. <sup>17</sup> Ea hile i fügäi amo hi gaulahlilä, gaamu amo digila sege ëi Busa Giwi Segela sälo dibea ami asi. Hibulu adoea sege amoda Gologodala sälo. <sup>18</sup> Segea ami ilia e i fügäigi baala negesaleada, dolö äudäge ebalä baala negei. Eda mogogi, elö ie naabo dafädimadi, elö ie naabo fefeädimadila baala negei. <sup>19</sup> Bailadia i gäi baledëidaia ado gowe dëdëla negemalosebegi, ilia amodaia dëdësalea, Nasalese fii Yesu, Yu udia dolöie beaha aligilo ginimelëla dëdëlahilä, i fügäi amoie bidigi baasi. <sup>20</sup> Yesu e gaamu ga madela baala negei ameada, Hibulu adoeage, Olomo adoeage, Giligi adoeage säla dëdëla negei dibe amo, Yu udia dolö yafiea nidesamu nelo. <sup>21</sup> Amala dëdëla negei dibe amo bealahilä, Yu ilile gobela ilo busa amolia Bailadiama sähalea, Dia Yu ilile beaha aligilo ginila sälada dëdëmabu. Ea himu sähalea, Neda Yu udia dolöie beaha aligilo gini neamelëla sälola säla dëdëmolä säi. <sup>22</sup> Amala säsebegi, Bailadia säla obëgësalea, Na dëdëi gomu diamiäia. Gameläla säi.

<sup>23</sup> Ami dolö amolia Yesu hä, i fügäigi baala negesilahilä, ie fagulo gii amo biyidiala mogei. Mogelahilä, ilia afädë afädëla nea gagai. Nea galahlilä, ie fagulo elö daia salugalo sedade gii amomu dilo. Fagulo amo asogemolöi made, didigala afädëfali asi gabugi, <sup>24</sup> ami dolö amolia hilidomu sähalea, Fagulo go made gadelala, nowëa neasebelela melëdelä sadu hamodila säi. Ado säla negei amea sähalea, Iliä nie fagulo mogelahilä, nie daia salugalo gii amoie sadu hamoimelëla säla dëdëla negei dibe amo gausiala digamäiaie, amala hamoi.

<sup>25</sup> Yesuie emege, emeie esamage, Golobasaie udia Melige, amase, gaamu Magadala udia Melige, ili Yesu i fügäigi baala negei amo ga madela ami nefolalo. <sup>26</sup> Yesuea, ie emele, ie bëgëla aulo amoligi ea boba hamolo amole ga madefali neebe amo bealahilä, emema sähalea, Neme-e, die malöda egowemelëla säi. <sup>27</sup> Amase, bëgëla aulo amomage sähalea, Die diemeda egowemelëla säi. Amalebe, bëgëla aulo amea amo gala säia amila e sigi awäla ea mosöa sigi nelo.

*Yesu hi hame hä, mosaloi*

*(Madiu 27.45-56, Maga 15.33-41, Ulugu 23.44-49)*

<sup>28</sup> Hobeala, Yesuea hamoi hahamola misi amo hä, walio hamosa maadei gabula helësëlahilä, Ne ödä molö gabula säi. Ado säla negei dibe amo gadola gausiala digamäiaie amala säi. <sup>29</sup> Amala säsebegi, ödä i afädëgi wani ödä gamogai usi ami dilo amogi, ilia dahudu gadoi i afädëie ëi hisoboie adomogi yaala, wani ödä gamogai amogi gelahlilä, Yesuie nafia diisi. <sup>30</sup> Amala hamosebegi, Yesuea wani ödä amo nalahlilä sähalea, Hä, hamosa maadei amola säla, ie busa fuäia idogola ie namolö amo fisila, hame hä, mosaloi.

*Ami dolô afädëa Yesuie afawa gögë gäwi*

<sup>31</sup> Sabada segeyo edefade amoie molô daialo segeyo gabugi, ilia Sabada segeyo amogi domalo i fügäidaia ami made diamiäiala helësëla, Yu ilia Bailadima sähalea, Ilile emo giwi dagabolahlilä, domalo neala gaula mosäia, dia emo giwi dagabomalola sämäia helësëi dialeamelëla säi. <sup>32</sup> Amala säsebegi, ami dolô amoli awälahlilä, Yesubalä baala negei dilo amogi afädëie emo giwi dagabolahlilä, elô amoie emo giwige dagaboi. <sup>33</sup> Amalahilä, ilia Yesu dibeaa maala beahamelebe, eda hä, hame doala asi dibe amo bealahilä, ie emo giwi made dagabola, <sup>34</sup> afädëa Yesuie afawa gögë gäwi amole healele ödäle besigai. <sup>35</sup> Amo hamose melëlo dolô amea, nelebo ea meli amo säla ulufai. Ea säla ulufai amoda dofämelë. Amase, säla ulufasebe amoda dofäla hi dawadigi. Ameada, diliage asigi afädë negemäiaie, ea säla ulufasebemelë.\* <sup>36</sup> Godeie ado säla negesalea, ie giwi afädë made dagabomolömelëla säla negei amo gadola gausiala digamäiaie amala hamoi. *Gë Udälo 34.20*  
<sup>37</sup> Amase, ado elô säla negei dibe amoda gowe. Dolô gögë gäwi amoda ilia bimolömelëla säla negei amo gausiala digamäiaie amai. *Segelaea 12.10*

*Ilia Yesuie domalo igi äbä gähe duwia ami baui*

*(Madiu 27.57-61, Maga 15.42-47, Ulugu 23.50-56)*

<sup>38</sup> Amalahilä, hobeala Alimadia fii Yosebea Bailadima Yesuie domalo amo nedulela nabi. Yosebe eda Yesuie bögëla aulo nelo gaso, Yu ilibalä bedähalea, ie asigi afädë negei amo musügä negela nelo. Bailadia, ä nimalola säsebegi, ea awäla Yesuie domalo amo nii. <sup>39</sup> Nigudimusi e, dafidi Yesu neebee gasigi aulo amoge, ebalä asi. Nigudimusia i afädëie heale muwege, i ei elô aloie healele gegoai dilo amea, Yesuie domalobalä negemolöie gaula asi. I heale gegoai dilo amoie yoi dofeda, gilo nabülas ohodoo gadoi dilo. <sup>40</sup> Elea Yesuie domalo amo nealahilä, Yu dolöea bausalea hamolo amo gadola, i heale gegoai dilo amola Yesuie domalobalä baagoi usililo fagulo hedabia balagula usili. <sup>41</sup> Iliä Yesu i fügäigi baala negesi diloa amida, sagai afädë dilo. Sagaia amida baumolöie igi äbä afädë doalahilä, dolô afädë made baui, gähe dilo. <sup>42</sup> Elea Yu ilile Sabada segeyoie daialo segeyo gabula helësëlahilä, baumolö äbä duwi ga made dilo amea, elea Yesuie domalo amogi bausi.

## 20

*Yesu noweii*

*(Madiu 28.1-8, Maga 16.1-8, Ulugu 24.1-12)*

<sup>1</sup> Salele mi gäwi segeyogi, sege yomolö gaalu, Magadala udia Meli e bauia ami awälahlilä beahamelebe, äbä igia idi gai amo doga negei dibe meli.\* <sup>2</sup> Amo beala, e baluluia awälahlilä, Saimono Fidale bögëla aulo elô Yesu hi boba hamolo amole neebee besela galala, elema sähalea, Iliä Dafidilo Geloï bauia amila gaula asi gabio. Iliä abidi gaula awäla negeidu, nilia dawa madela säi. <sup>3</sup> Amo nabalahilä, Fidale bögëla aulo elöie amila doadigila bauia ami moholö asi. <sup>4</sup> Helegela gaalu baluluia asi gaso, bögëla aulo elô amea Fida digila, edale bauia ami awäla besela galai. <sup>5</sup> Besela galalahilä, nogila digala made, dosogägila fia idogola salea, aga beahamelebe, fagulo hedabi amomu isogi ami dibe meli. <sup>6</sup> Saimono Fida hobeala maala, baui isogi nogila digalahilä beahamelebe, fagulo hedabi amoge, <sup>7</sup> fagulo Yesuie busa neegisila bausi amoge, gedola negela made, fagulo busa neegisi amo hido galila negei dibe meli. <sup>8</sup> Amalebe, bögëla aulo elô bauia dafidi besela galalo amoge, oböla hobeala baui isogi nogila digalahilä, amala hamoi dibe amo beala, e asigi afädë negei. <sup>9</sup> Yesu bauiala nowemolö dialeamelëla, ado säla negei dilo amoda, amo gala ilia hedabola helësëi made nelo. <sup>10</sup> Amo bealahilä, hele mosöa obögëi.

*Magadala udia Melia Yesu meli*

*(Madiu 28.9-10, Maga 16.9-11)*

<sup>11</sup> Segea baui baagido nea, Melia diisa nelo. Diisa nea wäla, dosogägila fia idogolahilä, baui isogi beahamelebe, <sup>12</sup> selesäia fii fagulo falei salugai äudä, Yesuie domalo baui diloa ami, elöda busa diloamadi, elöda emo diloamadila sebe meli. <sup>13</sup> Elea Melima nabahalea, Udia-o, dia goda edogi diisa neala nabi. Amalebe, ea elema säla obögësälela, Iliä nie Dafidilo Geloï gaula awäla, abododi negeidula dawa made amea diisamelëla säi. <sup>14</sup> Amala sälahilä, e besuia imogola beahamelebe, Yesu neebe meli. Ea meli gasoda, Yesu gabula made helësëi. <sup>15</sup> Amasebegi, Yesuea ema nabahalea, Udia-o, dia goda edogi diisa nea. Dia nowë hogosala nabi. Melia dolô amoda sagai beaha aligilo amo gabula helësëlahilä, ema sähalea, Dolô edefade-e, dia e gaula asi galëda, nihï nea ädulä, guwi gaula awäla negei dialeala

\* **19:35:** Beahaleada, healele ödäle besigase melëlo amoda, bögëla aulo Yesu hi boba hamolo dolô amomelë. Mida, Yone 19.26-27gi sähalea, Bögëla aulo amoda Yesu i fügäigi baala negei dibe gaalu ga madela nelo amo säi. \* **20:1:** Saleleie mi gäwi segeyoda, salele ede. Edolo niliada gifälädalüla sälo.

sāmola sāi. <sup>16</sup> Amala sāsebegi, Yesuea ema, Meli-ela sāi. Amala sāi amo nabalahlilā, ea besuia imogolahilā, Hibulu adoea ema Elabonai-ela sāi. Nilile ado sālada Sāla Olelelo-o. <sup>17</sup> Amalebe, Yesuea ema sähalea, Naado neebee gadogo aso, fedaia mateda, dia nema diigimabu. Dia nedoolali neebee awālahilā, gomalā sāmalo. Neda aso, nīe Naadoge dilile Eedoge, amase, nīe Godege dilile Godege neebee fedamolō neebolea sāmalo sāi. <sup>18</sup> Amala sāsebegi, Magadala udia Meli e awālahilā, bēgēla aulo amolima sähalea, Na Dafidilo Geloī e melimelēla sālahlilā, ema sāla ī amo ilima sāla iaha maadei.

*Bēgēla aulo amolia Yesu meli*

(Madiu 28.16-20, Maga 16.14-18, Ulugu 24.36-49)

<sup>19</sup> Segeyo amo galamu, salele mi gāwi segeyogi, eso digase gaalu, iē bēgēla aulo amoli Yu ilibalā bedähalea, ili sefolalo mosō amo idi fēdōla galahlilā sefolalo.\* Amala sefolalebegi, Yesu ili sebe mogogi ami maala nea, ilima sähalea, Dalulo dilibalā namiāiala sāi. <sup>20</sup> Amala sālahlilā, naaboge afoge ilima olei. Iliā hā, Dafidilo Geloī bealahilā, edefademalā obeāgi. <sup>21</sup> Yesuea ilima bu elō sähalea, Dalulo dilibalā namiāia. Naadoea ne fisiga wei amo gadola, nage dili fisiga gahagomelēla sāi. <sup>22</sup> Amala sālahlilā, ea ilimadi hame hēia fedala nafi fo diigilahilā sähalea, Eleloi Gesami nimo. <sup>23</sup> Odoaea nafade hamoi amo dilia made hēla fisiseda, nafade amolida diamolōmelēla sāi.

*Domasaea Yesu meli*

<sup>24</sup> Yesu besela galasolo amo galada, ili giwilasi amoligi Domasa, iē ēi elō Didimusila sālo amo, sebegi made besela galai.\* <sup>25</sup> Hobeala, bēgēla aulo odoa amolia ema sähalea, Nilia Dafidilo Geloī melimelēla sāla ī. Amala sāla īasebegi, Domasaēla ilima sähalea, iē naabogi milī gāwi amo made bealage, nīe naabo sōgōea iē milī gāwi bu amogi made digalage, amase, iē afawa gāwi bu amogi nīe naaboea made digalage, nada dofā gabula made helēsēmōmelēla sāi. <sup>26</sup> Amala sāi salele afādē baagilahilā, iē bēgēla aulo amoli bu mosōa gegedola sefolalo. Amo gala Domasage hiligila sulo. Idi sulubadela fēdōla gai gaso, Yesu e ili mogogi ami maala nea, ilima sähalea, Dalulo dilibalā namiāiala sāi. <sup>27</sup> Amala sālahlilā, ea Domasama sähalea, Nīe naabogi diē naabo sōgōea digala bimo. Amalahilā, diē naabo mogodigila nīe afawa digala bimo. Hā, bealahilā, asigi āudā negela made, afādēfali negemalola sāi. <sup>28</sup> Amala sāsebegi, Domasaea ema sāla obēgēsalea, Nīe Dafidilo Geloī, nīe Godela sāi. <sup>29</sup> Amala sāsebegi, Yesuea ema sähalea, Dia ne beala asigi afādē negesale. Ne made beala asigi afādē negese amoliada, edefademalā obeāgisa neamelēla sāi.

*Beba dēdēi goweie mi*

<sup>30</sup> Yesu e bēgēla aulo amolibalā nelo amo gaalu, ilile siigi dolōea hamomolōi made gadoi odoa yafie hamoi dibede amoda, beba gowegi hulu made dēdēi. <sup>31</sup> Gaso, beba gowegi dēdēsebeweda, Afādē Memelei amoge, Godeie malō amoge Yesu gabula helēsēla, ema asigi afādē negemāiage, amase, dilia ema asigi afādē negesa nea, iē ēigi namolōi namolō gaula namiāiage, dēdēla negesawe.

## Yesu e iē bēgēla aulo neebee bu besela galai

### 21

(Yone 21)

*Bēgēla aulo gifalādālaea Yesu meli*

<sup>1</sup> Hobeala, bēgēla aulo amoli Dabeliasa oeaba ami nebegi, Yesu e bu elō ilima ulufadigila besela galai amoda gomalā hamoi.\* <sup>2</sup> Saimono Fidage, Domasa iē ēi elō Didimusige, Galili segeie gaamu Gaina ami fii Nadanalege, Sebediie malō āudā amolege, iē bēgēla aulo āudā elōlege, ili ami gedola nefolalo. <sup>3</sup> Ami nefolalea, Saimono Fidaea ilima sähalea, Neda seme digila awāhadiola sāsebegi, ilia nilige hā, dibalā maahagola sāi. Amala sālahlilā, ili duugi fifigila awāla, gasigi seme digisa nea, seme isoie afādēge made neala nelo.

<sup>4</sup> Sege yose amo gaalu, Yesu bōsea ami maala nelo gaso, iē bēgēla aulo amolia e Yesu neala made helēsēi nelo. <sup>5</sup> Amala nebegi, Yesuea ilima nabahalea, Malisā-o, dilia seme afādē made niilela nabi. Amala nabasebegi, ilia sāla obēgēsalea, Ā, made niimelēla sāi. <sup>6</sup> Amalebe, ea ilima sähalea, Selēgēgo dilile du dafādīmadi digiseda, seme odoa digamolōmelēla sāi. Amalebe, ilia selēgē amala digilibe, seme yafie digai amea, selēgē dusugamolō uli. <sup>7</sup> Amala hamosebe amo bealahilā, bēgēla aulo afādē Yesu hī boba hamolo amea, Saimono Fidama sähalea, Goweda Dafidilo Geloī gabula sāi. Dafidilo Geloī gabula sāi amo nabalahlilā, Fidaea

\* 20:19: Yone 20.1iē gasumili amo bimalo. \* 20:24: Ēi Didimusila sāi amoie mida gomalā. Emea āudā busa dila āgiū amogi elōla sāi. \* 21:1: Oeabo Dabeliasa amoie ēi elōda Galili.

fagulo daia salugalo dafidi gila negei dilo amo salugalahlilä, ödägi nila digai. <sup>8</sup> Amase, bægëla aulo odoa amoliada dudaia nea, selëgëgi seme digaide amo dusugala gaula agesua moholö asi. Ili neloa amila ödä agesuada, mia made made, mida hädali afädë gadoi dilo.

<sup>9</sup> Ili agesua aliga alogola beahamelebe, nulo gobei elëlëgi amodaia seme gobei afädë, beledige dibe meli. <sup>10</sup> Yesuea ilima sähalea, Dilia walio seme nii gogi odoa gaula misiëla säi. <sup>11</sup> Amala säsebegi, Saimono Fida e awäla dudaia nea, seme selëgë amo agesua dusugala gaula misi. Seme bobogamu selëgëgi digai amo gedolada hädali afädëie nabülas biaie odoai ohodoa (153). Seme malei digai amea, selëgë nulimolöi gaso, made nuli.

<sup>12</sup> Yesuea ilima sähalea, Dili hä, molö naa mofiamola säi. Amalebe, bægëla aulo amoli bedähalea, iligi afädëa di nowëla made nabi. Iliada Dafidilo Geloj gabulamu helësëi. <sup>13</sup> Yesu e maala nea, beledi gobei amo neala iligali sogolahilä, seme gobei amoge, amo gadola wäla hamoi.

<sup>14</sup> Yesu e bauiala nowela awäla nea, bægëla aulo amoli neebee bu osoda ulufala besela galaida amo.

*Yesuea Fidama nïe sugua sibi amoli sigi namialola säi*

<sup>15</sup> Ili molö naha maadelahlilä, Yesuea Saimono Fidama nabahalea, Yoneie malö Saimono-o, odoa gowe ilia ne boba hamose amo gadola made, dia baagila awäla, ne dofä gelola boba hamosalela nabi. Amala nabasebegi, Fidaea ema säla obëgësalea, Ü, Dafidilo Geloj, na di boba hamose amoda, dia dawamelëla säi. Amala säsebegi, Yesuea ema sähalea, Nie sugua sibi malö amoli molö iaha namialola säi. <sup>16</sup> Yesuea ema bu agedu nabahalea, Yoneie malö Saimono-o, dia ne dofä gelola boba hamosalela nabi. Amala nabasebegi, Fidaea ema sähalea, Ü, Dafidilo Geloj, na di boba hamose amoda, dia dawamelëla säi. Amala säsebegi, Yesuea ema säla obëgësalea, Nie sugua sibi amoli sigi namialola säi. <sup>17</sup> Yesuea aso, bu osoda ema nabahalea, Yoneie malö Saimono-o, dia ne boba hamosalela nabi. Yesuea bu ohodoala dia ne boba hamosalela nabi amogi, Fida e asigia yöia idogolahilä, Yesuma sähalea, Dafidilo Geloj, nelebo sulubadela dia dawadigisa maadei neebe amo, na di boba hamose amoda, dia dawamelëla säi. Amala säsebegi, Yesuea ema sähalea, Nie sugua sibi amoli molö iaha namialo. <sup>18</sup> Na dima dofä gelola sähago. Di malisä nelo amogida, die malibu negelahilä, dihi moholö helësëse amo gadola nawesa aligilomelë. Gaso, di momaeala fia idogose amo gaaluda, die naabo mogodigisa gasegi, dolö odoaea di malibu negesilahilä, dia moholö helësëi madeido amogi sigi moholömelëla säi. <sup>19</sup> Yesuea ado amala säi amoda, Fida e abeahämola hamola baagola, Godeie ëi ilibia amo gauia adamolö amoie helësëla amala säi. Amala sälahilä, Yesuea Fidama sähalea, Di ne bægëla misiëla säi.

*Bægëla aulo Yesuea boba hamoi amoma ado säi dialea*

<sup>20</sup> Fidaea besula beahamelebe, bægëla aulo Yesu hi boba hamolo amo, ele bægëla maaha neebe meli. Dolö amoda dafidi ili molö naha sefolalo amo gala, Yesuie bidagia golögia alogola nabahalea, Dafidilo Geloj-e, nowëa di hololömolö gabula sälo amo maaha neebe meli. <sup>21</sup> Beahamelebe e gabugi, Fidaea Yesuma nabahalea, Dafidilo Geloj, dolö gowedala nabi. <sup>22</sup> Amala nabasebegi, Yesuea ema säla obëgësalea, Ne obëgësalea e namolöi namiäiala hameseda, amoda diele. Dida ne bægëla misiëla säi. <sup>23</sup> Amalebe, odoa ilia sähalea, Bægëla aulo go made baagomolöla säimelëla edoolalima säla daidoi. Gaso, Yesueada e made baagomolömelëlada made säi. Ea sähaleada, Ne obëgësalea e namolöi namiäiala hameseda, amoda dielela amomu amala säi.

<sup>24</sup> Bægëla aulo amea nelebo ea meli amo hi säla ulufadigisa nea, amala hamoi amo hi bebagi dëdëla negei amoda amomelë. Nilia ea säla ulufadigi amoda dofä gabula helësësamelë.

<sup>25</sup> Yesuea hamoi elö elöla yafie hamoimelë. Hamoi amo hido hídola hulu sulubadela dëdëla negesa maadei galebeda, sege dibe sulubadelagi beba yafie hamoi amo negemolö fu made bealabiola helësësamelë.

Hä amo.



## Abosolo Neala olelo oboba

Uluguea Ado Mala Hedabi dafidi dëdëi amo dëdësa maadelahilä, hobeala beba elöwege Ulugu eamu dëdëi. Yesuie Ado Mala Hedabi abosolo dolö ilia säla olelemäia Godeie Gesamia idi olei.

Yesuea ado afädë säi amoda gowe. Eleloi Gesami e dili neebee gui maala ie geloia dilile isogi nobamolömelë. Amala hamoseda, nie Ado Mala Hedabi gaula Yalusalemege, Yudiamadige, Sameliamadige, sege föi sulubadelagi olelesa nawesa namolömelëlä säi. (Abosolo 1.8)

Yesuea amala säi amo gadola ie bëgëla aulo amolia Ado Mala Hedabi säla daidola nawesa nelo. Amala säla iasebegi, dafidida Yu udia dolö hili ilimu Geleso sosogo nelo. Hobealada sege föi sulubadelagige Geleso sosogo aligisa maadela nelo.

Beba Abosologi afädë säi amoda, dafidi Bëdigosi Segeyogi Yesuie bëgëla aulo sebee Eleloi Gesami digai amoge, amase, hobeala Eleloi Gesamia iilasila geloi iasebegi, hamoi hamosa nelo amoge dëdëi dialea. Yesu selesaia mosöa awäla nebegi, Geleso sosogo nefolalo amolia Yalusaleme nea Ado Mala Hedabi säla daidosebegi, udia dolö yafie nefolalo amoli asigi besui.

Ilia Yu udia dolöie sege sulubadelamadige Sameliamadige säla daidosa maadei. Aso, iliamu wagadi made sege odoa dibeamadige, Olomomadige säla iia nawesa maadei amoie ado säla dëdëla negei dialea.

### *Yesuea Eleloi Gesami imolömelëlä säla negei*

<sup>1-2</sup> Diofilasa-o, dafidi na bebagi dëdëla negesaleada, Yesuea hamoi amoge, olelei amoge dafidi mi gäwia amila e selesaia mosöa fedala asi segeyo amoge dëdëla negesa maadeimelë. Fedala made nea, ea Eleloi Gesamiie geloia abosolo dolö namiäia memelei amolima gomälä hamomalo, gomälä sämalola säla iaha maadei. <sup>3</sup> Yesu së naala baagolahilä, bu nowela abosolo dolö amolia e dofä nowei gabula helësëmäia e ulufadigila segeyo nabülasi biyidia ilibalä nea, Godea Beaha Maadela Sigi Neebe amoie ilima säla iaha nelo. <sup>4</sup> E, aso, ilibalä nea ea ilima sähalea, Dilia Yalusaleme digila mosabio. Naadoea imolömelëlä säla negeila na dafidi dilima säla i amo imäia, gui beaha namialo. <sup>5</sup> Yoneada ödäea gesa nelomelë. Segeyo ede made nelolahilä, dili Eleloi Gesamia gemolömelëlä säi.

<sup>6</sup> Amo gala, ili gegedolahilä ema nabahalea, Dafidilo, Isilale udia dolö nilia nihili beaha namolö, nihilima ia obëgëmolö walio gogilela nabi. <sup>7</sup> Amala nabasebegi, Yesuea ilima säla obëgësalea, Naadoea hi asigia segeyo daiala negei amoie dawada, dilile made. Segeyo amo daialoda Naado hidomumelë. <sup>8</sup> Amai gaso, Eleloi Gesami e dili neebee gui maala, ie geloia dilile isogi nobamolömelë. Amala hamoseda, nie Ado Mala Hedabi gaula Yalusalemege, Yudiamadige, Sameliamadige, sege föi sulubadelagige olelesa nawesa namolömelëlä säi.

### *Yesu selesaia mosöa fedala asi*

<sup>9</sup> Ea ado amo säha maadelahilä, ilia ami beaha nebegi, e neala gauia adala selesaia mosöa fedai amo baidilia hagui amea, bu elö bimolöi made meli. <sup>10</sup> E fedala awäse amo gaalu, ilia muugi sisila nebegimu, dolö fagulo falei salugai äudä fodolofali maala ilibalä neebee meli. <sup>11</sup> Amolea ilima nabahalea, Galili dolöla dili-e, mi edoie muugi sisilamu dialeala nabi. Amala nabalahlilä elea sähalea, Yesu goda walio dili digila, e neala gauia adogola selesaia mosöa fedasebe amoda obëgëmolö. E selesaia mosöa awäsebe dilia meli amo gadoi wäla obëgëmolömelëlä säi.

### *Ilia Yudasa bedefala dolö afädë memelei*

<sup>12</sup> Amala säsebegi, ili segebi ei Olibebidaia amila Yalusaleme obëgëi. Segebia amila Yalusaleme ga madefali, Yu udia dolöea segeyo Sabada gafegi nawelo amo gadoi. <sup>13</sup> Ili Yalusaleme besela galalahilä, mosö iso daia hogoli hili fisia ami fedala nogila digai. Amolida Fidage, Yonege, Yamesege, Äduluge, Filibige, Domasage, Badolomiuge, Madiasige, Alibiasaie malö Yamesege, Selodo sosogo Saimonoge, Yameseie malö Yudasage. <sup>14</sup> Dolö amolia Godema adomolö ili gegedodosamu aligilo. Udia odoage, Yesuie eme Melige, ie edoolalige ilibalä amala gegedolo.

<sup>15</sup> Amo gala asigi afädë negei sulubadela gegedolada hädali afädëie nabülasi äudä gadoi sefolalebegi, Fidaea nowela nea sähalea, <sup>16</sup> Nedoola dili-e, Godeie ado siiba säla dëdëla negei amo dofä gausiala digamolömelë. Yudasaea dolö nefolalo amolia Yesu gaumäia idi olei amoie Eleloi Gesamia Debidima aligilahilä bea säla negei amo gadola dofä gausiala digaimelë. <sup>17</sup> Yudasada nili sosogo nelo. Nihiligila hamoi gegedola hamomolöie e

memeleimelëla säi. <sup>18</sup> (Yudasa hü nafade hamola muni nii amea sege afädë nofela nii. Amala hamola sege niia ami baagola digala bole dusula gahidado besela galai. <sup>19</sup> Amo hamoi amo hobeala Yalusaleme nefolalo amolia nabaha maadei. Amalebe sege amoïe ëi ilile ado sälada *Ageledama* negei. Nilile ado sälada heale sege.) <sup>20</sup> Fidaea sähalea, Gë Udälo bebegi ado afädë säla negei amo gowe.

Ë mosö nalämäia. Mosö amogi afädë made midiäiala säla dëdëla negei dialea.

*Gë Udälo 69.25*

Amase, ado elö säla negei dibe amo gowe.

Hamoi ea hamolo negei amo elöea hamola bedefamäiala säla dëdëla negei dialea.

*Gë Udälo 109.8*

<sup>21</sup> Amai gabugida nilia dolö elö gowe gadoi memeledelä. Amoda Dafidilo Geloï Yesu afu mafusa nelo amo gala nilibalä nawelo. <sup>22</sup> Yonea ödägi gese melëlo, Yesu neala gauia adala fedai melëlo nilibalä nawelo. Amea nilia e dofä baagola nowela dawadigi amo nilibalä sämolöie memeledelä. <sup>23</sup> Amala säsebegi, ilia dolö äudä ëi säla negei. Dolö elö amoïe ëida Yosebe, odoaea ïe ëi Basabasala sälo, odoaea Yasadusila sälo nelo amo. Amase, elö amoïe ëi Madiasile säla negei. <sup>24-25</sup> Amala sälahilä, ilia Godema adosalea, Dafidilo Geloï, dia sulubadelaïe iso beaha maadei. Dolö äudä memelei amolegi afädëa Yudasaea abosolo hamoi idiadolasia amila bedefamäia dia afädë memelei amo olemalo. Yudasa eda hü segea awähalea abosolo hamoi digila asi gabiola säi. <sup>26</sup> Amala Godema adolahilä, elele ëi dëdëla salalahilä fofogolebe Madiasïe ëidale besela galasebegi, abosolo gidälasi amolibalä giwi e baala namiäia memelela ifosi.

## 2

### *Godeïe Gesami digai*

<sup>1</sup> Yu udia dolöie molö nulo segeyo ëi Bëdigosi besela galasebegi, ili sulubadela mosö afädëgi gegedola sefolalo.\* <sup>2</sup> Amala gegedola sefolalebegi, fo geloiïe goba gadoi abela guula maalahilä, mosö ili fifgi sebea ami digala nobai. <sup>3</sup> Amala digala nobalahilä, nulo söale elile gadoi moge mogela ili sulubadela hïdo hidolama aliligisebe meli. <sup>4</sup> Amalahilä Eleloi Gesamia udia dolö amoli sulubadelama nobalahilä, ilia fii odoaië ado säla besela gagamämäia Eleloi Gesamia sälasisi.

<sup>5</sup> Yalusaleme ami Yu udia dolö Godeïe mala nabelo sege fïi sulubadelagi nefolalo amoli bobala asi ami sulo. <sup>6</sup> Udia dolö amolia goba amo nabalahlilä, ili sulubadela gegedoi. Gegedoi amolia hïdo hidolaea nabelebe, ilile ado sälo amo gadola säsebe amo nabalahlilä, ili sulubadela fudugi. <sup>7</sup> Amo nabala, ili edefademalä fudugilahilä sähalea, Wae! Nilile ado säla säha dibege ilida Galili dolö madefa. <sup>8</sup> Ili nilile ado elö elöi amo säsebe nihili nabasebeweda, abeahäladu. <sup>9</sup> Nili Badialage, Midialage, Elamalage, nili Mesobodemia dolöge, Yudialage, Gabadosialage, Bödasalage, Esialage, <sup>10</sup> Filigialage, Bäfilialage, Isibilage, Libiaïe sege Sailinimadilage, Olomola söfë misi amolige, <sup>11</sup> Yu udia dolöge, udia dolö odoaea Yute mala gaula mogolo amolige, Gilidilage, Alebialage, nili sulubadela nefolalebewema, ilia nihilile ado adola, Godea hamoi edefade hamoi amoïe säla ïasebegola säi. <sup>12</sup> Ili fudugila asigi säosäolahilä sähalea, Goda edodula säla didigai. <sup>13</sup> Odoa nefolalo amolia gadiabola sähalea, Wani ödä gähe hamola negei amo edefadela naala gagaosebogola säi.

### *Fidaea Ado Mala Hedabi säla ï*

<sup>14</sup> Amala säi amo nabalahlilä, Fida e abosolo gidälasi amolibalä nowela nea ea ilima ado gelolafali sähalea, Yu dolö dilimage Yalusaleme nefolalebe dilimage, amo hamoi amo säla idulä. Nie ado hedabola nabualo. <sup>15</sup> Dilia dolö gowe ili gagaosebela helëseï amoda amai mademelë. Segeyo walioda, aso, yosemelë.\* <sup>16</sup> Go hamose goda dafidi bea sälo Yoalea säla negei amo gausiahamelë. Eada gomalä säla negei.

<sup>17</sup> Godea sähalea, Segeyo aligila wagamolö ga madese gaaluda, na nie Gesami udia dolö sulubadelama söga salimolömelë.

Dilile didiwi diefegealiala nie mala olelesa namolömelë. Amase, dilile malö malisä amoliage sosoäla awäla elö elöla bimolömelë. Amase, dolö asigi fädäi neebe amolia simasi-molömelë.

<sup>18</sup> Segeyo amogimu nie hamoi hamolasilo udia dolö amolimage na nie Gesami söga salimolömelë. Ili nie mala olelesa namolömelë.

<sup>19</sup> Na muugi adogo hïdo elöi hamolasila naga föidaiage dolöea hamomolöi made gadoi hamolasimolömelë. Healege nulo söage höba buguge hamomolömelë.

\* **2:1:** Segeyo edefade Bëdigosi amoïe ëi elöda Sagaia Molö Hëhela Nelo Segeyo. Baagila Asi Segeyo molö nahilä segeyo nabülasi bia baagilahiläda Bëdigosi Segeyo besela galalo. \* **2:15:** Yosemelëla säi amoïe mida gomalä, Yu udia dolö amolia wani ödä yose made nulo.

<sup>20</sup> Amase, Dafidilo Geloïie Segeyo Edefadema lä besela galamolö amo, aso, made besela galala neëgi, esoge usila aubege bêlahilä heale uii besela galamolömelê.

<sup>21</sup> Amala hamosegi Dafidilo Geloïma damula mosöla säsebe amolida damula aulo gaula namolömelêla Godea säila

Yoalea säla negei amo Fidaea säi.

*Yoale 2.28-32*

<sup>22</sup> Fidaea sähalea, Isilale dolöla dili-e, ado sähago. Nabualo. Nasalese fii Yesuea geloi melêlo made gadoi hamolage, hido elöi hamolage, dolöea hamomolöi made gadoi hamolage, Godea Yesuma aligila dilibalä nea amala hamoi. Amala hamoi ameada e Godea odala iala hamoi amo hamomolö misi amo olei. Amoda dilia dawadigi nebege. <sup>23</sup> Dolö amoda gaula imolömelêla Godea dafidi daijala negei amo gadola hamomäia fisigisi. Dilia e baagomäia dolö nafade hamolo nefolalo amolia e i fügäigi baala negemäia hamolasi.

<sup>24</sup> Baagoia e nafodomolö uli amea Godea baago amoie säa e fisigisimäia e nowela ifosi.

<sup>25</sup> Debidiage ie helêsêla säi amo gowe.

Na beahamebe Dafidilo Geloï e nebalä ga madefali namolöi namolö misi neebe meli.

Nafadea ne neala fologolasiloea, ne gelolasimolöie e nie naabo dafädimadi ga made misi nea. <sup>26</sup> Amalebe nie isogi edefade obeägilo nobalahilä na obeägi ado säi. Amase, nie domalogi hamomolö amo hamomäia na beaha namolö. <sup>27</sup> Dia nie gesami baagoi uguli mosöa ami dögila made moholö. Die hamoi hamolasilö dihi memelela odai amo bauia ami made sigämolömelê. <sup>28</sup> Dia ne namolöie idi oleimelê. Dia nebalä namolöi nebegeada ne obeägilo nobalahilä obeägisa namolöla

Debidia säimelêla säi.

*Gê Udälo 16.8-11*

<sup>29</sup> Fidaea amala sälahilä sähalea, Nedoola dili-e, nilile mäu Debidiie, na dilima fädäla sähago. E baagoige bauige. E bauri amo nili mia wi walio dialea. <sup>30</sup> Dafidi eda bea sälo nebege, Godea ema ado dofä gelola säla negesalea sähalea, Hobeafali die mäu afädëa beaha aligilo gini filodaia samialamolömelêla säla negei amo Debidi hi dawadigi nelo. <sup>31</sup> Godea Afädë Memelei amo baagolahilä nowela ifosimolö amoie Debidi bea sähalea, Ie gesami uguli mosöa digila made moholö, ie domalo bauia ami sigämolö madela bea säla negei. <sup>32</sup> Amaimo, Yesu amoda Godea nowela ifosi. Amo nilia beaha maadei amo säla iahamelê. <sup>33</sup> Godea Yesu neala gauia adala fedalasila ie naabo dafädimadi ifosilahilä, Eleloi Gesami i. Edoea Gesami imolömelêla dafidi säla negei amo i. Ea amo walio söga sali amo dilia siia beala gëhea nabi amomelê. <sup>34-35</sup> Debidi eda selesaia mosöa fedai made gaso, ea säla negesalea sähalea,

Dafidilo Geloïa nie Dafidilo Geloïma sähalea, Na die ado nii nefolalebe amoli die emoea

emesala namiäia, dida nie naabo dafädimadi awäla salea, beaha samialola säimelêla

säi.

*Gê Udälo 110.1*

<sup>36</sup> Fidaea amala sälahilä sähalea, Isilale udia dolö nefolalebe dili sulubadelaia hedabola helêsëmalö. Yesu e dofä dilia i fügäigi baala negei amoda Godea e Dafidilo Geloï namiäiage Afädë Memelei namiäiage ifosi amo hedabola helêsëmalöla Fidaea säi.

*Udia dolö yafte asigi besula ödägi gei*

<sup>37</sup> Ado säi amo nabalahlilä, ilile isogi awäla gäwilebe Fidala abosolo odoa amolima nabahalea, Nedoola dili-e, nilia abilia hamomolödula nabi. <sup>38</sup> Amala nabelebe Fidaea säla obëgësalea, Dili asigi besula hido hídola Yesu Gelesoie ëgi ödägi gemalo. Amala hamosegida, dilia nafade hamoi amo hëla digila diligali Eleloi Gesami imolömelê. <sup>39</sup> Godea imolömelêla säla negei amo gadola dilimage, dilile malö amolimage, udia dolö wagadi made nefolalebe amoli sulubadelamage imolömelêla säla negei. Dafidilo Geloï Godea e neebea misiäia wemolö amoli sulubadelama imolömelêla säla negeila Fidaea säi.

<sup>40</sup> Fidaea ado geloi odoage häila nabulöi hamoi odoage ilima gelola säla ialahlilä sähalea, Udia dolö nafade memelela made sulubadela hamolo walio nefolalebe welia së molö amogi dilila nüloea fisäla awäla asigi besumalola säi. <sup>41</sup> Ea amala säi amo hedabola häila nabi amoli ödägi gei. Segeyo amo gala udia dolö dausini ohodoa baai. <sup>42</sup> Abosolo dolö amolia mala olelei amo bëgëla hamola digi, Geleso sosogo odoabalä dila nea, molö gedola nadigi, Godema adola digi, amo sulubadela ilia gelola hamosamu nelo.

*Geleso sosogo nea mala hedabi hamoi*

<sup>43</sup> Udia dolö sulubadela fudugila bedäi. Godea abosolo dolö amolima aligila hido elöi hamolasila, dolöea hamomolöi made gadoi hamola nawei amogi. <sup>44</sup> Amase, asigi afädë negei nefolalo amolige afädëdi nelo. Hido hídolaie nelegei dilo amoda, ili sulubadelaie ua gadoi dilo. <sup>45</sup> Segege, nelegeige bidi nealahilä, mogela nelegei made amoligali ilo. <sup>46</sup> Amase, segeyo sulubadelagi ilida Godeie mosöamu gegedolahilä, hilile mosöa afufusa neada ilile iso asigi falagasei nea hiligila obeägila molö gegedola naala, <sup>47</sup> Godeie ëi gauia adaha neebe amo bealahilä, udia dolö nefolalo amoli sulubadelaie obeägila melêlo. Segeyo sulubadelagi Dafidilo Geloïa odoa asigi afädë negei amolida neala baalasi.

## 3

*Dolô emo nafadei afädë wahilasi*

<sup>1</sup> Segeyo afädëgi eso digase gaalu, Fida Yonele Godeie mosóamadi asi. Deadi amo gadola ilia Godema adosa aligilo negei. <sup>2</sup> Amaimo, dolô afädë, ie emea neegela ágüsolo amo gala emo nafadei amo gadoi neegela ágüi, amo ilia sogobala gaula awäla Godeie mosó idi nogila digalo Aye Negei dibeami ifosisa aligilo. Segeyo sulubadelagi ea Godeie mosó digasebe amolima muni imola sámäia ifosilo. <sup>3</sup> Fida Yonele Godeie mosó nogila digasebe amo bealahilä ea elema sähalea, Alia ne muni imola säi. <sup>4</sup> Amala sälebegi Fida Yonelea ema siila nea Fidaea sähalea, Alima bimola säi. <sup>5</sup> Amala sälebegi e imolô gabula helësëla ea elema si. <sup>6</sup> Amala sisebegi Fidaea ema sähalea, Muni afädë gaui mademelë. Amai gaso, afädë gaui amo digali iahago. Nasalese fii Yesu Gelesoie éigi säha, di nowela nawemola säi. <sup>7</sup> Amala sälahilä ie naabo dafädi amo nabelela gauia adalasisibegü, ie emo fodolofalí neala gelolasi. <sup>8</sup> Nowela nila sadia adodogola asi. Amala awäla elebalä Godeie mosó nogila digala, Godeie éi gauia adala emo gumu sesegegila nawesa nelo. <sup>9</sup> Udia dolô nefolalo amoli sulubadelaea e Godeie éi gauia adala awäse amo bealahilä <sup>10</sup> ilia helësësalea, Godeie mosó nogila digalo Aye Negei dibeami salea muni imola säha filo amo gabula helësëi. Ema hamoi amo bealahilä ili hame galalaia fedala mudugi.

*Fidaea Godeie mosó Ado Mala Hedabi olelei*

<sup>11</sup> Dolô amea Fida Yonelema gaula fëdöla nebegi, udia dolô nefolalo amoli fudugilahilä, Godeie mosó hadai dibeami baluluia mafui. Hadai amoda Solomonioie hadaila sälo. <sup>12</sup> Fidaea udia dolô mafui amo bealahilä, ea ilima sähalea, Isilale dolô dili-e, amo hamoi amogi dili fudugilahilä alima sisila dibegoda edoie. Amai dilia helësësalea, alile geloiage Godeie mala mogola gaula neebeweage alia dolô gowe nowela ifosila helësësale. <sup>13</sup> Abalahamage Aisagage Yeigabage, nilile mäuge ilile Godea ie hamoi hamolasilo Yesuie éi ilibiamäia neala gauia adalasi. Dolô amo dilia dilile sigi aligilo neebea sigi gaula asimelë. Bailadi neebea sigi awäsebegi, Bailadia e fisigäla fisiga gamolô hamosebegi, diliada ema baagi iala golala melimelë. <sup>14</sup> Dilia dolô hedabi mogoifalí hido elöi amoma baagi iala golala bealahilä, dolô nufidelo amo fisigämola säla didigai. <sup>15</sup> Udia dolögali Namolô Gaumäia İlo amoda baagomäia nufimelë. Amo baagolahilä Godea bauia amila neala nowela ifosi neebe amo alia siia melimelë. <sup>16</sup> Yesuie éigi asigi afädë negei amea Yesuie éia dolô dilia beala dawadigi amoma geloi İ. Yesu hi alile asigi afädë negei neala nowelasimelë. Asigi afädë negei amea dili sulubadelaie siigi e wahilasimolöi wahilasimelë.

<sup>17</sup> Amai gabugi, nie nedoola dili-e, dilia Yesuma hamoi amo fädäla helësëla made nea hamoila helësësa. Dilile sigi aligilo amoliage amala hamoila helësësamelë. <sup>18</sup> Amo gadola siibafalí Gode e bea sälo sulubadela nefolalo amolima aligilahilä nea, ea Afädë Memelei amo së molömelëla bea säla negei amo gadola amala gausiala digai. <sup>19</sup> Amala hamoi gabugi asigi besula dilile nafade hamoi amo hëmäia Godemadi namialo. <sup>20</sup> Dilia amala hamoseda, dilile gesami gelolasimolöie Dafidilo Geloia e neebeala fuimolömelë. Amase, Afädë Memelei amo dilile namiäia dafidi odalasi Yesu amo dili neebea fisiga wemolömelë. <sup>21</sup> Siibafalí Godea bea sälo hile nafolai amolima aligila bea säla negei amo gadola, Godea sulubadela bu elö gähe namolö segeyo daiala negei amo gadola gausiala digamäia Yesu e selesaia mosó beaha nea. <sup>22</sup> Siiba Mosesea sähalea, Dafidilo Gelo Godea dilile didoomadila aligila afädë bea sälo ne gadoi dilile bea sälo memelela ifosimolömelë. Amala aligiseda, dilia ie ado nabala bëgëla awäla hamomalo. <sup>23</sup> İe ado nabalahlilä made hamose dolô amolida Isilale udia dolô amolibalä made namiäia nufudala baagomolömelëla Mosesea säi. <sup>24</sup> Amo gadola bea sälo sulubadela, Samuale nelo amila, bea säla negesalea segeyo waliowegi hamosebeweie bea säla negei. <sup>25</sup> Dilida bea sälo amolile malöge, amase, Godea dilile mäuma asialo made ado elöi säla negei amoie malöge nebege. Godea Abalahamama sähalea, Dïe mäuma aligila udia dolô fifi asi dibe amoli sulubadela neala obeägilasimolömelëla säi. <sup>26</sup> Amaimo, Godea Yesu e ie hamoi hamolasilo namiäia diligalidale fisiga wei. Fisiga wei amoie mida gowe. Dilia nafade hamosa neebea amila ea sigi gaula obëgëlahilä obeägilasimäia fisiga weimelëla Fidaea säla wagai.

## 4

*Ilia Fida Yonele nafodoi*

<sup>1</sup> Elea udia dolöma säla iaha nebegi, gobela İlo dolô nefolalo amolige, Godeie mosó idihë aligilo amolile beaha aligilo amoge, Sadiusi nefolalo amolige ele neebea misi. <sup>2</sup> Elea udia dolöma Yesu baagola nowei amea baagoi amoli nowela namolömelëla säla olelesebegi, İli mihaläla misi. <sup>3</sup> İli maalahlilä İlia ele gaula nafodolahilä amo gala gasisebegi, aiyo

gudimolöhlahlä galabaia musöa negei. <sup>4</sup> Amaimo, elea säla i amo yafiea nabalahlä asigi afädë negei. Hä dolö asigi afädë negei amoli gedolada dausini bia.

<sup>5</sup> Segeyo elö aligisebegi, ilile sigi aligilo amolige, dafidilo amolige, mala dawadigi amolige ili Yalusalame gegedoi. <sup>6</sup> Gobela ilo Busa Edefade Anasage, Gaiafasage Yonege Alegisädage, gobela ilo Busa Edefadei sosogo nefolalo amolige sulubadela gegedoi. <sup>7</sup> Ili gegedoi sebea ami ele ifoslahilä elema nabahalea, Alia hamoi amo edo geloia, nowëie ëigila hamoila nabi. <sup>8</sup> Amala nabasebegi, Fidama Eleloi Gesami nobai nea ea ilima säla obëgësalea, Udia dolöie sigi aligiloge dafidilola dili-e, <sup>9</sup> amai dilia walio alima mi nabi amoda alia dolö emo nafadei afädë ugila negei amoie nabi galëda, amai dilia helësësaleada, dolö emo nafadei amoda abeahäla hedabomolöi gabu. <sup>10</sup> Amai galëda, dili sulubadelaage, amase, Isilale fii sulubadelaage, mi fädäla helësëmolö dialea. Nasalese fii Yesu Gelesoië ëia dolö wagadi nebegowe wahilasimolöi wahilasi amo dihili beasebegomelë. Dilia Yesu Geleso i fügäigi baala negei amo Godea bauia amila nowelasi amoda amo.

<sup>11</sup> Igi amoda mosö olelo dilia hamomolöi made gabulahilä, memelela fisi amo geloi dafidilo dibeda

amomelë.

*Gë Udälo 118.22*

<sup>12</sup> Elöea damula moholöi made neamelë. Sege föi sulubadelagi neebe amola nili damula moholö udia dolögali ëi elö made imelëla Fidaea säi.

<sup>13</sup> Ili beahamelebe Fida Yonelea gelolahilä bedäla made säsebe amo beala ele sugulu made hamoi, nelebo afädë oodo bealage made hamoi dolö nelo amo helësëlahilä ili fudugi. Fudugilahilä gaso, ilia helësësalea, ele Yesubalä neë melëlo amo helësëi. <sup>14</sup> Amala helësëlahilä ilia beahamelebe emo nafadei dafidi wahilasi amo elebalä neebe amo bealahilä, elema ado säla obëgëmolöi made meli. <sup>15</sup> Amalebe ilia ele Galisolö mosöa amila segea oodola doadigila mosalai. Ele asibua hilido didiäla <sup>16</sup> sähalea, Nilia malö äüdä amolema abilia hamomolödu. Elea dolöea hamomolöi made gadoi afädë gelola hamoi amoda udia dolö Yalusalame nefolalebe amolia dawadigisa maadei. Elea amala made hamoila sämolö uli gabu. <sup>17</sup> Amaimo, säla daidoloea, nilia ele nufulöie sähaleada, elema ëi go säla udia dolö odoama bu säla imabiola gelola sädila säi. <sup>18</sup> Amala sälahilä ele welahlä ele maasebegi elema gelola sähalea, Alia Yesuie ëi säla udia dolö odoama amala olelemabiola säla i. <sup>19</sup> Amala säsebegi, Fida Yonelea säla obëgësalea, Godeie siigi, alia dilia säse go gadola nabala hamomolö amo dofeale ma, Godea säsebe amo gadola nabala hamomolö amo dofeale. Dilia memelema. <sup>20</sup> Amai gaso, alia meli amoge nabi amoge sämolö amo, made sämolö ulimelëla säi. <sup>21</sup> Amala sälahilä ilia elema säi amo gadola bu elö ele nufulöie ado gelolafali säla ialahlä ele nufulö fu made beasebegi fisigäla fisigi gai. Fisigäi amoie mida, udia dolö nefolalebe amoli sulubadelaage Godea hamoi amoie ië ëi gauia adaha neebe amo helësëlahilä amai. <sup>22</sup> Dolöea hamomolöi made gadoi hamola dolö wahilasi amo eda gäheo i nabülasi biyidia baagi nelo.

*Ili Godema adosalea ië ado mala olelemolöie geloi imalola säi*

<sup>23</sup> Fisigäsebegi Fida Yonele helele sosogo neebe obëgëlahilä, gobela ilo busa amoliage dafidilo amoliage elema ado säi amo elea ilima säla iaha maadei. <sup>24</sup> Säla i amo nabaha maadelahlä, ili sulubadelaage hame afädë negela Godema adosalea, Dafidilo Geloie-e, muge naga föige ödä duhuluge nelebo sulubadela amoligi dibe neebe sebe amoge dia hamosa maadei. <sup>25</sup> Siiba nilile mäu Debidi, die hamoi hamolasilo amoma aligila Eleloi Gesamia ado säi amo gowe.

Edoie udia dolö fii odo ilia edefademalä mihalähamu nea.

Edoie udia dolö amolia nali ado afädë negesamu nea.

<sup>26</sup> Sege sulubadelaie beaha aligilo gini nefolalo amolia nudumolöie daijala nefolalo.

Sigi aligilo amolia gegedolahilä Dafidilo Geloie amoge ië Afädë Memelei amoge daia sasagala neala golila

säi.

*Gë Udälo 2.1,2*

<sup>27</sup> Amo gadola Heledoeage Bödiasa Bailadiage elebalä udia dolö fii odoage Yu udia dolöage dofä gaamu gowegi die hamoi hamolasilo hedabifali Yesu, dia memelei amo, daia sasagala neala golimolöie gegedoi. <sup>28</sup> Ili amala hamoi amoda dafidi die geloiage asigiage daijala negei amo gadola gausiala digai. <sup>29</sup> Amaimo, Dafidilo Geloie-e, ilia nili nufulöie ado gelola säha nelo amo dia walio asigimalo. Die hamoi hamolasilo nilia bedäla made gelola nea die ado mala säla olelemolöie geloi imalo. <sup>30</sup> Amo gala oloi dibe amo wahilasimolöiege, die hamoi hamolasilo hedabifali Yesuie ëia dolöea hamomolöi made gadoi hamolasimolöiege hido elöi hamolasimolöiege, die naabo mogodigimalola säla adoi. <sup>31</sup> Godema adola wagai amole mosö ili gedola sefolalo amo fogola Eleloi Gesamia ilima nobasebegi, Ili Godeie ado mala bedäla made gelola säla iaha nelo.

*Udia dolö sulubadelaage odoa ugila negei*

<sup>32</sup> Udia dolö Yesuma asigi afädë negei nefolalo amoli sulubadelaea hame afädë negela asigi afädë negela nelo. Amala negela neada afädëa ie nelegei dibe amo bealahilä goweda niemelëla sälo made, hido hidolale nelegei dilo amoda ili sulubadelaie ua gadoi dilo. <sup>33</sup> Abosolo dolö amolia gelola nea Dafidilo Geloï Yesu baagolahilä nowela neala gelola säla olelesa nelo. Godea ili sulubadelaema edefademalä obeägilasilahilä hedabola ugila negesa nelo. <sup>34</sup> Ili sosogo nefolalo amoligida nelebo afädë ufoida made. Ilike sosogo odoaea segege mosöge munia bidi nealahilä <sup>35</sup> abosolo dolö amoligali ilo. Amala ialahilä abosolo dolö amoliada udia dolö odoa ufolala adi nefolalebe amoligali mogela ilomelë.

<sup>36</sup> Amo gadola dolö afädë nelo amoie ëida Yosebe. Ie ëi elö abosolo dolö amolia negeida Banabasa. (Banabasa amoda ado gowe gadoi. Iso asigi neala gelolasilo dolöla säla ëi negei.) Banabasada Ilibai sosogo nelo. Eda ödä södülogi Saibulusi fii. <sup>37</sup> Amea ie sege afädë dolö elöma muni nii amoda gaula maala abosolo dolö amoligali i.

## 5

### *Ananiasa Safailalea hamoi*

<sup>1</sup> Amala hamolo amo gadola dolö afädë Ananiasa ie udia Safailalea elele sege dilo amogi dolö afädëma bidi nii. <sup>2</sup> Muni bidi nii amo Ananiasaea mogela odoa hile negesi. Ie udiaeege amo dawadigi sulo. Amalahilä Ananiasaea muni odoa amo gaula awäla abosolo dolö amolima i. <sup>3</sup> İasebegi Fidaea Ananiasama sähalea, Dia Eleloi Gesamima wäfalä sämolöie mugabe Saidani die isogi nobamäia fu igo edoie. Dia die segeie bidi nii muni amogi odoa dihile negei gabu. <sup>4</sup> Sege bidi made nealada dihile dilo madele. Bidi nealahiläda bidi nii amoge dihile madele. Die isogi amala hamomolö helësëi amoda edoie. Dia wäfalä säi amoda dolöma made, Godema säimelëla säi. <sup>5</sup> Fidaea säi amo nabala Ananiasa ulula digala hame doala asi. Amala hamoimelëla säi amo nabelo amoli sulubadelaea edefademalä bedäi. <sup>6</sup> Amala hamosebegi, malisäea baagoi amo faguloea usulala gaula awäla bausi.

<sup>7</sup> Aoa ohodoa baagibua egoama hamoi amo helësëla made idia amo misi.\* <sup>8</sup> Amala maasebegi Fidaea ema nabahalea, Nema sämo. Alia sege muni nii amoda hä amo wäla niilela nabi. Amala nabasebegi, ea säla obögësalea, Ä. Alia muni nii amoda hä go wälamelëla säi. <sup>9</sup> Amala säsebegi, Fidaea ema sähalea, Diage diguaeage ali haligilaea Dafidilo Geloïie Gesamia abilia hamosebelela bimolöie fedogola meli amoda edoie. Digua baulo amolia dige gaula moholöie mumusogi digamolöie mosö idiliba maaha neamelëla säi. <sup>10</sup> Amala säi amole fodolofalä Fidaie emo mia ulula digala hame doala asi. Amala hame doala asi amole malisä amolia maala e baagoi dibe amo bealahilä ilia ie domalo segea gaula awälahilä egoa bauia amimu bausi. <sup>11</sup> Udia dolö Geleso sosogo nefolalo amolia edefademalä bedäla didigai. Amala hamoimelëla säi amo nabelo sulubadelaeege amai.

### *Dolöea hamomolöi made gadoi hamoi*

<sup>12</sup> Udia dolöbalä nea abosolo amolia dolöea hamomolöi made gadoige hido elöige yafie hamosa nelo. Amoli sulubadelaeadä hame afädë negela Solomonöie hadai dibeä amimu gegedosa aligilo. <sup>13</sup> Ili gegedosebea amida udia dolö odoa nefolalo amolida ilibalä bedälo. Amala bedäi nea gaso, ili beahaleada ilile ëi gauia adaha aligilo nelo. <sup>14</sup> Amalo gaso, udia dolö yafie nefolalo amolia Dafidilo Geloïma asigi afädë negesa maadelahilä Geleso sosogo nefolalo amolibalä baai. <sup>15</sup> Amalebe oloi difolalo amoli gaula mafula idiafa Fida awäsido fëo fösisisila nidila negela digi, dafudaia gaula maala nidila negela digi. Amoie mida, ilia helësësaleada, Fida e maasegi, ie ausuluboea oloi difolalebe amoli dabemäia amai. <sup>16</sup> Sege odoa Yalusalame ga madela dibeamadi amodila udia dolö yafie oloi difolalo amolige mugabe fedai difolalo amolige gaula gegedosebegi, sulubadela neala hedabola wahila digisa maadei.

### *Selesaia fia abosolo dolö ftsigäi*

<sup>17</sup> Amala hamosebegi, gobela ilo Busa Edefade nelo ameage, amase, ebalä aligilo Sadiusi sosogo dolö amoliage naabo gëi. <sup>18</sup> Amala helësëlahilä ilia abosolo dolö amoli neala nafodolahilä gaula awäla galabaia mosöa negesi. <sup>19</sup> Amala negesi dibege gasigi Dafidilo Geloïie selesaia fii afädëa galabaia mosö idi gai amo doga negesilahilä, ili sigi gaula segea doadigila fedalahilä <sup>20</sup> ilima sähalea, Dili afialahilä Godeie mosöa nea namolö gähe goweie mala sulubadela udia dolöma olelemalola säla i. <sup>21</sup> Amala säi amo nabala abosolo dolö amoli yosefalä Godeie mosöa ami awälahilä udia dolöma mala olelesa nelo.

Gobela ilo Busa Edefade nelo amoge ebalä aligilo nefolalo amolige maalahlilä ilia ado sämolö Yu udia dolöie dafidilo asigi gäwi nefolalo Galisolö amoli gegedomalai. Gegedolahilä ilia sähalea, Galabaia mosöa amila dolö amoli sigi misäiala säla imolö mosalola säi. <sup>22</sup> Amala

\* 5:7: Molö gaiä deala molöi gadoi baagibua.

säsebegi, idihë aligilo amolia galabaia awälähilä beahamelebe, dolö amoli maade beala Galisölö dolö amolima säla imolö obëgëi. <sup>23</sup> Obëgëlahilä ilima sähalea, Nilia galabaia mosö idi fëdöla gai amoge idihë aligilo idi gasia nefolalebe amolige melimelë. Bealahilä nilia idi gai amo dogala beahamelebe ami dolö afädë sebege made melimelëlä säla i. <sup>24</sup> Amala säla iasebe amo nabalahlilä, Godeie mosö idihë aligiloie beaha aligilo ameage gobela ilo busa amolaliage goea edo besela galamolödula helësëla säla säosäosa dilo. <sup>25</sup> Iliä amala asigi säosäosa dibegi dolö afädë maalahlilä ilima sähalea, Nabuö. Dolö dilia galabaia mosöa negei amoliada Godeie mosöa udia dolöma mala olelesa nefolaleamelëlä säla i. <sup>26</sup> Amala säla i amo nabalahlilä, idihë aligiloie beaha aligilo amola, idihë aligilo amolali awälähilä ili sigi obëgëi. Udia dolö nefolalebe amolia ili igia nufidolea bedälahlilä, ilia ilima nelebo afädë made hamola, geleä awäla sigi obëgëi.

#### *Abosolo ilia bedäla made ado säi*

<sup>27</sup> Ili sigi obëgëlahilä Galisölö dolö sefolalebea ami ifosi. Ifosilebe gobela ilo Busa Edefade amea ilima sähalea, <sup>28</sup> Nilia dofä dolö amoie ëi säla olelemabiola gelola säla i. Amai gaso, nabuö. Mala amomu Yalusalame udia dolöma säla iasebegi ilia dilile ado nabaha maadei gabio. Amase, dolö baagoi amoge diliada nilia nufila sämolöi nebegola säi. <sup>29</sup> Amala säsebegi, Fidala abosolo odoa amola ilia säla obëgësalea, Nilia dolöea säse amo gadola made, Godea säse amo gadola hamomolöi galea. <sup>30</sup> Dilia Yesu baagomäia iigi baala negei amoda nilile mäuie Gode nebe amea e nowela ifosimelë. <sup>31</sup> Eda Dafidiloge Damula Auloge namiäia Godea e gauia adala ie naabo dafädimadi ifosi. Godea amala hamoi amoie mida gowe, Isilale udia dolö asigi besumäiage nafade hamoi amo hëla fisimäiage fu imolöie amala hamoi. <sup>32</sup> Niliaage Eleloi Gesami Godea ie mala hamolo nefolalebe amolima ilo ameage amala hamoi amo dawadigila siia bealahilä säla ulufadigisa aligilo nili nefolalebewemelëlä säla i.

#### *Gamelielea Galisölöma ado säi*

<sup>33</sup> Galisölö dolö amolia ilia säi amo nabalahlilä edefademalä habobala abosolo amoli baagomäia nufulöla helësi. <sup>34</sup> Amala helësësa dibegi, Galisölö dolö sefolalebea amoligi afädë nowei. Eda Felesi dolö, eada mala säla negei amo olelelo. Ie ëi Gameliele. Udia dolö nefolalo sulubadelaeada ëi sälo neala sälo nelo. Amea sähalea, Dolö go ili oodola segea namolö mosalamola säi. <sup>35</sup> Amala sälahilä Galisölö dolö amolima sähalea, Isilale dolöla dili-e, dilia dolö go ilima nelebo afädë hamomolö helësësa galëda, dafidiale fädäla helësëmalö. <sup>36</sup> Aso, sedade nelola made, Deyudasa e maalahlilä ea sähalea, Neda dolö ëi sälomelëlä säsebegi, udia dolö hädali buyidiya gadoia e bëgëla afiai. Amai gaso, e baagomäia nufudasebegi e bëgëla aulo amoli dusudasisalea mala olelei amo hogosa helei. <sup>37</sup> Amase, hobeala gamanea udia dolöie ëi dëdëselo amo gala, Galili fii afädë, ie ëida Yudasa, misi. Maalahilä ie adoea udia dolö yafie neaha maadesebegi, eege baagomäia nufudasebegi, e bëgëla aulo amoli sulubadela dusudasisa maadei. <sup>38</sup> Amaimo, walio na dilima säha, dolö go ilima afädë hamola made hä guilasimalo. Iliä daiäi amoge hamoi amoge hili döfelëla hamosa galëda, amoda hogosa helemolömelë. <sup>39</sup> Ma, Godea hamomäia daiäi hamosa galëda, dilia haimolö ulimelë. Dilia Godebalä ado neloeamelëlä Gamelielea säi. Amala sälebegi Galisölö dolö amolia Gamelielea säi amo gadola hamodeläla helësi.

<sup>40</sup> Amala helësëlahilä, ilia abosolo amoli welahlilä mofiassebegi, ili fëgämalai. Fëgälahilä Yesuie ëi säla bu elöda olelemabiola sälahilä ili fisigäi. <sup>41</sup> Amalebe ili Galisölö nebeea amila obeägila segea doadigila asi. Obeägila asi amoie mida gowe, Yesuie ëigi hewai amo Godea dofeala helësi amogi. <sup>42</sup> Amalahilä segeyo sulubadelagi Godeie mosöa amige udia dolö mosöa amige Ado Mala Hedabi olelesalea, Godea Afädë Memelela ifosi amoda Yesu neamelëlä fisila made, säla iahamu nelo.

## 6

#### *Abosolo ili ugila negemäia ilia dolö gifalädäliä memelei*

<sup>1</sup> Segeyo amo gaaluda, Yesu bëgëla aulo malei maala baahamu nelo. Giligi ado sälo amolia Alamege ado sälo amolibalä gëgësalea sähalea, Dilia segeyo sulubadelagi mogela ilo amogida nilile udia didalo seba amoligali made ilomelëlä säla gëgëi. <sup>2</sup> Amala gëgësabegi abosolo giwilasi amolia Yesu bëgëla aulo odoa amoli sulubadela gegedomalolahlilä ilima sähalea, Nilia Godeie ado amo fisilahilä molö mogemolö amo dofea made gabumelë. <sup>3</sup> Amai gabugi, nedoola, dilia dili nebegogi dolö gifalädäliä mogoi neala sälo, Godeie Gesami nobai, hedabola dawadigi, amomu memelemalo. Memelelahilä, hamoi amo ilia sigi namiäia ifosidelä. <sup>4</sup> Amalahiläda, niliamu Godema adosa namolö amoge udia dolöma Godeie ado mala säla imolö amoge hamosamu namolölamelëlä säi. <sup>5</sup> Amolia säi amo udia dolöea nabalahlilä sulubadela dofea gabula säi. Amalahilä, ilia Sidibeni memelei. Sidibeni eda asigi afädë negelahilä gelola nea Eleloi Gesamige ema nobai nelo. Amase, Filibige,

Bologolusage, Niganologe, Dimonoge, Bamenasage, Nigolasage ili memelei. Nigolasa eda Ādiago fii. Eda Yu fii made gaso, dafidi Yu udia dolōie mala neala gaulahlilā ilibalā dila nelo. <sup>6</sup> Dolō memelei amoli abosolo ili neebee sigi maala ifosisebegi, Godema adolasila ilia ilma naabo negesi.

<sup>7</sup> Amala hamolahilā Godeie ado mala sāla daidoi. Yalusaleme ami Yesu bēgēla aulo udia dolō yafie, sāmōlō asusugai awāla baai. Gobela ilo dolō yafieage Yesuie mala gaula mogola asigi afādē negei.

#### *Yu ilia Sidibenibalā gudi*

<sup>8</sup> Godeie ugila negeloge geloige Sidibenima nobalasissebegi, e udia dolōbalā nea hīdo elōige dolōea hamomolōi made gadoige gelola hamosa nelo. <sup>9</sup> Amala hamosebegi, dolō odoaea Sidibenibalā gēgēsa nelo. Yu udia dolō amolile gedolo mosō afādē amōie ēida Fisigāi Amoli Dilo Mosōla sālo amoligi nelo. Dolō amolida Salinialage Alegisādialilage misi. Ilibalā odoage Silisiala Esialage misi amoli sulubadelaea Sidibenibalā gēgēsa nelo. <sup>10</sup> Gēgēsalea Eleloi Gesamia Sidibeni hedabola dawadigilasi amea ilia ado sāi amea e aulo dabemolōi made nelo. <sup>11</sup> Ilile adoea aulo dabemolōi made bealahilā, geleā hado musūgā awālahilā dolō odoama sāhalea, Sidibenia Mosesele Godele gagadela sāse nabimelēla sāmālola sāi. <sup>12</sup> Amala sāi amogi udia dolō nefolalo amoliage, dolō dafidilo nefolalo amoliage, mala dawadigi nefolalo amoliage habobala mihalālahilā, ilia Sidibeni sigi gaula Galisolō dolō neebee ami asi. <sup>13</sup> Amalahilā, ema ilia wāfalī babala sāsāla sāmāia dolō odo sigi maalahlilā amolia sāhalea, Dolō neebe egoweada sege Godea hile nafolai goge, Ado sāla negei dibe amoge gagadesamu nelomelē.\* <sup>14</sup> Eada gomalā sāimelē. Nasalese fii Yesuea mosō go hailsa fisila, mala Mosesea sāla negei amo nalaba maaha nelo nilīa nabaha neebewege neala bedefamolōmelēla sāi amo nilīa nabimelēla sāi. <sup>15</sup> Amo sāi amo nabalahlilā, Galisolō dolō sefolalo amolia Sidibeniiē odagi siila beahamelebe, selesaia fiīe odagi gadoi neebe melī.

## 7

#### *Sidibenia Galisolō dolō amolima ado sāi*

<sup>1</sup> Amaimo, gobela ilo Busa Edefade nelo amea Sidibenima nabahalea, Iliā ado sāsebege dofā sāsebelela nabi. <sup>2</sup> Amala nabelebe Sidibenia sāla obēgēsalea, Naado nedoola dili-e, ado sāhago. Nabualo. Nilīle naua māu Abalahama e Halana made awāla Mesobodemia nebegi, Gode yo digalo hīdo elōi amo Abalahama neebee maala besela galai. <sup>3</sup> Maalahilā ea ema sāhalea, Die segege sosogoge digīla sege na olese amogi mosalola sāi. <sup>4</sup> Amala sāi amo nabalahlilā, e Galadia sege digīla Halana namolō asi. Īe eedo baagolahilā, sege walio dili neebee ami namiāia e Godea namolō mosalola sāi. <sup>5</sup> Amo gala ema sege fufu afādē nofela made ī. Sege afādē emo afādēa emesamolōige dofā made ī. Amai gaso, Godea sege amogi dige die diaua māu ilige dili namiāia imolōmelēla Godea Abalahama e malō maade nebegi sāla negei. <sup>6</sup> Godea gomalā sāi. Die diaua māu amoli elōie sege namolōmelē. Ami gāheo i hādali biyidia galabaia hamoi gadoi hamolasisa neebe amo gaaluda, dolō elōea ili neala sēlasimolōmelē. <sup>7</sup> Amamolō gaso, ili galabaia hamoi gadoi hamomāia hamolasilo fii amolibalā na gudimolōmelē. Gudilahlilā ili sege amo digīla awālahilā, sege wegi nea nīe ēi gauia adamolōmelēla Godea sāi. <sup>8</sup> Amase, Godea asialo made ado elōi sāla negei amōie ea nofe negela Abalahamama gafodo damulasilo mala negei. Amala negei amo gadola Aisaga emea e āgūlebeda segeyo gōdōgi Abalahamae Aisagaie gafodo damulasi. Hobeala Aisagaie malō Yeigabamage amai. Amalahilā Yeigabaie malō nilīle māu giwilasi amolimage amai.

<sup>9</sup> Nilīle māu gidālasī amolia giwī afādē Yosebema naabo gēlahilā, eda Isibi sege galabaia hamoi gadoi hamolasilo namiāia odoama muni imolahilā muni nii. Isibi sege sigi asi gasoda, Godea e sigi nea <sup>10</sup> yōi elō elōla sulubadela dibe amila e damula awāla ugila negei. Isibi sege beaha algīlo Gini Felauē siigi, Godea Yosebegali hedabola dawadigilasi loge mala hedabi hamolasimāiege ī. Amo bealahilā, Isibi udia dolōge, amase, ĩe mosō sulubadelage sigi namiāia Yosebe memelela ifosi.

<sup>11</sup> Amalahilā Isibi sege sulubadelagige Gainana sege sulubadelagige sidē i maasebegi, udia dolō edefade yōsa nefolalo, nilīle māu ilia molō abidi galea walebelela hogoi gaso, afādē made beagolei. <sup>12</sup> Aso, molō made nebegi, Isibi sege molō gaeamelēla sāi amo nabalahlilā, Yeigabaea nilīle māu nelo amolima degabo mi gāwila aftamola sālahlilā ili fisiga gai. <sup>13</sup> Amalahilā bu elō awāsebegi Yosebea ĩe edoolalima, neda Yosebemelēla ulufadigila sāla ī. Amala sālahlilā nebegi, Felauēa Yosebe sosogo amoge dawadigi. <sup>14</sup> Amalahilā, Yosebea ĩe eedo Yeigabala e sosogola Isibi misialola sāsi. E sosogo gegeadolada nabūlasī gifalādaliāie odoi bia. <sup>15</sup> Misialola sāsi amo nabala Yeigaba Isibi digala nebegi, hobeala e baagoi. Amalahilā nilīle māu amolalige baagosebegi, <sup>16</sup> ilile domalo amo Segeme segea

\* **6:13:** Sege Godea hile nafolaila sāi amoda Godeie mosō amōie sāhalea sāi.



gaula obëgëlahilä, sege dafidi Abalahamaea Segeme ami Hamolöie malöma baulo sege bidia niia ami bauli.

<sup>17</sup> Godea Abalahamama ado säla negei amo gausiala digamolö fu ga madesalea, Isilale udia dolö Isibi nefolalo amoli sosogo malei häula besela galai. <sup>18</sup> Malei amala nebegi, hobeala beaha aligilo gini elö amea Yosebe made dawa nea, Isibi udia dolö sigi nelo. <sup>19</sup> Gini amea nili sosogo amoli dahila nealahilä, nilile mäu sëlasila, ilile malö dubo baagomäia segea sadia gamalai. <sup>20</sup> Amo gaalu, Moseseie emea e ägüla misi, malö amoda Godeie siigi hedabifali. Aube ohodoo eedo hi mosöa ami sigi nelo. <sup>21</sup> Amalahilä e segea negei dibegi, Felauie idiwia neala gaula awälahilä, hile malö folo wäla fosa nelo. <sup>22</sup> Amala fosololahilä ilia Isibiie dawadigilo amo sulubadela Mosesema olelei. Amasebegi ea ado adomolö amoge mala hamomolö amoge dolö geloi edefade nelo.

<sup>23</sup> Mosese e gäheo i nabülasi biyidia baagilahilä ie edoo Isilaleie malö amoli neebee söfë moholö dialeala helësëi. <sup>24</sup> Awälahilä ea beahamelebe Isibi dolö afädëa Isilale dolö afädë nufudaha neebe meli. Amalebe Mosesea Isilale dolö amo damula awäla Isibi dolö amo hi asiala hamoi amoie hi e bidigi nufudala baagoi. <sup>25</sup> Mosesea helësësaleada, ie edoo amolia Godea Moseseie naaboea ili fisigamolö gabula helësësa dialeala helësëi. Gasoda, iliada amala made helësëi nefolalo. <sup>26</sup> Amo aiyo amogi Mosese besela galala beahamelebe Isilale dolö äudä nudusa neebe bealahilä, ele neala aealasilälälahilä elema sähalea, Malö äudä-o, didoo madele. Halimu edogi nudusala nabi. <sup>27</sup> Amala sälebe, mi hamola nudulo amea Mosese bobala sadia galahilä ema nabahalea, Di nilile sigi aligilo namiäiage, gudi mogelo namiäiage di nowëa memelesio. <sup>28</sup> Aiyo dia Isibi dolö nufudadigi amo gadola nege nufudadigidelä misi nealela nabi. <sup>29</sup> Amala säi amo nabalahlilä Mosese e Midiana segea fisäla awäla nelo. Ami nea ie dolö malö äudä sogobai.

<sup>30</sup> Ami gäheo i nabülasi biyidia baagilahilä, Mosese e sege nafade udia dolö aligilo made sege Sainai bi ga made neebee ami nebegi, i holöfali afädëgi nulo söagila selesaia fii afädë Mosesea bimäia ulufadigila nelo. <sup>31</sup> Amala hamosebe amo beala Mosese e fudugilahilä ga madela hedabola fädäla bimolö awäha nebegi, Dafidilo Geloie ado nabi. <sup>32</sup> Dafidilo Geloia sähalea, Neda die diado amolile Gode neawe, Abalahamaiege, Aisagaiege, Yeigabaiege ilile Gode neawemelëla säi. Amala säsebegi, Mosese e edefademalä fudugila emo gigisëlahilä bimolö bedäla nelo. <sup>33</sup> Bedäla nebegi Dafidilo Geloia ema sähalea, Sege di nebegoda na nihile nafolai sege amea dia emo usililo salugai go gimo. <sup>34</sup> Nïe udia dolö Isibi nefolalebe amolima ilia edefademalä neala sëlasisebe amo siia melimelë. Ili dudumigila diisa dibe amo nabalahlilä, na ili damula awäla sigi obëgëmolöie digai neawe. Amai gabugi, hä misië, na di Isibi mosalahagomelëla säi.

<sup>35</sup> Dafidi Mosese ema ilia habobalahilä ema säla obëgësaleada, Di nilile sigi aligilo namiäiage, gudi mogelo namiäiage di nowëa memelesiola säi amoda Mosese amoma säi gasoda, selesaia fii afädë i holöfalgila ulufadigi amoie naaboea dolö amea ili sigi namiäiage damula mosäiage Godea e fisiga galasimelë. <sup>36</sup> Dolö amea Isibi segea neage, ödä duhulu ëida Heale Uii dibeami neage, gäheo i nabülasi biyidia sege nafadeia ami neage, hido elöige dolöea hamomolöi made gadoige hamola ili sigi asi. <sup>37</sup> Mosese amea Isilaleie malöma sähaleada, Godea dilile didoomadila aligila afädë bea sälo ne gadoi dilile bea sälo memelela ifosimolömelëla säi. <sup>38</sup> Mosese amoda selesaia fii afädëa Sainai bii amula ema ado säla iasolo amo gala sege nafadegi gegeedolo amolibalä nelo. Nilile naado amolibaläge nelo. Ado diamolöi diamolö amo nilima säla imäia ema i.

<sup>39</sup> Amaimo, nilile naado amolia ea ado säi amo gadola hamomolö habobalahilä, e bobala sadia gala ilile asigida Isibi obëgësa nelo. <sup>40</sup> Amala asigila nea ilia Alonoma sähalea, Niligali gode odo naaboea hamomalo, iliadale nili sigi mosäia. Mosese amea nili Isibilahilä segea moholöie sigi nelo amoma edo gadoi besela galaidu nilia dawa madela säi. <sup>41</sup> Amala säsolo amo gala ilia sugua afädë gao emalö gadoi naaboea hamolahilä wäfalä gode amoma sugua gadoi elö elöla nufudala göa nelegela i. Nilia naaboea hedabi hamoi gabula helësëlahilä ilia edefademalä obeägisa nelo. <sup>42</sup> Amala hamolebe Godea ili baagi iala ilia mu ilibia gasumilima göa nelegemäia fisigisi. Amo gadola bea sälöie bebägi dëdëla negei amo gowe. Isilale fii dili-e, gäheo i nabülasi biyidiagi sege nafadegi nea sugua gadoi nufudala göa negela negali iledu.

<sup>43</sup> Amaimo, Molegeie balai mosö dilia gaula asi. Amase, dilile gode Lëfanaie gasumili gadoige, dilia göa nelegemolöie naaboea hamoi amo dilia gaula asi. Dilia amala hamoi amea na dili Babilono holöbö baagia gala bobala mosäia fisiga gamolömelëla dëdëla negei dialea. Amosi 5.25-27

<sup>44</sup> Gode ilibalä neebe amoie helësëla balai mosö amo nilile naadolalibalä sege nafadeia ami nelo. Mosö amoda Godea Mosesema gowe gadoi hamomalola säla olei amo gadola ilia hamoi. <sup>45</sup> Hobealada nilile naado amolia ilile eedo bedefala balai mosö amo gaula Yasuabalä asi. Yasuabalä awäha nea Godea udia dolö fii odo nefolalo amoli nesila digila

sege amo iligali bedefala aligi awāha neada balai mosō amo gaula awāha nelo. Amalahilā balai mosō amo nebegimu beaha aligilo Gini Debidi besela galai. <sup>46</sup> Godea ema obeāgisebegi ea Godema nabahalea, Na mosō afādē Yeigaba fii amolile ulimolōda dofealela nabi.\*

<sup>47</sup> Amala nabi gaso, Solomonoea Godeie mosō uli.

<sup>48</sup> Amai gaso, Ilibia Edefade neebe ameadā mosō naaboea uligida aligilo made nea. Bea sāloea sāi amo gadola,

<sup>49</sup> Dafidilo Geloia sāhalea, Muda nīe beaha aligimolōie filo dialeamelē. Amase, naga fōida nīe emoea emesaia idala filo dialeamelē. Dilia ne namolōda mosō abodo gadoi olasimolō. Amase, ne hele fimolōie fuda abidi dialea.

<sup>50</sup> Nelebo dibe goda sulubadela nīe naaboea hamoi madelela sāila sāla dēdēla negei dialeala sāi.

*Aisaea 66.1,2*

<sup>51</sup> Aso, Sidibenia ilima sāhamu nea sāhalea, Dilile iso asigi geloifali nebege, bobaeage gēheage asigi afādē made negei amo wālasi nebege. Eleloi Gesamima habobahamu nebege. Dilida dilile diado amoli nelo amo gadoimu nebege. <sup>52</sup> Bea sālo nefolalo amoligi afādē dilile diado amolia neala made sēsa neloda nowē. Siiba dolō mogoifali moholōmelēla sāla digi amolige ilia baagomāia nufudadigisa nelo. Amase, walio dilia dolō amo hololōlahilā baagomāia nufimelē. <sup>53</sup> Diligali Ado sāla negei amo selesaia dolōma aulo negela ī amo dilia gaula nea, amo made hamolo nebege dilia amaila Sidibenia sāi.

### *Ilia Sidibeni igia nufudala baagoi*

<sup>54</sup> Sidibenia ado sāi amo nabalahlilā, ilia edefade mihalāla ema bese ali nalēgēi. <sup>55</sup> Amasebegi, Sidibeni ema Eleloi Gesami nobala nea, ea selesaia mosōa sida adogola nea beahamelebe, Godeie yo digalo hīdo elōi amoge, Yesu e Godeie naabo dafādīmadi neebe amoge meli. <sup>56</sup> Siila nea sāhalea, Bimo. Selesaia mosō dogā negei dibe amoge Dolōie Malō amo Godeie naabo dafādīmadi neebe amoge beahamelēla sāi. <sup>57</sup> Amala sāi amo nabala, ilia gelola hoala digila naaboea ilile gēhe galahlilā, e neebea gaalu fodolofali nawela awāla <sup>58</sup> e gaula gaamu yala baagia sadia galahlilā, e baagomāia igia nufudaha nelo. Dolō dafidi ema babala sālo amolia ilile fagulo sedade daia salugai amo gilahlilā, malisā afādēie emo mia nidila negei. Malisā amoie ēida Solo. <sup>59</sup> Iliā Sidibeni e igia nufudaha nebegi, ea Godema adosalea, Dafidilo Geloī Yesu-o, dia nīe gesami nea nimola sāi. <sup>60</sup> Amala sālahilā, emo gumu sasagala salea, gelolafali sāhalea, Dafidilo Geloī-e, ilia nafade hamosebe goweīeda ili sē imabiola sālahilā, Sidibeni e sūwia dilo wāla adi.

## 8

<sup>1</sup> Sidibeni nufudadigi amogi Soloea īe siigi dofea hamoila helēsēi.

### *Sloea Godea udia dolō wela ifosi nefolalo amoli neala sēlasisa nelo*

Segeyo amo gaalu, Sidibeni nufudalahilā, Godea Yalusaleme udia dolō wela ifosi nefolalo amoli mi gāwila edefademalā gelola neala sēlasisa nelo. Amalebe ili sulubadela fisāla awāla Yudia segeamadige Samelia segeamadige dusudasila afiaha maadei. Abosolo ilimu Yalusaleme ami nelo. <sup>2</sup> Dolō odoa Godeie mala nabelo nefolalo amolia edefademalā didigaola Sidibeniie domalo bausi. <sup>3</sup> Amalahilā Soloea udia dolō Godea wela ifosi nefolalo amoli nufudala īalalesa nelo. Amala hamosa nea mosō neebe amo sulubadelagi awālahilā, udiage dolōge gaula dusugaia awāla galabaia negesa nelo.

### *Samelia segea Ado Mala Hedabi sāla ī*

<sup>4</sup> Udia dolō fisāla dusudasila afiāi amolia sege ili afiāido amo sulubadelagi Ado Mala Hedabi sāla īā afiāi. <sup>5</sup> Amala afialahlilā, Filibi Sameliaie gaamu afādē dibeā ami awālahilā, ea ilima sāhalea, Godea Afādē Memelei amo hā misi neamelēla sāla īaha nelo. <sup>6</sup> Filibia ado sāla ī amo udia dolō gegedoi amolia hedabola nabalahlilā, ea dolōea hamomolōi made gadoi hamola digisebe amo beala ili sulubadelaea ea ado sāsebe amo nabaha nelo. <sup>7</sup> Amaha nea, udia dolō yafiema mugabe fedai nefolalo amoli nesila digisebegi īalala gāwila doadigila awāla digi, amase, dolō emo nafadeige, dolō fii siige yafie wahila digisa maadei. <sup>8</sup> Amala hamosebegi, gaamugi ami fii udia dolō amolia edefade obeāgisa nelo.

<sup>9</sup> Gaamugi ami dolō afādē īe ēi Saimono sulo. Dafidida ea golē hamosa nelo. Samelia fii udia dolō fudugimāia elō elōla hamosa nelo. Ea hīmu sāhaleada, Neda ēi sālo edefademelēla sālo. <sup>10</sup> Amase, dolō odoa ēi sāloge, memasage sulubadelaea Saimonoie ado nabaha aligilo. Amoli sulubadelaea sāhaleada, Godeie geloi amo ilia Edefadela sālo amoda amola sālo. <sup>11</sup> Saimonoea segeyo yafegi golē hamosa nelo amogi ili neala fudugilasilo amea ilia ea sāsebe amo nabaha nelo. <sup>12</sup> Amai gaso, Filibia ilima Godea Beaha Maadela Sigi Neebe amoiege Yesu Gelesoie ēige Ado Mala Hedabi sāla īasebegi, udiageage dolōeage, asigi afādē

\* **7:46:** Mosō amoda Yeigaba fii (Isilale udia dolō) Godegali nelebo odala īala īe ēi gauia adamolōie gobela īlo mosō.

negesebegi, ödägi gei. <sup>13</sup> Amase, Saimono eege asigi afädë negesebegi ödägi gei. Amalahilä e Filibihalä nawesa nea, dolöea hamomolöi made gadoige, geloi melëlo made gadoige hamosebe amo bealahilä Saimono e fudugi.

<sup>14</sup> Abosolo dolö Yalusaleme nefolalo amolia Samelia ilia Godeie ado mala neala gausaleala säi amo nabalahlilä ilia Fidale Yonele ili neebee fisiga gai. <sup>15</sup> Amala säsebegi, ele awäla besela galalahilä, elea Samelia udia dolö amolia Eleloi Gesami nimölä amöie Godema adolasi. <sup>16</sup> Mida, Eleloi Gesami ilibalä digala made nelo. Yesuie ëigimu ödägi gesa nelo. <sup>17</sup> Godema adolasilahilä, elea ilima naabo negesisebegi ilia Eleloi Gesami nii. <sup>18</sup> Abosolo äüdä amolea naabo negesi amea Gesami iasebe amo Saimonoea bealahilä, ea muni iahagolahilä <sup>19</sup> sähalea, Na afädëma nie naabo negesisebegi Eleloi Gesami nimolö amöie geloi amo nema imäiamelëla säi. <sup>20</sup> Amala sälebe Fidaea ema säla obëgësalea, Godea memalä imolö amogi dia munia nimolö helësëi amea, dige die munige haligila heli segea mosäiamelë. <sup>21</sup> Die isi asigi Godeie siigi mogoi made nebege. Ameada alia hamoi hamosebewegida dofä dia hamomolöi mademelë. <sup>22</sup> Dia nafade hamomolö helësëi amöie asigi besumalo. Amalahilä, die isogi nafade asiala helësëi amo hëmäia Dafidilo Geloima adomalo. <sup>23</sup> Na säi amöie mida, gesami aulo gamogai amo die isogi nobalahilä, nafade hamomolö amea di gide begi dibe go beahamelëla Fidaea säi. <sup>24</sup> Amala säsebegi, Saimonoea säla obëgësalea, Alia säi amo gadola nema made hamömäia Dafidilo Geloima nie adolasimola säi. <sup>25</sup> Amalahilä elea Yesuea elema hamoi amo säla i. Amase, Dafidilo Geloie ado malage säla ilahlilä Yalusaleme obëgëi. Obëgësalea Samelia segeie gaamu holöfalä dibeadi amogi Ado Mala Hedabi säla olela aliligi obëgëi.

#### *Filibia Idiobia dolöma Ado Mala Hedabi säla i*

<sup>26</sup> Amalahilä Dafidilo Geloie selesaia fii afädëa Filibima sähalea, Yalusalemela Gasa segea aulo idi gumadi mosalo. Idi sege nafadeido aulo amogi mosalola säi. <sup>27</sup> Amala säi amo nabalahlilä Filibi e nowela asi. Idi amogi awäha nebegi, Idiobia dolö afädë idiafa gausiai. Dolö amoda dafidi iso neadigi nelo. Dolö ameadä Idiobia udia dolöie beaha aligilo gini udia ëi Gädasi sulo amöie muni nelegeige beaha aligilo nelo. Dolö amoda Yalusaleme ami Godeie ëi gauia adala Godema adomolö asi <sup>28</sup> obëgësalea, galo sugua hosima begela dusugala aulo amogi filahlilä, bea sälo Aisaeaea bebägi dëdëla negei dibe amo nidela aligi awäha nelo. <sup>29</sup> Nidela aligi awäha nebegi Gesamia Filibima sähalea, Di awäla galo mia ga madela, galo awäse amo gadola mosalola säi. <sup>30</sup> Amala säsebegi, Filibi e baluluia galo awäse amo gadola awäla nebegi, Idiobia dolö amea Aisaeaea bebägi dëdëla negei dibe amo nidese nabi. Amo nabalahlilä Filibia ema nabahalea, Ado nidese goëda helësësebelela nabi. <sup>31</sup> Amala nabasebegi, ea säla obëgësalea, Afädëa goie mida gowemelëla nema made säla iasada, na abeahäla helësëmolöla säi. Amala sälahilä ea Filibima sähalea, Galodaia haligila fidelä fedala fimola säi. <sup>32</sup> Bebägi ado säla dëdëla negei nidei amoda gowe. Sugua sibi baagomäia nufulö sigi awäsebe amo gadolage, sibi emalö hili damusegi nafi dagala adolo made amo gadolage, ea nafi made dagai. <sup>33</sup> E neala hewalasilahlilä ie gudü mogola made säsi. E nagadaia namolöda aligila wagai amöie yaua mäuie ado nowëa säsimolöla

säla dëdëla negei dialea.

*Aisaea 53.7-8*

<sup>34</sup> Idiobia dolö amea Filibima nabahalea, Bea sälo amea, amo säi amo nowëie helësëla säi gabu, hi e helësëla säi gabule ma, elöie helësëla säi gabulela nema säla imola nabi. <sup>35</sup> Amalebe Filibia dafidi ado dëdëla negei nideia amila mi gäwila Yesuie Ado Mala Hedabi dolö amoma säla olelesa nelo. <sup>36-37</sup> Ele idiafa awähalea ödä afädë dibebe ami besela galala Idiobia dolö amea Filibima nabahalea, Bimo. Ödä dialea. Ne ödägi gemolö amo nelebo afädëa dofogamolöi gabulela nabi.\* <sup>38</sup> Amalahilä ea galo gaulo amoma beaha namiëlahilä, eege Filibige helegela ödägi digala aligilahilä Filibi e ödägi gelasi. <sup>39</sup> Ele ödägila fedalahilä, Dafidilo Geloie Gesamia Filibi fodolofalä sogobala gaula asibua Idiobia dolö amea e bu elö made meli. Amalahilä ea obeägila nelea hi aulo idi amogi asi. <sup>40</sup> Filibi e hä Asodasa gaamua neebe meli. Amalahilä e segea amila doadigila awäla gaamu dibe sulubadelagi nawesalea, Ado Mala Hedabi olela aliligi awäla Sisalia gaamugi besela galai.

## 9

### *Solo e asigi besui*

<sup>1</sup> Amo gala Soloea Dafidilo Geloie bëgëla aulo nefolalo amolima sëlasila nufudadigideläla gelola sähamu nelo. Ea gobela ilo Busa Edefade neebee ami awälahilä sähalea, <sup>2</sup> Gedolo mosö

\* **8:36-37:** Uluguea beba gowe dëdëi amogi hobea dolö odoaea ado odoa neala baala, damo 37 dëdëi. [37 Amala sälebe Filibia säla obëgësalea, Die bobaea gelola asigi afädë negei nea galëda, ödägi gemolöi dialeamelëla säi. Amala sälebe dolö amea sähalea, Ä, asigi afädë negei neawe. Yesu Geleso e Godeie Efege neala helësëlahilä gaula mogosamelëla säi.]

amolli beaha aligilo Damasaga nefolalebe amolima iɗulä, beba afädë dëdëla ïmo. Yesuie Idigi aulo nefolalebe, udiage dolöge, beagoleseda, nafodolahilä Yalusaleme sigi obëgëdeläla säi. <sup>3</sup> Amalahilä, Solo e Damasaga suägïla nebegi, mudaiala yo digalo maala fodolofali ema sege yabagelelo wäla yabagelei. <sup>4</sup> Amea e nagadaia digai dibegi, afädëa ema sähalea, Solo-o, Solo-o, edogi dia ne neala sëlasisala säse nabi. <sup>5</sup> Amo nabalahlilä e säla obëgësalea, Dafidilo, dida nowëla nabi. Amala nabasebegi, eä säla obëgësalea, Neda Yesu, dia neala sëlasisalo amomelë. <sup>6</sup> Di hä nowela Damasaga gaamugi mosalo. Dia hamomolö amo ami säla ïmolömelëla säi. <sup>7</sup> Dolö odoä Solobalä asi amolia adola made aumala nelo. Ado säse amo nabi gaso, dolö hodo made meli. <sup>8</sup> Solo e digai amo nowëia adalahilä si fisigäla meli gaso, nelebo bimolö uli meli. Uli galebeda ilia e nabelela gaulahlilä sigi awäla Damasaga besela galai. <sup>9</sup> Besela galalahilä, ami segeyo ohodoa nelo amogi bimolö uli nea, molö ödäge made naala nelo.

<sup>10</sup> Damasaga ami bëgëla aulo afädë nelo. Amoie ëida Ananaiasa. Ea sosoäla awäla beahaleamelebe Dafidilo Geloia wela sähalea, Ananaiasa-ola säi. Amala säsebegi, eä säla obëgësalea, Dafidilo Geloï-e, ne neawela säi. <sup>11</sup> Amasebegi Dafidilo Geloia ema sähalea, Di nowelahlilä idi gogi mosalo. Idi amoie ëida Mogoi Idi. Amogi awälahlilä Yudasäie mosöa besela galamolöie nowela mosalo. Yudasäie mosöa besela galalahilä dia Dasasa fii dolö afädë ëi Soloda salealela nabuulo. Mosalola säi amoie mida, eä Godema adosa neebe amoie. <sup>12</sup> Ea sosoäla awäla beahaleamelebe ïe si hedabomäia dolö afädë ëida Ananaiasa maalahlilä ïe naabo negesi meliä säi. <sup>13</sup> Amala sälebe Ananaiasaea säla obëgësalea, Dafidilo Geloï-e, dolö goeada udia dolö dihile nafolai Yalusaleme nefolalo amolima nafade edefade hamoimelëla udia dolö yafiea säi amo na nabimelë. <sup>14</sup> Nili neebëa wige udia dolö die ëi gauia adalo amoli sulubadela nafodomolöie gobela ïlo busa nefolalo amolia ema geloi ïmelëla säi. <sup>15</sup> Amala säsebegi, Dafidilo Geloia ema säla obëgësalea, Mosalo. Dolö amoda nïe hamoi hamolasilo namiäia memeimele. Eada udia dolö fii odoä amolige, beaha aligilo gini nefolalebe amolige, Isilale udia dolö nefolalebe amolige, nïe ëi ilile siigi sämäia memeimele. <sup>16</sup> Ea nïe ëigi së elö elöla molö amo na ema olemolömelëla säi. <sup>17</sup> Amala säi amo nabalahlilä, Ananaiasa awäla besela galalahilä mosö amogi nogila digai. Digalahilä eä ema naabo negesila sähalea, Nedoo Solo-o, Dafidilo Geloia ne wi misialai, di wi maahalea Yesu idiafa dia meli amea. Die si bu bimäiäge Eleloi Gesami dima nobamäiäge ne misialaila säi. <sup>18</sup> Amala sälebe fodolofali seme bebe gadoi Soloie siigila digalahilä eä bu bimolö meli. Amalebe Solo e hä nowelahlilä, ödägi gei. <sup>19</sup> Ödägi gelahlilä, molö naala gelola obëgëi.

#### *Solo Damasaga nea Yesuie mala säla ïaha nelo*

Damasaga nea Solo e bëgëla aulo amolibalä segeyo odoä nelo. <sup>20</sup> Beaha aligila made fodolofali gedolo mosöa awäla nea, eä Yesuda Godeie Efege neamelëla säla ïaha nelo. <sup>21</sup> Amalebe eä ado säi amo nabelo amoli sulubadela fudugilahilä sähalea, Udia dolö ëi go gauia adalo amoli Yalusaleme nufudadigisa aligilo amo e madele. Yawege amala hamomolöie ili nafodolahilä gobela ïlo busa nefolalebea ami sigi gaula moholöie misi madelela säla didigai. <sup>22</sup> Amalo gaso, Soloea edefademalä gelolasila ado mala säla ïaha nelo. Säla ïahalea Afädë Memelei amoda dofä Yesu e neamelëla säi amo Yu udia dolö Damasaga nefolalo amolia nabala fudugila, dofä säsebela helëselahlilä, säla obëgëmolö asusugai nelo.

<sup>23</sup> Segeyo yafie baagilahilä, Yu ili gegedola Solo baagomäia nufidedelämelëla säla didiäha dilo. <sup>24</sup> Amala didiäi amo Soloea nabi. Iliä segeyo sulubadela gasi esoage Damasaga gaamu yalala amalela digi amoie idi nogila digalo amo sulubadela Solo e baagomäia nufulöie idia negesamu nelo. <sup>25</sup> Amala hamosa nebegi gasi afädëgi Soloie bëgëla aulo nefolalo amolia Solo adu gadögi salalahilä yala baagido ëfëa begela fisiga idai.

#### *Solo e Yalusaleme nelo*

<sup>26</sup> Solo e Yalusaleme awäla, Yesu bëgëla aulo amolibalä gedola namolö helësei. Amala helëselä nebegi, eä Yesu bëgëla aulo made neala helëselä sulubadela bedäha nefolalo. <sup>27</sup> Amalo gaso, Banabasaea e sigi awäla abosolo amoli neebëa ami asi. Sigi awälahlilä eä abosolo amolima Solo e idiafa awäha nebegi Dafidilo Geloï meli amoge, eä Soloma ado säi amoge, ilima awala säla ï. Amala säla ïalahilä Damasaga awäla Soloea Yesuie ëigi ïe ado mala gelola säla ï amoge ilima awala säla ï. <sup>28</sup> Amala sälahilä Solo e ilihalä gedola nea, Yalusaleme sege sulubadelagi awäha nea, Dafidilo Geloïie ëigi gelola säla ïaha nawesa nelo. <sup>29</sup> Amala säla ïaha nea, eä Yu dolö Giligi ado adolo nefolalebe amolibalä ado adosa nea gëgësa nelo. Gëgësebegi ilia e baagomäia nufulöie idi hogosa nelo. <sup>30</sup> Amala hamosa neamelëla säi amo nabalahlilä edoolalia Solo Sisalia sigi awälahlilä e Dasasa mosäia ifola asi.

<sup>31</sup> Amala hamolahilä, Yudiage Galilige Sameliage udia dolö Godea wela ifosi nefolaloa ami aeaala nelo. Amala nea ili neala gelolasisebegi, Dafidilo Geloibalä bedäla nagadaiala nelo. Eleloi Gesamia ilile asigi falagaselasisisebegi, udia dolö odoaea asigi afädë negela ilima disa maadei.

*Fidaea Eniasa wahilasi*

<sup>32</sup> Fida e sege sulubadelagi nawesalea, udia dolô Godea hîle nafolai Lida gaamugi nefolalebea amige digala nelo. <sup>33</sup> Digala nea segea ami dolô afädê fii si dibe meli. Dolô amoïe ëida Eniasa, e imididaia diasi dibegimu gâheo i gödölasi baagi. <sup>34</sup> Fidaea ema sähalea, Eniasa-o, Yesu Gelesoea di wahilasissebege. Nowelahilä die fëo galimola säi. Amala säi amole e fodolofali nowei. <sup>35</sup> Udia dolô sulubadela Lidalage sege Salonolage ili sulubadelaea e bealahilä Dafidilo Geloima asigi besui.

<sup>36</sup> Yesu bégëla aulo udia afädê ëi Dabida, Giligi ado adola ëi elöda Dogasa, e Yoba filo. Udia amea hamoi hedabi hamosamu nea. Udia dolô busadäoi nefolalebe amoli ugila negesamu aligilo. <sup>37</sup> Amala hamosa sebegi e olola baagoi. Baagosebegi odoaea ië domalo nigime hëla hogoli ilibia afädëgi nea negesi. <sup>38</sup> Yoba gaamu amoda Lida gaamu ga madela negei. Bégëla aulo nefolalo amolia Fida segeyo amo gala Lida neai amo nabalahlilä, ilia dolô äudäma e neebea bea mosalai. Awälahilä elea ema sähalea, Saula made, nili nefolalebea fodolo misialola säla i. <sup>39</sup> Amala säla iasebegi, Fida e nowelahilä hiligila obégëi. Besela galahlilä hogoli ilibia amogi ilia e sigi asi. Sigi awälahilä udia didalo nefolalo amoli e neebe gaalu ga madela nefolalea didigaola fagulo sedadege fagulo odoage Dogasaea hi e made baagola salea hamoi dilo amo ema nidila olei. <sup>40</sup> Fidaea ili sulubadela afiaha maademolahilä, emo gumu sasagala salea Godema adoi. Amala adolahilä Fidaea ië domalomadi besuia galahlilä sähalea, Dabida, nowemola säi. Amalebe udia amea si fisigäla Fidama bealahilä e nowela fii. <sup>41</sup> Amala hamolebeda Fidaea udia amoïe naabogi nabelela nowela ifosi. Ifosilahilä Fidaea udia dolô Godea hîle nafolai nefolalo amolimage, udia didalo amolimage mofiamolahilä, ea udia wahi neebe amo ilima olei. <sup>42</sup> Amala hamoi amo Yoba udia dolöea dawadigisa maadelahlilä yafiea Dafidilo Geloima asigi afädê negei. <sup>43</sup> Fida e segeyo yafie Yoba segea ami nelo. E ami nelo amoda dolô afädê ëi Saimonobalä nelo. Saimono ameadä sugua gao gafodo nealahilä, amea nelebo odoa hamomolöie daiaha aligilo.

**10***Selesaia fii afädê maalahlilä Goniliasama ado säla i*

<sup>1</sup> Sisalia gaamugi ami dolô afädê nelo. Ië ëida Goniliasa. Eada ami dolô hädali afädê sigi aligilo nelo. Hädali afädê amoda hädali gafeia amoligi, hädali gafeia amolile ëida Idali Ami Dolöla sälo. <sup>2</sup> Goniliasa eada Godea hamei dibe amomu hamolö nea, Godebalä bedäla nagadaiala aligilo. Ië mosöa nefolalo amoli sulubadelaage amalo. Eada busadäoi neebe amoli ugila negela muni nelegeige iaha aligilo nea, segeyo sulubadelagi Godema adolasisa aligilo nelo. <sup>3</sup> Amala hamosa nebegi segeyo afädëgi eso bégisebe amo gaalu, Goniliasaea sosoäla awäla beahaleamelebe, Godeie selesaia fii afädëa e neebe maalahlilä ema Goniliasa-ola säsebegi ea fädäla meli. <sup>4</sup> Amala säsebegi, ea bedälahilä, selesaia fii amoma siila dialea nabahalea, Dafidilo, edola nabi. Amala nabasebegi, ea ema säla obégësalea, Dia Godema adosa aligilo amoge, nelegei muni busadäoi amoligali iaha aligilo amoge Godea bealahilä di helësësa neamelë. <sup>5</sup> Amaimo, dolô afädê Saimono, ië ëi elöda Fida, amoda di neebea gui misiäia dolô odoaea Yoba bea mosalamalo. <sup>6</sup> Dolô amoda edaio Saimonoïe mosöa söfë misi saleamelë. Saimono ameadä sugua gao gafodo nealahilä, amea nelebo odoa hamomolöie daiaha aligilo. Ië mosöda duhulu agesugi neamelëla säi. <sup>7</sup> Selesaia fii amea ema säla iala asibua Goniliasaea ië hamoi hamolasilo äudä nelo amolege, amase, ami dolô afädê Godea hamei dibe amomu hamolö ebalämu aligilo amoge, ohodoa amoli misialolahilä, <sup>8</sup> nelebo e neebea maala hamoi amo sulubadela ilima fädäla säla iaha maadelahlilä ea ili Yoba mosalai.

*Fidaea sosoäla awäla meli*

<sup>9</sup> Amo aiyo amogi ili awäla idiafaa eso mogogi suägila gaamu ga madela awäha neebe amo gaalu, Fidaea Godema adomolö mosö figi baledeidaia fedai. <sup>10</sup> Fedalahilä adosa salea, Fida e sidëa baagosebegi molö molö helësëi. Odoaea molö giala daiasebe amo gaalu, Fida e olobola salea sosoäla awäla meli. <sup>11</sup> Beahaleamelebe mu dogä negelahilä nelebo afädê fagulo gadoi edefade bidi biyidiagi gaulahlilä nagadaia fisiga idogosebe meli. <sup>12</sup> Amodaia ami hogoi elö elöige, nagadaia hagomoea aulo elö elöige, hagila aulo haea elö elöige sefolalebe meli. <sup>13</sup> Amo beaha nebegi, ado afädê sähalea, Fida-o, nowelahilä dia nufudala muöla säse nabi. <sup>14</sup> Amala säi amo nabalahlilä Fidaea säla obégësalea, Dafidilo Gelo-i. Ai, made molö. Nilia made mualaiage, nelebo die siigi dofea madege, na afädê dofä made maimelëla säi. <sup>15</sup> Amala sälebe, ado amea bu elö ema sähalea, Godea dofea muöla säi amoda ië siigi dofea madela sämabiola säse nabi. <sup>16</sup> Amo gadola bu ohodoala hamolahilä fodolofali nelebo fagulo gadoi amo mudaia dusugala neasebe meli.

<sup>17</sup> Sosoäla awäla meli amo Fidaea mi edoiedula asigi säosöala hehelësësa sebegi, dolô ohodoa Goniliasaie mosöala misi amoli maalahlilä, Saimonoïe mosö abidi neala nalaba awäla beagolelahilä, idi galo mia ami segeamadi nelo. <sup>18</sup> Idi galo baagido segea nea wala

nabahalea, Dolô afädë Saimono, ïe ëi elöda Fida, mosöa gui sebelela nabi. <sup>19</sup> Sosoöla awäla meli amo Fidaea edodula hehelësësamu sebegi Gesamia sähalea, Nabuö, dolô ohodoaea di hogosa nea. <sup>20</sup> Di hä nowela digamo. Ilibalä moholö amogi dia asigi säosäomabu. Na ili fisiga weila säi. <sup>21</sup> Amala säsebegi, Fida e digalahilä dolô amolima nabahalea, Dolô dilia hogose amoda nemelë. Edoïe misila nabi. <sup>22</sup> Amala nabasebegi, ilia säla obögësalea, Godeïe selesaia fii afädëa ami dolô hädali afädë sigi aligilo Goniliasama sähalea, Fida di neebee misialamalo. Ea säse amo dia nabualola säimelë. Goniliasada dolô asigi mogoi, Godebalä bedäla nagadaiala aligilo neamelë. Yu udia dolô amoliage e asigi mogoi neala sälomelëla säi. <sup>23</sup> Amala säsebegi, Fidaea ili mosöa digafiamola sälahilä, ili ami adi.

#### *Fida e Goniliasaïe mosöa asi*

Diala nowela hiligila afiai. Edoolali odoa Yoba gaamugi nefolalo amolige hiligila afiai. <sup>24</sup> Amo aiyo amogi e Sisalia gaamugi besela galai. Gaamugi ami Goniliasaea ili beaha nelo. E sosogo amolige e damelëfali amolige misialolahilä, ili gegedola beaha nefolalo. <sup>25</sup> Fida e digala besela galasebegi Goniliasa maalahlilä, ïe emo mia gumusula dia idogoi. <sup>26</sup> Amala hamosebegi, Fidaea e nabeleia idahalea sähalea, Di nowemo. Nege dolöfämelëla säi. <sup>27</sup> Fidaea ebalä adodola mumusogi digahamelebe udia dolô yafie gegedoi dibe meli. <sup>28</sup> Bealahilä ilima sähalea, Afädë Yu dolô neebe amogida udia dolô fii elöbalä aligilo madege, amase, söfëge aulo madela säla negei amoda dilia dawadigi nebege. Amala hamolo gaso, dolô elöma dida nafade, amase, Godeïe siigi dofea madela made sämäia Godea nema oleimelë. <sup>29</sup> Amalebe misialoi amogi na säla obögëla made, ne misimelë. Amaimo, mi edoïe ne misialaila nabahala nabi. <sup>30</sup> Amala nabasebegi, Goniliasaea sähalea, Gomoïe gahada deadi walio neebe we gadola eso bögisebe amo gaalu, nihi mosöa Godema adosa sebegi, dolô afädë fagulo hedabi eleloi salugai nie odagia maala nelo gabio. <sup>31</sup> Amala maala nea ea sähalea, Goniliasa-o, dia Godema adoi amo ea nabi. Amase, dia nelegei munige busadäoi amoligali ïaha aligilo amoge Godea made elaboi nea. <sup>32</sup> Dolô afädë Saimono, ïe ëi elöda Fida, e Yoba gaamugi neamelë. Dolô odoama bea mosalamalo. Dolô amoda edaio Saimonoïe mosöa söfë misi saleamelë. Saimono ameada sugua gao gafodo nealahilä, amea nelebo odoa hamomolöie daiaha aligilo. ïe mosöda duhulu agesugi neamelëla säi. <sup>33</sup> Amala sälebe na fodolofali di bea mosalola säi. Nabalahlilä misi goda hedabi hamoi. Nesege. Amaimo, Dafidilo Geloïa sulubadela dima sämalola säi amo gadola säsebe amo nabalö nili sulubadela Godeïe sidaia gedola saleawela säi.

#### *Fidaea Goniliasaïe mosöa Ado Mala Hedabi olelei*

<sup>34-35</sup> Fidaea sähalea, Godea udia dolô sulubadela memelela made, fii sulubadela ebalä bedäla nagadaialahlilä, mala mogoi hamosa nefolalebe amoli Godea hulu helësëla obeägilo neebe amoda, dofä na walio beagolei neawe. <sup>36</sup> Godea neala dalulusilo Ado Mala Hedabi Yesu Geleso aulodaia nea säla, Isilale udia dolöma säla ï amo dilia dawadigi nebege. Yesu Geleso amoda udia dolô sulubadelaïe Dafidilo Geloï nea. <sup>37</sup> Yonea ödägi gelo mala oleleibua, Galili ami mi gäwilahlilä, Yudia sege sulubadelamadi hamoi amo dilia dawadigi nebege. <sup>38</sup> Ami hamoi amoda gowe. Godea Nasalese fii Yesu memelela Eleloi Gesamige, geloige, ema söga negesebegi, Gode ebalä nelo amea Yesuea fufuia nawesa nea, udia dolöma hedabi hamola digi, udia dolô mugabe busaïe geloi hawa nefolalebe amoli sulubadela wahila digi amo dilia dawadigi. <sup>39</sup> Ea Yalusaleme neage, Yu udia dolöie sege sulubadelagi neage hamoi amo nilia beaha maadei. Ili e baagomäia iigi baala negeimelë. <sup>40</sup> Amaimo, segeyo äudä nelolahilä osodagi Godea dolô amo nowela ifosilahilä, udia dolöe e bimäia olei. <sup>41</sup> Amala olei amoda, udia dolô sulubadela made, Godea e bimäia memeleiamu meli. E baagola nowesebegi ebalä molö ödäge naha aligilo neebe nilimamu oleimelë. <sup>42</sup> Ea nilima sähalea, Udia dolöma ado mala säla ïahalea, udia dolô dafidi baagoi amolilege walio nefolalebe welilege gudi mogelo namiäia Godea ne memelela ifosila säla ïmalola säi. <sup>43</sup> Dafidi bea sälo nefolalo amoli sulubadelaïe ïe helësëla bea säla sähalea, Ema asigi afädë negei nefolalebe amolia nafade hamoi amoda Godea ïe ëia hëla digimolömelëla säi.

#### *Godea udia dolô fii odoagali Eleloi Gesami ï*

<sup>44</sup> Fidaea ado amo, aso, säha nebegimu, Eleloi Gesami udia dolô ea säi amo nabaha sefolalo amoli sulubadela digai. <sup>45</sup> Asigi afädë negei gafodo damulo Fidabalä misi amolia Eleloi Gesami memalä udu ïlo amo fii odoama söga sali amo beala fudugisa dilo. <sup>46</sup> Fudugi amoïe mida gowe. Udia dolô amolia ado elö säla, Gode eda edefade neala säse nabi amogi. Amalahilä Fidaea nabahalea, <sup>47</sup> Nilia Eleloi Gesami nii amo gadola nii amoli ödägi made gemolöila sämolöi nealela nabi. <sup>48</sup> Amala nabasebegi, ea Yesu Gelesoïe ëigi ödägi gemalola säi. Amalahilä ilia ema segeyo odoa libalä namolömelëla säla gauia idai.

## 11

### *Fida e Yalusaleme awälähilä nelebo hamoi säla i*

<sup>1</sup> Abosolo iliage edoolali Yudia sege sulubadelagi nefolalo amoliage nabahalea, udia dolö fii odoa amoliage Godeie ado mala neala gaui neala säi amo nabi. <sup>2</sup> Nabalahlilä nea, gafodo damulo dolö odoaea Fida Yalusaleme awäla besela galasebegi, ilia ema nemoi. <sup>3</sup> Nemola sähalea, Dia dolö gafodo made damui nefolalebe amolile mosöa digalahilä, ilibalä molö gedola naha sulo gabiola säi.

<sup>4</sup> Amala säsebegi, Fidaea nelebo dafidi mi gäwila hamoi amo ilima awala sähalea, <sup>5</sup> Ne Yoba gaamugi Godema adosa sebegi, olobola salea sosoäla awäla beahaleamelebe, mudaiala nelebo fagulo gadoi edefade bidi biyidiagi gaulahlilä ne mia fisiga idogoso. <sup>6</sup> Fisiga idogosebegi fagulo gadoi amogi na siila fädäla beahamelebe, sugua foi elö elöige, hogoi odoage, hagogomea aulo gadoige, hagila aulo haeage sefolalebe meli. <sup>7</sup> Beaha nebegi nema ado afädë sähalea, Fida-o, nowelahilä dia nufudala muöla säse nabi. <sup>8</sup> Amo nabalahlilä na säla obögësalea, Dafidilo Geloie. Ai, made molö. Nilia made mualaiage, nelebo die siigi dofea madege, afädë nie nafia made maimelëla säi. <sup>9</sup> Amala sälebeda ado amea mudaiala bu elö sähalea, Godea dofea muöla säi amoda ie siigi dofea madela sämabiola säse nabi. <sup>10</sup> Amo gadola bu ohodoala hamolahilä nelebo amoli sulubadela mudaia dusugala neasebe meli.

<sup>11</sup> Amo gala dolö ohodoa Sisaliata fisiga gai amoli mosö ne neebee ami maala besela galasio. <sup>12</sup> Besela galasebegi Gesamia nema ilibalä moholö amogi dia asigi säosäomabula säi. Amala säsebegi, nedoo gafeia amolalige nebalä awälähilä, nihiligila dolö amöie mosöa nogila digai. <sup>13</sup> Digalahilä ea niliima säla iahalea sähalea, Selesaia fii afädë nie mosöa maase meli. Selesaia fii amea sähalea, Dolö odoa Yoba mosaloi, amoli awäla dolö afädë Saimono, ie ei elöda Fida, e nisiäia bea mosaloi. <sup>14</sup> Ea ado mala säla iasebe amea dige die mosöa neebe amolige dili sulubadela damula moholömelëla säila säi. <sup>15</sup> Amaimo, na ado säha nebegi, Eleloi Gesami dafidi mi gäwila niliima digai amo gadola ilimage digasio. <sup>16</sup> Amala hamolebe na helësëla obögësalea, dafidi Dafidilo Geloia ado säi amo gadola, Yoneada ödäea gesa nelo, dili Eleloi Gesamia gemolömelëla säi amo helësëla obögëmelë. <sup>17</sup> Dafidilo Geloie Yesu Gelesoma asigi afädë negesebegi, Godea niligali i amo gadola, iligalige iasebegi, na Godema iligali amala imabula sämolöi nelolela Fidaea säla wagai.

<sup>18</sup> Amala säi amo nabalahlilä, ilia bu säla obögëla made, Godeie ei gauia adala sähalea, Godea udia dolö fii odoa neebe amoliage asigi besulahilä namolö gähe neala gaumäia iligali fu i gabula säi.

### *Udia dolö Godea wela ifosisi Ädiago nefolalo*

<sup>19</sup> Sidibeni baagomäia nufia amila odoaea ili neala sälasisa nebegi, udia dolö fisäla dusudasila afiai amoli fisäla odoa Fonisiage, Saibulusige, Ädiagoge awäla ado mala säla iia Yu udia dolö mamu olelela aliligi asi. <sup>20</sup> Amai gaso, fisäla asi amoligi Saibulusi dolö odoage Saillini dolö odoage Ädiago gaamugi awäla Giligi udia dolömage Dafidilo Geloie Yesuie Ado Mala Hedabi olelesa nelo. <sup>21</sup> Dafidilo Geloia ie geloi ilima olesebegi udia dolö yafie asigi afädë negesa maadelahlilä Godesadi namolö obögëi. <sup>22</sup> Amala hamoila säi amo Godea Yalusaleme udia dolö wela ifosi nefolalo amolia nabalahlilä, ilia Banabasama Ädiago segea bea mosalai. <sup>23</sup> E awäla besela galalahilä beahamelebe, Godea ili hedabola ugila negei amo bealahilä ea obeägi. Obeägihilä ea ilile iso asigi gelolasila udia dolö sulubadelama sähalea, Fisila made, Dafidilo Geloibalä dila nebegoda go wälasimu namialola säi. <sup>24</sup> Banabasa e dolö hedabi, Eleloi Gesami ema nobai nea, asigi afädë negei geloi nelo amala säi. Amaimo, udia dolö yafiege Dafidilo Geloima asigi afädë negela baai.

<sup>25</sup> Amala hamolahilä Banabasaea Solo hogomolöie Dasasa asi. <sup>26</sup> Beagolelahilä ea e Ädiago sigi obögëi. Ädiago ami gäheo i afädë ele udia dolö Godea wela ifosi nefolalo amolibalä gegedola nea, udia dolö yafieama mala säla olelesa nelo.

Yesu bögëla aulo Ädiago ami mi gäwila Geleso sosogola ei negei.

<sup>27</sup> Segeyo amo gaalu, bea sälo odoa Yalusalemelahlilä Ädiago digai. <sup>28</sup> Iligi afädëie ei Agabasa e nowelahilä, Gesamiie geloia bea säla negesalea sähalea, Sege fii sulubadelagi sidë i edefademalä gelola moholömelëla säla negei. Amala säi amo gadola beaha aligilo Gini Sisa Golodiasa nebegi gausiala digai. <sup>29</sup> Ado säi amo nabalahlilä, bögëla aulo nefolalo amolia ado afädë negela, edoolali Yudia nefolalebe amoligali ugila negela imolöie, muni dibe amo gadola idulämelëla säi. <sup>30</sup> Iliä amala säi amo gadola hamolahilä, ilia Banabasale Sololele naabogi gausilahilä, dolö dafidilo nefolalebe amolima imolöie gaula mosaloi.

## 12

### *Yamese baagomäia nufudalahilä, Fida nafodoi*

<sup>1</sup> Amo gaalu, Gini Heledoea udia dolô Godea wela ifosi nefolalo odoa amoli neala sêlasimolôie gaula nafodosa nelo. <sup>2</sup> Ea Yoneie edoo Yamese baagomâia nudulo helebea nufi. <sup>3</sup> Heledoea beahamelebe, Yu ilia ea nelebo hamosebe amogi haefula obeâgisebegi, Fidage gaula nafodomalai. Ea amo hamoi amo Segeyo Edefadegi beledi edelo yidila made gobela molô fu amo gala amala hamoi. <sup>4</sup> Fida gaula galabaia mosôa negesilahilâ, ami dolô nudulu gâwi biyidia amolia Fida e idihê namialai. Nudulu gâwi afâdê afâdêlagi ami dolô biyidia biyidiala ifosisi. Amala ifosisilahilâ, Heledoea Baagila Asi Segeyo amo baagibua ebalâ gudimolôie udia dolô neebee e sigi moholôla helêsêi. <sup>5</sup> Amaimo, Fida e galabaia mosôamu nebegi, udia dolô Godea wela ifosi amolia iê Godema gelola adosa nelo.

### *Selesaia fia Fida fisigî*

<sup>6</sup> Heledoea aiyo gadola e sigi moholôlahilâ, walio gasigi gadola, Fida e ami dolô äudâ amole mogogi ami adi dilo. Iliã e igi êfê äudâea begela negesilahilâ, ami dolô odoaea galabaia mosô amoiê idi galo baagido idihê nefolalo. <sup>7</sup> Amala dibegi, Dafidilo Geloie selesaia fii afâdê fodolofali maala aligisilahilâ, galabaia mosô hogolia ami yo digai. Selesaia fii amea Fidaie afawa nufigila didiigisalea sâhalea, Di fodolofali nowemola sâi. Amala sâi amole igi êfê äudâ amo Fidaie naabogi amila fisigâla digai. <sup>8</sup> Amala hamosebegi, selesaia fii amea sâhalea, Die malibu fêdôla negelahilâ, emo usililoge salugamola sâi. Amala sâi amo gadola Fidaea hamosebegi, selesaia fii amea ema sâhalea, Die daia salugalo fagulo amoge salugalahlilâ, ne bêgêla misiêla sâi. <sup>9</sup> Amala sâsebegi, e awâse amo gadola bêgêla segea doadigila awâhaleada, selesaia fiiã e dofâ sigi awâsebelã made helêsêla, ea sosoâla awâla beahala helêsêi. <sup>10</sup> Ele awâhalea idihê aligilo elô neebe amo baagila awâla, elô neebe amoge baagila asi. Amala awâla gaamugi aulo idi galo igi aeanea hamoia gaia ami besela galai. Besela galalebe idi gai amo hî asigia dogã negesebegi, ele doadigila asi. Awâla idi afâdê amogi awâha nebegi, selesaia fii amea e amilahilâ fodolofali digila asi.

<sup>11</sup> Selesaia fii amea digila asibua Fidaea fâdâla helêsêla obêgêsalea sâhalea, Heledoie naaboea gauia amilage, Yu udia dolô ilia hamomolô helêsêla amilage, Dafidilo Geloia ne damula awâla iê selesaia fii dofâ fisiga wei gabula sâi. <sup>12</sup> Amala fâdâla helêsêlahilâ, Fida e Yoneie eme Meliie mosôa asi. Yoneie êi elôda Magã. Mosôa ami udia dolô yafie gegedolahilâ Godema adosa dilo. <sup>13</sup> Fida e maalahlilâ idi galo baagido segeamadila neã, gödögödôla nufigisebegi, hamoi hamolasilo dolisâ êi Olodaea idi gai dugimolô misi. <sup>14</sup> E maalahlilâ sâse amo nabahamelebe, Fidaea adose nabala e edefademalã obeâgisalea, ami dolô made dogala baluluia digalahilâ sâhalea, Wae, dili-e! Fida idilibã misi neamelêla sâi. <sup>15</sup> Amala sâlebe, ilia ema sâhalea, Di gagaosa walofala sâi. Amala sâsebegi, ea ado gelolafali sâhamu neã, Ai, dofâ misi neala sâi. Amalebe ilia sâhalea, Godã iê selesaia fii gabula sâi. <sup>16</sup> Iliã amala sâha dibegimu, Fida ea, aso, idi galogi gödögödôla nufigisamu nebegi, idi gai dogalahilâ beahamelebe Fida neebe beala ili edefademalã fudugi. <sup>17</sup> Amalebe udia dolô amolia made adomâia ea naabo usigililahilâ, Dafidilo Geloia e galabaia mosôa amila doadigila segeã sigi misi amo ilima awala iãha maadei. Awala iãha maadelahlilâ sâhalea, Amala hamoimelêla Yamesemage, edoolalimage sâla imalola sâla ialahlilâ Fida e doadigila awâla sege elôgi asi.

<sup>18</sup> Sege yose amo gaalu, ami dolô amolia fudugilahilâ Fida abodogi asidula didiãla edefademalã asigi sãosãosa dilo. <sup>19</sup> Amala hamoi gabugi, Heledoea e hogoi amo made beagolesebegi, idihê aligilo nelo amolibalã gudilahilâ ili baagomâia nufualai.

Amalahilâ Heledo e Yudia sege digila Sisalia gaamugi namolô asi.

### *Heledo baagoi*

<sup>20</sup> Udia dolô Daiamadi nefolalebe amolimage, Saidonomadi nefolalebe amolimage, Heledoea edefademalã mihalãha nelo. Amala nebegi, hili asigi afâdê negelahilâ Heledo neebee asi. Iliã beã moholô neã, gini dilo mosô beaha aligilo dolô êi Balasadusalãã ado afâdê negelahilâ, hobeala neala dalumolôie ado sãmolô ili Heledo neebee asi. Amala sãmolô asi amoiê mida, ilia Heledoie segeamadi molô bidia nelo amo helêsêla amai. <sup>21</sup> Segeyo daialã negei amo gala Heledo e beaha aligilo giniiê fagulo sedade salugalahlilâ, beaha aligilo filodaia saleã, ea udia dolôma ado edefade sãla i. <sup>22</sup> Amo nabalahlilâ udia dolô amolia, Ado sãsebe godã dolôea sãse amo gadola made gabu, gode afâdê elôea sãse amo gadola sãsebelã gelola sãhamu nelo. <sup>23</sup> Ado amo Heledoea nabalahlilâ, Godeie êi gauia adamolô made helêsêi amea, Dafidilo Geloie selesaia fii afâdêã e fodolofali nufi. Amalebe, fêsôea naala e hame doala asi.

<sup>24</sup> Amaibua Godeie ado mala sãla daidola bãui.

<sup>25</sup> Hã Banabasale Sololeã Yalusaleme ami ugila negemolô asi amo hamosa maadelahlilâ, eleã Yone Magã sigi hiligila Ädiãgo obêgêi.



## 13

### *Banabasale Solole Godeie hamoi hamomolö mosaloi*

<sup>1</sup> Udia dolö Godea wela ifosi Ädiago nefolalo amoligi odoaea bea sälo nea, odoaea säla olelelo nelo. Ilile ëida gowe, Banabasage Simeono, ie ëi elö Nigeluge, gaamu Sailini ami fii Ulusiusige, beaha aligilo Heledobalä esamala aligilo Manainige, Sologe, ili nelo. <sup>2</sup> Segeyo afädëgi udia dolö Godea wela ifosi amolia Dafidilo Geloï helësëla molö aiyala made mai. Made naala nea, Dafidilo Geloïie ëi gauia adala Godema adosebegi, Eleloï Gesamia ilima sähalea, Banabasale Sololea hamoi hamomäia na helësëla daiai dibe amo gadola hamomäia, ele nafolala odasimalola säi. <sup>3</sup> Amalebe ilia molö made naala aiyala, Godema adola elema naabo negesilahilä mosalai.

### *Banabasale Sololea Saibulusi Godeie ado mala olelei*

<sup>4</sup> Eleloï Gesamia ele mosalosebegi, ele gaamu Selusia ami digai. Selusia amila ele du edefadegi fila awäla Saibulusi södülo dibebe ami asi. <sup>5</sup> Ele awäla gaamu Salamisi besela galalahilä, elea Yu udia dolöie gedolo mosö nefolalebea ami Godeie ado mala säla äha nelo. Ele ugila negemolöie Yonege ebalä asi. <sup>6</sup> Ele ödä södülo amoie sege sulubadelamadi nawesa nelolahilä awäla gaamu Bafosi besela galai. Segea ami Yu dolö afädë sebe meli. Dolö ameda golë elö elöla hamosa aligilo nea, wäfalä bea sälo nelo. Amoie ëida Ba-Yesu. <sup>7</sup> Eda gamane beaha aligilo dolö Segiasa Folasabalä aligilo nelo. Gamane dolö amoda asigi gäwi nulügäi nelo. E Godeie ado mala nabeldelä Banabasale Solole misialola wei. <sup>8</sup> Amai gaso, golë hamolo, amoie ëi elöda Elimasi, ea Banabasale Sololele ado bafuäha nelo. Mida, ea gamane beaha aligilo neebe amea Yesuma asigi afädë made negemäia helësëla amai. <sup>9</sup> Amala hamosebegi, Solo, ie ëi elö Folola sälo nelo amoma Eleloï Gesami nobalahilä ema siila dialea sähalea, <sup>10</sup> Wäfalä säsäla dahila nelo sulubadelage, asigi musügä negela gadiabolo sulubadelage dima nobai gabu. Amai, dida mugabe busaie malö neebe, mogoi hamomolö dibe amo sulubadelabaläda dia ado neala aligilo. Diada Dafidilo Geloïie mala mogoi hamolo dibe amo halowemolö helësësa aligilo amo, made fisimolöle. <sup>11</sup> Amai galëda, nabualo. Dafidilo Geloïie naaboea di nufudasebego. Hä die si dofogalahilä, eso nee made beala, holöbö segeyo sedade namolömelëla säi. Amala säi amole fodolofali gelë gadoiage gasimi sagai gadoiage ie si gesusebegi, nagubila nawesalea afädëa e nabelela gaula sigi mosäia ea hogosa nelo. <sup>12</sup> Amala hamoi amo bealahilä, gamane beaha aligilo dolö amea Dafidilo Geloïie ado mala säi amo nabala fudugilahilä, asigi afädë negei.

### *Banabasale Folole Bisidia segeie gaamu Ädiago ado mala säla olelei*

<sup>13</sup> Bafosi amila Fologe ebalä asi amolige du edefadegi fila awäla Bäfilia segeie Bega gaamugi besela galai. Gaamugi amila ili digila Yone e Yalusaleme obëgëi. <sup>14</sup> Amala hamosebegi, ili Bega gaamugi amila awäla, Bisidia segeie Ädiago gaamu dibebe ami besela galai. Besela galalahilä, segeyo Sabada gafegi ili gedolo mosöa ami awäla sulo. <sup>15</sup> Gedolo mosöa ami sebegi, Mosese nebegi Ado säla negei amoge, amase, bea sälo nefolalo amolia säla negei amoge nidelahilä, gedolo mosö beaha aligilo amolia dolö afädëma ilima sämäia säsi. Säsisalea, Nedoola dili-e, dilia udia dolö asigi gelolasimolöie ado afädë gaulea galëda, säla imäiamelëla säi. <sup>16</sup> Amala säi amo nabalalahilä, Foloea nowela aligila naabo usigilahilä sähalea, Isilale dolö diliage, amase, fii odoa Godebalä bedäla nagadaiala neebe diliage, nabualo. <sup>17</sup> Isilale udia dolö go ilile Gode neebe amea dafidi nilile naado nefolalo amoli memelei. Amalahilä ili Isibi awäla nebegi, sosogo malei besela galamäia neala edelasilahilä, hobeaie ie geloiamu Isibila sigi doadigila asi. <sup>18</sup> Sigi awäla sege nafade udia dolö aligisia made ami nebegi, gäheo i nabülas biyidiagi ea yöi gaula hi guila auaula nelo. <sup>19</sup> Amalahilä Gainana ami fii gifalädäla sulo amoli nufudaha maadelahilä, ilile sege Isilale udia dolö sämäia hilima imelë. <sup>20</sup> Amala hahamola maaha nea gäheo i hädali biyidiäie nabülas biyidiagi gadoi nelo. Sege amo nealahilä, Godea ëi sälo odoaea beaha aligimäia iligali äla beaha aligili awalahilä, bea sälo Samuale neloa ami awäla besela galai. <sup>21</sup> Samuale nebegi, ilia beaha aligilo gini imäia ëdëgësebegi, Godea Bëyamini sosogomadila Gisiie malö Solo i. Amala äsebegi Solo eda gäheo i nabülas biyidiagi beaha aligilo nelo. <sup>22</sup> Godea Solo beselahilä, ilile beaha aligilo Gini Debidu namiäia memelela ifosi. Debidu helësëla ado gomalä säi, Yesüe malö Debidida nie naabo dafädi, hame salifali neebe melimelë. Eada na helësëi dibe amo gadoi hamosa maademolömelëla Godea säi. <sup>23</sup> Dolö amoie yaua mäumadila afädëa Isilale udia dolöie damula aulo namiäia Godea dafidi säla negei amo gadola Yesu e misimelë. <sup>24</sup> Yesu e, aso, maala ulufadigila made nebegi, Yonea Isilale udia dolö sulubadelama sähalea, Asigi besulahilä ödägi gemalola säla äha nelo. <sup>25</sup> Yonea ie hamoi hamola wagamolö fu ga madesebegi, ea sähalea, Diliada ne nowë neala helësësebe. Neda amo mademelë. Amai gaso, nabualo. Hobea ne baagia e moholömelë. Na ie emo usililo ëfë fisigämolö dofea made newela Yonea säimelë. <sup>26</sup> Nedoola dili, Abalahamaie malöge, amase,

fii odoa Godebalä bedäla nagadaiala neebege, damula moholö amoië ado gowe nilima fisiga wei. <sup>27</sup> Udia dolö Yalusalame nefolalo amola, ilile dafidilo nefolalo amolalia dolö amo fädäla dawadigi made nelo. Dawadigi made nea, ilia e baagomäia nufulöla säi amea bea sälo nefolalo amolia ado säla negei dilo amo segeyo Sabada gafe sulubadelagi nidesamu aligilo amo gadola gausiala digai. <sup>28</sup> Amaimo, e baagomolö mi maadegi, ilia Bailadima nufualola säi. <sup>29</sup> Ìe helësëla dëdëla negei dibe amo sulubadela gausiaha maadesebegi, ilia idaijala gaula digalahilä igi äbägi bausi. <sup>30</sup> Amai gaso, Godea e bauia amila neala nowelasi. <sup>31</sup> Nowelasisesebegi, dafidi ebalä Galilila Yalusalame fedafiai amolia e segeyo yafiegi meli. Meli amolia udia dolöma e olelo nea. <sup>32</sup> Amaimo, nilia dilima Ado Mala Hedabi säla iaha neawe. Dafidi nilile naadolalima hamomolömelëla säla negei amo gadola <sup>33</sup> Godea Yesu neala nowelasi amea ilile malö nilima gausiala digaimelë. Gë Udälo agedugi dëdëla negei amoda gowe.

Dida nïe malö nebege, walio neda dië Diado aligisawela

säla dëdëla negei dialea.

*Gë Udälo 2.7*

<sup>34</sup> Godea Yesu neala nowelasi amo bu made baagomolömelëla gomalä säla dëdëla negei dialea.

Dofä hedabi obeägilasimolö dafidi Debidima imolömelëla säla i amo gadola dilima imolömelëla

säla dëdëla negei dialea.

*Aisaea 55.3*

<sup>35</sup> Amo gadoi ado elö säla dëdëla negeida gowe.

Dië hamoi hamolasilo dihi memelela odai amo bauia ami made sigämolömelëla

säla dëdëla negei dialea.

*Gë Udälo 16.10*

<sup>36</sup> Debidi nelo amo gaalu, Godeie hamoi hamomolö negei dilo amo gadola hamosa maadelahilä e baagoi. Baagosebegi ìe eedolali bauia ami eege amimu baula sigäi. <sup>37</sup> Amaimo, Godea afädë neala nowelasi amoda sigäi made melimelë. <sup>38</sup> Amai gabugi, nedoola dili-e, Yesuie aulodaia nea nafade hamoi amo hëmolöie mala dilima säla iaha neebewe helësëmalö. <sup>39</sup> Ea hamoi amea, sulubadelaia dolö amoma asigi afädë negesebegi, nafade hamoi amo Mosese nebegi Ado säla negei ameadä hëmolö uli amo sulubadela ea hëla digisa maadelo nea. <sup>40</sup> Amaimo, bea sälo nefolalo amolia dafidi bea säla negei amo dilima gausiala digaloea, hedabola idihë namialo. Bea säla negei amoda gowe.

<sup>41</sup> Gadiabolo nefolalebe, bimo. Beala fudugilahilä baago geia mosalo. Dili neebe amo gaalu, na hamomolö amo afädë dilima amala hamoila säseada, dilia dofä gabula made helësëmolömelëla

säla dëdëla negeila Foloea säla wagai.

*Habagaga 1.5*

<sup>42</sup> Amala säla wagalahilä, Folole Banabasale gedolo mosöalahilä doadigila awäha nebegi, udia dolöea elema sähalea, Mala amo gadoi segeyo Sabada gafe elö gogi säla imolö obëgëmalola säi. <sup>43</sup> Amalahilä gedoi amoli dusula awäla, Yu udia dolö yafiege, amase, udia dolö fii odoa Yuie mala bëgëla hamolo yafiege, Folole Banabasale bëgëla asi. Bëgëla maasebegi, elea ilima säla iahalea, Godea ugila negelo dibeä ami fodola namialola gelola säla i.

<sup>44</sup> Segeyo Sabada gafe elö amogi Godeie ado nabulö gaamu sulubadela gegedoi gaso, odoa holöbö made gedoi. <sup>45</sup> Amaimo, Yu udia dolö amolia yafie gegedoi dibe amo bealahilä, ilile iso asigia Foloma edefademalä naabo gëlahilä, e gadiabola, ìe ado bafuäha nelo. <sup>46</sup> Amasebegi, Folola Banabasalea hubabelela made gelola nea sähalea, Amaimo, Godeie ado dilimadale dafidi säla imolöi galea gaso, dilia helësësaleada, namolöi namolö nimolö amo nilia dofea madela helësëlahilä, ado amo eegeia gasebegoeadä alia dili digila fii odoamadi moholömelë. <sup>47</sup> Mida, Dafidilo Geloia alia hamomalai amoda gowe.

Dida fii odoa udia dolöie yo digalo nebege. Damula aulo amo sege föi dibe sulubadelamadi gaula mosäiala

säi.

*Aisaea 49.6*

<sup>48</sup> Elea amala säi amo nabalahlilä, udia dolö fii odoaea obeägila, Dafidilo Geloie ado mala gauia adalahilä, Godea namolöi namolö amo gaula namiäia memelei amoli sulubadela asigi afädë negei. <sup>49</sup> Amalahilä Dafidilo Geloie ado mala neala gaulahlilä sege amogi säla daidoi.

<sup>50</sup> Amaimo, Yu udia dolö amolia gaamu amoië udia dafidila fii Gode helësëlo sefolalo amoliage, dolö ëi sälo nefolalo amoliage mihalämäiala, Folole Banabasale neala sëlasimäialahlilä, sege amomadi made namiäia nesila digi. <sup>51</sup> Amala hamolebe ilia asiala hamoi amo helësëmäia elea dao elele emogi baai amo fëfëla salalahilä, Agioniamäia asi. <sup>52</sup> Yesu bëgëla aulo nefolalo amolima obeägiloge Eleloi Gesamige nobai nelo.

## 14

*Folole Banabasale Aigoniama nea ado mala sāla olelei*

<sup>1</sup> Aigoniama ami Folole Banabasalea gaamu odoagi aulo amo gadola Yuie gedolo mosōa ami asi. Ami awālahilā ado mala hedabolafalī olelesa nelo amea, udia dolō yafie, Yuge, Giligige, ilia asigi afādē negei. <sup>2</sup> Amasebegi, Yu udia dolō asigi afādē negemolō haboi nefolalo amolia udia dolō fii odoa amolia edoolalima bimolō habobamāia si nigilasi. <sup>3</sup> Segeyo yafie Folole Banabasale ami nea, bedāla made Dafidilo Geloīe ado mala gelola olelesa nelo. Amala olelesa nebegi, Dafidilo Geloīe ugila negelasilo mala sāla i amo dofā gabula helēsēmāia, Dafidilo Geloīa ele neala gelolasilahilā, dolōea hamomolōi made gadoige, hido elōige hamomāia elema geloi i. <sup>4</sup> Amala hamosebegi, gaamugi ami fii udia dolō nefolalo amoli mogelahilā, odoa damula Yumadi, odoa damula abosolomadila mogela nelo. <sup>5</sup> Amasebegi, Yu ilige, amase, fii odoa amolige, ilile sigi aligilo amolibalā nea, Folole Banabasale sē muāia igia nufulō dialeala helēsēi. <sup>6</sup> Amala helēsēsaleala sāi amo nabalahlilā, Folole Banabasale fisāla awāla Ligoniamage segeie gaamu Ilisidalage Debige sege amoie ga made ga madela dibeadī amogige asi. <sup>7</sup> Amige elea Ado Mala Hedabi sāla ūa asi.

*Folole Banabasale Ilisidala nea hamoi*

<sup>8</sup> Ilisidala gaamugi ami dolō emo nafadei afādē sulo. Emea emo nafadei amo gadoi neegela āgūla misi salea, holōfalī emesala nawelo made sulo. <sup>9</sup> Dolō amea Foloea ado sāsebe amo nabaha sulo. Nabaha sebegi, Foloea ema sisamelebe, e wahimāia asigi afādē negei sebe amo bealahilā <sup>10</sup> gelola sāhalea, Dihile emoea nowela namiēla sāi. Amala sālebe, dolō amo nila fedala aligisilahilā nawesa nelo.

<sup>11</sup> Foloea amo hamose amo bealahilā, Ligoniamage udia dolō yafie gegedoi amolia hilile ado adola gelolafalī sāhalea, Dolō gadoi hamolahilā, gode amoli nihilī neebēa digai gabuwela sāi. <sup>12</sup> Amala sālahilā, Banabasāie ēi Susa negei. Amase, Folo eda ado adolo neala helēsēlahilā, iē ēi Hemisi negei. <sup>13</sup> Ilisidala gaamu amoie yala baagido ami ilile gode Susaie odala ilo mosō olasi nelo. Amoie gobela ilo dolō nelo amea mama bebegesiala amalei amoge sugua gao gawali amoge idiliba ami sigi misi. Sigi maalahilā eage gegedoi nefolalo amoliage elegali gōa nelegela nufudala imolō helēsēla sigi misi.

<sup>14</sup> Amala hamomolōie hamosa neala sāi amo nabalahlilā abosolo āudā Banabasale Foloea helele fagulo amo nulilahilā, udia dolō gegedoi mogogi ami baluluia awālahilā, ado gelola silālasila <sup>15</sup> sāhalea, Dolō dili-e, dilia goda edo hamomolōie hamosa. Alige dolōfā dili nebege gadoi neamelē. Dilia nelebo memalā gadoi go fisila Gode namolōi neebe amoma besumāia alia Ado Mala Hedabi sāla imolō misimelē. Gode namolōi neebe ameadā muge naga fōige ōdā duhuluge nelebo sulubadela amoligi dibe neebe sebe amoge ea hamosa maadei. <sup>16</sup> Dafidi ea udia dolō fii odoa siiba fii amoli sulubadela hili helēsēse amo gadola mosāia fisigisi. <sup>17</sup> Amai gaso, ea hamoi amo sulubadela e dofā neala helēsēmāia, musūgā negela made, hī e olei. Ea hedabi hamosebe amoda gowe. Sege mudaiala fisiga idaloge, amase, molō būulasiloge amole diligali ilomelē. Diligali molō iase amea bolelasiloge obēgilo dilile isogi nobalasiloge neamelēla sāi. <sup>18</sup> Elea ado amala sālahilā, udia dolō gegedoi sefolalo amolia elegali gōa nelegela sugua gao made nufudala imāialahlilā, baagi sēi hamoi hamosa nelo. Amalebeda ilia made amai.

<sup>19</sup> Amaha nebegi, Yu odoa Ādiagolage Aigoniamaage mofiai. Mofiai amolia helēsēse amo gadola gegedoi amolia amala helēsēmāialahlilā, ilia ado afādē negei. Ado afādē negelahilā, ilia Folo igia nufi. Nufi amo baagoi gabula helēsēlahilā, dusugala gaula awāla gaamu baagido negesi. <sup>20</sup> Amala hamosebegi, Yesu bēgēla aulo nefolalo amolia Folo e amalela digila nebegi, e nowelahilā gaamu amogi bu obēgēla digai. Diale aiyo amogi Banabasale helegela Debi asi.

*Banabasale Foloea Yesu bēgēla aulo nefolalo amoli neala gelolasi*

<sup>21</sup> Ele gaamugi ami nea elea Ado Mala Hedabi sāla ūa nelo. Sāla i amea Yesu bēgēla aulo yafie besela galai. Amalahilā ele Ilisidalage Aigoniamaage Ādiagoge obēbēgela awāhalea, <sup>22</sup> elea bēgēla aulo nefolalo amoli neala gelolasila sāhalea, Dilia asigi afādē negei nebegoda go wālasimu namialola sāsisila aliligi obēgēi. Elea sāhalea, Godea Beaha Maadela Sigi Neebea ami moholōie, nilia yōi yafie bimolōmelēla sāla i. <sup>23</sup> Asi amo obēgēsalea, elea Godea wela ifosi sege hido hidolagi dolō odoa dafidilo nefolalebe amolia sigi aligimāia memelela ifosisi. Ifosisilahilā, molō made naala aiyala nea, udia dolō Dafidilo Geloīa asigi afādē negei nefolalo amoli Godema adola ema gausisila aliligi asi.

*Ele Sisalia segeie gaamu Ādiago obēgēi*

\* 14:12: Iliā hilile gode ēi sālo dibe amo gadola ēi negei.

<sup>24</sup> Amalahilä Bisidia sege baagila awäla Bäflia segea besela galai. <sup>25</sup> Besela galalahilä elea Bega gaamugi ami Godeie ado mala säla ialahilä, Adalia digai. <sup>26</sup> Adaliala ödä du edefadegi fila Ädiago obëgëi. Dafidi Ädiago ami elea hamoi hamola wagai amo hamomäia Godea udia dolö wela ifosi Ädiago nefolalo amolia Godea ele ugila negemäia ele Godema adolasila gausia ami obëgëi. <sup>27</sup> Ami besela galalahilä, elea udia dolö Godea wela ifosi nefolalo amoli gegedomalolahilä, Godea elemadi aligila hamoi amo ilima awala säla iaha maadei. Elea sähalea, Udia dolö fii odoa amoli Yesuma asigi afädë negemäia ea idi doga negei gabiola säla i. <sup>28</sup> Eleda segeyo yafie Yesu bëgëla aulo amolibalä ami nelö.

## 15

### *Mala hamogimolöie Yalusalame gegedoi*

<sup>1</sup> Dolö odoa Yudiala digalahilä ilia edoolalima säla olelesalea sähalea, Mosese nebegi säla negei dibe amo gadola, gafodo damulo mala dibe amo made hamoseda, Godea dili made damula moholömelëla säla i. <sup>2</sup> Amala säla i amo nabalahlilä, Folole Banabasalea dolö amolibalä didiähalea holöfalä made gëgëi. Amalebe ilia Folole Banabasale dolö odoa nefolalo amolibalä mala amo hamogimolöie abosolo amolimage dolö dafidilo nefolalo amolimage nabuäia Yalusalame fedamalai. <sup>3</sup> Amala säi amo gadola Godea wela ifosi nefolalo amolia mosalosebegi ili fedafiai. Fedafiahalea ilia Fonisiamadige Sameliamadige udia dolö nefolalo amolima fii odoa nefolalo amoli Godema asigi afädë negeimelëla säla iia fedafiai. Ado amala säi amo nabalahlilä, edoolalia edefademalä obeägisa nefolalo. <sup>4</sup> Ii fedafiala Yalusalame besela galasebegi, udia dolö Godea wela ifosi nefolalo amoliage, abosolo amoliage, dolö dafidilo nefolalo amolalia dili mofiaha golela säla olei. Amasebegi Folole Banabasalea Godea elema aligila hamoi amo sulubadela ilima säla iaha maadei. <sup>5</sup> Amai gaso, Felesi sosogo odoa asigi afädë negei nefolalo amolia nowela aligilahilä sähalea, Fii odoa amoliage gafodo damulolö dialea. Amase, Mosese nebegi Ado säla negei amoge ilia hamomäia säla imolö dialeala säi.

<sup>6</sup> Ado amo hamogimolöie abosologe, dolö dafidilo nefolalo amolalige gegedoi. <sup>7</sup> Gegedolahilä ado säsäla awäla gidogo gadogosebegi, Fida e nowela aligilahilä ilima sähalea, Nedoola dili-e, fii odoa nefolalebe amolia Ado Mala Hedabi nïe nafia nabalahlilä asigi afädë negemäia Godea dafidifali diligi ne memelei amo dilia dawadigi. <sup>8</sup> Sulubadelaie iso asigi dawadigi neebe Gode amea udia dolö fii odoa nefolalebe ilige dofea neebela ulufadigila olesalea ie Eleloi Gesami niligali i amo gadola iligalige imelë. <sup>9</sup> Eada ilige nilige mogogi nofeida maade. Iilia Yesuma asigi afädë negesebegi, ilile nafade hamoi amo ea hëla fisimelë. <sup>10</sup> Amaimo, dilia Gode fedogola bimolölahilä adu yoi edefade niliage nilile naado amoliage ägümolöi made amo bëgëla aulo nefolalebe amolia ägümäia neala ägüsi amo mi edöie. <sup>11</sup> Amala hamomolöi mademelë. Nilia helësësaleada, Dafidilo Geloï Yesuie ugila negeloea ili damula asi amo gadola nilige damula asila helësësamelëla Fidaea säi. <sup>12</sup> Amala säsebegi, Banabasale Fololea udia dolö fii odoabalä nea, Godea elema aligila nea dolöea hamomolöi made gadoige hido elöige hamoi amo sulubadela gegedoi sefolalebe amolima elea säla i. Säla iaha nebegi, ilia ado adola made, nalabola sefolalo. <sup>13</sup> Elea ado säha maadesebegi Yamesea sähalea, Nedoola dili-e, na säsebewe nabuö. <sup>14</sup> Godea udia dolö fii odoa nefolalebe amoli hamei amo dafidi olela odoa iligi ie namiäia memelei amo Saimonoea nilima awala säla imelë. <sup>15</sup> Säla i amo gadola bea sälo nefolalo amolia ado amo wäla säla negei dialea. Amoda gomalä dëdëla negei dialea.

<sup>16</sup> Dafidilo Geloïa sähalea, Hobe ne obëgëlahilä na Debidüie mosö dagabola digai amo hamogimolö. Mosö hai dibe amo hahamogilahilä gelolasimolömelë. <sup>17</sup> Mida, udia dolö fii odoa amolia Dafidilo Geloï hogomäia amamolömelë. Fii odoa nïe ei gaula neebe amoli sulubadelaie ne hogomäia amamolömelëla säi. Gowe sulubadela hamolo Dafidilo Geloïa amala säila

*Amosi 9.11-12*

<sup>18</sup> Amoda siibafali nilia dawadigi. <sup>19</sup> Na sämolö helësësebe amoda gowe. Udia dolö fii odoaea Godema asigi besusa neebe amolida nilia neala yölasimolö amo dofea made. <sup>20</sup> Iilia yoi made gaumäia nilia ilima beba gomalä dëdëla fisiga gadelä. Age gowe, molö nulo dibe amogi wäfalä godegali göa nelegela i muabio. Agedu gowe, udia dolö fa nimabio. Osoda gowe, hogoi elö elöla sebe amo nufudahalea, muugia heale gälo sali amola muabio. Biyidu gowe, heale hi eege muabio. Amoli dëdëla fisiga gadelä. <sup>21</sup> Mida, siibafali Mosese nebegi mala säla negei dibe amoda gaamu sulubadelagi dolö odoaea säla iahamu aligilo. Ie ado mala amoda gedolo mosö difolalebea ami segeyo Sabada gafe sulubadelagi nidesamu aligilomelëla Yamesea säi.

*Fii odoa Geleso sosogo nefolalebe amolima beba dëdëla i*

<sup>22</sup> Amala sãsebegi, abosolo amoliage dolô dafidilo nefolalo amoliage, amase, udia dolô Godea wela ifosi ami nefolalo amoli sulubadelaeage ado afädë negelahilã sãhalea, Nilí neebewegi dolô odoa Folole Banabasalebãlã Ädiago mosãia memeledelãmelã sãi. Amala sãlahilã ilia Yudasale, ie ãi elöda Basabasa, Sailasale memelei. Eleda edoolali amoligi dafidilo nelo. <sup>23</sup> Beba ilia gaula mosãia gomalã sãla dëdëla i.

Abosolo niliage, dolô dafidilo nefolalebeweage, dilile didoo nefolalebe nilia nilile nedoo fii odoa Ädiagoge Siliamadige Silisiamadige nefolalebe dilima dili go gabiola sãla beba gowe dëdëla lasisago.

<sup>24</sup> Nilí neebewegi odoaea dilima ado sãla i amea dili fudugila asigi sãosãola nefolaleai amo nilia nabi. Iliã amo amala sãmalola nilia made sãimelë. <sup>25</sup> Amoie nilia ado afädë negelahilã, dolô memelei amoli nilile damelë aeaifali Banabasale Fololebalã dili neebea fisiga idamolöla helësëi. <sup>26</sup> Dolô äudã amoleada nilile Dafidilo Geloí Yesu Gelesoie ëigi hamoi hamosalea baagomolô ga made díbea amimu ga madela aligilomelë. <sup>27</sup> Nilia amala helësëi amo gadola Yudasale Sailasalea bebagi ado dëdëi amo gadola adoea sãla imãia dili neebea mosalahagomelë. <sup>28</sup> Eleloi Gesamiage niliage yöi afädë dilima neala baalasiloa nilia ado geloi biyidiãmu dilia hamomãia sãla imolöla helësëi. Amoda gowe ili.

<sup>29</sup> Age gowe, molô nulo díbe amogi wãfãli godegali göa nelegela i muabio.

Agedu gowe, heale hi e muabio.

Osoda gowe, hogoi elö elöla sebe amo nufudahalea muugia heale gãlo sali amola muabio. Biyidu gowe, udia dolô fa nimabio.

Amo hamomabiola sãi amo hamola made sisigaha aligiseda, hedabola namolömelë.

Hã amomelë. Hawiola

sãla dëdëla i. <sup>30</sup> Hã mofiamalolahilã ili Ädiago digai. Digala besela galalahilã ilia Geleso sosogo nefolalo amoli gegeomalolahilã beba dëdëi amo ilima i. <sup>31</sup> Amala iãsebegi udia dolô amolia dëdëi amo nidei. Ado hedabi dëdëi amo nidei amea ilile asigi neala gelolasisebe amogi obeãgi. <sup>32</sup> Yudasale Sailasaleage bea sãlo nea, edoolali bogodei namiaia neala asigi gelolasila ilima ado yafie sãla iãhamu nelo. <sup>33-34</sup> Ele Ädiago ami segeyo holöbö ede nelolahilã, ilia dafidi ele mosalola sãlo nefolalebea ami obëgëmãia edoolalia aealo alima diamiaialahilã, Hawio obëgëmalola sãi.\* <sup>35</sup> Folole Banabasale Ädiago ami nea, eleage dolô odoa yafieage amolalia Dafidilo Geloíie ado mala sãla iãdigi sãla olela digisa nelo.

*Folole Banabasale gëgëlahilã hido hido*

<sup>36</sup> Segeyo odoa nelolahilã Foloea Banabasama sãhalea, Gaamu sulubadelagi Dafidilo Geloíie ado mala sãla ia ami edoolali hedabola nebelela fãdãla beba obëgëdila sãi. <sup>37</sup> Amala sãsebegi, Banabasaea Yone Maga helësëlahilã, nihiliãgila afiahala sãi. <sup>38</sup> Amai gaso, Foloea e sigi moholô amo dofea madela helësëi. Mida, dafidi ea elebalã hamoi hamomolô made awãla ele digãla Bãfiliala bahila obëgëi amogi. <sup>39</sup> Amala helësësebegi Folole Banabasale helemu edefade gëgëlahilã mogela, Banabasaea Maga sigi gaula ele Saibulusi moholöie ödã duugi fila asi. <sup>40</sup> Amase, Foloea Sailasa memelesebegi edoolalia sãhalea, Godeie ugila negelo alibalã namialola sãsebegi, ele asi. <sup>41</sup> Ele awãla Folo e Siliamadige Silisiamadige nawesa nea, udia dolô Godea wela ifosisi sege amoligi nefolalo amoli neala gelolasisila aliligi asi.

## 16

*Dimodi e Folole Sailasalebãlã asi*

<sup>1</sup> Folo e awãhamu nelolahilã, Debige Ilisidalage awãla besela galai. Ami bëgëla aulo afädë ãi Dimodi nelo. Ie emeda Yu fii udia gaso, ie eedoda Giligi dolô nelo. Emeda asigi afädë negei sulo. <sup>2</sup> Edoolali Ilisidala ami fiiage Aigoniama fiiage Dimodi eda asigi mogoi neala sãlo nelo. <sup>3</sup> Foloea Dimodi ebalã moholöla helësëlahilã, ea Dimodiie gafodo damulasi. Amala hamoi amöie mida, segea ami Yu udia dolô neebe amoli sulubadelaeada Dimodiie eedoda Giligi dolô neala dawadigi neebe amo helësëlahilã amala hamoi. <sup>4</sup> Ili gaamu díbeamadi amogi nawesalea ilia abosologe dolô dafidiloge Yalusaleme ami nefolalo amolia mala sãla negei amo gadola ilia bëgëla hamomãia ilima sãla iã awãha nelo.

<sup>5</sup> Amalebe udia dolô Godea wela ifosi nefolalo amoli Yesuma asigi afädë negemolömedi neala gelolasilahilã, segeyo sulubadelagi odoaea asigi afädë negelahilã ilima maala baala bãusa nelo.

*Foloea Doloasa nea sosoãla awãla meli*

\* **15:33-34:** Dawadigi odoa ilia helësëseleada, ado odoa sãi damo gogi dialeala helësëi. Ado amoda gomalã. [Amai gaso, Sailasa eda Ädiago ami namolöla helësëi.]

<sup>6</sup> Eleloi Gesamia ilia Esiamadi ado mala sāla imolō mosabiola idi gasebegi, ili Filigiamadile Galesiamadilemu nawesa namolō asi. <sup>7</sup> Misia sege nofea ami awāla besela galalahilā, ili Bidiniamadi awāla besela galamolō helēsēsebegi, Yesuie Gesamia mosabiola idi gai. <sup>8</sup> Amala idi gasebegi, ili Misia baagila digala gaamu Doloasa awāla besela galai. <sup>9</sup> Awāla besela galasolo amo gala, gasigi Foloea sosoāla awāla beahaleamelebe, Masedonia fii dolō afādēa ema sähalea, Dia nili Masedonia ugila negemolō duhulu dēgēla misialola sāha neebe meli. <sup>10</sup> Foloea amala sosoāla awāla beasebegi, hä, nili fodolofali Masedonia moholōie fu hogosa neada, Godea nilia ilima Ado Mala Hedabi sāla imāia neala olei gabula helēsēi.

#### *Ilidiaea asigi afādē negei*

<sup>11</sup> Amalahilā nilia Doloasa digila ödä duugi fila mogolafali awāla Samodelese besela galai. Amo aiyo amogi obōla awāla Neabolisi besela galai. <sup>12</sup> Neabolisi amila nagadabodo awāla Filibai besela galai. Gaamu amoda Masedonia segeie afādē dilo. Amida Olomo gamane maala aligilo. Nili ami segeyo odoa nelo. <sup>13</sup> Segeyo Sabada gafegi Filibai gaamu amoiē yala idi galo baagido doadigila awāla, ödä afādēie ayesua Godema adole sege dialealedula helēsēlahilā, nili ödägi ami afiai. Ami awāla udiáfali odoa gegedola sefolalebe amolibalā fiffigilahlilā adosa sefolalo. <sup>14</sup> Daiadaila udia afādē ēi Ilidia sulo. Ado sāi amo ea nabaha sulo. Udia ameadā fagulo hogale uii gadoi amo bidi neaha aligilo. Ea Godeie ēi gauia adala Godema adosa filo. Foloea ado mala sāla iaha nebegi, Ilidiaea mala amo hedabola nabala gaula mogomāia Dafidilo Geloia iē iso asigi dogā negelasi. <sup>15</sup> Amala hamosebegi, Iliidiage iē mosōa ami aligilo amolige ödägi gei. Ödägi gesebegi Ilidiaea nilima sähalea, Dafidilo Geloima na dofā asigi afādē negei gabula helēsēsa galēda, na mosōa namolō mofiamalola sāi. Ea ahadulamu eegesebegi nili ea mosōa afiai.

#### *Folole Sailasale Filibai galabaia negei*

<sup>16</sup> Nili Godema adole segea ami awāha nebegi, dolisā afādē galabaia hamoi gadoi hamolasilo sulo amoma, mugabe fedalahilā meualasilo sulo amo, nilia gausiala digai. Dolisā amea meuasebe amoiē, udia dolō nefolalo amolia iē beaha aligilo nefolalo amoligali muni ede ilo nelo. <sup>17</sup> Folola nihiligila awāha nebegi, dolisā amea bēgēla maalahlilā ūala sähalea, Dolō golida Gode ilibia edefade neebe amoiē hamoi hamolasilo neamelē. Dili damula aulo neala gaumāia, ilia sāla ilo neala sāi. <sup>18</sup> Dolisā amea segeyo yafiegi ado amala sähamu aligisebegi, Foloea habobalahilā besuia imogola mugabe fedai amoma sähalea, Yesu Gelesoie ēigila sähago. Dolisā go digila, segea mosōla sāi. Amala sāi amole, mugabe amo doadigila asi.

<sup>19</sup> Amala hamosebegi, dolisā amoiē beaha aligilo amolia hobeala muni bu elō made nimolō gabula helēsēlahilā, ilia Folole Sailasale gaulahlilā, magaiā gaamugi sigi aligilo nefolalebea ami, ele gaula dusugaia asi. <sup>20</sup> Iliā Olomo gamane gudi mogelo nefolalo amoli neebea ami sigi awālahilā sähalea, Yu dolō äudā gowelea nilile gaamugi wi maalahlilā, udia dolō neala nafadelasisebemelē. <sup>21</sup> Nilia hamomolō madela sāla negei dibe amoda, elea hamomalola sāla olelesa neamelē. Mala olelesebe amoda, Olomo dolō nefolalebe niliada amo nabala hamomolōi mademelēla sāi. <sup>22</sup> Amala sāi amo nabalahlilā, udia dolō gegedoi amoliage ele nufulō hamosebegi, gudi mogelo amolia elele fagulo gila digilahlilā, ele buudi damuia nufualai. <sup>23</sup> Iliā gelola nufudala iälalelahilā, Folole Sailasale dusugaia awāla, galabaia mosōa ifosilahlilā, galabaia beaha aligilo amoma gelola sähalea, Ele hedabola idihē namialola sāla i. <sup>24</sup> Amala sāla iāsebegi, galabaia sigi aligilo amea ele galabaia mosō hogoli mogogi amogi gaula awāla ifosilahlilā, elele emo i gāia igadula negesi.

<sup>25</sup> Gasi mogogi Folole Sailasale Godema adola digi, iē ēi gauia adala gē udāla digisebe amo, odoa galabaia mosōa sefolalo amolia nabi. <sup>26</sup> Amala sāha sebegi, fogoli edefademalā fodolo maalahlilā, galabaia mosō igau fogosa maadei. Amala hamoi amole, mosō amoiē idi galo dogā negesa maadelahlilā, igi ēfēa ili sulubadela nafodoi amoge, holola fisigēla digaha maadei. <sup>27</sup> Amala hamoi amogi, galabaia beaha aligilo amo adi elaboi amo nowelahilā beahamelebe, idi galo sulubadela dogā negesa maadei dibe amo bealahilā, galabaia negei amoli fisāla awāha maadei gabula helēsēi. Amala helēsēlahilā, ea hile nudulo helebe besela neala, hi e nufudala baagodelā hamosebegi, <sup>28</sup> Foloea ado gelolafali sähalea, A, di dihimu nufuabio. Nilida fisāla made asimelē. Sulubadela sefolaleawela sāi. <sup>29</sup> Amala sāi amo nabalahlilā, galabaia beaha aligilo amea gele gaula mofiamola sālahlilā, Folole Sailasale sebea baluluia awāla, e emo giginēla elele emo mia fila digai. <sup>30</sup> Amala hamolahilā, ea ele segea sigi fedalahilā elema sähalea, Dafidilo äudā ali-e, Godea ne damula mosāia na abilia hamomolōdula nabi. <sup>31</sup> Amala nabasebegi, elea sāla obēgēsalea, Dafidilo Geloia Yesuma asigi afādē negeseda, dihidige, die mosōa ami aligilo amolige, damula moholōmelēla sāla i. <sup>32</sup> Amala sālahlilā, elea emage, iē mosōa aligilo amolimage, Dafidilo Geloie ado mala sāla iaha nelo. <sup>33</sup> Amo gala, gasi mogogi galabaia beaha aligilo amea ele sigi awālahilā, elele domalogi

buudi damuia nufi amo nigime hēlasi. Amala hamosebegi, eege ea mosōa aligilo amolige ödāgi gelasi. <sup>34</sup> Ödāgi gelasisebegi, ea ele ea mosōa sigi awālahilā, ele molō muāia ī. Eage, ea mosōa aligilo amoliage, ilia Goderna asigi afādē negei amogi edefade obeāgisa nelo.

<sup>35</sup> Yose Olomo gamane gudi mogelo amolia dadi gaui nefolalo amolima ado sāsiseale sähalea, Dolō āudā amole fisigāmāia sāla īmalola sāsi. <sup>36</sup> Amala sāsi amo nabalahlilā, galabaia beaha aligilo amea Foloma sāla īahalea, Na ali fisigāmalola gudi mogelo amolia sāsi gabumelē. Iliā amala sāsi gabugi ali doadigila awāhalea dalulo go gaula geleā mosalola sāi.

<sup>37</sup> Amala sāsebegi, gaso, Foloea dadi gaui mofiai amolima sähalea, Alīda Olomo dolō amogi neebe amo ilia gudila made, udia dolō si mogogī buudi damuia ali nufi. Nufudalahilā galabaia mosōa gaula dusugaia awāla ifosisio. Amaimo, iliada walio ali geleā musūgā fisigāla mosalasiōle. Ai, amala mademelē. Hili ili maalahlilā ali fisigāmāiamelēla sāi.

<sup>38</sup> Foloea sāi amo gadola dadi gaui amolia gudi mogelo amolima sāla īasebegi, ele Olomo dolō amogi gabiola sāi amo nabalahlilā ili bedāi. <sup>39</sup> Amalahilā ilia ele neebea awāla elema aeala sähalea, Asiala hamoimelēla sālahilā, amila sigi segea doadigila awāla gaamu we dīgīla mosāiamelēla geleā sāi. <sup>40</sup> Amala sāsebegi, ele galabaia mosō digīla awāla Iliāiea mosōa asi. Mosōa amida edoolali sefolalebe amoli bealahilā, elea ili neala gelolasilahilā asi.

## 17

### *Folole Sailasalea Desalonaiga nea hamosa nelo*

<sup>1</sup> Ili asi amo awāla Āfibilisiye Aboloniage besela galala digila awāla giso Desalonaiga besela galai. Gaamugi amida Yu udia dolōie gedolo mosō afādē nelo. <sup>2</sup> Dafidi Folo e sege odoagi nea gedolo mosōa aulo amo gadola e awāla gedolo mosōa ami digai. Gedolo mosōa ami Foloea segeyo Sabada gafe ohodoagi gegedola mofiai amolibalā ado bebagi sāla dēdēla negei amo ilima sāla īaha nelo. <sup>3</sup> Amala sāla īaha nea ea ilima Godeie ado mi ulufadigila awala sāla īaha nelo. Ea ilima sähalea, Afādē Memeleia sē naala baagola nowemolōla bea sālo amolia dofā amala sāla dēdēla negei dialea. Yesuda na walio dilima sāla īahago. Amoda Afādē Memelei amomelēla Foloea sāi. <sup>4</sup> Amala sāla īasebegi, odoa ami nefolalo amolia ea dofā sāsebelā helēsēlahilā Folole Sailasalebalā dii. Giligi udia dolō Godeie ēi gauia adalo yafieage udia dafidila fii odoaeage amai.

<sup>5</sup> Amai gaso, Yu dolō nefolalo amolia naabo gēlahilā, dolō nafade hamolo memalā magaia gaamugi nawesa aligilo nefolalo odoa amoli hobe nii. Hobe nealahilā udia dolō yafie gegedolasila, ado gelolafali sāi amea ili sulubadelaea gaamugi ami nududulā hamoi. Amala hamola ilia Folole Sailasale udia dolō neebea sigi moholōie ele hogosalea dolō afādē ēi Yeisonoie mosōa ami fudulasia awāla hogola digai. <sup>6</sup> Awāla hogoi amo ele made beasebegi, ilia Yeisonoge edoo odoa amolali gaula dusugaia awāla galisōlō dolō amoli neebea awālahilā gelolafali sähalea, Dolō sege sulubadelagi nafade yafie daidola hamosa maadelo amolia hā nilile segea besela galai gabumelē. <sup>7</sup> Besela galasebegi Yeisonoea īe mosōa fimāia fu ī gabio. Ili sulubadelaea beaha aligilo gini elō Yesu neebe amo sähaleada, beaha aligilo Gini Sisa neebe amea hamolo mala sāla negei dibe amoda damusa neamelēla sāi. <sup>8</sup> Udia dolō sulubadela nefolalo amolige galisōlō dolō nefolalo amolige ilia ado sāi amo nabalahlilā, fudugila bedāi. <sup>9</sup> Fudugila bedāsebegi galisōlō dolō amolia Yeisonoeage dolō odoa ebalā gaui amoliage ili fisigāmolōie muni īmalasebegi, īmalasebe amo gadola īasebegi ili fisigai.

### *Folole Sailasalea Belia nea hamoi*

<sup>10</sup> Segoyo amōie gasigi edoolalia Folole Sailasale Belia moholō mosalola sāi. Amala sāsebegi, ele awāla Belia besela galalahilā, Yu udia dolōie gedolo mosōa ami asi. <sup>11</sup> Udia dolō Belia ami sefolalo amolile asigi fisigai ameada Desalonaiga udia dolō amoli baagila asi. Iliā Godeie ado mala nabalō edefademalā obeāgila nabahamu nelo. Nabalahlilā, ilia Foloea ado mala sāla ī amo dofā walebelela bimolōie segeyo sulubadelagi bebagi ado dēdēla negei amo nidela fādāla beaha aligilo. <sup>12</sup> Amala hamolahilā ili yafiea asigi afādē negei. Giligi udia dafidila fii sefolalo amoliage, amase, Giligi dolō yafieage asigi afādē negei.

<sup>13</sup> Amala hamosebegi, Foloea Belia amige Godeie ado mala sāla īaha neala sāi amo nabalahlilā, Yu dolō Desalonaiga nefolalo amoli Belia ami mafulahilā, udia dolō amoli fudugila bedāmāia ili neala fologolasi. <sup>14</sup> Amala hamosebegi, edoolalia Folo e ödā duhulu dibeamadā amodi mosāia fodolofali fisiga gai. Sailasale Dimodile made awāla Belia ami nelo. <sup>15</sup> Folo ifola afiai amolia e Adenesi gaamugi ami ifosila obēgēsebegi, Foloea ilima ado sāsiseale, Sailasale Dimodile ne neebea fodolofali misīāia sāla īmalola sāsisebegi ili obēgēi.

### *Folole Sailasalea Adenesi nea hamoi*

<sup>16</sup> Folo e ele misīāia Adenesi ami beaha nea beahamelebe, gaamugi ami nelebo yafie wāfali godegali gōa nelegela sāmolōie naaboea hamoi difolalebe amo bealahilā, īe asigigi

edefademalä yösa nelo. <sup>17</sup> Amogi yöla ea gedolo mosöa ami awälahlilä, Yu udia dolö nefolalo amolibaläge odoa Godeie ei gauia adalo nefolalo amolibaläge didiäha nelo. Magaia gaamu dibe amige segeyo sulubadelagi udia dolö gausiasebe amolibalä ea didiäha nelo. <sup>18</sup> Ebigulia sosogo mala olelelo dolö odoaeage Sidoigi sosogo mala olelelo dolö odoaeage Folobalä säla obëge obëgësa nelo. Ili odoaea sähaleada, E dawadigi gadoi hamola säha neebe goda edo säsebelä säi. Amase, ili odoaea sähaleada, Sege näiadodi amolile godeie mala säla iahaledula säi. Iliä amala säi amoie mida gowe. Foloea Yesuie malage baagoi amoli nowemolö malage säla i amogi amai. <sup>19</sup> Amala sälahilä ilia Folo e sigi awäla Aliobagusa Galisolö dolö amoli gegecola adolo segea ami awälahlilä ilia ema sähalea, Dia mala gähe säla olelelo amo nilia nabalö hamesamelë. <sup>20</sup> Ado odoa säi amo hido elei gabugi, amoie mi helësëdelälä säi. <sup>21</sup> (Adenesi fii amoliage, amase, sege näiadodi fii Adenesi ami maala nefolalo amoliage nelebo odoada hamolo made, segeyo sulubadelagi iliada mala gähe elöi elö elöla sämolöge nabalöge amomu hamosamu aligilo.)

<sup>22</sup> Amasebegi Foloea Aliobagusa Galisolö dolö amoli mogogi nowela nea sähalea, Adenesi fii dili-e, dilia nelebo afädë hamosebego na beahaleada, dilia göa nelegela hamolo mala amo gelola hamei gabula helësësamelë. <sup>23</sup> Na nawesalea beahamelebe, dilile göa nelegela sälo mosö yafie meli. Beahaleamelebe göa nelegela nufudala ilo auli afädë aulala negei dibeä ami gomalä dëdëla negei dibeo. Gode nilia dawa madegalila elöla negei dibeo. Dilia Gode dawa made nea e helësëlo. Amo hile ado malafali amo na walio dilima säla iahagomelë. <sup>24</sup> Godeada sege dibe sulubadelage nelebo sulubadela amogi dibe neebe sebe amoge hamosa maadei. Gode eda mudaiaiege nagadaiaiege Dafidilo Geloï nea. Gode amoda gobela ilo mosö naaboea hamoi amoligi aligilo made nea. <sup>25</sup> Eda nelebo afädë ufola adida made neebe amo dolöfäea e ugila negela nelebo afädë imolöi mademelë. Mida gowe. Ea namolöge hamege nelebo sulubadelage udia dolö sulubadelagali imolöda hi e nea. <sup>26</sup> Eada mi gäwila dolö afädë hamoi amoma aligila udia dolö fii sulubadela hahamola sege sulubadelagi awäha namialai. Aso, amala made hamola nebegi, dafidifali ea daiaha maadelahlilä, udia dolö ili amo gala gowegi namiäiala helësëlahilä, ilile sege nofela daiala negei. <sup>27</sup> Ea ili hamoi amoie mida gowe. Iliä e hogomäiage nagubaia nawela e beagolemäiage ea ili hamoi. Gode eda nili hido hidola neebea wagadi made maade nea. <sup>28</sup> Mi ema aligilahlilä, ie geloigi nili segegi fila digi fologola digisa sebewemelë. Amo gadola diligi ado dëdëlo dolö odoa nefolalo amolia sähalea, Nilige ie malölali neamelëla sälo. <sup>29</sup> Hä nilida Godeie malö neebe amea, nilia e goloeage silibaeage igiage, nelebo afädë dolöea ie asigia naaboea hamola negei difolalebe amoma Godeda amo gadoi neala helësëmolöi mademelë. <sup>30</sup> Godeada dafidi udia dolöea e dawa made nea hamoi amoda ea helësëlo made nelo. Amalo gasoda, walio ea udia dolö sege föi sulubadelagi neebe amo sulubadelaä asigi besumalola gelola säha nea. <sup>31</sup> Ea dolö afädë memelei amoie aulodaiala udia dolö sege sulubadelagi nefolalebe amolibalä mogolafali memelela mogomolöie segeyo afädë daiai amo dialea. Ea dolö memelei amo baagola nowela ifosi amea udia dolö nefolalebe sulubadelabalä amala hamomolömelëla dofä gelola säla negei amo oleimelëla Foloea säi.

<sup>32</sup> Baagoi amoli nowemolöla säi amo nabalahlilä, dolö odoa nefolalo amolia ölahilä e gadiaboï. Amase, odoaea sähalea, Ado walio säla i amo hobeala bu elö nabalö helësësamelëla säla i. <sup>33</sup> Amala säsebegi, Foloea ili amilahlilä digila asi. <sup>34</sup> Amala awäsebegi dolö odoa nefolalo amolia ebalä dila asigi afädë negei. Asigi afädë negei amoligi dolö afädëie ëida Daionisiasa, eda Aliobagusa Galisolö dolö nelo. Eage, amase, udia afädë ei Damalisi eage, amase, odoaeage elebalä asigi afädë negei.

## 18

### *Foloea Golidi nea hamoi*

<sup>1</sup> Amala hamosebegi, Folo e Adenesi digila Golidi asi. <sup>2</sup> Golidi ami Yu dolö afädë ei Aguila gausiai. Eda Bödasa fii dolö. Beaha aligilo Gini Golodiasaea Yu fii Olomo nefolalebe amoli sulubadelama näiadodi aftaha maademalola säsebegi, Aguila ie udia Bilisilale Idali sege digila hädamade misi nelo. Folo e ele sebea asi. <sup>3</sup> Foloeage Aguila Bilisilaleage hamoi afädë hamolo. Amalebe e elea mosöa gedola nea eage hamoi hamosa nelo. Ili bidi nimolöie ilile hamoida balai mosö nedëmesa aligilo. <sup>4</sup> Amo hamosa neada Foloea segeyo Sabada gafe sulubadelagi gedolo mosöa ami awälahlilä, gegedoi amolibalä didiäha nelo. Yu udia dolö odoaeage Giligi udia dolö odoaeage ea dofä säsebelä helësëi.

<sup>5</sup> Sailasale Dimodile Masedoniala digasebegi, Foloea segeyo sulubadelagi Godeie ado mala säla iahamu nelo. Ea Yu udia dolö nefolalo amolima Afädë Memelei amoda Yesu neamelëla gelola säla iaha nelo. <sup>6</sup> Amala säla iaha nebegi gaso, ilia made nabalahlilä e baagido säla digi gagadela digisa nelo. Amala hamosebegi, Foloea ie fagulo fëfëla digilahlilä, ea ilima sähalea, Dili nafadegi awäseada, dihili asiala hamoi ameamelë. Asialada nema



mademelê. Walio neebe wegida ne awâla udia dolô fii odoa nefolalebea moholômelêla sai. <sup>7</sup> Amala sâlahilâ, amila ili dîgîla Folo e dolô afâdê êi Didiasa Yasadusi amea mosôa asi. Îe mosôda gedolo mosô gâgâgêlafali nelo. Dolô ameada Godeie êi gauia adalo nelo. <sup>8</sup> Gedolo mosô beaha aligilo êi Galisibusaeage ea mosôa aligilo amoliage ilia Dafidilo Geloima asigi afâdê negela nelo. Amase, Golidi udia dolô yafie nefolalo amoliage nabalahlilâ asigi afâdê negesebegi ili ôdâgi gei.

<sup>9</sup> Gasi afâdêgi Foloea sosoâla awâla beahaleamelebe, Dafidilo Geloia ema sâhalea, Bedâla nafi yômabio. Mala sâla îahamu namialo. <sup>10</sup> Mida, ne dibalâ neamelê. Gaamugi guida, udia dolô yafie nîe neebe amea afâdêa di nufudala sêlasimolô mademelêla sâla î. <sup>11</sup> Amala sâla îasebegi, Foloea udia dolô nefolalo amolima Godeie ado mala sâla îaha nea gâheo i afâdêie, elô amoiê aube gafeia ami nelo.

<sup>12</sup> Agaia sege Galioea beaha aligilo nelo amo gaalu, Yu fii nefolalo amoli ado afâdê negela ilia Folobalâ ado neala e gaulahlilâ gudilo mosôa sigi asi. <sup>13</sup> Sigi awâlahilâ ilia sâhalea, Udia dolô nefolalebe amolia Godeie êi gauia adamâia dolô gowea mala sâla negei dibe amo gadola made, mala elôi sâla, sâla olelea neamelêla sai. <sup>14</sup> Amala sâsebegi, Foloea ado sâdelâ hamosa nebegi, Galioea Yu fii amolima sâhalea, Yu dolôla dili-e, mala dabalâ nafade hamoiê sâmolô mofiai galebeda, amoda na habobala made hedabola nabalabio. <sup>15</sup> Gasoda, adoge êige dihilile mala sâla negeige amolilemu galêda, amoda dihili hamogimalo. Goieda na made mogemolômelêla sai. <sup>16</sup> Amala sâlahilâ ea ili gudilo mosôa amilahilâ nesila digi. <sup>17</sup> Amala hamosebegi, ili sulubadelaea gedolo mosô beaha aligilo îe êi Sosodenisi nelo amo gaulahlilâ gudilo mosô baagido segeamadi ami nea nufudaha nelo. Amala nufudasebegi Galioeada hilile hamoi hamosebegola helêsêlahilâ ea adola made nelo.

#### *Folo Silia segeie Âdiago obêgêi*

<sup>18</sup> Amala hamosebegi, Folo e Golidi ami segeyo odoa nelolahilâ ea edoolalima dili samialola sâla, ôdâ duugi fila Silia segea moholô asi. Bilisilale Aguilalege hiligila asi. Awâla Sêgilia gaamua ami nea Foloea Godema afâdê hamomolômelêla sâla negei amea îe busa hili damusa maadei. <sup>19</sup> Amalahilâ awâla Ebese besela galai. Besela galalahilâ Foloea ele ami digîlahilâ, hîdo awâla gedolo mosô neebea ami besela galai. Besela galalahilâ Yu dolô nefolalo amolibalâ ado didiâha dilo. <sup>20</sup> Amala didiâha dibegi ilia ema sâhalea, Dida nîlbalâ holôbô sedade namiâiamelêla sai. Ili Amala sâsebegi, Foloea ilima ùla made sai. <sup>21</sup> E moholô nea ea ilima sâhalea, Ne dili neebea obêgêmâiala Godea hameseda, amoda ne obêgêmolômelêla sai. Amala sâlahilâ ea ili hawiola sâlahilâ e Ebese digîla ôdâ duugi fila asi. <sup>22</sup> Awâla ôdâ agesua besela galalahilâ Sisalia gaamugi besela galai. Besela galalahilâ awâla e fedalahilâ udia dolô Godea wela ifosi nefolalo amolima dili go gabiola sâla olelahilâ awâla Âdiago digai. <sup>23</sup> Folo e Âdiago ami holôbô ede nelolahilâ, e awâla Galesiamadige Filigiamadige holôbô aligila baagila digila awâhalea, Yesu bêgêla aulo nefolalo amoli sulubadela neala gelolasisila aliligi awâha nelo.

#### *Abolosia Ebese nea hamosa nelo*

<sup>24</sup> Amo gaalu, Yu dolô afâdê êi Abolosi eda Alegisâdalia fii nelo amo Ebese misi. Eada ado hedabola dawadigila adolo nea, bebegi ado dêdêla negei dibe amo hedabola dawadigi nelo. <sup>25</sup> Dafidi Dafidilo Geloie idigi aulo mala ema olelei. Îe iso asigigi sâmo sâmosa nebegi, ea Yesuie mala amo udia dolôma hedabola olelea nelo. Abolosi eada Yonea ôdâgi gelo mala olelei amomu dawadigi nelo. <sup>26</sup> Abolosia gedolo mosôa ami nea gelola sâla îaha nelo. Amala sâla îasebe amo nabalahlilâ, Bilisilale Aguilalea Abolosi sigi aliga galahlilâ, elea Abolosi ea Godeie idigi aulo mala hedabola helêsêmâia mogolafali sâla îaha nelo.

<sup>27</sup> Hobeab Abolosi e Agaia segea moholô helêsêsebegi, edoolalia e gelolasila hâ mosalola sâlahilâ, Yesu bêgêla aulo amolima beba dêdêla îasisalea Abolosima obeâgilahlilâ gauia idogomalo. Abolosi e ami besela galasebegi, udia dolô Godeie ugila negeloea ili ugila negesebegi asigi afâdê negei amoli ea hedabola ugila negesa nelo. <sup>28</sup> Mida, udia dolô yafie gegedoi nebegi, ea bebegi ado dêdêla negei dibe amogila sâhalea, Afâdê Memelei amoda Yesu e neamelêla ulufadigila sai. Ee ado amo gelolafali sâsebegi, Yu udia dolô hewalahilâ ilia adola made sau sagai.

## 19

#### *Foloea Ebese nea mala sâla îaha nelo*

<sup>1</sup> Abolosi e Golidi nebegi Folo e nawesalea segebi gau fedala digala digila awâla Ebese besela galai. Besela galala Ebese ami bêgêla aulo odoa gausiai. <sup>2</sup> Gausialahlilâ ea ilima nabahalea, Dilia Yesuma asigi afâdê negeselo amo gala Eleloi Gesami niilela nabi. Amala nabasebegi, ilia sâla obêgêsalea, Eleloi Gesami neala sai goda nîliâ nabi mademelêla sai. <sup>3</sup> Amala sâsebegi, Foloea sâla obêgêsalea, Amai galêda, edoea ôdâgi geila nabi. Amala

naabasebegi, ilia sāla obēgēsalea, Yonea ödāgi gelo amo gadola geimelēla sāi. <sup>4</sup> Amala sāsebegi, Foloea sāla obēgēsalea, Yonea ilia nafade hamoi amoie asigi besula ödāgi gelo. Ea udia dolōma sāhalea, Ne dafidi misi neamelē. Hobeala afādē moholō amorna dilia asigi afādē negemolō dialeala sāi. Hobeala moholōla sāi amoda Yesu hi e helēsēla sāila Foloea sāi. <sup>5</sup> Foloea amala sāi amo nabalahlilā, ili Dafidilo Geloī Yesuie ēigi ödāgi gei. <sup>6</sup> Amasebegi Foloea ilima naabo negesibegē Eleloi Gesami ilima digala ilia ado elō sāla bea sāha nelo. <sup>7</sup> Dolō amolida giwilasi gadoi nelo.

<sup>8</sup> Amala hamosebegi, Folo e gedolo mosōa ami digai. Aube ohodoagi amala digahamu nea ea ado mala gelola sāla iahalea, udia dolō nefolalo amolibalā didiāhalea, Godea Beaha Maadela Sigi Neebe amoie mala sāla iaha nelo amoda dofā sāi gabula helēsēmāia sāla iahamu nelo. <sup>9</sup> Amala sāla iahamu nebegi dolō odoa nefolalo amolia ilile asigi geloi neada asigi afādē made negei. Udia dolō nefolalo amolia nabuāia ilia Idigi aulo mala amo gagadesa nelo. Ili amala hamosebegi, Foloea ili amilahlilā Yesu bēgēla aulo amoli sigi asi. Amala hamolahilā segeyo sulubadelagi ado mala sāla didiālo mosō afādē Dilanasaie neebea ami awālahilā, Foloea Yesu mala sāla didiāha nelo. <sup>10</sup> Ea gāheo i āudāgi amala hamosamu nelo. Amala hamoi amea Esia segea nefolalebe ili sulubadela, Yu udia dolōeage, Giligi udia dolōeage, Dafidilo Geloīie ado mala nabi.

#### *Segebaie efegeliala hamoi*

<sup>11</sup> Godea Foloie naaboea geloi melēlo made hīdo elōi hamosa nelo. <sup>12</sup> Īe filimo dogelo faguloge bululo faguloge hile domalogi diigilo amo gaula oloi difolalebea ami awāsebegi, oloi damula digi, mugabe doadigila awāla digisa nelo.

<sup>13</sup> Amala hamosebegi, Yu dolō nawesalea mugabe fedai nesila digisa aligilo nefolalo amoligi odoaea oodo beala Dafidilo Geloī Yesuie ēi sāla mugabe fedai nefolalo amolia sāhalea, Foloea ĩe mala sāla ilo Yesu amoie ēigi dili nesila digisagola sālo. <sup>14</sup> Yu udia dolōie gobela ilo busa afādēie ēi Segebaie efegeliala gifalādalia amolia amala hamosebegi, <sup>15</sup> mugabe fedai amea ilima sāla obēgēsalea, Na Yesu dawa, Fologe helēsēsa. Gasoda, dilida nowēla nabi. <sup>16</sup> Amala nabalahlilā dolō amoma mugabe fedai nelo amea ilima nila sadia alogola ĩe geloiā ili baagila awāla, ili nufudala ialalesebegi ili mosōa amila sēsēla dudugimu fisāla asi. <sup>17</sup> Amala hamoimelēla sāi amo nabalahlilā, Ebesa nefolalo sulubadela Yu udia dolōge Giligi udia dolōge edefademalā bedālahilā, Dafidilo Geloī Yesuie ēi gauia adaha nelo. <sup>18</sup> Amase, asigi afādē negei yafie nefolalo amoli maalahlilā, ulufadigila, niliā nafade amo hamoimelēla sāla sisiaha maadei. <sup>19</sup> Golē hamolo yafie nefolalo amolia ilile golēie beba difolalo amo gaula mafulahilā, udia dolō nefolalo amoli sulubadelaea bimāia gobesa maadei. Beba gobei amoli muni dafidi nii amoda nāba gegedolada siliba giwi dausini nabūlasi bia gadoia nii.

<sup>20</sup> Amo gadola Dafidilo Geloīie ado mala daidolahilā, edefademalā gelola bāui.

#### *Ebesa ami nebegi, habobahalea ūalala sāi*

<sup>21</sup> Amala hamosebegi, Folo ema Gesamia helēsēlasisebegi daiala negesalea, dafidi Masedoniage Agaiaie awālahilā, hobeala Yalusaleme moholōi moholōla helēsēi. Amala helēsēlahilā sāhalea, Ami awāha maadelahlilāda, Olomoge sōfē moholō dialeala sāi. <sup>22</sup> Amala sālahilā ea ĩe ugila negelo Dimodile Eladasale Masedonia mosaloi. Ele amala mosalolahilā, e holōbō Esia segea beaha nelo.

<sup>23</sup> Amo gala, Idigi aulo mala olelei amogi yōmolō holōfali made, edefade besela galai. <sup>24</sup> Dolō afādē nelo amoie ēi Demediliasa, ea nelebo elō elōla silibaea hamolo nelo. Ademisīe odala ilo mosō gadoi holōfali afādē afādēla Demediliasaea silibaea hamolo nelo.\* Ea amo hamolo ameada hamoi hamolasilo nefolalo amolia muni edefade neaha aligilo. <sup>25</sup> Ea ĩe hamoi hamolasilo amolige, dolō odoaea hamoi amo gadoi hamolo nefolalo amolige neala gegedolasilahilā sāhalea, Dolōla dili-e, niliā hamoi amo hamolo amea muni edefade nelo amoda dilia dawa. <sup>26</sup> Ebesa wimu made, Esiamadi sege holōbō sulubadelamadida, dolō Folo amea udia dolō yafie dusugala nidilahilā, ilile asigi neala gagaolasila sāhalea, Nelebo dolō naaboea hamola nowei amolida, gode madela sālo nea. Amo dilia beadigi nabadigi amomelē. <sup>27</sup> Ea amala hamosa neebe ameada, udia dolō amolia nabalahlilā, niliā bidi nimolōie hamoi hamolo amoda nafadela sāloea. Amomu made, niliie gode edefade udia Ademisīe odala ilo mosōge udia dolōie siigi memalā gabula sāloea. Amase, Esiamadi udia dolō nefolalebe amoliage, udia dolō sege sulubadelagi nefolalebe amoliage dafidi ĩe ēi gauia adalo gaso, ĩe ēi edefade amo neala nagadaialoeala sāi.

<sup>28</sup> Ado sāi amo nabalahlilā, ilia edefademalā mihalēla gelola ūalalahilā sāhalea, Ebesaie Ademisida edefademalā neala gelola sāhamu nelo. <sup>29</sup> Amaimo, gaamugi nefolalo amoli

\* **19:24:** Ademisida gowe gadoi. Eda wāfali gode udia gadoi. Udia dolōea nelebo elō elōla gōa nelegela, wāfali gode amogali ilo.

sulubadelaea üalala dogogösa difolalo. Amala üalala dogogösa difolalea, Masedonia fii dolö äudä Gaiusale Alisadagusale Folobalä nawesa aligilo amole ilia gaalu gedolo gaamu edefade dibeami fodolofali sigi gaula asi. <sup>30</sup> Foloea udiä dolö yafie gegedoi dibeami hi äudulä hamosebegi, Yesu bægëla aulo nefolalo amolia made mosalola säi. <sup>31</sup> Esia sege amoië gamane sigi aligilo odoa Folobalä damelë hamola amolia Foloma ado säsisalea sähalea, Di gedolo gaamu dibeami domä mosabiola säsi.

<sup>32</sup> Iliä amala säsisebe amogaalu, udiä dolö gegedoi amolia gelola üalala dogogöla säha difolalo amea, ili asusugahalea odoaea ado elö säsebegida, odoeada, oböla, ado elö säla aulo dabela digisa dilo. Ili yafieada, mi goweie gedoi gabula made helësei nefolalo. <sup>33</sup> Yu dolö nefolalo amolia Alegisäda e nowela fedala aligisia ami namiäia nabelela gaula fedala ifosisebe amogaalahlilä, udiä dolö odoaea helëssäleada, mi e gabula helësei. Amala helëssäebegi Alegisäda e nowela aligilahlilä nea naabo usigilisalea, gegedoi amolima ne mademelëla sädelä hamoi. <sup>34</sup> Amala hamoi gaso, ilia eda Yu dolö amogi gabula bealahlilä, ado gelola gaalu sähalea, Ebeseie Ademisisida, edefademalä neamelëla säha nebegimu, aoa äudä gadoi asi.\*

<sup>35</sup> Gaamu amoië gusigusi nelo amea udiä dolö sulubadela nefolalo amolima sau sagamolahlilä, ea ilima sähalea, Ebese dolöla dili-e, Ademisi edefade neebe amoië odala ilo mosö neebe amoiëge, amase, nelebo afädë mudaiala beselala digai dibe amoiëge sigi aligiloda Ebese gaamumu dibe amoda dolö afädë dawa madeda nowë. <sup>36</sup> Hä, na säi amogaadola afädë wäfalä säila sämolö uli ameada, dilia nelebo afädë asigi made gawila hamolo amogaadola, made hamola, sau sagamo. <sup>37</sup> Dilia dolö äudä sigi misi goweieada odala ilo mosöa negei amogi afädë made fa nii, dilile gode udiä amoge made gagadeimelë. <sup>38</sup> Amaimo, Demediliasaege ebalä hamoi hamolo neebe amoliage, ilia afädëbalä gudimolö helëssä nea galëda, gamane gudilo dolö neebe amea amoië gudimolö segeyo odoa daiala negei dialea. Iliä amogi gudimolöi galea. <sup>39</sup> Amomu made ado odoage sämolö helëssä nea galëda, amoda gamane dolö amolia ado giwi sämolö gegedomalola säsegi sämolöi galea. <sup>40</sup> Nilia walio hamoi amea Olomo gamane neebe ameada, nilima dilia üalala dogogöla gëgëimelëla sälahilä, nilibalä gudimolöi gabumelë. Iliä amala hamoseda, nilia walio gegedola üalala säi amoië mi goweie säimelëla sämolöi mademelëla gusigusi amea säla wagai. <sup>41</sup> Amala säla wagalahlilä, ea gegedoi nefolalebe amolima afiaha maademalä.

## 20

### *Folo e Masedoniage Giligige asi*

<sup>1</sup> Ado gelola üalala dogogöla säha dilo amogaalu sau sagaha maadeibua, Foloea Yesu bægëla aulo amoli mofiamalahlilä, asigi gelolo mala ilima säla ialahlilä, ne awähamelë, dili hawio, namialola sälahilä, e Masedonia moholö asi. <sup>2</sup> Sege amoligi nawesa nea, Foloea ilima asigi gelolo ado yafie säla iia awälahlilä, hobeala Giligi segea besela galai. <sup>3</sup> E ami aube ohodoa nelolahilä, hobeala e du neala Silia moholö hamosebegi, Yu fii nefolalo amolia e nufulöla didiäha dialeai amea, e Masedonia obëgëmolöla helësei. <sup>4</sup> Dolö ebalä asi amolida gowe ili. Gaamu Belialada Bilusaie malö Sobadage, Desalonaigala Alisadagusale Següdasalage, Debila Gaiusage, amase, Dimodige, Esia segeala Digigusi Dolofimasalage, amoli ebalä asi. <sup>5</sup> Dolö amolida ilidale dafidi awäla nili misiäia Doloasa ami beaha nelo. <sup>6</sup> Segeyo Edefadegi beledi edelo yidila made gobela molö amogaalahlilä, nili Filibai digila ödä duugi fila afiai. Amala afiala ödä duugi fila segeyo bia awälahlilä, afiala ili nebea Doloasa besela galai. Besela galalahilä segeyo gifalädalä ami nelo.

### *Doloasa ami Foloea Yudigasa neala nowelasi*

<sup>7</sup> Segeyo gifalädalügi nili molö molö gedolahilä Foloea ilibalä didiäha nelo.\* E aiyu amogi moholö gabula helëssälahilä, ea säla iaha nebegimu gasi mogoi. <sup>8</sup> Mosö ilibia hogoli nili gedoi amogida gamali wala negei malei dilo. <sup>9</sup> Ami malisä afädë amoië ëi Yudigasa e mosö amoië wido holela dagaboidaia ami salea edefademalä süwiala waoi. Foloea sähamu nebegi, Yudigasa süwiala adi elaboi amogaalahlilä amogaalahlilä osodadaia amila bebedoi. Amala hamosebegi, neahamelebe hä, baagoi meli. <sup>10</sup> Folo e digalahilä malisä amodaia dia fedalahilä naaboea gauia welahlilä sähalea, Hame gudusebemelë. Didigaomabula säi. <sup>11</sup> Amala sälahilä Folo e bu fedala beledi dagabodasila nahilä, ado sedadela säha nebegimu segeyo sagai. Segeyo sagasebegi, e asi. <sup>12</sup> Malö amogaalu made baagoi sebegi, ilia e sigi awähalea ilile iso asigia edefade obeägä.

### *Folo e Doloasala Miledusa asi*

\* **19:34:** Aoa äudäda molö giai deala molöi gadoi. \* **20:7:** Dolö dawadigi odoa amolia helëssäleada, molö mai amoda Yesuie molö maila helësei.

<sup>13</sup> Nili nilidale ödä duugi filahilä Asoso moholö afiai. Asoso ami Folo gausialahilä, ödä duugi fimolö helësei. Folo e nagadabodo moholöie ea amala dai. <sup>14</sup> Afialahilä Asoso ami ea nili gausialahilä, eege ödä duugi fedala filahilä nihiligiila Midilini afiai. <sup>15</sup> Amo aiyo amogi amilahlilä, ödä duugi fila awäla Giosi sida gagala awäla, aiyo amogi Samoso awäla besela galai. Amilahlilä amo aiyo amogi Miledusa awäla besela galai. <sup>16</sup> Esia segeamadi segeyo yogobodimolö madelahlilä, Folea Ebesa baagila moholöla helësei. Yu udia dolöie molö nullo segeyo ei Bëdigosi made besela galai amo gaalu, fodolofali Yalusaleme awäla besela galamolöi galëda, amoda moholöla helësei.\*

*Folea Geleso sosogo Ebesa nefolalo amolile dafidilo amolima hawiola säi*

<sup>17</sup> Miledusa ami nea, Folea udia dolö Godea wela ifosi Ebesa nefolalo amolile dolö dafidilo nefolalo amoli e neebee misiäia misialola säsi.\* <sup>18</sup> Ili e neebee maala besela galasebegi, ea ilima sähalea, Esia segeamadi degabo mi gäwila maala neloa amila dilibalä nea hamosa nelo amoda dilia dawadigi. <sup>19</sup> Yu dolö nefolalo amolia ne nufulö daihaha nelo amea ne fedogola beasebegi, na nihä nagadaiala siaholö digaha nea, Dafidilo Geloie hamoi hamolasisa nelomelë. <sup>20</sup> Dili ugila negemolö amogi afädë musügä negela made, na dilima säla iadigi, udia dolö gegedoi dibe amige, dilile mosöa amige, säla olelela digi amoda, dilia dawadigi amomelë. <sup>21</sup> Amaimo, na Yu ilimage, amase, Giligi ilimage asigi besulahilä, Godemadi nea, nilile Dafidilo Gelo Yesuma asigi afädë negemalola gelola säla i amomelë.

<sup>22</sup> Amala hamosa nelo gaso, hä walio Gesamia ne mosöla säse amo gadola, ne Yalusaleme moholö neawe. Ami neëgi, nema edo hamomolödu, na dawa mademelë. <sup>23</sup> Dawa made gaso, na afädë dawadigida gowemelë. Sege sulubadelagi ne neloadi amogi nebegi, Eleloi Gesamia nema säla iahalea, Galabaia negemolöge së molöge bimolömelëla gelola säla iahamu nelomelë. <sup>24</sup> Amaimo, ne namolö amoda, nema memalä gadoi gabula helësesamelë. Godeie ugila negelasio Ado Mala Hedabi säla imolöie hamoi Dafidilo Gelo Yesuea nema i amo hamola wagamolö amoda, geloi gabula gelola helësesa neawe. <sup>25</sup> Hä, nabuö. Ne dafidi dili nefolalebeadi Godea Beaha Maadela Sigi Neebe amoie mala säla iaha nelo gasoda, diligi afädëa hobeala nie mi bu elö made bimolöla helësesamelë. <sup>26</sup> Amai gabugi, walio na dilima ulufadigila fädäla säla iahago. Afädë nafadegi awäsedä, asialada nema mademelë. <sup>27</sup> Mida gowe. Godea hamomolö amo afädë musügä negela made, sulubadela na dilima säla iaha maadei amea. <sup>28</sup> Geleso sosogo sugua sibi gadoi nefolalebe amoli dilia sigi namiäia Eleloi Gesamia dili ifosi amo ilile asigige dihilile asigige hedabola beaha namialo. Udia dolö Godea wela ifosis nefolalebe amoli ie namiäia hile healea nii amoli dilia sugua sibi sigi aligilo amo gadola, ili sigi namialo. <sup>29</sup> Ne asibua ilua ügülo geloi gadoi dili nefolalebea gui maalahlilä, sugua sibi gadoi nefolalebe amoli bobasëla made, nufudala hësömolöla helësesamelë. <sup>30</sup> Dihili diligi dolö odoaea nowelahlilä, ado halowela säla. Yesu bëgëla aulo nefolalebe amoli dusugala ili bëgëla misiäia moholömelë. <sup>31</sup> Hä, idihë namialo. Na gäheo i ohodogä esoage gasigige siaholö digaha nea, dili hido hidolama säla olelesamu nelo amo helësemalo.

<sup>32</sup> Amai gabugi Godemage, ie ugila negelo ado mala amomage dili gausisagomelë. Mala amea dili neala gelolasimolöge, Godeie udia dolögalä hedabi imolö dibe amo gadola dilima imolöge nea. <sup>33</sup> Na afädëie munige faguloge gesami awäla made nelomelë. <sup>34</sup> Nihile naaboea nihä hamoi hamola, nihinege, nebalä aligilo amolige, nili molöge neleboge dofea negei dilo amoda, dihilä dawadigi amomelë. <sup>35</sup> Na sulubadela hamosa nelo amo gadola hamoi edefade hamosebuewa udia dolö geloi made nefolalebe amoli ugila negemolö dibe amo oleimelë. Amase, Dafidilo Gelo Yesuea sähalea, Afädëa digali afädë iaseda, dia holöfali obeägimolö. Gasoda, dia afädë elögalä iaseda, dia edefademalä obeägimolömelëla säi amo helësemolöi dibe amoge oleimelëla Folea säla wagai. <sup>36</sup> Ea ado amo säha maadelahlilä, ili sulubadelabalä ea emo gumu sagala gumusula Godema adoi. <sup>37</sup> Godema adola wagasebegi, ili sulubadelaedä edefademalä dila Folo gaula mimi. <sup>38</sup> Amala ilia edefademalä asigii. Asigii amoie mi edefadeda gowe. Ea nie mi bu elö made bimolömelëla säi amogi. Hä, amalahlilä ilia e du dibe ami ifola asi.

## 21

*Folo ödä duugi awäla, Yalusaleme asi*

<sup>1</sup> Nilia ilma, nili hä afiahamelë, dili hawiola sälahilä, ödä duugi fila mogolafali awäla Gosi besela galai. Amo aiyo amogi Odosi besela galai. Amilahlilä Badala besela galai. <sup>2</sup> Badala amila ödä du elö Fonisä moholö dibe amo bealahilä, nili amogi fila afiai. <sup>3</sup> Afiahalea nilia Saibulusi södölo dibe amo bealahilä naabo fefeädimadi dibe amo amilahlilä

\* 20:16: Baagila Asi Segeyo molö nahilä segeyo nabülasi bia baagilahliläda, Bëdigosi Segeyo besela galalo.

\* 20:17:

Miledusala Ebese moholöda mia made, gilomida nabülasi bia gadoi. Ayala Fogomayu gadola.

nili baagila awāla Siliamadi awāhamu nelo. Awāhamu nea Daia awāla besela galai, du amogi nelegei gaui amo ami negemolōie. <sup>4</sup> Daia ami besela galala bēgēla aulo nefolalo amoli beagolelahilā, nili ilibalā segeyo gifalādālā ami nelo. Gesamia ilima aligilahilā helēsēlasisēbegi, ilia Foloma Yalusaleme mosabiola sāi. <sup>5</sup> Amala sāsebegi gaso, nili moholō fu besela galasebegi, hā doadigila afiai. Afiasēbegi ili sulubadela udia malōla gaamugi amila nilibalā duhulu aghesa afiai. Afialahilā nili sulubadela duhlulu bōsea ami emu gumu sasagalahlilā Godema adoi. <sup>6</sup> Godema adolahilā, nili hā afiahamelē, ilima dili hawiola sāi. Amase, iliage nilima amala hawiolahilā hili mosōa obēgēsēbegi nili duugi fimolōie afiai.

*Sisalia ami bea sālo Agabasaea Foloma ado sāla ī*

<sup>7</sup> Ōdā duugi filahlilā Daia dīgila awāhamu nea, Dolemesi besela galai. Besela galalahilā nedoo nefolalo amoli sāla olela gausialahlilā ilibalā segeyo afādē adi. <sup>8</sup> Diala aiyu amogi awāla Sisalia besela galai. Besela galalahilā Ado Mala Hedabi sāla ilo afādē nelo amoie ēi Filibi amoie mosōa digalahilā ebalā nefolalo. Filibida dolō Gifalādālā amoligi nelo. <sup>\*</sup> <sup>9</sup> Ī idiwilali biyidia sulo amoli dolō made fila awāla salea, Godeie bea sālo sulo.

<sup>10</sup> Nili ami segeyo nahui nebegi Godeie bea sālo afādē amoie ēida Agabasa eda Yudiala misi. <sup>11</sup> E nili neebee ami maala, ea Foloie malibu gii amo nealahilā hile emole naabole neegilahilā, ea sähalea, Eleloi Gesamia sähalea, Malibu goweie eedo amo Yalusaleme ami Yu dolō nefolalebe amolia gowe gadola gaula neegila dolō fii odoama imolōmelēla sāsebemelēla sāi. <sup>12</sup> Amala sāi amo nabalahlilā niliage, amase, udia dolō ami nefolalo amoliage Foloma Yalusaleme fedamolō gamelāla sähamu nea hāuai. <sup>13</sup> Amala sähamu nefolalebege ea sāla obēgēsalea, Dilia diisamu dibegoea ne neala yōlasisebe goda edoie. Ne Yalusaleme ami nea nie emo naabo neegimolō gomu made. Dafidilo Geloī Yesuie ēigi baagomolō diēge amoda dofeala helēsēsamelēla sāi. <sup>14</sup> Amala sāsebegi, ea helēsēi neebee amo haila fisimolōi made beala nilia fisilahilā sähalea, Dafidilo Geloia hamesebe amo gadola hamomāiamelēla sāi.

*Folo e Yalusaleme asi*

<sup>15</sup> Amala sāla, segeyo amala nelolahilā, nelegei neala gaula Yalusaleme fedai. <sup>16</sup> Bēgēla aulo odoa Sisialia nilibalā gegebola afiai. Afiai amoda Saibulusi fii afādē bēgēla aulo siiba nelo amoie ēida Nesono te mosōa awāla nefolamolōie ilia nili sigi asi.

<sup>17</sup> Nili Yalusaleme besela galasebegi ami nedoolali amolia obeāgila gauia idai. <sup>18</sup> Amo aiyu amogi Folola nihilīgila Yamese neebee afiai. Afiaha dibegi, dolō dafidilo nefolalo amoli sulubadelage ami gegedoi. <sup>19</sup> Foloea ilima dili go gabiola sālahlilā, udia dolō fii odoa nefolalebea ami Godea emadi aligila hamoi amo ilima awala sāla iaha maadei. <sup>20</sup> Foloea awai amo ilia nabalahlilā Godeie ēi gauia adai. Amalahilā ilia Foloma sähalea, Nedoo, dia dawa, Yu udia dolōda dausini maleia asigi afādē negei. Udia dolō amoli sulubadelaeadā Ado sāla negei amo gelola bēgēla awāha neamelē. <sup>21</sup> Amala hamola nelo amolima dolō odoa nefolalo amolia sähalea, Foloea Yu udia dolō sege elō elōla fii odoa amoligi nefolalebe amoli sulubadelama ado gowe gadoi sāla olelelo. Mosesea Ado sāla negei dilo amo fisimola sāla, dilile malōie gafodo damumabio, siiba mala hamolo amoda made hamomalola sāla iaha neamelēla odoaea sāla ī gabio. <sup>22</sup> Odoaea di yawe misi neala sāseba, ilia dofā nabalō gabumelē. Hā nilia abilia hamomolōdu. <sup>23</sup> Amaimo, niliada dia mala afādē bēgēla hamomāiaie sāla iaha. Nilibalāda Godema afādē hamomolōmelēla sāla negei dolō biyidia nea. <sup>24</sup> Diada ili sigi awāla, ilia Godeie siigi nigime baai made neebee amo olelo mala hamomolō amo diage amala hamomalo, amase, ili busa gesemolōie ilile bidige dia negelasimalo. <sup>\*</sup> Amala hamoseda, odoaea ado die sāi amo nabelo amoliada, nilima wāfalī sāla ī gabula helēsēlahilā, Ado sāla negei dibe amo dia bēgēla hamolo gabula helēsēmolōmelē. <sup>25</sup> Udia dolō fii odoa asigi afādē negei neebee amolima, ado sāmōlō helēsēi dilo amo nilia beba dēdēla ī. Nilia ilima sähalea, ili idihē nea, molō nūlo dibe amogi wāfalī godegali gōa nelegela ī muabio. Amase, heale hi e muabio. Hogoi elō elōla sebe amo nufudahalea muugia heale gālo salī amola muabio. Amase, udia dolō fa nimabiola sāla īla sāi.

<sup>26</sup> Amalahilā amo aiyu amogi Foloea dolō biyidia amoli sigi nea, hiligila Godeie siigi nigime baai made neebee amo olelo mala hamoi. Amalahilā e Godeie mosōa awāla gobela iloma nigime baai made neebee amo oleloie segeyo amogi wagamolō gabugi, afādē afādēlaea amo galada odala imolō gabula sāla ī.

*Yu dolō amolia Folo gauī*

<sup>27</sup> Mala amoie segeyo gifalādālā dilo awāha maademolō ga made dibegi, Yu dolō odoa Esia segeala mofiai amolia Folo Godeie mosōa neebee amo meli. Bealahilā udia dolō nefolalo amoli sulubadelaea Foloma habobamāia neala habobalasilahlilā Folo gauī. <sup>28</sup> Gaulahlilā ilia

\* **21:8:** Filibida dolō gifalādālā abosolo ugila negelo namiāia dafidi memelei amoligi nelo. Abosolo 6.1-6 bimalo.

\* **21:24:** Abosolo 18.18 amoge bimalo.

gelola uuala sähalea, Isilale dolöla dili-e, nili ugila negemolö mofiamo. Dolö gowege sege dibe sulubadelagi udia dolö nefolalebe sulubadelama säla olelesalea, Isilale udia dolöge, Ado säla negei dibe amoge, amase, sege gowege, amolida memalämelëla säla olelelomele. Amomu made, ea Giligi dolö odoa nefolalebe amoligi Godeie mosöa sigi maalahlilä mosö Godea hile nafolai nelo amoge neala nafadei gabiola säi. <sup>29</sup> Amala säi amoda dafidi ilia Ebese fii ëi Dolofimasa e Folobalä gaamugi neebe amo bealahilä, Foloea e Godeie mosöa sigi nogila digai gabula helësëlahilä amala säi.

*Ami dolö amolia Folo e sigi asi*

<sup>30</sup> Amala säsebegi, gaamugi nefolalo amoli sulubadela fudugilahilä, udia dolö baluluia mafula gegedola ilia Folo gaulahlilä, Godeie mosöa amila dusugala gaula awähalea Godeie mosö idi galo sulubadela fodolofali gaha maadei. <sup>31</sup> Amala hamolahilä Folo baagomäia nufulö hamosebegi, Olomo ami dolö beaha aligilo busa amea Yalusaleme udia dolö sulubadelaede edefademalä fudugila nudusaleamelëla säi amo nabi. <sup>32</sup> Amo nabalahlilä ea ami dolö sigi aligilo odoa nefolalo amolige ami dolö odoa nefolalo amolige sigi awälahlilä, udia dolö gegedoi neebea ami ili fodolofali baluluia afiai. Beaha aligilo busa amoge ami dolö odoa amolige maase bealahilä, ilia Folo made nufudala fisi. <sup>33</sup> Ami dolö beaha aligilo busa amea Folo neebea awälahlilä e gaula nea, ea ami dolö amolima sähalea, Igi ëfë äudäea e nafodomola säi. Amala sälahilä ea nabahalea, Dolö goweda nowë, ea edo hamosiola nabi. <sup>34</sup> Amala nabasebegi, udia dolö gegedoi nefolalo amolia säla obëgesalea, ado elö elöla gelola säla didigai. Amala gelola säla didigai amea ami dolö beaha aligilo busa amea ado mi fädäla made beasebegi, ami dolö amolima dolö goweda ami mosöa sigi mosalola säi. <sup>35</sup> Amala sigi awäla e mosö aulo didaia fedadelä hamolebe udia dolö gegedoi amolia edefade habobasebegi, ami dolö amolia Folo e naaboea sogobala gaula fedai. <sup>36</sup> Mida, udia dolö amolia, nufuö, baagomäia nufuöla gelola säla didigala ili bëgëla maasebegi amai.

*Folo e asigi afädë negei amoie mi Yu ilima fädäla säla i*

<sup>37</sup> Ami dolö amolia Folo e sigi gaula ilia mosöa digamolö hamosebegi, Foloea ami dolö beaha aligilo busa amoma sähalea, Na dima ado afädë nabeulela säi. Amala sälebe busa amea sähalea, Dida Giligi ado adolole. <sup>38</sup> Isibi dolö afädë dafidi gamanebalä nudulahlilä ie nudulo dolö dausini biyidia sege nafade udia dolö aligisia made ami sigi awäha nelo amoda di madelela nabi. <sup>39</sup> Amala nabasebegi, Foloea sähalea, Neda Yu dolö neawe. Silisia segeie gaamu Dasasa dibe amoda nie segemelë. Nie gaamuda ilibia edefademelë. Na udia dolö ilima ado sädelä dima nabahala säi.

<sup>40</sup> Amala sälebe ami dolö beaha aligilo busa amea dofea sämosebegi, Foloea aulo didaia ami nea naabo usigili. Sau sagaha maadesebegi Foloea Hibulu adoea sähalea,

## 22

<sup>1</sup> Naado nedoola dili-e, dilia na asiala hamoila säsebegöie, asiala made hamoila dilima fädäla säla iahago, nabualola säi.

<sup>2</sup> Amala sälahilä Hibulu adoea säha neebe amo nabalahlilä, dolö nefolalo amolia dofä adola made sau sagala nefolalo.

Sau sagala nefolalebegi Foloea sähalea, <sup>3</sup> Ne fiida Yumelë. Silisia segeie gaamu Dasasa amida nemea ne neegela ägüi. Gasoda, neda gaamu wegi nea wi fädäla aligisebegi, Gamelielea ne olelesa nelo. Eada nema nilile naua mäuie mala säla negei dibe amo sulubadela hedabola säla olelei. Na Godea hamomola säsegi gelola hamosa nelo, dili walio nefolalebe goea hamosa neebe go gadola. <sup>4</sup> Idi gowegi bëgëla aulo nefolalo amoli na neala sëlasisa nelo, ili baagomäia. Udiage dolöge nafodolahilä, ili galabaia mosöa negesa aligilomele. <sup>5</sup> Gobela ilo Busa Edefade neebe ameage galisölö dolö nefolalebe sulubadelaeege, ilia na dofä säsebewe dilima säla ilo amo. Ili ilile edoo Damasaga nefolalebe amolima beba dëdëla, na gaula mosäia iasisio. Iasisibegi Idi bëgëla aulo ami nefolalo amoli gaulahlilä së imäia Yalusaleme sigi obëgemolöie nea asimelë. <sup>6</sup> Ne Damasaga suägüla eso mogogi aligisebe amo gaalu, mudaijala yo digalo edefade fodolofali maala nema sege yabagelelo wäla yabagelei. <sup>7</sup> Amaimo, ne nagadaia digala negei dibegi afädëa nema sähalea, Solo-o, Solo-o, edogi dia ne neala sëlasisala säse nabi. <sup>8</sup> Amo nabalahlilä na, Dafidilo, dida nowëla säla obëgëi. Amala säla obëgëlebeda ea nema sähalea, Neda Nasalese fii Yesu, dia neala sëlasilo amomelëla säsio. <sup>9</sup> Dolö nebalä afiai amoliada yo digai amo meli gaso, afädëa nema ado säi amoie adoda ilia made nabi. <sup>10</sup> Amala hamosebegi, na nabahalea, Dafidilo, na abilia hamomolödula nabi. Amala nabasebegi, Dafidilo Geloia nema sähalea, Di nowela Damasaga mosö. Ami dia hamomolö Godea daiai amoda afädë ami neebe amea dima säla iaha maademolömelëla säsio. <sup>11</sup> Yo edefade digai amea na bimolö ulisebegi, dolö nebalä afiai amolia ne nabelela gaula awäla Damasaga besela galai.

<sup>12</sup> Dolô afädë ò Ananiasa e Damasaga ami nelo. Eada Ado säla negei dibe amo gadola hamolo nebegi, Yu udia dolô ami nefolalo amoli sulubadelaeada, eda dolô hedabi mogoi neala sälo nelo. <sup>13</sup> E maala ne neebee ga madefali nea, ea nema sähalea, Nedoo Solo-o, die si hedabi bu bimalola säσιο. Amala säi amole nie si bu hedabolahilä bimolöi gabugi e meli. <sup>14</sup> Amasebegi ea sähalea, Nilile mäüie Gode neebe amea ea hamesebe amo dia helësëmäiage, ie hamoi hamolasilo asigi mogoifali neebe amo dia siia bimäiage, hi ado säbebe amo nabuäiage di memeleimelë. <sup>15</sup> Dia meli amoge nabi amoge udia dolô sulubadelama säla imolöie e neala olelo di namolömelë. <sup>16</sup> Di memalä beaha samolöda edoie. Hä nowelahlilä ödägi gela, Dafidilo Geloima adola, dia nafade hamoi amo hëla fisimalola säσιοla Foloea säi.

*Foloea fii elöma ado mala sämäia Godea fisiga gai*

<sup>17</sup> Foloea säla iahamu nea sähalea, Ne Yalusaleme obëgëlahilä Godeie mosöa Godema adosa salea sosoäla awäla <sup>18</sup> beahamelebe, Dafidilo Geloie e misi nelo gabio. Ea nema sähalea, Dia nie säsiase amoda Yalusaleme nefolalebe amolia made nabolö ameadä, hä fodolofali, Yalusaleme digila di abela mosalola säσιο. <sup>19</sup> Amala säsebegi, na säla obëgësälea, Dafidilo Geloie, na gedolo mosö difolalebe ami awäla udia dolô dima asigi afädë negei nefolalo amoli nufudala ialalela, galabaia negelo amoge hili dawadigimelë. <sup>20</sup> Die olelo Sidibenüie heale digasolo amo gala nege ilibalä nelomelë. E baagomolöge dofeala helësëlahilä e baagomäia nufidelo amolile fagulo daia salugalo gii amoda na beaha nelomelëla säi. <sup>21</sup> Amala sälebe ea nema sähalea, Mosalo. Na di sege wagadi made, udia dolô fii elö sefolalebea ami fisiga gamolömelëla säi.

*Foloea ami dolô amolima neda Olomo dolömelëla säi*

<sup>22</sup> Ea ado säha nelo amo udia dolô nefolalo amolia hedabola nabaha nea gaso, ea udia dolô fii elöma moholömelëla säse amo nabalahlilä, ilia gelola üalala sähalea, Dolô goweda baagomäia nufuö. Go gadoida wi namolöi made gabula säla didigai. <sup>23</sup> Iliä üalala didigala sähamu nea hilile fagulo daia salugai gila sadia gala digi, gulu dao gasala sadia adala digisa nebegi, <sup>24</sup> ami dolô beaha aligilo busa amea sähalea, Iliä ema ado gelola säse goie mi säla imäia ami mosö mumusogi digala e fëgämalola säi. <sup>25</sup> Amasebegi ilia Folo fëgämolöie e nafodoi. Nafodoi amola wäla nea, Foloea ami sigi aligilo ga madela neebe amoma nabahalea, Olomo dolöma gudi made nabala, Olomole mala säla negei ameadä dolô amo fëgämolöda mogolalela nabi. <sup>26</sup> Amala säi amo nabalahlilä sigi aligilo amea ami dolô beaha aligilo busa neebe awäla ema säla ialahlilä nabahalea, Dia abilia hamomolö gabu. Dolô goweda Olomo dolöla säi. <sup>27</sup> Amasebegi beaha aligilo busa amea e neebe awäla ema nabahalea, Nema sämo. Dida Olomo dolölela nabi. Amalebe ea säla obëgësälea, Äla säi. <sup>28</sup> Amalebe beaha aligilo busa amea sähalea, Nihine muni edefadea ne Olomo dolô hamomolöie nümelëla säi. Amalebegi Foloea sähalea, Nemea ne neegela ägüsolo amo gala ne amala nelola säi. <sup>29</sup> Amalebe e fëgämolö nefolalo amoli fodolofali badadi gasi gagai. Amasebegi ami dolô beaha aligilo busa amea helësësäleada, na Olomo dolô nafodoila helësëlahilä, e bedäha nelo.

*Foloea Yuüe Galisolöma ado säi*

<sup>30</sup> Amo aiyö amogi ami dolô beaha aligilo busa amea Yu amolia Folo eada edo asiala hamoidula fädäla bimolöie, e fisigälahilä gobela ilo busa amolige, Galisolö dolô amoli sulubadelage gegedomalai. Gegedosebegi ea Folo sigi digala ili sebea ami ifosi.

## 23

<sup>1</sup> Foloea Galisolö dolô amolima siila nea sähalea, Nedoola dili-e, ne Godeie siigi nawesa neada nie iso asigia dofealahilä hahamola misi amo, aso, hamosa neawe. <sup>2</sup> Amala säsebegi, gobela ilo Busa Edefade Ananiasaea dolô odoä Folo ga made nefolalo amolima sähalea, Ie nafigi nufuöla säi. <sup>3</sup> Amala säsebegi, Foloea ema sähalea, Dida mosö alalo gai beni faleia hëi amo gadoi nebegi, Godea di nufulömelë.\* Ado säla negei dibe amo gadola dia nema gudi nabolö salea gasoda, dia Ado säla negei dibe amo damula ne nufuöla sähalela nabi. <sup>4</sup> Ea Amala nabasebegi, dolô e ga madela nefolalo amolia sähalea, Dia Godeie gobela ilo Busa Edefade neebe goma nafadela sähalela nabi. <sup>5</sup> Amala nabasebegi, Foloea säla obëgësälea, Nie nedoola dili-e, e gobela ilo Busa Edefade neala na made helësëi. Udia dolô dili nefolalebe amöie beaha aligilo neebe amo dilia e gagademabiola bebägi dëdëla negei dialeala säi. <sup>6</sup> Amalahilä Foloea dolô nefolalebe amoli odoä Sadiusi sosogo, odoä Felesi sosogo nefolalebe amo helësëlahilä, Galisolö gegedoi nefolalo amolima ado gelola sähalea, Nedoola dili-e, neda Felesi sosogo neawe. Nie naadoge Felesi sosogo nelomelë. Udia dolô baagoi nowemolö amo dofä gabula helësëla asigia sisiläfüsa neebeweieda gudisagomelëla

\* **23:3:** Mosö alalo gai beni faleia hëila säi amöie mida gomälä. Mosö alalo gai nafade fea amoda made bimäialahlilä beni faleia hëlo amo gadoila helësëi.

säi. <sup>7</sup> Ea amala sälebegi, Sadiusi sosogo amoliage, Felesi sosogo amoliage ili gëgëlahilä gegedoi amo hilimu moge mogela nelö. <sup>8</sup> Sadiusi sosogo iliada udia dolö baagoi amoli made nowelolage selesaia fiige gesamige madela sälo nea, Felesi sosogo ilia ohodoa amoli dofä gabula helësësa neamelë. <sup>9</sup> Amalahilä dolö amolia gëgësalea ado gelola sähamu nebegi, mala dawadigi odoa Felesi sosogo amolige nefolalo ilia nowela aligilahilä ado gelola sähalea, Dolö gowea nafade afädë hamoi nilia made meli neawe. Amai gesamiale ma, selesaia fiia ema ado säla ìledula säi. <sup>10</sup> Amala säsebegi, ilia gëgëlahilä edefade nudusalea, Folo dusugagise amea damula galaloea ami dolö beaha aligilo busa amo bedäi. Bedälahilä ea ami dolö nefolalo amolima sähalea, Dili idogo digalahilä Folo e ili mogogila neala ami mosö mumusogi sigi obëgëmalola säi.

<sup>11</sup> Amala hamolahilä gasigi Dafidilo Geloi Folo neebee maalahlilä sähalea, Asigi gelomalo. Bedämabio. Yawe Yalusalemé nea di nie neala olelo nelö amo gadola Olomo awälage amo gadola wäla hamomolömelëla säi.

*Yu dolö ilia Folo baagomäia nufulö daiai*

<sup>12</sup> Sege yosebe amo gaalu, Yu dolö nefolalo amolia Folo nufulö daiaha dilo. Ili migalia diigila ado gelola säla negesaleada, ilia molö ödäge made naala, Folo nufudala baagolahilä molö ödä molömelëla säla negei. <sup>13</sup> Nufulöla daialo amolida nabülasi biyidia baagi. <sup>14</sup> Ili gobela ilo busa amolige dolö dafidilo amolige neebee awälahlilä ilia sähalea, Nilia migalia diigila ado gelola säla negesaleada, nilia molö made naala, Folo nufudala baagolahilä molö molömelëla säla negeimelë. <sup>15</sup> Amala hamoi gabugi, Galisölöla diliada ami dolö beaha aligilo busa amo sebee ado fisiga gahaleada, Folo dili neebee sigi digamalamäia, ema säi amoie mi fädäla hogomolöela sämalö. Amala hamosedä, e dili mia, aso, made besela galala neëgi, nilia e nufulöie daiai neamelëla säla i. <sup>16</sup> Amala säsebegi, gaso, Foloie efileie malöea ilia säi amo nabalahlilä, e ami dolöie mosöa awäla mumusogi digala Foloma säla i. <sup>17</sup> Amo nabala Foloea sigi aligilo dolö afädë welahlilä sähalea, Diada malö malisä gowe beaha aligilo busa sebee sigi mosalo. Eada ado afädë ema sämolö gauleamelëla säi. <sup>18</sup> Amalebe ea malö malisä amo beaha aligilo busa sebee sigi awälahlilä sähalea, Galabaia negei Foloea ne wesaleada, malö malisä goweada ado afädë dima sämolö galea, di sebee sigi mosöla säla imelëla säi. <sup>19</sup> Amala säsebegi, ami dolö beaha aligilo busa amea malö malisä amoie naabogi gaula agesuadi heledo nea nabahalea, Diada nema edo sädeläla nabi. <sup>20</sup> Amalebe ea sähalea, Yu ilia ado afädë negesalea gomalä negesio. Ema säi amoie mi fädäla nabolöie, dia Folo e Galisölö neebee aiyö sigi digamalamäiala sämolöla säsiö. <sup>21</sup> Amaseda, diada ilima ümabio. Mida, dolö amolida nabülasi biyidia baagi, ilia e nufulö musügä beaha nea. Ili migalia diigila ado gelola säla negesaleada, molö ödäge made naala, e nufudala baagolahilä molö ödä molömelëla säla negesio. Hä dia ümäia ili walio daiala beaha neamelëla säla i. <sup>22</sup> Amala säla ìbe beaha aligilo busa amea malö malisä amoma gelola sähalea, Dia nema säla i amo afädëma säla imabio, mosalola säi.

*Gamane sigi aligilo Feligisi neebee, Folo e sigi asi*

<sup>23</sup> Amala sälahilä ea ami sigi aligilo äudä misiëla welahlilä elema sähalea, Sisalia moholöie ami dolö hädali äudäge, sugua hosidaia fila aulo dolö nabülasi gifalädaliage, amase, gögë gaulo dolö hädali äudäge, süwia midilö neë gaalu, moholöie walio daiamalo. <sup>24</sup> Amase, Foloie sugua hosige dilia daialahlilä e hedabola sigi awäla gamane busa Feligisi neebee sigi mosalola säi. <sup>25</sup> Amala sälahilä ea beba afädë dädëla ìahalea gomalä säla dädëla i.

<sup>26</sup> Neda Golodiasa Ilisiana, na gamane sigi aligilo Feligisi dolö edefade dima, Di go gabiola säla, beba gowe dädëla ìasisago.

<sup>27</sup> Yu iliada dolö go gaula nufudadigimolöie hamosebegi, na eda Olomo dolömelëla säsebe amo nabalahlilä, ami dolö amola e neebee maala na e damula awäla sigi obëgëimelë. <sup>28</sup> Ili ema gudimolö ado säsebe amoie mi nabolölahilä, na ilile Galisölö neebee e sigi asimelë. <sup>29</sup> Sigi awälahlilä beahamelebe, ilia ema gudimolö ado säi amoie mida ilile mala säla negei amoïemu meli. Amai ameada, e baagomäia nufulöge, galabaia negemolöige, afädë made meli. <sup>30</sup> Dolö go baagomäia nufulö daiahaleamelëla afädëma nema säla ìasebegida, di neebee e fodolo fisiga idogosagomelë. Ea nafade hamoila sälo amoliage mi gowëimelëla dima säla imolö mosalahagomelëla

säla dädëla i. <sup>31</sup> Amaimo, ami dolö amolia ea säi amo gadola, gasigi Folo e sigi awäla Ädibadalisi gaamugi besela galai. <sup>32</sup> Amo aiyö amogi ami dolö sugua hosidaia fila aulo amoliamu e sigi awähamu nebegi, ami dolö odoa amolida hilile mosöa obëgëi. <sup>33</sup> Ami dolö sugua hosidaia fila afiai amoli awäla Sisalia besela galalahilä, gamane sigi aligilo amoma beba dädëi amo neala ìala, amase, Fologe sigi maala e mia ifosi. <sup>34</sup> Amalebe beba amo nidelahilä Foloma nabahalea, Dida bolobinisi abidilala nabi. Eda Silisiala helësëlahilä <sup>35</sup> ea sähalea, Dia nafade hamoila sälo amoli mofiala neëgi, na die gudi nabolömelë. Amala sälahilä ea Heledoea mosöa e idihë namialai.



## 24

*Yu dolöea Foloea nafade hamoila säi*

<sup>1</sup> Segeyo bia nelolahilä gobela ilo Busa Edefade Ananiasage, dolö dafidilo nefolalo amolige, Olomoie mala negei amo gadola sälasilo ëi Dedulusi nelo amea ille säsimäia eege hiligila digai. Digalahilä, ilia gamane sigi aligilo amea nabuäia Foloeada nafade gomu hamoimelëla säla i. <sup>2</sup> Amalahilä sigi aligilo amea Folo misialai. Maala nebegi, Dedulusia ea asiala hamoi amoie ado säla iahalea, Dia nili sigi namolöi nelo amea nili neebee dalulo amoda negesimu dialeamelë. Dia nili hedabola sigi nelo amea sege edefade gowegi nefolalebewe hedabi namolöie, neala mogolasisa nelo. <sup>3</sup> Dolö edefade Feligisi-e, nilia amo bealahilä segeyo sulubadelagige sege dibe sulubadelagige dima obeägila edefademalä ne-segesa aligilomelë. <sup>4</sup> Amai gaso, na asiala dima dofogaloea, dia nili bobasëla nilia ado oboba säsewe nabuäia. <sup>5</sup> Nafade hamoloda dolö gowemadila misi gabula beagolesamelë. Eada Yu dolö sege dibe sulubadelagi nefolalebe amoli neala habobalasilahlilä nudulasiloge, amase, Nasalese sosogo nefolalebe amolile dafidiloge emu neamelë. <sup>6-7</sup> Amase, ea Godeie mosö Godeie siigi nigime baalasilage hamoi. Amalebegida nilia gauimelë.\* <sup>8</sup> Amaimo, dihi mi fädäla hogomolöie dolö goma nabaseda, nilia nafade gowe hamoila säseweda dofä säsebela helësëmolömelëla säi. <sup>9</sup> Amala säsebegi, Yu iliage Dedulusiie ado ugila negela ado säi amoda dofämelëla säla i.

*Foloea Feligisima ado säi*

<sup>10</sup> Gamane sigi aligilo amea Foloea ado sämäia ie naaboeamu oodo bibila säsebegi, ea obögëla sähalea, Dida gäheo i yafiegi sege edefade goweie gudi mogelo nelo amo helësëlahilä, nie asigiada ilia ado säi amoie dima obögëla sämolöda hedabi galea. <sup>11</sup> Amaimo, na Godeie ëi gauia adala Godema adomolö Yalusaleme fedäia amila segeyo walioda giwimelë. Amoda dihi dawadigimolöi. <sup>12</sup> Amaimo, ilia na Godeie mosöa nea afädëbalä didiäha neebe made meli. Amase, gedolo mosöage, sege gaamu dibeage udia dolö gegedoi amoli fudugilasila hamoseda made melimelë. <sup>13</sup> Amaimo, na nafade hamoila ilia walio sälebeda, na dofä amala hamoi amoda dima säla ulufadigimolö amo ulisio. <sup>14</sup> Ado dofä dima säla iahawe, amoda gomalä. Neda Idi ilia sosogo elöla säse gowe bögësaleada, nilile mäuie Gode ëi gauia adalomele. Amase, nada Ado säla negei dibe amo sulubadelage, Godeie bea sälo amolia ado säla dädëla negei amoge dofä gabula helësësamelë. <sup>15</sup> Godea baagoi amoli nowela ifosimäia na beaha neebe amo gadola, amase, dolö gowe iliage amala beaha neamelë. Godea amala hamomäia na asigia sisiläfüsa nea. <sup>16</sup> Amalebe segeyo sulubadelagi Godeie siigige udia dolöie siigige nie iso asigia mogola namiäiala helësësa aligilo. <sup>17</sup> Neda gäheo i odoa nelolahiläda, nihile segea obögësalea, udia dolö nelebo maade amoligali muni imolöiege, amase, Godegali odala imolöiege obögëi. <sup>18</sup> Dafidida Godeie siigi nigime baai made neebe amo olelo mala hamolahilä, Godeie mosöa odala imolöie awäla nebegi, ilia ne meli. Nebalä udia dolö gegedoi made, gëgëla nudusage made nudui. <sup>19</sup> Amalebe, Yu dolö odoa Esia segeala mofiai ami nefolalo amolia nema dia nafade hamoila säha nea galëda, di neebe hili ado amo sämolö yawe moholöi galea. <sup>20</sup> Maade galëda, dolö nefolalebe gowe ilia ne Galisolö dolö neebee nowela ifosisolo amo gala, ilia na dofä nafade hamoila meli amo säla imäia. <sup>21</sup> Ne iibalä nea na ado afädë säi amomuda gowe. Udia dolö baagoi nowemolö amo dofä gabula helësëla asigia sisiläfüsa neebeweëda, dilia walio gudisagomelëla säimelëla Foloea säi.

<sup>22</sup> Amala säsebegi, Feligisia Idigi aulo mala hedabola dawadigi nelo ameadä gudi nabi amo wagalahilä sähalea, Ami beaha aligilo busa Ilisiasa e maasegi, dilile gudi säla mogemolöla säi. <sup>23</sup> Amala sälahilä, ami sigi aligilo amoma sähalea, Folo e idihë nea gaso, hi helësëse amo gadola hamomäiage, amase, e damelë neebe amolia e ugila negemolö misiäiage fu imalola säi.

*Feligisia Folo e gäheo i äudä galabaia negei*

<sup>24</sup> Segeyo odoa nelolahilä, Feligisi e hile udia Dulusalabalä misi. Dulusila eda Yu udia. Feligisia Folo bea mosalolahilä sigi maasebegi, Foloea Geleso Yesuma asigi afädë negemolö mala säla iäsebegi, Feligisia nabaha nelo. <sup>25</sup> Nabelebe Foloea mogoi namolöge, asigi sigi namolöge, mogemolöie segeyo daiala negei amo maasebe amoiege säla iaha nelo. Säla iaha nebegi, Feligisi e bedälahilä sähalea, Di mosalo. Hobeala fu beaseda, na di misialam-olömelëla säi. <sup>26</sup> Amala helësëselo amo gala Feligisia Folobalä ado didiämolöie wesamu nelo amoda muni imäiala helësëlahilä amai. <sup>27</sup> Gäheo i äudä nelolahilä Feligisi gadoi Bosiusi

\* **24:6-7:** Dolö dawadigi odoa amolia helësësaleada, ado odoage damo gogi dialeala helësëi. Ado amoda gomalä. [Nilia nilile Ado säla negei amoie ema gudideläi: 7 gaso, ami dolö beaha aligilo busa Ilisiasa maala, nili bobala didigilahilä, ea nilia gaula nelo amo sigi awä시오. 8 Sigi awäla ea nafade hamoila sälo amoli di neebe misialola säi.]

Fesidusi e gamane sigi aligilo bedefala nelo. Feligisiada Yu dolô nefolalo amoli obeägimäia Folo e galabaia mosôa ifosisamu nelo.

## 25

*Foloea sähalea, Olomo beaha aligilo Gini Sisa neebee gudimolô moholômelêla säi*

<sup>1</sup> Bolobinisigi ami gamane sigi aligilo Fesidusi besela galala segeyo ohodoa nelolahilä, e Sisalia digîla Yalusaleme fedai. <sup>2</sup> Yalusaleme fedala nebegi gobela îlo busa nefolalo amolige, Yu udia dolô êi sälo nefolalo amolige e neebee awälahilä, Foloea nafade gomalä hamoimelêla säla î. Säla îlahilä ilia ema gelolafali sähalea, <sup>3</sup> Dia dofä nilî ugila negela Folo eda Yalusaleme misialamäiala säi. Dafidi ilia didiähalea, Folo e, aso, idiafa maaha neêgi, e nufulôie idia negemolômelêla didiäi amo helêsêla amala säi. <sup>4</sup> Amalebe Fesidusia säla obêgêsalea, Folo eda Sisalia galabaia nea. Neda holôfalî nelolahilä ami obêgêmolômelê. <sup>5</sup> Dolô goea nafade afädê hamoi galêda, dilile êi sälo odoa nefolalebe amolia ebalä gudimolôie nebalä digamalamalola säi.

<sup>6</sup> Amida Fesidusi e ilibalä segeyo gödôlasi gadoiledu ma, nabûlasi gadoiledu, nelolahilä Sisalia digai. Amo aiyo amogi Fesidusi e gudisalea filo amodaia salea, ea Folo sigi misialai. <sup>7</sup> E maasebegi Yu dolô Yalusalemela digafiai amolia Folo e nogôla amalela digîla nea, ea nafade yafie edefade hamoimelêla säi. Amala säi gaso, ea dofä amala hamoi amoda säla ulufadigimolô amoda ulî melî. <sup>8</sup> Amaimo, Foloea sähalea, Yu udia dolôie mala säla negei dibe amoge, Godeie mosôge, amase, Olomo beaha aligilo Gini Sisa neebee amomage na nafade afädê made hamoi neawela säi.

<sup>9</sup> Amala säsebegi, Fesidusia Yu udia dolô obeägimäiala helêsêlahilä, Foloma säla obêgêla nabahalea, Iliä säi amoie na gudi mogemolôie Yalusaleme fedamolô helêsêsebelela nabi. <sup>10</sup> Amasebegi Foloea säla obêgêsalea, Mosôa walio ne neebeweda Sisaie gudilo mosô. Nebalä gudimolô amoda mosô wegimelê. Dihî dawadigi, nada Yu ilimada asiala hamoi afädêda made. <sup>11</sup> Amaimo, na nafade hamolo amea baagomolô galebada, ne baagomolô amoda dofealabio. Amai walio dolô gowe ilia na nafade hamoila säsebegi, amo dofä made galêda, afädêda ne neala ilile naabogi gausimolôda made bimolômelê. Amaimo, neda Sisaeamu nîe gudi nabuäiala helêsêsamelêla säi. <sup>12</sup> Amala säsebegi, Fesidusia dolô e ugila negela sälasilo amolibalä didiälahilä, ea Foloma säla obêgêsalea, Dia Sisaea nabuäiala säi ameada dida Sisama moholômelêla säi.

*Fesidusia Gini Agilibama Foloie nabi*

<sup>13</sup> Segeyo odoa baagilahilä, beaha aligilo Gini Agilibale Benisile Sisalia Fesidusima di go gabiola säla olemolô misi. \* <sup>14</sup> Eleda Sisalia segeyo holôbö nahui nelo. Segeyo amo gala Fesidusia Foloie ado amoie ginima säla î. Ea sähalea, Dolô afädê dafidi Feligisia galabaia negei nelo amo, wimu neamelê. <sup>15</sup> Ne Yalusaleme nelo amogida, Yu ilile gobela îlo busa amoliage dolô dafidilo amoliage dolô amoie sähalea, Ea nafade gomalä hamoimelêla säla îlahilä, na dofä ea asiala hamoila sãmäiala säsio. <sup>16</sup> Amasebegi na ilima säla obêgêsalea, Olomo nilile malada dolô memalä neala elôie naabogi gausiloda mademelê. Dolô gudimolô galêda, eda dafidi gudimolô dolô amo mimiagila mia sida alogola aligilo. Amase, nilia ema fu îahalea ilia ema säse amoie säla obêgêmäia fu îlomelêla säi. <sup>17</sup> Amalebe ilia wi maala gegedosebegi, segeyo baagila made, amo aiyo amogi ne gudisalea filo amodaia salea, na dolô amo sigi misialola säi. <sup>18</sup> Dolô ebalä gudimolô amoli hä nowela nefolalebeda, ilia ea nafadefali hamoi gabula sãmabelela helêsêi gaso, maade gabu. <sup>19</sup> Iliä ado gêgêla säha nelo amoda ilile Gode bêgêlo mala amole, Yesu baagola Foloea e noweimelêla sälo amolegi gêgêi. <sup>20</sup> Na ado goie mi fädäla bimolô amo asusugasebegi, na ema nabahalea, Ado goie gudi mogemolôie Yalusaleme moholô helêsêsebelela nabi. <sup>21</sup> Amalebe Foloea, beaha aligilo giniamu nîe gudi mogemäia galabaia namolôla säsebegi, na e beaha aligilo Gini Sisa neebee fisiga gamolôlahilä gaso, aso, galabaia namialaimelêla Fesidusia säi. <sup>22</sup> Amala säsebegi, Agilibaea Fesidusima sähalea, Dolô goea ado säse amo nihî nabolôila helêsêsebelemelêla säi. Amala sälebe, ea säla obêgêsalea, aiyo dia îe ado nabolômelêla säi.

<sup>23</sup> Amo aiyo amogi Agilibale Benisile momadolahilä maala ami beaha aligilo busa nefolalo amolige, gaamu amoie dolô dafidilo nefolalo amolali gamane gegedolo mosôa ami digai. Digalahilä, Fesidusia Folo e sigi misialasebegi ilia e sigi misi. <sup>24</sup> Sigi maala nebegi Fesidusia sähalea, Gini Agiliba-o, dolô gegedoi sulubadela dili-e, dolô dilia beasebe egoeda Yu udia dolô sulubadela, Yalusaleme amige, amase wige, nema nabahamu nea sähalea, E namolôï madela îalala säha aligilomelê. <sup>25</sup> Amai gaso, na ea hamoi amoie e baagomäia nufulôda mi afädê made beagolei. Gasoda, ea beaha aligilo ginia îe gudi mogemäiala säsebegi, na ado afädê negesaleada, e fisiga gamolôla säi. <sup>26</sup> Ea hamoi amoie dafdiloma beba

\* **25:13:** Gini Agilibada Heledo, Yamese nufidelo amoie malô. Abosolo 12.1 bimalo. Benisida Agilibaie elefi.

dëdëmolöie afädë fädäla made beagolesebegi, Gini Agiliba-o, die siigi e sigi misialaimelë, amase dilile siigige. Mida, nilia ema säi amoie mi fädäla hogolahilä, ea hamoi amoie mi bebagi dëdëla negemolö dibe amo helësëlahilä, dëdëmolömelë. <sup>27</sup> Afädë galabaia neebe amea nafade gomalä hamoila made dëdëla fisiga gamolöda dofea madela helësësamelëla Fesidusia säi.

## 26

### *Foloea Gini Agilibaea nabuäia ado säi*

<sup>1</sup> Agilibaea Foloma sähalea, Dia sämolö amo sämalola säi. Amala säsebegi, Foloea naabo gauia adogola nea sähalea, <sup>2</sup> Gini Agiliba-o, Yu dolöea nema dia nafade hamoila säi amo sulubadelaieda walio na dima säla obëgëmolö amogida obeägisamelë. <sup>3</sup> Obeägisamelëla säi amoda, diada Yu udia dolö neebe amoie mala sulubadelage, amase, nilia elö elöla helësëla gëgëlo amoge dawadigisa maadei nebegi. Ameada na walio ado säsebewe sedade säsebelä helësëla made, hame negela nabuäiala helësësa.

<sup>4</sup> Ne malësägila na hamosa nelo amoda Yu udia dolö sulubadelaia dawadigisa maadei nea. Mi gäwia amila nihi segea neage Yalusalame neage, namolöi nelo amo ilia dawadigi nea. <sup>5</sup> Iliä ne malësägila dawadigi ameada ilia sämolö helësësedä, na Felesi ilile mala hamosa nelo amo dima sämolöi gabu. Nilile Gode bëgëlo mala amoie sosogo odoä dialea gaso, Felesi sosogoie mala elö elöla yafie hamolo ameada sosogo odoä sulubadela baagisa asimelë. <sup>6</sup> Amaimo, dafidi Godea nilile mäuma ado afädë säla negei amo hamomäia na asigia sisiläfüsa neebeweie ne nebegi walio gudisagomelë. <sup>7</sup> Ado säla negei amo bimolöie nili fii giwilasi nefolalo amolia asigia sisiläfülahilä, esoage gasigige Godeie ei gauia adala ema ado sähamu nefolalea. Amaimo, beaha aligilo gini-e, na asigia sisiläfüsa neebeweieda Yu dolö ilia dia nafade hamoila säha neamelë. <sup>8</sup> Godea udia dolö baagoi amoli nowelasilo neebe amo dilia e amala hamolo ulila helësësa nefolalebegoda edoie.

<sup>9</sup> Nasalese fii Yesuie ei neala nafademolöie, na hamoi edefade hamomolöila helësësa nelomelë. <sup>10</sup> Amala helësëlahilä, na Yalusalame nea amala hamosa nelo. Gobela ilo busa nefolalo amolia ne geloi iasebegi, udia dolö yafie Godea hile nafolai amoli na galabaia negei. Amalahilä, ilia udia dolö amoli baagomäia nufualola säsegige na ülomelë. <sup>11</sup> Segeyo yafiegi gedolo mosö nefolalebe amo sulubadelagi awälahilä, ilia Gode gagademäiaie na ili neala sëlasisa nelo. Na ilima edefademalä mihaläla fii elö elöläie gaamu dibeä amige awälahilä, ili neala sëlasisa nelomelë.

<sup>12</sup> Na amo gadola hamomäia gobela ilo busa nefolalo amolia ne geloi iäla, bebage dëdëla iasebegi Damasaga gaamugi asi. <sup>13</sup> Beaha aligilo gini-e, ne idiafa awäla eso mogogi aligisebe amo gaalu, na beahamelebe, nege nebalä afiai amola nili nebeea ami eso si gadoi made, yo edefade hido elöi mudaiala säsälosebe meli. <sup>14</sup> Amala hamosebegi, nili sulubadela digafui difolalebegi, afädëa nema Hibulu adoea sähalea, Solo-o, Solo-o, edogi dia ne neala sëlasisa. I ägëgi emoea nufidelo wäla nufidelo goeada di dihimu yölasisebegola säsio. <sup>15</sup> Amala sälebe na naba obëgësalea, Dafidilo, dida nowëla nabi. Amala nabebe Dafidilo Geloia säla obëgësalea, Neda Yesu, dia neala sëlasilo amomelë. <sup>16</sup> Di nowela emoea emesala namië. Di hamoi hamolasilo namiäiäge, dia walio ne neebe meli amoge, hobeä ne bimolö amoge udia dolöma säla imäia na di memelela ifosimolöie ulufadigila misi neawe. <sup>17</sup> Hobeä ne bimolöla säi amoda, di fii nefolalebe amoliage, amase, udia dolö fii elö nefolalebe amoliage, di nufudadigiloea na damula moholömelë. Na di ilima fisiga gahagomelë. <sup>18</sup> Iliie si fisigälasimolöiege, gasimi sagaia amila yo digalo dibeä amige, amase, Saidaniie geloi hawa amila Godea sigi nebeea ami ili besulasimolöie, na di fisiga gahagomelë. Iliä amala hamoseda, ilile nafade hamoi amo hëla fisimolö. Amase, udia dolö nema asigi afädë negela Godea hile nafolaimadi namiäia fu imolömelëla säsio.

<sup>19</sup> Amalebe, Gini Agiliba-o, selesäia mosöala olesalea ado säi amoda na fisila made nelo. <sup>20</sup> Dafidida Damasaga nefolalebe amolimage, Yalusalame nefolalebe amolimage, amase, Yudia sege sulubadela dibeä nefolalebe amolimage säla iahalea, Dili asigi besulahilä Godemadi nea, dili dofä asigi besui amo gadola mala hedabi olela hamosa namialola säla iahilä, hobealada fii odoä ilimage amala säla iaha aligilomelë. <sup>21</sup> Amala säla iaha aligilo amoie, Yu dolö nefolalo amolia ne Godeie mosöa nebegi gaulahilä baagomäia nufidedelä hamomelë. <sup>22</sup> Amaimo, Godea ne ugila negesebegida, na memasamege, ei sälomage ado säsäla misi amo, aso, walio säha neawe. Nada ado elö made sähamelë. Nada siiba bea sälölea, Moseselea nelebo gausiala digamolömelëla ado säla negei amomu sähamelë. <sup>23</sup> Iliä gomalä säla negei. Afädë Memele amoda së molö dialea. Amalahilä, bauiala nowemolö amo dafidifali hi nowese amea ea Godeie yo digalo amo e fii amolimage, amase, udia dolö fii odoä amolimage säla imolöla bea säla negeila Foloea säi.

### *Foloea Agiliba asigi afädë negemäiaie säi*

<sup>24</sup> Foloea amala sāha nebegi Fesidusia gelola uuala sähalea, Folo, dida gagaosebego. Die dawadigilo edefade goeada dihödi gagaosebegola sāi. <sup>25</sup> Amala sāsebegi, Foloea sähalea, Dolö edefade Fesidusi-e, ne gagaosa maademelë. Nada dofä sāha. Asigi gäwi nea gowe sähala sähamelë. <sup>26</sup> Gini Agilibaeada na ado sāi amoie dawadigisa neamelë. Nada mustüga negela made sāla iaha maademolöi neawe. Na helësésaleada, ea dawa made made, amoli sulubadela ea dofä dawadigisa maadei nebegola helësésamelë. Mida, amo hamoi amoda musüga nea hamoi made ameada amala helësësa. <sup>27</sup> Gini Agiliba-o, diada bea sāloie ado amoda dofäla helësésale. Na helësésaleada, diada dofäla helësésala helësésamelëla sāi. <sup>28</sup> Amasebegi Agilibaea Foloma sāla obëgésalea, Ne Geleso sosogo namolöie fu oboba gogi aligilasiāia helësésabela sāi. <sup>29</sup> Amala sāsebegi, Foloea sāla obëgésalea, Fu obobagi galëge ma, sedadegi galëge amoie na dimu made, udia dolö na walio ado sāsebe nabaha nefolalebe amoli sulubadelage nihine gadoi namiāiaie Godema adosamelë. Nihine gadoi gaso, dili igi ëfëa galabaia negelo amo gadola made negela namiāiala helësésamelëla sāi.

<sup>30</sup> Amasebegi beaha aligilo ginige, gamane sigi aligiloge, Benisige, ilibalä sulo amolige hä nowei. <sup>31</sup> Nowelahilä ili segea doadigila awäla hilidomu sähalea, Dolö goweda ea hamoi amoie nufulöge, galabaia negemolöge maade gabula sāi. <sup>32</sup> Amasebegi Agilibaea Fesidusima sähalea, Dolö goeada Sisaea ie gudi nabuāiala made sāi galebeda, dia fisiga gamalalabiola sāi.

## 27

### *Ilia Folo e Olomo mosäia ödä du edefadegi fisiga gai*

<sup>1</sup> Iliä nili ödä du edefadegi Olomo moholö dialeala ado afädë negesebegi, ilia Fologe dolö galabaia negei odoage ami sigi aligilo afädëie naabogi gausi. Sigi aligilo amoie ëida Yuliasa. Eada ami dolö hädali afädë sigi aligilo nelo. Eda beaha aligilo Gini Sisaie Ami Dolö amoligi nelo. <sup>2</sup> Nili ödä du edefade Adalamidiamala misi dilo amogi fila afiai. Ödä du amoda Esia segeie gaamu agesumadi besela galala digila moholö dilo. Desalonaigala Masedonia fii dolö afädë ëi Alisadagusage nilibalä afiai. <sup>3</sup> Afiala amo aiyu amogi Saidono besela galai. Besela galalahilä Yuliasaea Foloma hedabola helësëlasila sähalea, Di damelë wi nefolalebe amolia nelebo di gumusui dibe amo gadoi imäia, ili neebea moholöi galeala sāla i. <sup>4</sup> Amalahilä sege amo digila ödä duugi afiaha dibegi, fo eso digasebeamadila maasebeamadi amogi moholö iliwasebegi, fo hagula Saibusimadi dewagila afiai. <sup>5</sup> Afialahilä ödä duhulu dëgëla awäla Silisiale Bäfiliale agesumadi awälahilä Ilisiaie gaamu Maila besela galai. <sup>6</sup> Besela galahamelebe, ami dolö sigi aligilo amea ödä du elö Alegsädaliala misi Idalimadi moholö dilo amogi nili sigi awäla ifosi. <sup>7</sup> Segeyo holöbö nahuigi afiahalea baagi sëla aligi gebela awäla Nidusa gaamu sida gagala afiai. Fo amea nili moholö helësëido amogi moholöi made gabugida oböla fo hagula ödä södülo Gilidimadi dewagila awäla Salomone segeamadi sida gagala afiai. <sup>8</sup> Nili baagi sëla aligi dewagila didigila awäla sege afädëgi besela galai. Sege amoda Ödä Du Musüga Negelo Hedabi Segela sālo. Amoda gaamu Alasea ga madela ami dilo.

<sup>9</sup> Segeyo yafie baagila asi amogige, amase, Molö Made Nülo Segeyo\* amoge baagila asi amogige segeyo amo gaaluda, baagoloea ödä duugi aulo made negei. Amo helësëla Foloea ilima sähalea, <sup>10</sup> Dolö dili-e, wilahilä moholö amoda dofea made, nafade na melimelë. Nelegei difolalebe goge, du edefade wege neala nafademolö gabumelë. Amase, nili odoage baagomolö gabumelëla sāi. <sup>11</sup> Amala sāi gaso, ami sigi aligilo amea ödä du gaulolea ödä du eedolea helësëse amo gadola hamodeläla helësëla Foloea sāsebe amo gadola made hamodeläla helësëi. <sup>12</sup> I bäu gise gaalu, gögi mulo segeyo besela galasebegi sege amogida ödä du negesilamu diamolö amo dofea made gabula helësëlahilä, dolö yafie ilia Finigisi moholö amoie ado afädë negei. Iliä nili Finigisi besela galamolö walebelela bimolö moholöila helësëi. Gögi mulo segeyo besela galasebegi ami negesimu diamolöla helësëi. Finigisi amoda Gilidi södüloie ödä agesua. Du negelo segea ami diëda eso digasido amoie fefeädimidilage dafädimidilage melëlo.

### *Du ödägi awäha nebegi fo edefade misi*

<sup>13</sup> Fo eso digasido amoie fefeädimidila holöbö geleäla maasebegi, dolö amolia hili helësëi amo gadola ga moholö dialeala helësëi. Amala helësëlahilä nelebo yöi igi aeanea hamoi amo dusugala neala gauia adalahilä, Gilidi segeie ödä agesumadi afiai.\* <sup>14</sup> Aso, afiaha dibegi heleia made fo geloi edefademaläde Gilidi södülomadila misi. Fo amoie ëida Ulagulo fo.\*

\* **27:9:** Molö Made Nülo Segeyola sāi amoda nafade hëmolöie odala ilo mala siiba daiala negei segeyo dilo amola helësëi.

\* **27:13:** Nelebo yöi igi aeanea hamoila sāi amoda gomalä. Nelebo yöi igi aeanea hamolahilä ödä du made mosäia begela ödägi nea salelo. \* **27:14:** Ulagulo foda eso fedasido amoie fefeädimidila mulo, mugi fo gadoi.

<sup>15</sup> Amalahilä du amo foëa gaula näiadodimu bolosebegi iliada du obëgëdelä hamoi gasoda, obëgëmolöi made meli. Amasebegi hä foëa du gaula mosäia fisigisi. <sup>16</sup> Fisigisila awäla södölo holöfali, ëida Gaudaea fo holöfali hagusebegi, niliada häualafali du edefade mia du holöfali begela negei amo dusugala gaula misi. <sup>17</sup> Dusugala gaula maala du holöfali amo gauia adala du edefade amodaia negesebegi, ilia du edefade hawa ëfë fisiga idogalahilä amo bäimäia fëdöla begela negei. Iliada du amo ödämu dibe amogi ödä dögöla digai made giäbigi ëi Sidisi amogi aligisiloea bedähalea ie balai amo hails negesebegi foëamu gaula asi. <sup>18</sup> Fole ödä bubolele dagabola maase amolea nilida edefade besu besui. Amasebegi, amo aiyo amogi ilia mi gäwila nelegei dudaia negei amo duhulugi hadia idodogosa nelo. <sup>19</sup> Amalahilä awäla segeyo naabo osodagi, ödä duugi negelo nelegei odo, ëfëge balaige ige amo gadoi difolalo amoge hili naaboea neala ödägi hadia idodogoi. <sup>20</sup> Segeyo yafëgi niliada eso, gasumilile made beala, fo edefademalä maahalea nili neala besu besusamu nelo. Amasebegi nilia helësësalea, nilida samolö made gabu, baagomolö gabula helësëi.

<sup>21</sup> Segeyo yafie ili molö made nasebegi, Foloea ili mogogi nowela nea sähalea, Dolö dili-e, dilia nie ado nabala Gilidi made baagi galebada, nafadela bedälasila hamoi amoda made beala, nelegei odo made fisilabio. <sup>22</sup> Amaimo, walio na dilima gomalä sähawe. Dili bedäla made, obeägimalo. Mida, niligi afädë made baagomolö. Du wemu nafademolömelë. <sup>23</sup> Gode neebe amöie ne neawe. Nada ie ëi gauia adaha aligilo. Gode amöie selesaia fii afädëa walio gasigi ne sebea maala nea <sup>24</sup> sähalea, Folo, bedämabu. Dida awäla Sisaie siigi namolö galea. Amase, nabuö. Dolö dibalä ödä duugi sefolalebe goli sulubadelada made baagomolö Godea die naabogi gausila imelëla säasio. <sup>25</sup> Ameada, dolö dili-e, bedäla made, obeägimalo. Mida, na helësësalea, Godea ado nema säi amo gadola gausiala digamolöla helësësamelë. <sup>26</sup> Gaso, foëa nili gaula awäla södölo afädëgi aligisimolö galeamelëla Foloea säi.

<sup>27</sup> Amaimo, segeyo silasi awäha nelolahilä gasisebegi, nili ödä duhulu ëi Ödä Adiliagi foëa gaula awähamu nelo. Gasi mogogi ödä du gaulo dolö amolia ödä agesu holöbö ga madei gabula helësëi. <sup>28</sup> Amala helësëlahilä ilia ödä amo dofe bimolöie ëfë sedade amöie bidigi yöi afädë begelahilä ödägi fisiga idogoi. Fisiga idogoi amo nea adogola beahamelebe ödä dögöla digai dofei amo mida nabülasi biyidia gadoi meli.\* Amala bealahilä holöfali aliga galahilä bu elö fisiga idogola dofela beahamelebe ödä dofei amo mida nabülasi ohodoa gadoi meli.\* <sup>29</sup> Amalahilä nili awähalea igidaia aligisiloea bedälahilä, ilia nelebo yöi igi aeanea hamoi biyidia amoli du amöie gobegi begela sadia idogoi.\* Amalahilä ilia sege yola eso neëmäia Godema adosa nelo. <sup>30</sup> Amaimo, ödä du gaulo amolia du digila äudulälahilä du holöfali fisiga idogola wäfalä sähaleada, Nelebo yöi igi aeanea hamoi odo duie busamadila fisiga idogosamelëla säi. <sup>31</sup> Amalebe Foloea ami sigi aligilo amomage ami dolö amolimage sähalea, Ili du gowegi made aligiseda, dili baagomolömelëla säi. <sup>32</sup> Amala sälebegi ami dolö amolia du edefadegi du holöfali begei amo damula sali. <sup>33</sup> Haea gämolö hä ga madese amo gaalu, Foloea dolö amoli molö muäiala ilima sähalea, Segeyo silasigi dili molö fodögila made naala memalä nelo. <sup>34</sup> Walio dili molö muäiala sähamelë. Dili namolöie molö molö dialea. Dilile busa hili afädë made besela digimolömelëla säi. <sup>35</sup> Amala sälahilä Foloea beledi afädë nealahilä ili sulubadela sebea ami nea Godema nesegehalilä dagabola naha nelo. <sup>36</sup> Amala hamosebegi, sulubadela asigi gadaealahilä ilige molö mai. <sup>37</sup> Ödä du amogi dolö sefolalo amoli gedolada hädali äudäie nabülasi gifalädaliäie odoai gafeia sulo. <sup>38</sup> Molö mai agulahilä, ilia ödä du amo hageamäia eladi gadoi ëi widi dilo amo ödägi sadia idodogosa nelo.

### *Du dagabodasi*

<sup>39</sup> Segeyo hosogasebe amo gaalu, ilia duhulu agesua besela galaia amo bealahilä, sege abididula asusugai. Asusugalahlä beahaleamelebe duhulu hedogola bose fula asi dibe amo bealahilä, ami awäla ödä du negemolöi galëda, negemolöla helësëi. <sup>40</sup> Amala helësëlahilä ilia nelebo yöi igi aeanea hamoi amoli ödägi ëfë amo damula sasali. Amala hamolahilä ödä du mogola mosäia adelo i ëfëa begela negei dilo amo fisigäi. Fisigalahilä foëa ödä du gaula mosäia ilia duie busamadi balai afädë dilo amo gauia adogola neegilahilä, ili ödä agesu dibeami besela galamolöie awäha nelo. <sup>41</sup> Awäha nea ödä du amo ödä isogi bose giäbigila fedai dilo amogi udigi. Busa amo udigila aligisilahilä fogomolö uli dilo. Amala aligisi dibegi ödä bubolela edefade maasebe amea du gobe aba fedafusalea dagabodasila nafadei. <sup>42</sup> Amala hamosebegi, dolö galabaia negei amoli ödä agesua dasi afufula fisäla afialoea, ami dolö amolia ili sulubadela nufudadigimolöla helësëi. <sup>43</sup> Ili amala helësësebegi ami sigi aligilo amea Folo e made nufuäiala helësëla ilima säla iahalea, Dilia helësëi amo gadola hamomabiola säi. Amala sälahilä ea sulubadelama sähalea, Ödä dasi aulo nefolalebe dilidale ödägi nila digala dasi afufula agesua mosalo. <sup>44</sup> Odo dilida i gäi amogi gaula,

\* 27:28: Mida nabülasi biyidia amoda hësä gidälasi gadoi.

\* 27:28: Mida nabülasi ohodoa amoda hësä gödölasi gadoi.

\* 27:29: Abosolo 27.13 amogi gasumilii nufi amo bimalo.

amase, odoa du nuli amogi gaula biila mola afufula mosalola säla i. Amala säi amo gadola hamolahilä niligi afädë made baagola hulu agesua dea negesa maadeimelë.

## 28

### *Folo e Malada södölogi nelo*

<sup>1</sup> Nili agesua hedabola besela galalahilä, ami fii amolia sege ödä södölo amoie ei Maladamelëla säla i. <sup>2</sup> Udia dolö sege amogi fii amolia nili hedabola helësëla hido elöla ugila negei. Sege digahalea gögösebegi, ilia nulo gobelahilä nili sulubadelama hëgi haumolö mofiamalola säi. <sup>3</sup> Foloea nulo gasa nidilahilä nulo gaamugi gobesebegi, nulo amogi baagolo nuba afädë nulo gaamuea hëgisebegi doadigila fedala, Foloie naabogi mihila begedigila gosai dilo. <sup>4</sup> Ami fii udia dolö amolia beahamelebe, Foloie naabogi nubaea mihila begedigila gosai dibe amo bealahilä hilidomu sähalea, Dolö goeada dofä dolö nufudala baagolo. Eda duhulugi baagomolö halabai gaso, godea nafade hamolo amolima bidi obëgëla ilo amea e made namiäia amasebela säi. <sup>5</sup> Amasebegi Foloea nuba amo folalea nulogi hadia galahilä, eda made olola hedabi nelo. <sup>6</sup> Udia dolö amolia helësësalea, e galumolöledu ma, fodolo baagola digamolöledula helësëi. Amala helësëlahilä, ili sedademalä beaha nefolalebegi, emada nelebo afädë made hamose meli. Amasebegi ilia asigia oböla elö bedefala helësësalea, eda gode afädë gabula helësëi.

<sup>7</sup> Sege afädë ili sebe amo gägëgëla dilo amoda södölo amoie dafidilo ei Bubuliasaie sege dilo. Dolö amea nili ea mosöa fimäia fu iasebegi segeyo ohodoagi ea nili hedabola sigi nelo. <sup>8</sup> Bubuliasaie eedo domalo hëgige gaisa sëge oloi dibegi, Foloea e dibeä ami awäla Godema adoi. Godema adolahilä ea ie naabo negesebegi oloi dilo amo wahilasi. <sup>9</sup> Amala hamosebegi, södölogi ami oloi difolalo amoli Folo nebea mafusebegi ili wahilasisi. <sup>10</sup> Nilima obeägila ilia hedabolafali hamoi. Amala hamolahilä hobeala nili ödä duugi äudulä hamosebegida ilia nelebo nili gumusui dibe amo gadoi i.

### *Folo awäla Olomo besela galai*

<sup>11</sup> Aube ohodoa ami nelolahilä, nili ödä du afädë Alegsädaliala misi dilo amogi fila afiai. Ödä du amo i bäu gilo segeyo amoli besela galasebegi södölogi ami negesi dilo. Ödä du amoie busamadi malö äüdä balagula ägüi amolele ausulubo iia hamola baala negei dilo.\* <sup>12</sup> Afiala nili Silagusa besela galalahilä, segeyo ohodoa ami nelo. <sup>13</sup> Silagusa amila awäla giso llegenduma besela galai. Segeyo afädë ami nelolahilä, fo eso digasido amoie fefeädimidila maasebegi, nili afiala gasila didigadigila awälahilä amo aiyo amogi awäla Budeoli besela galai. <sup>14</sup> Besela galalahilä ami nedoo odoa nefolalebe amoli beagolelahilä, ilia nilima segeyo gifalädalä namolömelëla säi. Ami nelolahilä nili Olomo moholö afiai. <sup>15</sup> Afiaha dibegi nedoolali Olomo ami nefolalo amolia nili maahala säi amo nabalalahilä, ilia nili idiafa gausiamolö maala odoa Abiasa magäia gaamugi gausialahilä, odoada hele filo mosö ohodoa nebea ami gausiai. Foloea ili maasebe amo beala Godema nesegelahlilä, ie iso asigi delësi.

<sup>16</sup> Nili Olomo besela galasebegi gamane ilia, ami dolö afädëa idihë neëgi, Folo mosö afädëgi hido namolöi galeala säi.

### *Foloea Olomo nea Yesuie mala säla i*

<sup>17</sup> Segeyo ohodoa nelolahilä, Foloea Yu udia dolö nefolalo amolile dafidilo nefolalo amoli misiäia wei. Maala gegedosebegi Foloea ilima sähalea, Nedoola dili-e, nili fii amolimage, nilile mäuie mala amomage na nafade afädë made hamoi nebegi, ne Yalusaleme ami nafodolahilä, Olomo dolö nefolalebe amolile naabogi gausimelë. <sup>18</sup> Ila gudilahilä ne nufudala baagomolö amoie mi fädäla made beasebegi, fisigamolöla helësëi. <sup>19</sup> Amala helësësebegi, Yu dolö amolia amamabiola säsebegi, idi elö maade gabugi na beaha aligilo Gini Sisaeamu nie gudi nabuäiala säi. Amai gasoda, na ne fii amolima nafadela hamoila sämolöda helësëla made nelo. <sup>20</sup> Mi amoie na dili siia beala ado sämolöie dili misiäia weimelë. Isilale ilia asigia sisiläfusa nebeä amoie igi ëfë gowea ne begela nebea säi.\*

<sup>21</sup> Amala säsebegi, ilia ema sähalea, Yudia amila dia hamoi amoie beba nilima made dëdëla iäsi. Nilile nedoo misi amoliage ado made säi. Dia nafade hamoilage made säla imelë. <sup>22</sup> Dia helësëi amo nilia nabolöla helësësebe. Mida, sege sulubadelagi sosogo gowe nafade neala sälo amo nilia dawadigi neamelëla säi. <sup>23</sup> Amala sälahilä ilia ema segeyo naabo negesebegi, ili yafie Folo nebea mosöa ami mofiala gegedoi. Gegedosebegi Foloea yosefali nowela Godea Beaha Maadela Sigi Neebe amoie ado säla iahalea mi awala iaha nebegimu së gäi. Ea Mosese nebegi Ado säla negei amo gadolage, amase, Godeie bea sälo nefolalo amolia bea säla negei amo gadolage säla iahalea Yesuie säi amo dofä gabula helësëmäia säla iahamu

\* **28:11:** Malö äüdä balagula ägüila säi amoda, wäfali gode Susa amoie dolö malö äüdäiela säi.

\* **28:20:** Abosolo 23.6,

24.21, 26.6 amoli bimalo.

nelo. <sup>24</sup> Amala säla iasebegi, dolö odoaeada ea ado säsebe amo dofä gabula helësëi. Amase, odoaeada dofä gabulada made helësëi. <sup>25</sup> Amala hamolahilä ili hilimu asigi afädë made negela afiai. Dafidida, Foloea ado afädë wagala sähalea, Eleloi Gesarnia bea sälo Aisaeama aligila dilile mäuma mogola säi gabu. <sup>26</sup> Ea sähalea, Udia dolö amoli neebee awäla ilima sähalea, Dilia nabahamu nea gasoda, fädäla made helësëmolömelë. Dilia beahamu nea gasoda, galone gowe gabula made beagolemolömelë. <sup>27</sup> Amoie mida, udia dolö amolile asigi dofogai nea. Ili gëhe gai gadoia hedabola made nabelo nea. Ilile siige dofogai nea. Ilii siia beala, gëhea nabala, asigia helësëla besusa galebada, amoda na ili wahilasilabiola sämalola

Aisaeaea säi.

*Aisaea 6.9,10*

<sup>28-29</sup> Amai ameada gowe helësëmalo. Godeie damula moholö ado mala amoda udia dolö fii elö amolima fisiga gaila helësëmalo. Ilii nabolömelëla Foloea säla wagai.\*

<sup>30</sup> Foloea mosö e adi amoie bidi ialahilä ami gäheo i äudä nelö. Ami nea udia dolö sulubadela e neebee mofusebe amoli obeägila gauia idala nelö. <sup>31</sup> Ea Godea Beaha Maadela Sigi Neebe amoiege säla iala, amase, Dafidilo Geloi Yesu Gelesoie malage säla olelesa nelö. Bedäla made gelola säla olelesa nebegi, afädëa ema olelemabiola made säi. Hä amo.

---

\* **28:28-29:** Dawadigi dolö odoaea helësësaleada, ado odoage amogi dialeala helësëi. Ado amoda gomalä. [29 Foloea ado säsebegi, Yu dolö amolia awäha nea hilimu mihaläla gëgëla afiai.]

## Golosi Neala olelo oboba

Golosi gaamu amoda bolobinisi Esiäie Ebesa gaamu ga madela adadi eso maasido dilo. Folea made, dolö odoaea Golosi udia dolöma Ado Mala Hedabi säla olelesebegi, udia dolö odoa nefolalo amolia asigi besula Yesuma asigi afädë negei.

Amala hamosebegi, Geleso sosogo Golosi nefolalo amolima, dolö odoaea Godeie mala dofä dibe amo gadola made säla olelesa neala säsebe amo nabalahlilä, Folea beba we dëdëla i. Godeie mala dofä dibe amo gadola made säla olelelo nefolalo amolia sähalea, Gode neebe amo hedabola helësëla, ie damula aulo neala gausa maademolöie, mudaia sigi aligilo nefolalebe amolige, busa nefolalebe amolige helësëla ei gauia adamolö dialeala säi.

Ilia amomu made, mala elö elöla hamomolöge, made hamomolöge säla digi, gafodo damumolö dialealage, amo gadoi yafie säla olelesa nelo. Ado amo nabalahlilä, Foleeada amolia Godeie mala dofä dibe amo gadola made olelei gabula helësëlahilä, Godeie mala dofä dibe amo dëdëla ilima i.

Folea beba amo dëdëla dolö äudäma i. Dolö elö amoie ëida Digigusi, elö amoie ëida Onesimusi. Elea gaula mosäia i. Onesimusi eda, galabaia hamoi gadoi hamolasilo nelo. Ie dafidilo ei Filimonoma beba elö Folea dëdëla i amo dialea.

### **Geleso eda nelebo dibe sulubadelaië busa neada, namolö sulubadelage, Godeie mala dibe amoge ema nobai nea**

*(Golosi 1.1-3.4)*

<sup>1-2</sup> Neda Folo, Gode hile hamelo dibe amea, Geleso Yesuie abosolo neawe. Nedoo nalifi Golosi gaamugi Gelesoma asigi afädë negela, ema dila nefolalebela dilima, nilile nedoo Dimodi alia beba gowe dëdëla isasisago.

Nilile Naado Godea dilima ugila negelasiloge, neala dalulasiloge imäia hamesa neawe.

*Golosi ilia Yesuma asigi afädë dofä negei*

<sup>3</sup> Alia dilile Godema adosaleada, segeyo sulubadelagi nilile Dafidilo Geloi Yesu Gelesoie Eedo Gode neebe amoma nesegesamu aligilomelë. <sup>4</sup> Dili nefolalebe goea Geleso Yesuma asigi afädë negei amo, amo wälasi nebegoge, amase, Godeie udia dolö sulubadelama boba hahamosa nebegoge, alia nabalahlilä, nesegesa aligilo. <sup>5-6</sup> Ado dofä amoda, Ado Mala Hedabi dili neebea besela galasebegi, asigia sisiläfüsa namolö amoda, nabi gomelë. Selesaiä mosöa musügä negei amoie dilia asigia sisiläfüsa neebe goeada, dilia asigi afädë negesa nebegole, boba hamosa nebegolemelë. Ado Mala Hedabi ameada, sege sulubadelagi bäula edelahilä, gägä negelasilo nea. Diliage ado amo dafidi mi gäwila nabalahlilä, Godea ugila negelasilo i amo hedabola helësëla, dofä gabula beagolesolo amo gala, amo gadolamu gägä negela bäulasisamu nelo. <sup>7</sup> Ado mala amoda, Ebafoolasaea dilima säla olelei. Eda nilile damelë obeägilo nilibalä hamoi gedola hamolasilo nea. Eda asigi falagasei nea, dili ugila negela, Gelesoie hamoi hamosa nelo. <sup>8</sup> Godeie Gesamia odoa boba hamolo dilima i amo, Ebafoolasaea alima ulufala säla imelë.

*Golosi ili gelolasila Folea Godema adolasi*

<sup>9</sup> Dilile säla iasebegi, dafidi nabia amila alia Godema dilile adolasisamu nelo amo neamelë. Asigi falagasei namolöle, helësëlole, ie Gesamia ilo dibe ameada, Godea hamese amo gadola helësëlo amo dilima nobamäiaie adolasisamu neamelë. <sup>10</sup> Amala adosebe amoie mida, dilia Godeie mala bëgëmolö dibe amo gadola bëgëla awäla, Gode neala obeägimäiaie adolasilö. Amoda gomalä. Hamoi hedabi amoli sulubadelagi dilia gägä negemäiaie, Gode dawadigilo amo edemäiaie, <sup>11-12</sup> dili mia yöi dibe amo sulubadelagi, aabela made habobala, aso maadela, gelola namiäiaie, ie geloi hido elöia geloi sulubadela iäla, dili neala gelolasimäiaie, amase, Godeie udia dolö yo digalo neebe ami neëgi, ilima imolö daiala negei dibe amoda, Naadoea dili neala hedabolasi amea, dilimage mogela imolö amogi, ema obeägila nesegesa namiäiaie, adolasilö. <sup>13</sup> Gasimi sagaloie geloia nili gide begei dibe amo beala, Naadoea nili naabogi gaula, ie malö boba hamoi neebe amea beaha maadela sigi neebea ami nili sigi maala ifosi. <sup>14</sup> Malö ameada nilia nafade hamoi amo hëla fisilahlilä, nili fisigäla ifosi nefolalea.

*Gelesoie mala amoge hamoi hamolo amoge Folea säi*

<sup>15</sup> Nilia Gode made melëlo gaso, ie malöda Gode hi e gadoi nea. Eda ie malö abulümi neada, Godea hamoi dibe neebe sebe amo sulubadelaie busa nea. <sup>16</sup> Godea ie malömadila mudaia neebe amolige, nagadaia dibe neebe sebe amolige sulubadela hamoi. Siia bimolöi dibe neebe sebe amolige, bimolöi made dibe neebe sebe amolige, sigi aligilo nefolalebe amolige,



dafidilo nefolalebe amolige, mudaia geloi elö elöla nefolalebe amolige, sulubadela emadilamu aligila hamoi. Godea ie malöie namiäia hamoi amolida, sulubadela ie malömadilamu hamoi. <sup>17</sup> Amoli sulubadelada dafidi nelö made, Geleso e dafidi nelö amo nea. Sulubadela dibe neebe sebe amolige, made balälämäia gaula aligilo nea. <sup>18</sup> Geleso sosogo nefolalebe amoli sulubadelada, ie domalo nea, hi eda busa nea. Domalo amoie namolö mida, hi e nea. Sulubadela dibe neebe sebe amoiege, busa hi emu namiäia, malö abulümi nelö amo baagola, baagoi bauiala mi gäwila nowelasi. <sup>19</sup> Godea hamei amo gadola, ie namolö amoge, mala amoge sulubadela ie malöma nobamäia hamelahilä, Gode hi ie malöma nobalasi. <sup>20</sup> Hä, malöea hamoi ameada, nelebo sulubadela dibe neebe sebe amolibalä ado nii neebe amo nufuda salimäia helësëi, nagadaiaige, mudaiaige. Ie malö i fügäigi baagola, ie heale digai ameada, Godea sulubadela ebalä neala aealasi. Aealasi ameada, amala nufuda sali.

<sup>21</sup> Dafidi dilia Gode baagi iala wagadi made nelö. Amoda dilia mala nafade hamosa nelö amea iso asigigila Godebalä ado neala nelomelë. <sup>22</sup> Gaso, walioda, hä, dilima asiai maade, nafade made baai, mogoi eloi neëgi, ie sidaia sigi moholöie, ie malö domalogi baagoi amea, dilibalä ado nii nelö amo nufuda sali neamelë. <sup>23</sup> Amai gaso, dilia Godema asigi afädë negei amo, fologola made, amo wälasi nea, Ado Mala Hedabi nabi ameada, asigia sisiläfüsa namolö i amo, nigia gala fisila made, gaula fëdöla namolö dialea. Ado Mala Hedabi dilia nabi amoda sege dibe sulubadelagi säla iaha maadei. Neda amoie hamoi hamolasilo Folo neawe.

### *Foloea Geleso sosogo nefolalo amolile hamoi hamolasilo nelö*

<sup>24</sup> Na dilile së nase wegä obeägisa neawe. Geleso sosogo nefolalebe amoli sulubadela Gelesoie domalo neebe amoie, na nihile domalogi ilile së nasebe ameada, Gelesoea dafidi së naala idiadi amo na së naala baahadio. <sup>25</sup> Geleso sosogo neebe amoli sulubadelaie hamoi hamolasilo namiäia, Godea ne memelela ifosi neawe. Dili hedabi namiäiaie, ea hamoi amo na hamomäia nema i. Gelesoie ado mala dibe amo sulubadela dilima säla olelemäia, hamoi amo nema iasio. <sup>26</sup> Amoda mi gäwia amila udia dolö nefolalo amoli sulubadelama ulufadigi made, musügä negesi dilo amo walioda, hä, hile udia dolö ilima ulufala olesa nea. <sup>27</sup> Hile hameloea, ado musügä negesi dilo amo Godea ie udia dolö amolima ulufala olei. Ado amoda hedabi hido elöi amo helësëmäiaige, amase, udia dolö fifi asi nefolalebe amoli sulubadela ado amea ugila negemolöi gabula helësëmäiaige, amala hamoi. Musügä negesi dilo amoda gomala. Geleso eda dilile isogi dilibalä neebe amomelë. Amala neebe ameada, Godeie hedabi hido elöi namolö dibea ami namolöila helësëla, asigia sisiläfüsa namialo.

<sup>28</sup> Hä, dofä asigi falagasei nea, nilia säla iadigi, hahamogila digi, säla olelela digisa aligise ameada, ie säla ulufalo neamelë. Udia dolö neebe amoli sulubadela Gelesoma dilahilä, asigi hedabi negei nefolalebe amoli, Godeie siigi, sigi gaula moholöie, amala hamosa aligilomelë. <sup>29</sup> Hamoi amo hamosa maademolöie, ea ie geloi edefadea ne neala gelolasisa neëgida, na aso maadelahilä, hamoi amo baagi sëi edefade hamosa neawe.

## 2

### *Nilia asigi afädë negei gelola nea, wäfalä ado säse neadigimolö*

<sup>1</sup> Dili nefolalebe diliage, udia dolö Eleodisia gaamugi nefolalebe amoliage, udia dolö ne made melëlo nefolalebe amoli sulubadelaieage, na dili ugila negemolöie baagi sëi nea, hamoi hamosa neebewe helësëmäiala hamesamelë. <sup>2</sup> Na dili sulubadelaie iso asigi gelolasimolöge, dihilimu boba hamola dila aeala namiäiaige, amoie hamoi hamosa neawe. Dili amo gadoi neada, asigi hedabi neaha maadelahilä, dilile asigi afädë negei amo dofä gelomolömelë. Hä, Godea ado dafidi musügä negei dilo amoda, dilia dawadigimolömelë. Ado musügä negei amoda, Geleso hi emelë. <sup>3</sup> Asigi falagasei namolöle, dawadigilole hedabi hido elöi amoli sulubadelada, Gelesoma musügä negei dialea.

<sup>4</sup> Na dilima säseweda, odoaea ado hedabi hido elöi säsebe amea dili gadiabola dahila neloeaie sähamelë. <sup>5</sup> Ne dilibalä nea made gaso, nie asigi gesamileda, dilibalä nea. Dilia Gelesoma asigi afädë negei amo fologola made nea, mala mogoi hamosa nebeo bealahilä, na edafademalä obeägisa neawe.

### *Nili Gelesobalä dila nea, namolö gähe gaula namolö*

<sup>6</sup> Dilia Geleso Yesu e dilile Dafidilo Geloi namiäialahilä, neala gaui amo gadola, ebalä dila namolöi namialo. <sup>7</sup> I nagagi difi aulo amo gadola, dilile difi ema awälahilä, osogolodaia mosö olelo amo gadola dilile namolö Gelesoma diia adogola namialo. Dilima säla olelei amo gadola, dilia Gelesoma asigi afädë negei amo gelola namolöi nea, nesegemolö nobala adugamäia namialo. <sup>8</sup> Dolö odoaea dolöie dawaea dili dahila neala, ado iso gäwi made säsebe amea, dilia asiala ilia helësëse amo bëgëla awäla, ie memalä galabaia hamoi gadoi hamolasilo aligiloea idihë namialo. Iliada Geleso mi hamolo made, hilile maüie mala olelei amoge, nagadaia galuge, mugabege, mi hamola sälo nea. <sup>9</sup> Geleso e dolö domalo

nea, hedabi hido elöi elö elöla Godema nobai dibe amolida, ema nobai dialea. <sup>10</sup> Diliage Gelesoma dila nebegi, namolö dilima i ameada, namolö amo dilima nobaha maadei neamele. Gelesoda, nelebo geloi elö elöla dibe amo sulubadelaie busada, e neamele. <sup>11</sup> Gelesoma dila nea, fagulo gai gilo amo gadola nagadaia mala gai amo ami gila fisila, dili gafodo damui nea. Amoda dolö naaboea dagaboi made, Geleso ea dagaboi. <sup>12</sup> Dili ödägi gei ameada, Gelesobalä gedola baui amomele. Gode e geloi edefade neebe amea, Geleso e baagoiala nowelasi neebe amoma dilia asigi afädë negesebegi, dilige Gelesobalä gedola nowela ifosi neagomele.

<sup>13</sup> Dili dafidi nagadaia mala hawa neada, asiala hamosamu nelo amea, dili baagoi gadoi nebegi, Godea dili Gelesobalä neala nowela ifosi amo neagomele. Nilia asiala hamoi amo sulubadela Godea hësa maadeimele. <sup>14</sup> Ado säla negei amo damula, nilia nafade hamosa nelo ameada, bidi negei nebegi, Godea neadigi. Ado säla negei amea hamomolö dialeala säi ameada, nilibalä ado neala gide begei dibegi, Godea neala gaula awälähilä, Gelesoie i fügäidaia baala fisimolöi fisi. <sup>15</sup> I fügäi amodaia Gelesoea mudaia sigi aligilo nefolalo amolige, beaha aligilo nefolalo amolige, ilile geloi hamolo nefolalo amoli sulubadela damusa maadelahilä, udia dolö sulubadelaia bimäia, na baagila asimelela säla, ili gide begela gaula moholöi asi.

*Nili Gelesobalä baagoi ameada, ado säla negei elö elöla difolalebe amea nili ugila nege-molöi made dialea*

<sup>16</sup> Ameada, dilia molö nase ameage, ödä nase ameage, amase, segeyo edefade amoiege, aube gähe olei amoiege, molö giala nulo segeyo bégëla hamose ameage, segeyo Sabadaie mala amo gadola hamose ameage, odoaea dili mogelasila asiala hamoimelela sämolöda, dofea mademle. <sup>17</sup> Mala amolida, hobeala moholö amoie ausulubo gadoi dialea. Hodo dofäda, Geleso hi emele. <sup>18</sup> Afädëa wäfalä dihä nagadaialo gadoi namolöi galealage, selesaia fii ëi gauia adogola sämolöi galealage, dilia hamoi amoie bidi nimolö amo made neloala säseada, ie ado made nabala, idihë namialo. Dolö ameada simasia meli amoie ado yafie memalä säla dabola, nagadaia mala helësëla, mi maade amogi, gugusäla bimäia säse amea, <sup>19</sup> ea Geleso nilile busa neebe amo gaula aligilo made nea. Busa ameada domalo nelebo hulu dibe amoma geloi iala, domalogi moma gumu, dii sulubadela amea iilasila, Godea hamese amo gadola edëlasilo neamele.

<sup>20</sup> Dili Gelesobalä baagoi ameada, nagadaia nea hamolo ameage, mugabeie geloi ameage, dili dafidi gide begei dilo amo fisigäi neagomele. Amala neada, nagadaia mala hamolo nefolalebe amea hamosa neebe amo gadola, dili made fisigäia hamolo amo gadola wäla hamosa nebegoda mi edoie. <sup>21</sup> Iliada ado sälo amoda gowe gadoi. Gowe nimabio. Gowe muabio. Gowe diigimabiola sälo. <sup>22</sup> Amolida, dafidi dolö hi hamolahilä, säla olelela hamomolö. Ameada, mala amoli sigälo dialeamele. <sup>23</sup> Dolöea hi asigia göa nelegeloge, wäfalä nagadaiai gadoi aligiloge, gafodogi sëmäia hamologe, mala amoli gadoi helësësälea, asigi nulügäi hedabia säla negei gabula helësëmolöi gaso, mala amoli gadoi hamose ameada, domaloie gesami aulo dibe amo fisimäia hamolo made nea.

### 3

*Nili Gelesobalä baagola nowei*

<sup>1</sup> Godea dili Gelesobalä neala nowelasi neagomele. Amala hamoi neebe ameada, dilia selesaia mosöa Geleso hile filodaia, Godeie naabo dafädimadi sebea ami nelebo dibe amoli helësëla, amida dilile boba gosala namialo. <sup>2</sup> Nagadaia nelebo dibe amoli helësëla made, nelebo selesaia mosöa dibe amolimu helësësa namialo. <sup>3</sup> Dili baagoi nea, dilile namolö Gelesobalä, Gode neebea ami musügä negei neagomele. <sup>4</sup> Dilile namolö gähe Geleso hi e neebe amo ulufadigisolo amo gala, dilige ebalä, ie yo digalo hido elöi amola ulufadigimolömele.

### **Geleso e nilile isogi neebe ameada, nili gähe nea**

*(Golosi 3.5-4.18)*

*Nili gähe nea*

<sup>5</sup> Amamolö ameada, nagadaia mala amea hamelo amoli baagosa maademalo. Amolida, udia dolö susugu hamologe, nigime baai mala hamologe, gesami auloge, hamela diigiloge, gesami awäla naamu negemolöila helësëloge, amo sulubadela baagosa maademolöi maademalo. Gesami aulo amoda, nelebo odoama göa negelo mala amo gadoi dialea. <sup>6</sup> Mala amoli gadoi hamosalea, Godeie ado neadigilo nefolalebe amolima Godeie habobalo moholömele. <sup>7</sup> Dafidida, mala amolia dili sigi nea, ilia hamomola säse amo gadola, dilia bégëla hamosa nelo amomele.

<sup>8</sup> Amaimo, walioda mala egowe ili gadoi sulubadela fisisa maademalo. Habobaloge, mi-haläloge, nafade hamologe, gagadeloge, baagido säloge, dilile nafi idigila ado nafade säloge, fisisa maademolöi maademalo. <sup>9-10</sup> Asigi gofo, ie mala amola gila fisilahilä, asigi gähe salugai neebe ameadä, dilia dihilimu wäfalä sämabio. Asigi gähe amo hamolo Gode neebe amea, hi e gadoi namiäia, ea dili bedefalasila, e neebe amo dawadigisa maademäia, dilima amala helësëlasisa neamelë. <sup>11</sup> Asigi gähe amogi, nili sulubadelada, afädëdi nea. Yu udia dolöle, Giligi udia dolöleda maade. Gafodo damulole, made damuloleda maade. Amase, sege elögi fiige, mala melëlo made gadoi hamologe, galabaia hamoi gadoi hamolasiloge, fisigäige, maademelë. Mi hi eda, Geleso nea. Eda nili sulubadeläie isogi nea.

*Nilia odoa boba hamomolö dialea*

<sup>12</sup> Godea dili boba hamola ie namiäia, ea dili memelela ifosila, hile udia dolö nefolaleagomelë. Amala nefolalebe ameadä, dilia bobasëmolöge, ugila negemolöge, di-hili nagadaiala namolöge, amase, hedabola beala geleä hamomolöge, aabela made habobamolöge, amoli gadoi salugala namialo. <sup>13</sup> Dili nebegoea odoaië mala beala, weda abidä amahadula helësësedä, made säla, fisimalo. Amase, dilia nafade hamoi amo Dafidilo Geloia hëla fisi amo gadola, diliage odoaea nafade hamose amo hëla fisimalo. <sup>14</sup> Hedabi hamomolö amolidaiada boba hamolo amo bu salugamalo. Boba hamolo ameadä, mala hedabi hido hidola dibe amoli sulubadela neala afädëfalä hamolasila, hedabi hido elöi hamola neala gedolasilo nea. <sup>15</sup> Dili domalo afädë nea, Godea dili dalulasimäia wei ameadä, Gelesoea neala dalulasilo dilima i amo helësëla, dilile iso asigigi hedabola memelela hamomalo. Amala hamosa neada, nesege samu namialo. <sup>16</sup> Dofä asigi falagasei nea, dilia dihilimu säla olelela digisa neage, neala hamogila digisage, namialo. Amase, gë udähalea, Gë Udälo bebägi dibe amolige, Godeie ëi gauia adogola gë udälo amolige, Eleloi Gesamia dilima gë udälo olelesebe amolige, udäha namialo. Amala hamosa neada, dilile iso asigigila Godema nesege sa nea, Gelesoie ado hido elöi asigi dafidilo namolö dibe amoda, dilile isogi negesiä namialo. <sup>17</sup> Amaimo, Yesuie aulodaia nea, Naado Godema nesege sa neada, dilia hamosebe amoge, säsebe amoge, sulubadela Dafidilo Geloï Yesuie ëigi nea, hamomalo.

*Folea sosogo ilile säi*

<sup>18</sup> Udia dolöma fii sefolalebela dili-e, dili Geleso sosogo salea hamomolö dibe amo gadola, dilile diguäea hamomola säse amo nabala ili hawa namialo. <sup>19</sup> Dolö udia nii nefolalebela dili-e, dilile udia sämäia yölasila made säla, boba hamosa namialo.

<sup>20</sup> Malësä-o, dilile diado diemeleä ado säse amo sulubadela, nabala hamomalo. Amo gadola hamosebe ameadä, Dafidilo Geloï neala obeägilasisa neamelë. <sup>21</sup> Malö eedo nefolalebela dili-e, dilia dilile malö yölasisegi, ili dofea madela helësëia idogolea, egedidigila sämabio.

*Folea hamoi hamolasilo ililege sigi aligilo ililege säi*

<sup>22</sup> Galabaia hamoi gadoi hamolasilo nefolalebela dili-e, dilia dilile sigi aligilo nagadaia nefolalebe amolia hamomola säsebe amo gadola, sulubadela hamosa maademalo. Iile sidaiamu made, amase, ilia hedabi hamolo neala sämäiamu made hamomalo. Amala made, dofä asigi mogoi negei nea, Dafidilo Geloibalä bedäla, e helësësa nea, dilile sigi aligilo amolia säsebe amo bögëla, hedabimuu hamosa namialo. <sup>23-24</sup> Dafidilo Geloia dilile bidi daijala negei dibe amo imolö helësësa nea, nelebo sulubadela hamosebego hamosaleada, dolöie hamoi hamolasisala helësëla made, Dafidilo Geloïie hamoi hamolasisala helësëlahilä, dilile geloi sulubadela hamomalo. Dilia hamoi hamose amoda, Dafidilo Geloï Gelesoie hamoi hamolasisamelë. <sup>25</sup> Nafade hamosa neebe ameadä, nafade hi hamose amo gadola, së ia obögëmolömelë. Godea udia dolö memelelahilä, hili hamoi amo gadola, nofela made, afädëdila mogemolömelë.

## 4

<sup>1</sup> Sigi aligilo nefolalebela dili-e, dilile galabaia hamoi gadoi hamolasilo nefolalebe amolima mogola hamomolö dibe amo gadola, nofela made, afädëdila hamosa namialo. Diliage dilile sigi aligilo selesaia mosöa neebe amo helësëmalö.

*Nilia Godema adomolö amo gelola bögësa nea, mogola namolö dialea*

<sup>2</sup> Godema nesege sa, hedabola helësëla idihë nea, Godema gelola adosamu namialo. <sup>3</sup> Amala hamosa neada, dilia niilege adolasisa namialo. Amala säsedä, nilia Godeie ado mala Gelesomadi aligila dafidi ulufadigi made negei dilo amo säla imolöie, Godea nili fu iala, idi dogä negemäia, adolasisa namialo. Mi amoieda, ne walio galabaia neawe. <sup>4</sup> Na udia dolöma ado mala ulufala säla imolö dibe amo gadola säla iduläie, Godema adolasimalo.

<sup>5</sup> Udia dolö segea nefolalebe amolibalä neada, hedabola helësëla asigi falagasei namialo. Mala hedabi hamomäia, fu i dibe amogida, memalä namiabio. <sup>6</sup> Odoaea dilima ado säsegi,

dilia ili sulubadelama hedabola gomalä säla obëgëmolöla helësëmolöieda, molögi ëbi baalo amo gadola, ili ugila negemolöila helësëla, ado hedabola sälo namialo.

*Foloea Digigusile Onesimusile Golosi fisiga gai*

<sup>7</sup> Na hamosa neebeweie adoda, Digigusi ea dilima säla imolömelë. Eda nedoo obeägilo asigi falagasei nea, hamoi hamosamu aligilo. Dafidilo Geloïie hamoi nilia gedola hamolasisa aligilomelë. <sup>8</sup> Ea nili neebeweie hamosa neebeweie ado dilima säla imäiage, dilile iso asigi gelolasimäiage, na e dili neebewa fisiga gaseweie mida, amoiemelë. <sup>9</sup> Nilile nedoo obeägilo Onesimusi e asigi falagasei nea, diligi sosogo afädë neebe amo, eege Digigusi helegela moholömelë. Wi hamose amoië ado sulubadelada, ele dili neebewa maala, säla iaha maademolömelë.\*

<sup>10</sup> Alisadagusa e haligila galabaia neebe amea, dili hawiola säsisebego. Banabasaie esago Magaeage, amo gadola wäla hawiosebego. E dili neebewa maaseda, dilia e säla olela gausialahilä, e gauia idogomalola na dilima dafidi säla i amomelë. <sup>11</sup> Yesu, ie ëi elö Yasadusi eage dili hawiola säsisebego. Udia dolö Godea Beaha Maadela Sigi Neebea ami namiäiäie nebalä hamoi hamosa neebe amoligi, dolö ohodoa amolimuda, Yu dolömelë. Iliä ne edefademalä ugila negesa nelomelë. <sup>12</sup> Ebafolasa eege diligi sosogo afädë nea, Geleso Yesuie hamoi hamolasilo neebe ameada, dili hawiola säsisebego. Dili asigi fädäi nea, Godeie mala dawadigila neebe amo gadola gelola namiäiage, Godea hamei dibe amo sulubadela dawadigisa maadelahilä, fologola made namiäiage, dili helësëla ea segeyo sulubadelagi Godema adolasisamu neamelë. <sup>13</sup> Ea dilile hamoi baagi sëi edefade hamolasi amo na meli ameada, dofä amala hamolasisala sämolöi neawe. Ea udia dolö Eleodisia nefolalebe amolilege, Hielabolisi nefolalebe amolilege, amala hamolasisa neamelë. <sup>14</sup> Nilile alögoda obeägilo dolö Ulugu Demasaleage, aso, dili hawiola säsisebego.\* <sup>15</sup> Geleso sosogo Eleodisia nefolalebe amolima, nilia ili hawioila säsimelëla säla imalo. Udia ëi Nifä emage, ea mosöa Geleso sosogo gedolo nefolalebe amolimage, amalamu säsimelëla säla imalo.

<sup>16</sup> Beba goda dilia nabaha maademäia nidesa maadelahiläda, Geleso sosogo Eleodisia ami nefolalebe amoliage nabaha maademäia, ilima fisiga gamalo. Hä, beba Eleodisia nefolalebe amolima fisiga gai amo nealahilä, amoge aso, nidemalo.

<sup>17</sup> Agibasa ema dilia ado gomalä sämalo. Dafidilo Geloïie hamoi dia hamomäia i amo hamosa maademolöla helësësa namialola säimelëla säla imalo.

<sup>18</sup> Neda Folo, na dili hawiola säla, nihile naaboea dëdësago.\*

Neda igi ëfëa galabaia negei neebewe elaboloeo. Godeie ugila negelo dilima diamolöi diamäia hamesa neawe.

Hä amo.

\* **4:9:** Onesimusi eda Filimonoie galabaia hamoi gadoi hamolasilo nelo. Filimono bebägi dibe amo bimalo. \* **4:14:**

Dolö yafia helësësaleada, beba äudä Ado Mala Hedabi Ulugule Abosolole dëdëi amoleda Ulugu egowea dëdëila helësëi.

\* **4:18:** Age Golidi 16.21gi dibe amoge bimalo.

## Age Desalonaiga Neala olelo oboba

Folea udia dolö Godea wela ifosisi Desalonaiga nefolalo amolima beba afädë dëdëla iasi. Amoië mida, ilia hä, gelomäiage, ilile asigi delësila namiäiage, dëdëla i. Iliä Godema asigi afädë negela namolöi neebe amoge, amase, boba hamola namolöi neebe amoge, Dimodia säsebe amo Folea nabala, Godema nesegei. Amala sälahilä, Folo hi e dafidi ilibalä nelo amogi, neda gowe gadoi nelomelëlage, amase, Yesu obëgëmolö ilia nabi amoge, helësëlasila dëdëi.

Amase, Dafidilo Geloï obëgësolo amo gala, udia dolö Gelesoma asigi afädë negei baagoi amolidale nowemolömelë. Nili made baagoi gähe sefolalebeweda, ilibalä gaalu mu baidilidaia Dafidilo Geloï gausiamolö afiamolömelëla säla, Folea dëdëla iasi.

Amala dëdëlahilä, Dimodia ado säi nabi amoiëge, Folea ado elö säla obëgësalea, Geleso e obëgëmäia beaha neada, dilia dihilile asigi neala gelolasila digi, ugila negela digila, walio hamosa neebe go gadola wäla, hamosamu namialola säla dëdëla iasi.

### Folola, ebalä hamoi gaalu hamolo nefolalo amolalia Desalonaiga ili helësëla säosäosa nelo

(Age Desalonaiga 1-3)

<sup>1</sup> Folo Sailasa Dimodila nilia udia dolö Geleso sosogo Desalonaiga nefolalebe dilima beba gowe dëdëla iasisago. Nilile Naado Godeiëge, Dafidilo Geloï Yesu Gelesoiëge dili nefolaleagomelë.

Ugila negelasiloge, neala dalulasiloge, dilima imäia hamesa neawe.

*Desalonaiga ilia asigi afädë negei amogi Folea obeägi*

<sup>2</sup> Dili sulubadela helësëla, nilia segeyo sulubadelagi nesegela digi, dilile ei säla Godema adola digisa aligilomelë. <sup>3</sup> Amala säha neada, nilia nilile Naado Godeie siigi nea, dilia asigi afädë negela hamoi hamoi amoiëge, boba hamola nea, hamoi baagi sei hamosa nebegoiëge, nilile Dafidilo Geloï Yesu Gelesoma asigia sisiläfüsa nea, yöi diëgi, dofea, aso maadela, auaula nebegoiëge, helësësa aligilomelë. <sup>4</sup> Nie nedoo nalifila dili-e, nilia helësësaleada, Godea dili boba hamola, hilefali nafolai nefolaleala helësësamelë. <sup>5</sup> Mida, nilia Ado Mala Hedabi dili neebea gui gaula misi amoda, adoeamu gaula misi mademelë. Amoda geloibaläge, Eleloi Gesamibaläge, nilile asigi afädë negei geloi amoda, dilia beala dawadigi amomelë. Nili dilibalä nea, ugila negela hamosa nelo amoda, gomalä hamoila dihili dawadigi nebegomelë.

<sup>6</sup> Dilia nilile malage, Dafidilo Geloïie malage, bëgëla hamosa aligilo. Amase, Godeie ado mala neala gaula nelo ameada, yöi yafie beasebegi, Eleloi Gesamia dili neala obeägilasimelë.

<sup>7</sup> Amala hamoi ameada, Bolobinisi Masedoniamadige, Agaiamadige, udia dolö Gelesoma asigi afädë negei sulubadelama, mala hedabi hamola olei gabio. <sup>8</sup> Dafidilo Geloïie ado mala dilia säla iia asi amoda, Masedonia segeamadile Agaia segeamadilemu made. Dilia Godema asigi afädë negeigoge, sege dibe sulubadelaëa nabala daidosa maadei gabio. Ameada, nilia ilima bu daiasela säla imolö helësësa mademelë. <sup>9</sup> Mida, nili dili neebea maasebegi, dilia nilima obeägila damelë hamolahilä, gauia idogoi ameada, udia dolö sege amogi neebe amoli sulubadelaëa säsäi awäha dialea. Dilia dafidi wäfalï gode amo fisila, namolöi neebe Gode dofä amoma besula, amoië hamoi hamolo besela galai amoge, <sup>10</sup> amase, Godeie malö e selesäia mosöala obëgëla misiäiala beaha nefolalebegoge, ilia säsäi awäha dialeamelë. Malö amoda Godea baagoiala nowelasi. Amoda Yesu, hobeä Godeie mihalälo besela galamolö dibe amo baagimäia, nili sigi obëgëlo amomelë.

## 2

*Folea Desalonaiga nea hamoi hamosa nelo*

<sup>1</sup> Nie nedoo nalifila dili-e, nili dili neebea maalahlilä, hamoi hamosa nelo amoda, hamola waeasei made amo, dihili dawadigi neagomelë.\* <sup>2</sup> Nili dili neebea Desalonaiga, aso, made maala Filibai nebegi, gaamu amogi nefolalo amolia nili neala sëlasila gagadesa nelo amoda dilia dawadigi neagomelë. Dili neebea guwi odoaea nilibalä ado nii nelo gaso, nilile Godea nili neala gelolasisebegi, nilia dilima Ado Mala Hedabi Godemadila misi dibe amo säla imelë. <sup>3</sup> Nilia dili Gelesoma asigi afädë negemäia wesaleada, halowela helësëlo, asigi nafade musügä negelahilä, dili dahila neala, made oleleimelë. <sup>4</sup> Amalebeda, Godeä nili fedogola bealahilä, hile hamelo amea nilia ië Ado Mala Hedabi amo säla olelemäia, ea nilima iasio. Ado

\* 2:1: Abosolo 17.1-9 bimalo.

amo sāla olelesaleada, udia dolōea obeāgīmāiala olelelo made. Nilile asigi fedogola melēlo Godea obeāgīmāiale olelelomele. <sup>5</sup> Nilia dili neala golila ado sāmolōge, asigi musūgā negela dilile nelebo dibe amogi gesami moholōge, amo gadola hamolo made nea, sāla olelesa nelo amoda, dilia dawadigi. Amase, Godeage amala sāla ulufamolōi nea. <sup>6</sup> Dili neebe goeage, udia dolō odoa nefolalebe amoliage, nilile ēi gauia adamāiala made helēsēi nelomele. <sup>7</sup> Nilī Gelesoie abosolo dolō nelo amea, dili yōlasila nilī ugila negemāia sāmolōi nea gaso, sāla made nelo. Amala made sāla, dilibalā hame negela neada, emea malō geleā sigi aligilo amo gadola sigi nelo amomele. <sup>8</sup> Nilia dili boba edefade hamoi neebe amea, dilima Godeie ado mala sāla imolō amomu made, nilia nihili nili imolō amoge dofea gabula helēsēimele. Mida, dili hā, nili sosogofali besela galai amea.

<sup>9</sup> Nie nedoo nalifila dili-e, nili dilibalā nea, naaboea hamoi baagi sēi hamosa nelo amoda, dilia dawagomele. Godeie Ado Mala Hedabi sāla iaha neada, dili yōlasila afādēa imāiala made helēsēla, nihili naha namolō amoiē hamoi nilia yoba gasigige, baagi sēla hamosa nelomele.

<sup>10</sup> Udia dolō asigi afādē negei nefolalebe dilibalā nea, mala nilia hamosa nelo amoda, diliage, Godeage, sāla ulufamolōi nea. Nilia Godeie siigi mala mogoi hedabi hamosa neada, asialada, hamolo mademle. <sup>11</sup> Malō eedoea iē malō sigi aligilo amo gadola, nili dilibalā nea, dili afādē afādēlabalā mala afādēdila hamosa nelo amoda, dihili dawagomele. <sup>12</sup> Amala hamosa neada, nilia dilile afādē dilēsilasila, gelolasilage, amase, dili Godeie mala bēgēmōlō dibe amo gadola bēgēla mosāiage, ado sāla iahamu nelo amomele. Dili Godea Beaha Maadela Sigi Neebea ami, iē yo digalo hīdo elōi neebea ami awāla namiāia, ea dili wesa neamele.

#### *Geleso sosogo amolia asigi afādē negei gelola nea, yōi gaula nelo*

<sup>13</sup> Nilia Godeie ado mala sāla iasebegi, dilia dolōie ado gabula made helēsēla, Godeie ado dofā gabula nabi amoiē, nilia Godema nesegesamu aligilomele. Ado amoda dofā Godeie ado. Gelesoma asigi afādē negei nefolalebe dilile isogi, ado ameadā hamoi hamosagomele. <sup>14</sup> Nie nedoo nalifila dili-e, Yudia segea Geleso Yesuie udia dolō Godea wela ifosisi nefolalo amolima hamoi amo gadola, dilige sēlasī gabugo. Yu dolō sosogo hilimu sēlasisa nelo amo gadola, dilige dihilile sosogoea sēlasisa nebege. <sup>15</sup> Yu dolō ilia Dafidilo Geloī Yesuge, bea sālo nefolalo amolige nufudalahilā, nilige nesila digisa nelomele. Godeada ilibalā made obeāgīsa. Udia dolō sulubadelabalā ado nelo neebe amea, <sup>16</sup> Yu dolō made, fii odoama ado mala made sāla imāia, ilia nili idi gahamu aligisio. Amoiē mida, Godea udia dolō amoli sigi made obēgēmāiaie amasio. Amase ameadā, ilile nafade hamoi amo edela nobala, ilia nafade hahamolamu awāha nefolalea. Ameadā, Godeie mihalālo ilima dofā misi dialea.

#### *Foloea Desalonaiga bu elō moholō helēsēi*

<sup>17</sup> Nie nedoo nalifila dili-e, Yuda ilia nilīma hamoia amila, nilia dili digīla holōbō gasi gala neada, nilia dilile migali made beala nea gaso, nilile asigida dilibalā neamele. Amala helēsēsa neada, nilia dili edefademalā hamela, bu bimolōila helēsēla, dili neebea moholōie idi hogosamu nelo. <sup>18</sup> Nilīda, hā, dili neebea moholō helēsēi neamele. Neda Folo, nada afādē made, segeyo nahuigi mudulā hamoi gaso, mugabe Saidania nilile idi gasio. <sup>19</sup> Nilile Dafidilo Geloī Yesu e bu obēgēsegi, iē siigi nilia abeahāla gelola obeāgīla namolōdu. Dilima maade galēda, edoea nilia hamoi hedabi gowe gadoi hamoimelēla sāla ulufala olemolōdu. Be, nilile bidida, dilimle. <sup>20</sup> Ā, dofā. Dilia hamosebe amea nili obeāgilasisebe ameadā, nilia dilima obeāgīsa neamele.

### 3

#### *Foloea Desalonaiga ili gelolasimāia Dimodi fisiga gai*

<sup>1</sup> Nilia dili asigila, beaha namolōda dofea made gabugi, hā, alīmu Adenesi namolōla helēsēlahilā, <sup>2</sup> alia nilile nedoo Dimodi e dili bimāia fisiga gai. Dimodi eda Gelesoie Ado Mala Hedabi sāla ilo neada, Godebalā nea hamoi gaalu hamosa aligilomele. Ea dili gelolasila, dilile asigi afādē negei amo iliasimāia, e fisiga gai amoda, <sup>3</sup> dilia yōi gaula, sē naha nebege, fologola fudugiloēaie amai. Yōi amoli gaumāia Godea nili memelei amoda, dihili dawagomele. <sup>4</sup> Nilī dafidi dilibalā nelo amogi neada, dilima nilia gomālā sāla i. Sēi elō elōla nili mia besela galamolōmelēla sāla i amomele. Segeyo nafade amoda, hā, nili mia besela galai dibe amoda, dilia dawadigi. <sup>5</sup> Na beaha namolōda dofea made gabugi, dilia asigi afādē negeigo amalasi neebelela bimolōie, Dimodi e mosalaigomele. Na helēsēsaleada, fedogola melēlo mugabe Saidania, dilile asigi afādē negeigo fisimāia, dili sāfe negesegi, nilia hamoi hamosa nelo amo waeaseloamele.

#### *Dimodia ado hedabi gaula misi amogi Foloea obeāgi*

<sup>6</sup> Amaimo, Dimodi e dili neebea guila, hādamade maala, nilibalā nea. Ea sāhalea, dilia asigi afādē negei amo amalasi neamelēlage, dihilimu boba hahamosa neamelēlage, ea obeāgi ado amo nilīma sāla iasio. Amo gadola sāla iahalea, nilia dili helēsēsamu nea, dili bimolōila

helësësa neebewe gadola, diliage segeyo sulubadelagi nili helësëla obeägilomu nea, nili siia bimolöila säha neamelëla säi amo nilia nabimelë. <sup>7</sup> Nie nedoo nalifila dili-e, amala hamosa neamelëla ea säla i ameada, nili yömolöge sëmölöge dibeä amila, dilia asigi afädë negei amo amalasi neamelëla säi nabi ameada, nilile iso asigi neala gelolasimelë. <sup>8</sup> Hä, dilia Dafidilo Geloima dilahlilä, gelola namolöi neebe ameada, walio dofä nilile iso asigi neala obeägilasi neamelë. <sup>9</sup> Nilia dili helësëla, nilile Godeie sidaia edefademalä obeägisä nea. Amaha gaso, nilia helësësaleada, obeägilo nilima i dibe ameada, nilia Godema nesegela säla, bu dabe abeahäla obëgëmolödula helësësamelë. <sup>10</sup> Nilia dili bimolöila helësëla, yoba gasigige Godema adosamu neada, dilile asigi afädë negei amo obobaloea, nilia neala gelolasila moholöie, adosamu aligilomelë.

*Folo e ili neebëa moholö amoie, Godea idi gai dogä negemäia, ea Godema adosa nelo*

<sup>11</sup> Nilile Naado Godeage, nilile Dafidilo Geloï Yesueage, nili dili neebëa moholö amo idi dogä negemäia hamesa neamelë. <sup>12</sup> Dihilimu boba hamosa neebe goiege, udia dolö sulubadelabalä boba hamosa neebe goiege, Dafidilo Geloïa bäulasila, nobala adugaha namäiäla säha. Dilia boba hamolo amoda, nilia dilima boba hamosebewe gadola hamomäia hamesamelë. <sup>13</sup> Nilile Dafidilo Geloï Yesula, e fii asigi mogoi sulubadelabalä maasolo amo gala, dili nilile Naado Godeie süigi, nafade made baai, mogoilali namolöie, ea dilile iso asigi neala gelolasimäiäla säha.

## **Desalonaiga ilima mala mogoi amoli ilile namolögi gelolasila bäumaloi**

### **4**

*(Age Desalonaiga 4-5)*

*Susugu hamomabiola säi*

<sup>1</sup> Nie nedoo nalifila dili-e, na ado wagahalea gomalä säla iahago. Dilia Gode obeägimäia gomalä hamosa namialola, nilia dafidi säla i amo dilia gelola hamosa neagomelë. Amai nili walio, Dafidilo Geloï Yesuie äigi nea, dilima gelola säsebe amoda gowe. Dilia hamosa neebe amo gadolamu made, baalage hamomäiäla säha.

<sup>2</sup> Nilia Dafidilo Geloï Yesuie geloigila nea sähaleada, dilia gomalä hamosa namolö dialeala säla i amoda, dihili dawadigi nebegomelë. <sup>3</sup> Godea hamei neebe amoda gowe. Dilia dilile namolö sulubadela ema odala iala, eleloi namialo. Susugu hamolo mala dibe amo sulubadela sisigaha namialo. <sup>4-5</sup> Amase, fii odoa, Gode helësëlo made nefolalebe amolia susugu hido elöla hamolo amo gadola made, Godeie süigige, udia dolöie süigige mala hedabi bögëla hamosa neada, dilile domalo hedabola sigi namolö helësëmalö. <sup>6</sup> Amo helësëla, didoolali asiala dahila nimabio. Mala amoli gadoi hamosa neebe amoligalida, Godea së imolömelëla nilia dilima dafidi gelola säla iaha nelo amomelë. <sup>7</sup> Godea nili wei amoda, nigime baai mala hamosa namiäia made, nilile namolö egali ialahlilä, eleloi namolö mala amo bögëla hamosa namiäia weimelë. <sup>8</sup> Amai gabugi, afädëa ado säla olelesebewe baagi iasada, dolöie ado neadigimolö mademelë. Eada, Godea Eleloi Gesami diligali ilo neebe amoie ado neadigisa neamelë.

*Nilia mala hedabi hamomolö amo gelolasimolö dialea*

<sup>9</sup> Geleso sosogo nefolalebe amoli boba hamolo amoie, nilia beba dädëla imolöi dialeala helësësa mademelë. Amoie mida, dihilimu gomalä boba hamomolö dialeala Godea säla olelei amea. <sup>10</sup> Bolobinisi Masedonia segea Geleso sosogo nefolalebe amoli sulubadelama boba hamosa nefolalebegomelë. Nie nedoo nalifila dili-e, dilia baala gelola hamosamu namialola säla dädëla iahago. <sup>11</sup> Amala hamosa neada, nilia dilima dafidi säha nelo amo gadola, asigia hame negela aumala nea, dihilile hamoi hamomolö amo helësëla, naaboea hedabola hamosa namialo. <sup>12</sup> Amala helësësa aligiseda, udia dolö segea nefolalebe amolile sigi, dofä mala mogola hamolo nea, nelebo afädë ufoida, made bimolömelë.

*Dafidilo Geloï e obëgësolo amo gala, nili neala gedolasimolö*

<sup>13</sup> Nie nedoo nalifila dili-e, udia dolö baagoi amolima edo hamomolödu, amo dilia hedabola helësëmäiäie sähawe. Amase, udia dolö odoa Gelesoma asigia sisiläfüsa aligilo made amolia baagoigi didigaolo amo gadola, dilia amamäia made hamesamelë. <sup>14</sup> Mida, Yesu baagola nowei amo nilia dofäla helësëse ameada, udia dolö Godema asigi afädë negei baagoi amoli, Yesuie geloigila Godea neala nowelasisegi, Yesubalä obëgëmolö gabula helësësamelë.

<sup>15</sup> Dafidilo Geloïie ado nilia dilima säsebeweda gomalä. Dafidilo Geloï obëgësolo amo gala, nili made baagoi nefolalebeweada, udia dolö dafidi baagoi amoli baagila, dofä nilidale dafidi made moholömelë. <sup>16</sup> Segeyo amo gala, Godea ado gelola sämolö amoge, selesäia fii dafidilo amea ado uuala sämolö amoge, Godeie melo fuuloea fumolö amoge, Dafidilo

Geloi hi e Hebenila digasegi, udia dolö Gelesoma asigi afädë negei baagoi amolidale nowemolömelë. <sup>17</sup> Amo baagiada, nili udia dolö made baagoi nagadaia nefolalebewe, ea neala gegeдолahilä, baagoi dafidi nowei amolibalä gedola, Dafidilo Geloi e gausiamolöie, mu baidilidaia fedafiamolömelë. Amalahilä, nili Dafidilo Geloibalä gedola namolöi namolömelë. <sup>18</sup> Amala namolö gabugi, hä, dilia dihilimu adowe säla iaha neada, iso asigi neala gelolasisa namialo.

## 5

### *Nilia Dafidilo Geloi obëgëmäia daiala namolö*

<sup>1</sup> Nie nedoo nalifila dili-e, amala hamomolö amoda, nilia dilima segeyo gowegilage, eso si gowegilage säla, dëdëla imolöi dialeala made helësësamelë. <sup>2</sup> Dafidilo Geloie segeyo amo, fa nelo dolö gasigi mulo amo gadoi amoda, dihili hedabola dawa gomelë. <sup>3</sup> Udia dolöea sähalea, Nilida nudula made, dofea neawela säha neëgi, ili neala nafademolö amo, aabela misi dië bimolö. Udiaea malö ägümolö salea, aabela sëlö amo gadoi bimolö. Ili sisigamolöi made bimolömelë.

<sup>4</sup> Nie nedoo nalifila dili-e, dilida gasimi sagaia made nebege, fa nelo maasegi fudugilo amo gadola, segeyo amo besela galasolo amo galada, dili fudugimolöi made bimolömelë. <sup>5</sup> Mida, nili gasile gasimi sagalo elele made nea. Dili sulubadelada, yo digalole, esolele malö nebege. <sup>6</sup> Amai gabugi, nilia udia dolö odoa amoli gadoi made namolöla. Ili adi elaboi diëgi, nilia idihë nea, asigi sigi namolöla. <sup>7</sup> Udia dolö süwialo neebe amolida, gasigi süwia dilo nea, amase, udia dolö gagaolo neebe amolida, gasigi gagaolo ödä nülö nea. <sup>8</sup> Amala hamolo amo gadola made. Nili esoie neebe ameadä, nihilile asigi sigi aligimolöla. Amala neada, nudusalea bidagia salugala aligilo amo gadolada, nilia asigi afädë negemolöle boba hamomolöle salugala namolöla. Amo salugalahilä, nudusalea habuga salugalo amo gadolada, nili damula mosäia, asigia sisiläfüsa namolö amo salugala namolöla. <sup>9</sup> Nilia Godeie habobalo dibe amoie së muäia, ea nili memelela ifosi made. Dafidilo Geloi Yesu Gelesomadila nea, damula aulo gaula namiäia, ea nili memelela ifosi nea. <sup>10</sup> Dafidilo Geloi Yesu Geleso e obëgësedä, nili baagola made namolöi neëgi galëge, ma, baagoi galëge, mogela made, ebalä gedola namolöi namolöie, e nilile baagoi. <sup>11</sup> Amala hamoi gabugida, dilia walio hamosa nefolalebego gadola, dilia dihilile asigi neala gelolasila digi, iila ugila negela digisa nebegoda, amala hamosamu namialo.

### *Hamomolö dialealage, dili helësësa neamelëlage, Foloea ado säla wagai amoiege*

<sup>12</sup> Nie nedoo nalifila dili-e, nilia dilima gomalä säla iahago. Dili häuala ugila negelo dolö amoli hawa nagadaia namialo. Ili Dafidilo Geloie ëgi dili beaha aligilo nea, ado säla iadigi, hamogila digisa neamelë. <sup>13</sup> Ili hamoi hamosebe amo, dilia ili hedabola helësëla obeägila, dofä boba hamosa namialo. Amase, dili sulubadelaeage, dihilimu aeaeahamu namialo.

<sup>14</sup> Nie nedoo nalifila dili-e, dilia hamomolö dibe amoda gowe. Hamoi hamomolö habobalo nefolalebe amolima gelola säla imalo. Bedälo nefolalebe amolimada, ilile asigi delësimäia, gelolasila ado säla imalo. Amase, asigi hubabelei nefolalebe amolida, ugila negemalo. Sulubadelabalä aabela habobala made, geleä sämalö. <sup>15</sup> Amaimo, afädëa dili afädëma nafadela hamoseda, amoma nafade hamola obëgëmbio. Segeyo sulubadelagi, Godeie udia dolö nefolalebe amolimage, amase, udia dolö odoamage, mala hedabimu hamosa namialo.

<sup>16</sup> Amaha neada, dilia segeyo sulubadelagi obeägisamu nea, <sup>17</sup> Godema adosamu namialo. <sup>18</sup> Dili neebea ami hedabi diëge, nafademolö diëge, Godema nesegesamu namialo. Dilia Geleso Yesuma dila nea, mala amo gadola hamosa namiäia, Godea hamesa neamelë.

<sup>19</sup> Eleloi Gesami dilima neebe amo usimabio. <sup>20</sup> Bea sälo afädëa ado säla iaseda, memalä gadoi hamola, gagadela sämbio. <sup>21</sup> Ado sulubadela mogola säsebele, ma, halowela säsebelela fedogola bealahilä, mogola säse amoda neala gaumalo. <sup>22</sup> Mala nafade elö elöla sulubadelada, sisigahamu namialo.

<sup>23</sup> Gode eda neala aealasilö mi neebe amohi, dilile namolö neala hamogila, dili sulubadela nigime baai made, eleloi namiäiaie säha. Nilile Dafidilo Geloi Yesu Geleso obëgësegi, dilile gesamiage, asigiage, domaloeage asiai maade, hedabifalimu namiäiaie sähago. <sup>24</sup> Dili wela ifosilo amoda, säla waeaselo made neebe ameadä, dofä hi amala hamomolömelë.

<sup>25</sup> Nie nedoo nalifila dili-e, dilia nilile Godema adolasimalo. <sup>26</sup> Dilia Geleso sosogo nefolalebe amoli sulubadela gausiala mimisa namialo. <sup>27</sup> Dafidilo Geloie ëgila na dilima gelola säla iahago. Godeie udia dolö nefolalebe amoli sulubadelaea nabuäia, beba gowe nidela säla imalo.



<sup>28</sup> Nilile Dafidilo Gelo Yesu Gelesoie ugila negelasilo dilibalä negesi diamiäia hamesa neawe.  
Hä amo.

## Agedu Desalonaiga Neala olelo oboba

Folea Geleso sosogo Desalonaiga nefolalo amolima beba agedu gowe dëdëla iasi.

Folea udia dolö Godea wela ifosisi Desalonaiga nefolalo amolima beba agedu dëdëla iasi amoie mida, dolö odoaea sähalea, Geleso obëgëmolö sai segeyo amoda, hä, misimelëla säla olelesa neala säsebegi, ili neala mogolasila beba gowe dëdëla iasi. Geleso made obëgëla neëgi, afädë hamomolömelëla sai amoda gowe. Udia dolöea Godeie ado made nabala, auaula nefolalegi, ado säla negei neadigilo dolö amo maala, hi e sigi aligilo gadoi hamomolömelë.

Amala hamomolö amo helësëlahilä, Gelesoma asigi afädë negei nefolalebe amoliada, yömölö diëgige, sëmölö diëgige, fologola made, aso maadela, namialola säla beba gowe dëdëla iasi.

### Hobeala Dafidilo Geloie segeyo besela galamolö

*(Agedu Desalonaiga 1-2)*

<sup>1</sup> Folo Sailasa Dimodila nilia udia dolö Geleso sosogo Desalonaiga nefolalebe dilima, beba gowe dëdëla iasisago. Nilile Naado Godeiege, Dafidilo Geloï Yesu Gelesoiege dili nefolaleagomelë.

<sup>2</sup> Nilile Naado Godeage, Dafidilo Geloï Yesu Gelesoiege, dilima ugila negelasiloge, neala dalulasiloge imäia hamesa neawe.

*Yöi dibegi Desalonaiga ilia, aso maadela, gelola nelo*

<sup>3</sup> Nie nedoo nalifila dili-e, dilia asigi afädë negei nebege, dofä bäula edela awäha nebegeiege, dihilimu boba hahamosa nefolalebege bäusa nebegeiege, dili helësëla nilia segeyo sulubadelagi Godema nesegeomolö dialea. <sup>4</sup> Amoie mida, ado niia dili yölasimölöge, sëlasingölöge iase amogida, dilia habobala made, auaula, aso maadela nebegeiege, Godema asigi afädë negei amalasi namolöi neebe goiege, nilia udia dolö Godea wela ifosisi sege elö elölögi nefolalebe amolima dilile ëi gauia adalomelë.

*Gode e mogoi nea nili mogemolö*

<sup>5</sup> Dilia hamoi amo gadola, Godea mogolafali mogemolö amoie, ea nilima ulufai dialea. Godea Beaha Maadela Sigi Neebe amoieda, dilia yöi amoli gaula neamelë. Ameada, Godea Beaha Maadela Sigi Neebea ami digamolö amoda, ea dofeala helësëmolömelë. <sup>6</sup> Godea mogolafali hamolo nea. Odoaea dili neala sëlasingölöge amoieda, eage ili neala sëlasingölömelë. <sup>7</sup> Yöi gaula nebegoda, ea neala hogosa helela, dilige nilige hele fimäia imolömelë. Dafidilo Geloï Yesula ië selesaia fii geloibalä, selesaia mosöala nulo söa hido elöibalä maala ulu-fadigisolo amo gala, Godea amala hamomolömelë. <sup>8</sup> Udia dolö Gode baagi iaha nefolalebe amolige, nilile Dafidilo Geloï Yesuie ado malama mi hamola aligilo made amolige, së imolömelë. <sup>9</sup> Ilile bidi nafade nimolö amoda, së naha namolöi namolömelë. Dafidilo Geloï neebea amige, amase, ië geloi hido elöi dibeaa amige made namolö. Nafadeia amimu namolöi namolömelë. <sup>10</sup> Amala hamomolö amoie segeyo amogida, Dafidilo Geloï maasegi, Godeie udia dolö ama asigi afädë negei neebe amoli sulubadelaie ië ëi gauia adala, ama obeägisa namolömelë. Nilia dilima ado mala säla i amo nabala, dilia asigi afädë negei amea diliage obeägisa namolömelë.

*Ilia Desalonaiga gelolasila Godema adolasi*

<sup>11</sup> Amo helësëlahilä, nilia segeyo sulubadelagi dilile Godema adosamu neamelë. Ea dili wei amoda, dofeala helësëmäiaie adolasisamu neamelë. Dilia hedabi hamomolö dibe amo sulubadela hamomolöila hamesa neebe goie, ië geloiä hamolasimäiaie, asigi afädë negei nea hamosego sulubadela hamomolöila helësëmäiaie, adolasisa neawe. <sup>12</sup> Ugila negemalola adolasisa nelo amea ugila negeseda, dilia nilile Dafidilo Geloï Yesuie ëi gauia adogomolömelë. Amase, eage dilile ëi gauia adogomolö. Nilile Godeage, Dafidilo Geloï Yesu Gelesoiege, elele ugila negelasiloa amala hamomolömelë.

## 2

*Godie ado neadigilo dolö moholö*

<sup>1</sup> Nie nedoo nalifila dili-e, nilile Dafidilo Geloï Yesu Geleso e bu obëgësegi, nili ebalä gedomolö amoie dilima ado afädë gelola säla iahago. <sup>2</sup> Dolö odoaea dilima sähalea, Dafidilo Geloïie segeyo amo, hä, besela galaimelëla säsege, bea sälo afädëa amala bea säla säimelëla säsege, amase, dolö afädëa sähalea, Folola ilia beba dëdëi amogi amo gadola dëdëi dibeola säsege, amo nabala fodolofali säosöala fudugimabio. <sup>3</sup> Ili odoaea amoli sai amo gadola elö elöla sälahilä, dili dahila neloea hedabola idihë namialo. Segeyo amoda memalä made besela

galamolömelë. Dafidida, yafea Godeie ado made nabala auaula namolöge, amase, ado säla negei neadigilo dolöge maala ulufadigimolömelë. Dolö amoda heli segea moholömelë. <sup>4</sup> Eada udia dolöea wäfalä gode gadoima göa nelegelo nelebo amoli sulubadelabalä ado nimolöge, ea nelebo amoli baagila awäla hile ëi gauia adogola, Godeie mosöa nogila digala salea, Neda Godemelëla sämolömelë.

<sup>5</sup> Ne dilibalä nelo amogi, amoli hamomolö amo na dilima säla i amoda, dilia made helësëla, elaboi neale. <sup>6</sup> Waliowegi ado neadigilo dolö amo made misiäia idi gai amoda gowe gadoila dilia dawadigisa maadei. Godea daiäi segeyogi e maala ulufadigimolömelë. <sup>7</sup> Ado säla negei neadigilo mala amoda, odoaea walio musügä hamoi hamosa nefolalea. Amaha gaso, neadigilo mala amo walio idi galo dolö amea amala gagala awäha neëgi, Godea e hä, bisilimolömelë. <sup>8</sup> Amala hamoseda, ado säla negei neadigilo dolö amo ulufamolö. Dolö amoda Dafidilo Geloï Yesuea ie nafiadila hame fisigise amea baagomäia nufulömelë. Ä, hi e yo digalo geloibalä maalahilä, yo digalo amea dolö amo nufudaha maademolömelë. <sup>9</sup> Ado säla negei neadigilo dolö amoda, mugabe Saidaniie geloigila maalahilä, hido elöi hamola, dolöea hamomolöi made gadoige, melëlo made gadoige, wäfalä hamomolömelë. <sup>10</sup> Ea nafade elö elöla wäfalä hamolo dibe amo sulubadela, udia dolö nafadegi moholö amoli dahila neala hamomolömelë. Iliä ado dofä amoma boba hamomolö amo habobai amea, ili nafadegi moholömelë. Iliä ado dofä amoma boba hamoi galebeda, Godea ili sigi obëgëlabio. <sup>11</sup> Amai amea, iliä wäfalä säse amo dofä gabula helësëmäiaie, Godea ilile asigi neala gagaolasisa nea. <sup>12</sup> Amase, udia dolöea ado dofä amo gaula mogola made, mala nafademu obeägila hamolo nefolalebe amoli sulubadelabaläda, Godea gudila mogemäiamelë.

#### *Godea dili damula moholöie daijala memelei*

<sup>13</sup> Nedoo nalifi Dafidilo Geloïa boba hamosa neebela dili-e, nilia dili helësëla segeyo sulubadelagi Godema nesegesa namolöi dialea. Mida, sege föi mi gäwia amila hile udia dolöfalä namiäia dili nafolala memelei. Eleloi Gesamia ugila negelasisebegi, dilia dilile namolö sulubadela Godegali iaha maadelahilä eleloi neebe amea, amase, Godeie ado amoda dofä gabula helësësa neebe amea, Godea dili damula moholöla daijala memelei. <sup>14</sup> Amala hamomäiaie, Ado Mala Hedabi nilia dilima säla olelesebegi nabi ameadä, Godea dili weimelë. Nilile Dafidilo Geloï Yesu Gelesoie geloile yo digalo amole diliage gaalu nimäiaie weimelë. <sup>15</sup> Amai ameadä, nie nedoo nalifila dili-e, gelola namialo. Nilia dilima Godeie ado mala säla i amoge, amase, beba dëdëla i amogi säla olelei amoge, dilia hedabola bëgëla hamomalo.

<sup>16</sup> Nilile Dafidilo Geloï Yesu Geleso hie emage, nilile Naado Godemage dilile adolasisa nea. Naado Godea nili boba hamolahilä, ie ugila negelasilo amea nilile asigi neala gelolasila, fisila made, gelolasisamu nea, dofä asigi neala sisiläfülasisio. <sup>17</sup> Ea dilile iso asigi gelolasila, ado hedabolamu sämäiage, mala hedabi dibe amo gadola sulubadela bëgëla hamomäiage, geloi imäia adolasisa neamelë.

## **Desalonaiga ilia udia dolö hamoi hamomolö bobogoi nefolalo amoli hä, hamogimalola säi**

### **3**

#### *(Agedu Desalonaiga 3)*

#### *Godea nili ugila negemäia adolasimalola säi*

<sup>1</sup> Nie nedoo nalifila dili-e, na ado säla wagahalea gomälä säla iahago. Udia dolö sege odoadi nefolalebe amolia nabuäiaie, Dafidilo Geloïie ado mala aabela säla daidomäiage, amase, dilia ado mala gauia adogoi amo gadola, iliage gauia adogomäiage, dilia nilile Godema adolasisa namialo. <sup>2</sup> Ado elö goweiege adolasimalo. Dofä nafade hamolo nefolalebe amolibalä neëgi, Godea nili damula mosäia, dilia ema adosa namialo. Mida, udia dolö sulubadela asigi besui mademu nefolalebe amea. <sup>3</sup> Amai gaso, mugabe Saidani nafadea dili made digaläsimäia, Dafidilo Geloï eda mogoi neebe amea, ea dili neala gelolasila idihë nea sigi namolömelë. <sup>4</sup> Dafidilo Geloïa nilile asigigi helësëlasisebegi, nilia dilima hamomola säse amo hamosa nebege gadola, hobealage dilia hamosamu namolö gabula helësësa neawe.

<sup>5</sup> Dilile iso asigia Godeie boba hamolomadige, Gelesoie fologola made nea gelola namolömadige, Dafidilo Geloïa sigi mosäia hamesa neawe.

#### *Udia dolö sulubadela hamoi hamomolö dialea*

<sup>6</sup> Nie nedoo nalifila dili-e, nilia Dafidilo Geloï Yesu Gelesoie ëigila dilia gomälä hamomolola sähaleada, nedoo nalifi odo hamoi hamomolö bobogologe, nilia gomälä hamomolö dialeala säsegi hamolo made nefolalebe amolibaläge, dili gedola namiabiola säha. <sup>7</sup> Nilia

hamolo amo gadola, diliage amo gadola hamomolö dialeala dawadigi neagomelë. Nili dilibalä nelo amogi neada, hamoi hamomolö habola made, hamosa nelo. <sup>8</sup> Amala hamosa nebegi, dilia niligali molö i amoda, memalä made naala, bidia neala naha nelo amomelë. Memalä made naala, nilia naaboea hamoi baagi sëi yoba gasigige hamosa neada, diligi afädëa yöi made gaumäia, nilia hamoi hamosamu nelo amomelë. <sup>9</sup> Ugila negemola sämolöi made made, sämolöi nea gaso, nihili hamoi amoie mida, dilia nilia hamolo amo gadola bëgëla hamomäiaie amala olela hamoimelë. <sup>10</sup> Afädëa hamoi made hamolo nea galëda, amogali molö made imalola nili dilibalä dafidi nelo amogi nea, säla i amomelë. <sup>11</sup> Nilia ado säi amoie mida, dihiligi odoa neebe amolia hamoi hamomolö bobogolo nea, ilia hilile hamoi made hamola, odoaea hamoi hamose amomu memele nawesa nelolahilä, adomu adosamelëla säi amo nabalahlä sähamelë. <sup>12</sup> Dafidilo Geloï Yesu Gelesoie ëgila gelola sähago. Udia dolö amoli geleä sau sagala nea, hilile hamoi hedabola hamola, nelebo hamoi hili hamose amea molö mualola sähago.

<sup>13</sup> Amaimo, nie nedoo nalifila dili-e, dilia mala hedabi hamomolö amo habobala fisimabio. <sup>14</sup> Nilia dilima ado galone beba gogi dëdëla iasisego, afädëa made bëgëla hamoseda, eda gowe gadoi neala helësëlahilä, hi e hewamäia, dili ebalä gedola namiabio. <sup>15</sup> Udia dolö amo gadoi neebe amoli nilibalä ado nii neala helësëla made, nili sosogo neala helësëlahilä, ili asigi gawimäia ado säla iala hahamogisa namialo.

*Ado säla wagai*

<sup>16</sup> Dafidilo Geloï hi emu dalulasilo mi neebe amea segeyo sulubadelagige, nelebo elö elöla gausiala digasolo amo galage, dili neala dalulasimäia hamesa neamelë. Dafidilo Geloï eda dili sulubadelabalä namiäia hamesa neawe.

<sup>17</sup> Neda Folo, na dili hawiola säla nihile naaboea dëdësago. Na beba dëdëse sulubadelagi wagahalea go gadolamu dëdëlomelë.

<sup>18</sup> Nilile Dafidilo Geloï Yesu Gelesoie ugila negelasilo dili sulubadelabalä negesi diamiaia hamesa neawe.

Hä amo.

## Filimono Neala olelo oboba

Filimono eda dolô edefade afädê nelo. Eda gaamu Golosi ami fii Geleso sosogo nefolalo amogi afädêda e nelo. Dolô afädê, iê galabaia hamoi gadoi hamolasilo, iê ëida Onesimusi nelo. Eada, iê beaha aligilo neebe amo digila awäla, gaamu elögi namolô asi. Gaamugi ami nea, Onesimusi ea Folo galabaia neebe amobalä damelê hamola neada, Onesimusi e Gelesoma asigi afädê negei.

Segeyo amo gala Folo e galabaia negei nelo ameada, e Filimono neebea moholô uli nelo. Amai gabugi, Onesimusi e iê beaha aligilo neebea obêgêmäia, Folea beba gowe dädêlahilä, Onesimusima i. Folea Filimonoma gomalä säla beba dädêla iasi. Iê galabaia hamoi gadoi hamolasilo amoma habobala made, eda walio Geleso sosogo ameada, Filimono eda iê edoo gadoi hamola, e neawela helegela namolöla sämalola säla dädêla iasi.

### Filimonoïe galabaia hamoi gadoi hamolasilo nelo bahila asi amo, hobeala bu oböla Geleso sosogo nebegi, Folea e Filimono neebea bu obêgêmalola säi

<sup>1</sup> Neda Folo. Neda Geleso Yesuie galabaia dolömelê. Nilile nedoo Dimodi alia nilile damelê hamoi gaalu hamolo Filimono dima beba gowe dädêla iasisago. <sup>2</sup> Amase, alia nilile nalifi Abia dimage, nihiligila nudusa aligilo Agibasa dimage, Geleso sosogo Filimono dia mosöa gedosa aligilo amolimage, beba gowe dädêla iasisago. <sup>3</sup> Nilile Naado Godeage, Dafidilo Geloï Yesu Gelesoeage, dilima ugila negelasiloge, neala dalulasiloge imäia hamesa neawe.

#### *Filimonoïe mala hedabia Folo neala obeägilasi*

<sup>4-5</sup> Dia Dafidilo Geloï Yesuma asigi bogia adogola nea, Godeie udia dolô sulubadela boba hamesa neala säi nabi amolegi, na nie Godema adosaleada, di helêsëla Godema nesege samu aligilomelê. <sup>6</sup> Dida nilibalä nea, nilia Gelesoma asigi afädê negei amoïege, asigi afädê negei amomadila Godeie dawa hedabi dima bäumäiage, nilia nelebo hedabi Gelesomadila nii amoli sulubadela dia hedabola helêsëmäiage, na Godema adolasisa aligilomelê. <sup>7</sup> Ae, nedoo. Die boba hamolo dibe goeada, Godeie udia dolô sulubadelaïe iso asigi gelolasilomelê. Amala hamolo ameada, nie iso asigige neala obeägilasi gelolasimelê.

#### *Filimonoëa Onesimusi iê edoofali gadoi hamola neawela namialola säi*

<sup>8</sup> Dia hamomäia na hamese amoda, Gelesoie ëigi nea, dofea dia hamomola dofä ulufala sämolöi neawe. Gasoda, dia mala hedabi hamolo amoli na dawa ameada, <sup>9</sup> na dima gelola sämolö made helêsëi. Boba hamolo mala dibe ameada, na dima geleä säha. Neda Folo, ado mala gaula aulo momaeai, Geleso Yesuie galabaia dolô nea sähago. <sup>10</sup> Na dima, nie malö Onesimusima mala hedabi hamomolölela nabaha. Onesimusi e ne galabaia neebea ami maasebegi, ea Gelesoma asigi afädê negemäia, na ema säla oleimelê. Ne galabaia nea, neda iê eedo gadoi hamola nelo.\* <sup>11</sup> Dafidida, ea di fidila negemolöi made nelo gasoda, oböla walioda, ea alï haligila ugila negemolöi nea.\*

<sup>12</sup> Na hä, e walio di neebea obêgêmalahago. E maasebegoda, dofä nie bobafali fisiga gahagomelê. <sup>13</sup> Ado Mala Hedabi olelelo amoïe galabaia neebea ami neëgi, dia ne ugila negelo amo gadola, Onesimusia hamomäia e haligila neala sämolö helêsëi. <sup>14</sup> Gaso, dia dofeala made säseada, nada e made gauia idogomolö. Dia hamomolö amoda, na dima gomalä hamomalola made sämolö. Be, dia hamese amo gadola hamomäiamelê. Dia nema hamoi hedabi hamomolö helêsëseada, dihi hamese amo gadola hamomalo.

<sup>15</sup> Na helêsëseleada, ea di digila salele ede made aliga gala nelo ameada, e obêgëla maala, hä, dibalä namolöi namolöla helêsësamelê. <sup>16</sup> E obêgëla maala dibalä namolö amoda, e galabaia hamoi gadoimu hamolasilo neala helêsëmabio. Dofä, eda diê hamoi hamolasilo gaso, walio amo baagila awäla, eda didoo obeägifali namolömelê. Na e dofä boba hamolo gaso, dia ema obeägimolö amoda, ea galabaia hamoi gadoi hamolasise amogimu made, Gelesomadila e didoofali neebela beala, na e boba hamolo neebe amo baagila awäla, dia e dofä boba hamomolömelê.

<sup>17</sup> Dia alï dila neala helêsëseada, ne maasegi obeägila gauia idogolo amo gadola, Onesimusi emage amo gadola wäla hamomalo. <sup>18</sup> Amase, ea dibalä asiala hamoi galêge, bidi negei

\* **1:10:** Onesimusi eda Filimonoïe galabaia hamoi gadoi hamolasilo nelo. Hobeala, e fisäla awäla Folo neebea besela galai. Amalahilä, Folobalä neada, e Gelesoma asigi afädê negei. Segeyo amo gaalu lilile maleeada, hamoi hamolasilo fisäla awäseada, beaha aligiloea ami dolöma nufudala baagomäiala säla imolöi dialeala säla negei dilo. \* **1:11:** Onesimusi, Giligi adoeada, hamoi hedabi hamolola sälo amo gadoi.

galēge, nema negesimalo. <sup>19</sup> Neda Folo, nihile naaboea ado we dēdēsamelē. Bidi goda na idulā. Dīe namolō nebalā bidi negei dialeala sāmōlōi gasoda, na ado go sāmōlō habosebe.\*  
<sup>20</sup> Nedoo, dia nabualo. Dafidilo Geloīē ēigi nea, dia mala hedabi na sāse amo gadola hamomāia hamesa. Alī Yesu Gelesoīe neebe ameada, dia mala hamosebe amea, nīe iso asigi neala obeāgilasimāia hamesamelē.

<sup>21</sup> Na dima beba dēdēla īasisegoda, dia hamomōlōla helēsēsa. Na helēsēsaleada, dia hamomōlō ameada, na dima nabasewe baagila moholōla helēsēsamelē. <sup>22</sup> Amase elōda, dilia adoī amo Godea nabala, ne dili neebea fisiga gamolō gabula helēsēsamelē. Ameada, ne maala midilōie dia mosō hogoli afādē daiala negesimalo.

*Folobalā hamoi gaalu hamolo nefolalo amolia Filimono hawioi*

<sup>23</sup> Ebafolasa eege, Geleso Yesuīe hamoi hamosa nebegi galabaia negei nebalā neebe-weage, di hawiosebege. <sup>24</sup> Dolō odoa nebalā gedola hamoi hamolo Magaeage, Alisadagusaeage, Demasaeage, Ulugueage, ilia di hawiosebege. <sup>25</sup> Dafidilo Geloī Yesu Gelesoīe ugila negelasilo dilile gesamibalā diamiāiamelē.

Hā amo.

---

\* **1:19:** Ado Age Golīdi 16.21gi dibe amo bimalo.

## Yamese Neala olelo oboba

Yamesea ie beba gowegi dëdëi dibe amoda, Godeie udia dolô sege elôgi afufui nefolalebe amoli sulubadelaea mala hedabi dibe amo bëgëla hamomäia dëdëla iasi. Beba egowegi dëdëi dibe amea Godeie mala nilile isogi nogila digala, asigi falagasemäia ado yafie dëdëla negei dialea.

Geleso sosogoea udia dolôbalä nea, mala mogoi hamola ulufadigila hamomolô dialea. Ado odoa dëdëi dibe amoda gowe. Nagadaia neebewegi neada, dafidilo namolôge, busadäoi namolôge, neala nafademolôge, hedabi hamomolôge, mogemolôge, asigi afädë negemolôge, hamoi hamomolôge, elî sigi namolôge, habobala gëgësadiala made sâmolôge, asigi nagadaiala namolôge, gugusäla bimäia made namolôge, fologola made, aso maadela namolôge, Godema adomolôge, amo gadola hamosa namolô dialeala säla dëdëla negei dialea.

### Yöi diëgi gelola nelolahilä, hobeala nili Godebalä hedabola namolömelë

*(Yamese 1.1-18)*

<sup>1</sup> Neda Yamese, Godeiege Dafidilo Geloi Yesu Gelesoiege hamoi hamolasilo neebewe nea. Isilale sosogo giwilasi sege elôgi afufui nefolalebe dilima go gabiola säla, beba gowe dëdëla iasisago.

*Yöi amoliada nili gelolasilo dialea*

<sup>2</sup> Nie nedoo nalifila dili-e, neala sëlasimolô elô elöla dili neebee gui dië bease amogi, obeägisamu namialo. <sup>3</sup> Mida, dilia Godema asigi afädë negei neëgi, fedogola bease ameadä, dofea, aso maadela namiäia gelolasilo. Amoda dilia dawadigi. <sup>4</sup> Gufula namolöi nea, aso maadela gelola nebegoeada, asigi falagasei hedabi, dofeafali dofea nea, Godeie mala hamolo dibe amogi, afädë maadeda, made namolömelë.

*Afädë asigi falagasela helësëmolô amo ema maade galëda, ea Godema nabolö dialea*

<sup>5</sup> Amaimo, dili neebe gogi afädë asigi falagasela helësëlo amo maade galëda, Godea imäia ea Godema ëdëgëmolô dialea. Gode eada, nemola gëla made, udia dolô sulubadelagali nelebo baala ilo neebe ameadä, egali imolömelë. <sup>6</sup> Amai gaso, imola ëdëgësa neebe ameadä, asigi äudä negela made, asigi afädë negelahilä ëdëgëmalô. Asigi äudä negelo amoda, foea ödä aidagula afu mafusalea aidagula sadia galo amo gadoi neamelë. <sup>7</sup> Amo gadoiada, Dafidilo Geloa egali afädë imolô gabula helësëmbio. <sup>8</sup> Ea asigi äudä negei nea, ie mala sulubadelada hi sigi aligilo made neamelë.

*Yamesea busadäoile nelegei yafie negelolema ado säi*

<sup>9</sup> Amaimo, Geleso sosogo afädë e busadäoi nea galëda, e Godeie siigi ilibia neebe amogi, obeägimolô dialea. <sup>10</sup> Gaso, afädë e nelegei yafie negelo dafidilo dolô nea galëda, e nagadaia neebe amogi, obeägimolô dialea. Mida, e mama gadoi nea, eege baagomolömelë. <sup>11</sup> Mama hedabi hido elöi difolalegi, eso neëla galala hëgise amea, ödölöla dufigila didigafulo amo gadola, nelegei yafie negelo dafidilo dolô nefolalebe amolida, hilile hamoi hamosa neëgi, baagomolömelë.

*Niliä nafade hamomäia helësëlasila made, Godea nili neala hedabolasilo nea*

<sup>12</sup> Udia dolöea yöi gaula, aso maadela, gelola aligisebe amoliada, obeägisa nea. Mida, ilia fologola made, gufula aligiseda, namolô gähe bidi amo nimolömelë. Godea e boba hamoi nefolalebe amoligali bidi imolömelëla säi amo imolömelë. <sup>13</sup> Amaimo, dolô afädë hile iso asigigi nafade hamomolô helësëlahilä, Godea na nafade hamomäia helësëlasimelëla sâmolöi mademelë. Nafadeada Godea nafade hamomäia helësëlasimolöi mademelë. Amase, Godeada udia dolöea nafade hamomäia helësëlasilo nea mademelë. <sup>14</sup> Amalo made, nili sulubadela hido hidolaie asigigi gesami awäla nafade hamomolô helësëlo. Nihilile hameloada, öhoë fädämäia salëgi wale yaala gosalo amo gadola, nili neala dusugalasila nafade hamolo dialea. <sup>15</sup> Amaimo, gesami aulo ameadä, udiäea malô fagulo hagui gadoi sulolahilä, malô giisi mosöa aulo amo gadola, hobeala hä, nafade hamoi amo ulufadigila besela galala neegela ägülo. Amalahilä, nafade hamoi amo edelahilä, baagomolô amo neegela ägüloamelë.

<sup>16</sup> Nie nedoo nalifi obeägilola dili-e, mala amo gadoi dili dahila neloeamelë. <sup>17</sup> Gode eamu nelebo hedabi hido elöi difolalebe amo sulubadela mudaiala ilo nea. Gode eda eso aube gasumili mudaia yo digalo neebe amo sulubadelaie Eedo nea. Naado eada, mala hamomolô amo bedefa bedefalo made nea. Eda nelebo afädë eso hagula digi, neëla digilo amo gadoi made nea, eda sedadelahilä, oböla, obobagilo made neamelë. <sup>18</sup> Hile hameamu

e nilile Naado namolô besela galai. Nelebo ea hamoi dibe amogi, nilida abulümi gadoi namiäiala helësëla, ie ado dofä dibe amea ea nili neegela ägülasimelë.

## **Nilia dofä Godema asigi afädë negeseda, mala hedabi amo hamolomelë**

(Yamese 1.19-5.6)

*Nilia ado mala nabala bögëla hamomolö dialea*

<sup>19</sup> Nïe nedoo nalifi obeägïlola dili-e, dilia gowe hedabola helësëmäiaie. Dili sulubadelaea ado säsebe amo hä, fodolofali gëhe sagala nalabomalo. Ado sämolöüeda hä, fodolofali sadia gala made, geleä sämalö. Amase, aabela mihalälämbio. <sup>20</sup> Amoie mida, udia dolöie mihalälo dibe ameadä, Godeie mogoi hamomolö dibe amoda, hedabolo made dialea. <sup>21</sup> Amaimo, nafade hamolo dibe amoli sulubadelage, mala nafade yafie elö elöla besela galalo dibe amoge, fisisa maademalo. Amalahilä, dihili dili nagadaiala nea, Godeie ado mala dilile isogi sagasi amo nimalo. Amala hamoseda, ado amea dilile gesami sigi obögëmolöimelë.

<sup>22</sup> Amaimo, dilia ado mala nabala waeaseseda, dili dihilimu gadiabosa neagomelë. Nabala hamomalo. <sup>23</sup> Afädëa ie ado mala nabala bögëla hamola made, waeaseseda, eda dolöea ie odagi ödäsöea melëlo amo gadoi nea. <sup>24</sup> Ea ie odagi ödäsöea melëlo gasoda, e awähalea ie odagi abodo gadoidula aabela asusugaha aligilo nea. <sup>25</sup> Godeie ado mogoi hedabifali säla negei ameadä, udia dolö fisigäla fisigisilo. Ado säla negei amo, elabola made, afädëa hedabola bebehämu aligila dofä hamomolö dibe amo gadola bögëla hamoseda, Godea dolö amea hamosebe amo sulubadela neala hedabolasimolöimelë.

<sup>26</sup> Amaimo, afädëa helësësälea, neda Geleso sosogo dofea neawedalähilä, ea ie nafi made sigi aligisedä, e hümu gadiabosa nea. Ea asigi afädë negei neebe amoge, mala nabaha neebe amoge, memalämelë. <sup>27</sup> Nilile Naado Godeie siigi nafade made baai, Geleso sosogoea hamolo mala dibe amo gadola hamolo nea, mogola neebe ameadä, malö guluba sefolalebe amolige, udia didalo sefolalebe amolige, yöi gaula neebe amo ugila negelo, amase, Godeie siigi nagadaia mala nafade dibe amea ema baaloea, hedabola beala sisigaha aligilomelë.

## **2**

*Dilia udia dolöbalä nofela made, afädëdila hamomolö dialea*

<sup>1</sup> Nïe nedoo nalifila dili-e, Dafidilo Geloï Yesu Geleso e yo digalo hïdo elöi neebe amoma asigi afädë negelahilä, udia dolöbalä nofela made, afädëdila hamomalo. <sup>2</sup> Dolö äüdä, elöda, naabogi gälo ulini goloea hamoi amo gäla, fagulo hedabifali salugala, amase, elö busadäoi amoda, fagulo nafade nulibaiaï salugalähilä, ele dili gedosebea ami maasegi, hamolo amo helësëmalo. <sup>3</sup> Dilia fagulo hedabi salugala misi amoma guwi samolö misiëla säla, filo hedabi olelo. Gaso elö fagulo nulibaiaï salugai amoma sähalea, Dihï neebea gui aligisale, ma, maala nïe emo mia gudogoi faisalela säsedä, <sup>4</sup> hä, dili dihilimu nofela, dilia asigi nafade negela, gudi mogelo gadoi nea, mogesa nea madele.

<sup>5</sup> Nïe nedoo nalifi obeägïlola dili-e, dilia hä, nabualo. Nagadaia udia dolöie siigi busadäoi nefolalebe amolia asigi afädë negese amoie, nelegei negelo gadoi namiäia, Godea ili memelei madele. Amase, Godea siiba säla negesalea, udia dolöea e dofä boba hamoi neebe amolida, ea beaha maadela sigi neebea ami sigi moholömelëla säla negelahilä, ea busadäoi neebe amolige ami namiäia memelei nea madele. <sup>6</sup> Gaso, dilia busadäoi nefolalebe amoli gagadelomelë. Dili nowëa hewala yölasila gudisadialo nea. Amoda, nelegei yafie negelo dafidilo dolö amolia amalö madele. <sup>7</sup> Dilia Yesu Gelesoie ëi hedabi salugala neebe amogi, ilia ëi amo gagadelo nea madele.

<sup>8</sup> Nilile Gini Gode neebe amoie bebagi ado säla negei dibe amea sähalea, Dihïdi boba hamolo amo gadola, odoä dibalä nefolalebe amolige boba hamomalola säla dëdëla negei dialea. Amala säi dibe amo gadola bögëla hamosa nea galëda, hedabola hamosa neagomelë.

<sup>9</sup> Amai gaso, dilia udia dolö nofela nea galëda, asiala hamosa nea. Amala hamosa neebe amea ado säla negei dibe ameadä dilia hä, mala damulomelëla ololomelë. <sup>10</sup> Amaimo, dolö afädëa Godea ado säla negei dibe amo hulu sulubadela bögësälea gaso, ado amogi holöfali holöbö afädë damusedä, ea ado säla negei dibe amo hulu sulubadela damusagomelë. <sup>11</sup> Udia fa nimabiola säi ameadä, udia dolö baagomäia nufuabiolage säi. Dia udia fa made nelo nea gaso, baagomäia nufudasedä, dia hä, mala säla negei dibe amo damulomelë.

<sup>12</sup> Godeie ado säla negei nili fisigälasilo amea, oböla, nili mogemolöimelë. Hä, ado adomolömadige, amase, mala hamomolömadige, amo helësëla hamomalo. <sup>13</sup> Mida, afädëa udia dolö odoä neebe amoli made bobasësedä, Godea mogela gudisalo amo gala, eege made bobasëmolöimelë. Amai gaso, bobasëlo amea gudi mogese amo nufuda salalahilä, baagila aulomelë.



*Asigi afädë negei amea mala hedabi hamola ulufamolö*

<sup>14</sup> Nie nedoo nalifila dili-e, afädëa neda asigi afädë negei neawelahilä, mala hedabi made hamola ulufadigiseda, ameadä e ugila negemolöle. Ea asigi afädë negei ameamuda e damula moholöle. <sup>15</sup> Nedoo nalifila ili neebe amoligi faguloge molöge maade neëgi, <sup>16</sup> amolima dili afädëa sähalea, Gögi fagulo salugala, molö mualola säla, nelebo afädë dofä made iahalea, memalä hawioseda, dilia amala hawiose ameamuda, ili abeahäla ugila negemolödu. <sup>17</sup> Amo gadola wäla, asigi afädë negeida nea gaso, mala hedabi hamola made ulufaseda, asigi afädë negei badu gomuda, hä, baagoi gadoimelë. <sup>18</sup> Amaimo afädëa sähalea, Dolö gomoda asigi afädë negei nea. Amase, dolö odoa gomoeada mala hedabi hamosiöla sälo nea. Amala sälo neebe amoma na gomalä säla obëgësago. Afädëa ne asigi afädë negei neawela säla, mala hedabi ulufadigila made hamoseda, e asigi afädë negei neala na abeahäla helësëmolödu. Nage nihì mala hedabi hamosebe amea, ne asigi afädë negei neawela ulufala olemolömelë. <sup>19</sup> Dilia Gode afädëfali neebe amo helësësegoda, hadabolafali helësëi gabu. Mugabe neebe amoliage amala helësëla, fudugila bedäha dialea.

<sup>20</sup> Asigi maadela dili-e, asigi afädë negei nea mala hedabi hamola, made ulufaseda, asigi afädë negei neebe gomuda memalämelë. Amo dilima oledule. <sup>21</sup> Nilile naado Abalahamaea ie malö Aisaga gobela ilo aulidaia negela Godegali i ameadä, Godea ea hamoi amo bealahilä, eda dolö asigi mogoi neala säi madele. <sup>22</sup> Ea asigi afädë negei nelo amole, mala hedabi hamosa nelo amole, helegela afädëdi nelo go beasebele. Ea mala hedabi hamoi ameadä, ie asigi afädë negei amo hä, dofealasimelë. <sup>23</sup> Amala hamosebegi, ado säla negei dibe amo gadola gausiala digai amoda gowe. Abalahamaea asigi afädë negei nebegi, Godea eda asigi mogoi neala säila säla dëdëla negei dialea. Amase, Abalahamada Godeie damelë neala säimelë. *Mi Gäwi 15.6, Aisaea 41.8* <sup>24</sup> Amaimo, afädëa asigi afädë negese ameamu made, mala hedabi hamose amea, Godea di asigi mogoi nebegola sämolö go beasebele.

<sup>25</sup> Amo gadola wäla, idigi nawela susugu hamolo udia Eleihaba sulo amea, desega mosäia Yasuaea fisiga gai äüdä amole ie mosögi sigi nelolahilä, ele idi elögi obëgëmäia idi olela fisiga gasebegi, Godea Eleihabama dida asigi mogoi udiala säi madele. <sup>26</sup> Amaimo, afädë e hame doala asi galëda, ie domalo amoda hä, baagoi dialea. Amo gadola wäla, afädëa asigi afädë negeida nea gaso, mala hedabi hamola ulufalo made galëda, asigi afädë negei badu amomuda hä, baagoi gadoi dialea.

### 3

*Nilia ado sigi namolö dialea*

<sup>1</sup> Nie nedoo nalifila dili-e, dili sulubadelaea nili säla olelelomu namolöila helësëmabio. Amoie mida, Godea udia dolöea hamoi amo gadola mogemolö segeyo besela galasolo amo gala, odoabalä gudimolö amo gadola made, säla olelelo neebe nilibalä Godea hadabolafali memelela gudimolö amoda, dilia dawadigi. <sup>2</sup> Nili sulubadelaea asiala idi elö elöla hamolo. Amaimo, afädëa ado asiala made sälo nea galëda, eda hadabifali nea. Ie domalo asigige hadabola sigi aligimolöi galea.

<sup>3</sup> Nilia sugua hosiië nafigi aeane fisiga gala, ëfë begei amogi gaulahilä, nilia hamese amo gadola mosäialahilä hosi sigi aligilo. Ameadä, nilia hosiië domalo sulubadela sigi namolöie amalo. <sup>4</sup> Amase, sibia ödägi aulo dibe amo helësëdelä. Sibida edefademaalä, amase, fo gelola guula maala bobadelä hamosegi gaso, sibi gaulo amea helësëse amo gadola duhuludabodo mosäia, sibi edefade amo i aeane baledi holöfali amea hamogilomelë. <sup>5</sup> Amo gadola, eliä holöfali gaso, hamoi edefade elö elöla yafie hamomolöla sälo nea. Amase, nulo iso holöfalimelëa sege ilo sulubadela naha maadelo dialea madele. <sup>6</sup> Eliä nulo gadoi galea. Nafade hamomolö dibe amo sulubadelada elimadilamu besela galaha. Eliäda domalo sulubadela nigime baaha maadelo nea. Ameadä nilile iso asigigi mala nafade elö elöla besela galasebe amoda, nulo söa fedalo amo gadoi galea. Elië söa fedalo mida, heli segeala mulo.

<sup>7</sup> Sugua ilaba elö elölage, haea elö elölage, nuba elö elölage, ödägi fii elö elölage sefolalebe amolida, udia dolöea aeaseda, aeamolöi. Amoli aealo <sup>8</sup> gaso, eliä dofä aeamolöi mademelë. Eliä sigi aligimolö ulimelë. Dofä nafadefali nafade galea. Eliä baagolo nuba se gadoi nobai galeamelë. <sup>9</sup> Nilile eliä Dafidilo Geloil nilile Naado neebe amoie ëi gauia adalo. Amalahilä, eli ameamu, oböla, Godea hi e gadoi namiäia hamoi neebe amoli neala nafademaalola nafadela sälo nea. <sup>10</sup> Nafi idi afädë amogila Godeie ëi gauia adogomolöge, amase, odoa neala nafademäiala sämolöge, besela galaha. Nie nedoo nalifila dili-e, mala amo gadoida, dofea mademelë. <sup>11</sup> Ödä gü afädëgila hadabige gamogaige besela galalole. <sup>12</sup> Nie nedoo nalifila dili-e, afäeoeada silama gägä negelole, ma, mahabu ëfë gadoi gelebi ëfëada afäeo gägä negelole. Amo gadola wäla, ëbi ödä dibe ameadä, bu oböla ödä hëdäi besela galalo mademelë.

*Dolô asigi falagasei neebe ameada mala hedabi hamomolô dialea*

<sup>13</sup> Dili neebe gogi asigi falagasela hedabola helêsêla hamoloda nowê neebe. Amo gadoi hamolo neebe ameada, hedabimu hamola, e asigi falagasei amea ea hîle êi gauia adogola made, nagadaiala nea, mala hedabi hamola ulufamolô galea. <sup>14</sup> Amai gaso, dilile iso asigigila odoaea nelegei dibe amo dofâ negali negemolôila helêsêla, nelebo hamosalea odoaea dilile êi gauia adamâialamu hamoseda, dilile asigi dibe amea ne dofeala made helêsêmalo. Dilia mala amo gadoi hamosebe amea dofâ sâlo dibe amo fisioeamelê. <sup>15</sup> Asigi amo gadoida mudaiala digalo mademelê. Amoda nagadaialage, dolôfamadilage, mugabemadilage mulomelê. <sup>16</sup> Odoaea nelegei dibe amo dofâ negali negemolôila adabala helêsêlo mala amoge, nelebo hamosalea odoaea dilile êi gauia adamâialamu hamolo mala amoge dibe amida, asigi afâdêdi madege, mala nafade sulubadelage diê bimolômelê.

<sup>17</sup> Amai gaso, asigi falagasei namolô mudaiala misi gowe gadoi nii neebe amoliada, mala gowe gadoi hamomolômelê. Mi gâwilada, ilile asigi gagadelai namolôge, amase, aealo mala bégêla hamomolôge, odoabalâ hame negela namolôge, odoaea sâse nabala hamomolôge, bobasêlolea gâgâ hedabilea nobai namolôge, nofela made udia dolô sulubadelabalâ afâdêdi namolôge, ado âudâ sâlo madea namolôge, aligilo nea. <sup>18</sup> Aealo neebe ameada, aealo hawa amo sagamolômelê. Bâuseda, hî emage udia dolô odoamage asigi bobagila namolô amoie gâgâ negemolômelê.

**4***Nagadaia mala boba hamosa neebe amoliada, Godebalâ ado nii neala sâi*

<sup>1</sup> Dilia gégêla nudusa nebegoda, abidila besela galahadu. Amoda domaloea gelola hamelo amoli dilile isogi dibe amila gégêla nudula besela galaha madele. <sup>2</sup> Dilia nelebo odoa dibe amo nimolôila helêsêlahilâ gaso, made nelomelê. Amahaleada, baagomâia nufidelo. Amase, odoaiê nelebo dibe amo asigia negalimu negemolôila adabala helêsêlahilâ, made neala, gégêla nudusa aligiloge nea. Amala hamolo nea, Godema îmola made êdêgêlo ameada, made neala nebegomelê. <sup>3</sup> Dilia nimolô helêsêla êdêgêseda, made nelo. Amoie mida, dilile asigi mogoi made nea, êdêgêsebe ameamelê. Dilia nelebo nimolôila helêsêse amoda, dihili dilimu helêsêla, domaloea gelola hamelo amo gadola waasemolôie êdêgêlo.

<sup>4</sup> Udiaea egoa digîla dolô elôma aulo amo gadola, Gode digîla asi nefolalebela dili-e, nagadaia galu dibe amobalâ damelê hamola neebe ameada, Godema bimolô habobaha neebe amoda, dihili dawa made neale. Dilia nagadaia galu dibe amobalâ damelê hamola neebe ameada, Godebalâ ado nii neamelê. <sup>5</sup> Godeie bebagi ado gowe sâla negei dibe amoda, memalâ sâla negei dialeala helêsêsale. Godea gesami nilile isogi ifosi neebe ameada, ea helêsêsebe amo gadola hamoiabelamu helêsêsa neamelê.\* <sup>6</sup> Amai Godea nili hîdo elôla ugila negelasilo. Amai amea, Godeie ado sâla negei dibe amoda gowe. Asigi dalagaia galo neebe amolida, Godea nagadaialasilahilâ gaso, nagadaialo neebe amolida, obôla, ea ugila negelasilola sâla dêdêla negei dialea.

*Malai 3.34*

<sup>7</sup> Amai gabugi, dilia Gode hawa nagadaiala namialo. Mugabe busama habobaseda, ea dili digîla fisâla moholômelê. <sup>8</sup> Dili Gode neebea ga madela aligiseda, eege dili neebea ami ga madela aligimolômelê. Nafade hamolo dili-e, dilile naabo nigime hêmalo. Asigi âudâ negelo dili-e, dilile iso asigigi nafade dibe amo sulubadela fisisa maadela, asigi gagadelai namialo. <sup>9</sup> Didigaomalo. Amase, obeâgîsa nefolalebe dilida, obôla, bedefala asigi sâosâoia idogola diimalo. <sup>10</sup> Dilia Dafidilo Geloie siigi, dihili dili nagadaiala namialo. Amala hamoseda, ea dili neala gauia adogolasimolômelê.

*Odoa neebe amoli baagido sâmbioli sâi*

<sup>11</sup> Nie nedoo nalifila dili-e, odoa neebe amoli baagido sâmbio. Afâdêa edooma baagido sâla mogeseda, ea Moses nebegi Ado sâla negei dibe amo baagido sâla mogelo nea. Amaimo, dia Ado sâla negei dibe amo mogeseda, ado amo bégêla hamolo made nea, dida obôla, amoie mogelo gadoi neamelê.\* <sup>12</sup> Gode afâdêfalî eamu ado sâla negei amo îloge, amase, gudî mogeloge e hîdomu nea. Ea hîdomu namolô îloge, namolô nea neloge e nea. Dia odoa dibalâ nefolalebegoli mogesegoda, di nowê neala helêsêlahilâ, mogelo wâla mogesa nea.

*Na gomalâ hamomolôla daiala negela sâmbioli sâi*

\* 4:5: Damo gowegi dêdêla negei dibe go gadoida, beba odoagi maademelê. Amase, Giligi adoeada hedabola ulufala made dêdêdi. Dolô odoaea helêsêla sâhaleada, Godea gesami nilile isogi ifosi neebe ameada, segeyo sulubadelagi mala nafade dibe amobalâ gesami awâla siia nufudaha nea. Diliada ado goda memalâ gabula helêsêlela sâi. \* 4:11: Yamesea damo gowegi Ado sâla negeie helêsêla dêdêdi dibe amoda Gobela îlo 19.18. Amase, Yamese 2.8ge bimalo.

<sup>13</sup> Aiyo gahada gogi galë, ne hä, gaamu afädëgi awälahlilä, gäheo i afädë gadoi ami nea, bisinesi hamose ameadä, na muni nimolöla säha nefolalebe dilima sähago. Nabualo. <sup>14</sup> Dilia aiyo besela galamolö amoda dawa mademelë. Dilile namolöda abodo gadoi. Gelë galahlilä, aabela hogosa helelo amo gadola, dilile namolö goda amo gadola hogosa helemolömelë. <sup>15</sup> Dilia sämolö dibe amoda gomalä. Dafidilo Geloia hamei galëda, hä, nili namolö neebewegi, gomalä hamomolöla sämolöda. <sup>16</sup> Amala säla made, dilia dihili dili ilibialahlilä, asigi dalagala neda hamoi edefade gowe gadoi hamomolömelëla sälo. Ado amo gadolada asiala sälomelë. <sup>17</sup> Hä, afädëa hedabi hamomolö dibe amo hi dawadigilahlilä gaso, made hamola fisiseda, nafade hamosa nea.

## 5

### *Nelegei yafte negelo neebe amoie ado säi dialea*

<sup>1</sup> Nelegei yafte negelo dafidilo dolö nefolalebe dilia nabualo. Neala nafademolö dilile dië bimolö amogi gäia güsälä diisa namialo. <sup>2</sup> Dilile nelegei amo sulbadela gäalimusa maadeimelë. Amase, dilile fagulo hedabi difolalebe amoda, hä, gasiämoëa damusa maadeimelë. <sup>3</sup> Dilile golo silibage negei amoda hä, asömalö gaisa baaha maadeimelë. Asömalö gaisa baai ameadä, dilia nafade hamoimelëla neala ulufamolömelë. Nuloea wilo amo gadola, golo silibage asömalö gaisa baai ameadä, dilile domalo nuloea molömelë. Aligila wagamolö ga madese gaalu, dilia nelebo sulbadela gafedela negei gabugo.\* <sup>4</sup> Nabuö. Sagaia hamoi hamolasilo amolia dilile sagaia hamoi hamolasisa nebegi, dilia ili dahila neala, bidi made iala dofogai. Dilia dofogai amea, Gode wesegi, dilia asiala hamoi amoie bidi nimolömelë. Hamoi hamolasilo dilia gadiabolo amolia ado säsebe amoda, Dafidilo Gelo sulbadelaie geloi neebe amea nabaha nea. <sup>5</sup> Dili nagadaiawi nea nagadaia nelebo hedabi amomu gaula nea, domaloiemu hamela mi hamosalea, dihili dili obeägisa nea. Domalo besolomäialahlilä, molö badoia naha nebege gaso, dihili dili nufudala baagomolö segeyo hä, besela galai dialea. <sup>6</sup> Nafade hamolo made nefolalo amolima dilia nafade hamoimelëla sälahilä, ilia nudumolö helësei made neëgi, baagomäia nufidelomelë.

## **Gelola nea Godema adosa neada, Dafidilo Gelo misiaia beaha namolö**

*(Yamese 5.7-20)*

### *Nilia iso asigia fologola made, aso maadela nea, Dafidilo Gelo misiaia beaha namolö*

<sup>7</sup> Nie nedoo nalifila dili-e, Dafidilo Gelo misiaia fologola made, aso maadela beaha namialo. Dolö sagai sagalo neebe amea, ie sagai sagai amo hedabola bäumäiala beaha aligilo amoda, dilia dawamelë. Ea ie iso asigia, aso maadela, gelola nea, i bäu gilöie segeage, bobagilöie segeage hamoi hamomäia, fologola made, aumala aligilo amo helësemalo. <sup>8</sup> Amaimo, diliage fologola made, aso maadela, gelola namialo. Mida, Dafidilo Gelo obëgëmolö segeyo hä, ga madefali galeamelë. <sup>9</sup> Nie nedoo nalifila dili-e, Godea dilia hamosebege mogeloea, dilia dihilimu habobala gëgësadiamabio. Memelela gudimolö dolö amoda, hä, mosöa nogila digamolöie, idi galo baagido neamelë.

<sup>10</sup> Bea sälo dafidi nefolalo amolia së naha nea, aso maadela, Dafidilo Geloie ëgi ie ado mala säla olelesa nelo amo helësemalo. Nie nedoo nalifila dili-e, amo helëselahlilä, diliage amo gadola wäla hamosa namialo. <sup>11</sup> Bimo. Ili së edefade naha nea gaso, aso maadela, gelola nea, obeägisa nelomelëla nilia sälo amoda dilia dawadigi gomelë. Dilia Yoboie sedaluge nabelo amomelë. Yoboëa yöi amoli gaula nea, aso maadela, gelola nebegi, Dafidilo Geloia hobeala ema hedabi hamoi amoda, dilia dawa amomelë. Bobasëloge, ugila negelasiloge, Dafidilo Geloima nobai nea.

### *Migalia diigila sämabiola säi*

<sup>12</sup> Nie nedoo nalifila dili-e, dilia dofä gomalä made hamomäia säla iahago. Selesaia mosöie ado sähaleage, nagadaiaie ado sähaleage, nelebo odoäie sähaleage, migalia diigila sämabio. Godea dia asiala hamoila säloea, ü, ailemu sämalo.

### *Dolö asigi mogoi neebe amea Godema adose amoda geloi dialeala säi*

<sup>13</sup> Amaimo, dili nebegogi afädë yöi gaula nea galëda, hi Godema adomolö dialea. Amase, afädë obeägisa nea galëda, Godeie ëi gauia adogola gë udämolö dialea. <sup>14</sup> Dili nebegogi afädë oloi galëda, ea Geleso sosogo udia dolö Godea wela ifosisi sigi aligilo dafidi nelo amoli wemolö dialea. Iliä dolö amoie Godema adosalea, Dafidilo Geloie ëgi ie busagia

\* **5:3:** Udia dolö amolibalä Godea mogela gudisulo amo galada, udia dolö amoli nagadaiawi nea hedabi hamoi afädëge, iligi hedabi afädëge, dofä maadefali maade bimolömelë. Iliada nelebo nafademolö amomu gaula namolö. Ameadä, ili nagadaia nelo amogida, mala hedabi made hamoi amo olemolömelë. Nuloea molömelëla säi amoda ilia bidi nafade nimolömelëla säi.

susu gadoi weli negemolö dialea. <sup>15</sup> Iliä Godema asigi afädë negela nea adose amea e wahilasimolömelë. Oloi dilo amo Dafidilo Geloia neala wahila nowelasimolömelë. Ea nafade hamoi galëda, amoge hëla fisimolömelë. <sup>16</sup> Hä, dili hïdo hïdolaea nafade hamoi amo odoalima säla sisiaha maadesegi, ili helësëla Godema adolasimalo. Dili wahisa maademäiaie, amala hamomolö dialea. Asigi mogoi neebe amea Godema adose amoda, geloifali, dofä udia dolö ugila negelomelë.

<sup>17</sup> Elaiada dolöfä nili neebewe hï gadoi nelo. Ea sege made digamäia Godema gelola adosebegi, gäheo i ohodoaie aube gafeiagi sege made digala esoimu dilo. <sup>18</sup> Oböla, hobeala ea Godema bu adosebegi, mu dusuia gala sege digalahilä, sagai bu hedabola besela galai.

*Afädë e idi asiala asi neëgi, nilia sigi obëgëmolö dialea*

<sup>19</sup> Nie nedoo nalifila dili-e, dili neebe gogi afädëa ado dofä amo amilahilä digila idi asiala awäsegi, edoo afädëa e oböla bu sigi obëgësedä, <sup>20</sup> gomalä helësëmalö. Afädëa nafade hamolo e asiala asia amila sigi neala obëgësedä, ea e baagomolö dibeä amila sigi obëgëla, nafade yafie hamoi amoge Godeä hësa maadeila helësëmalö.\*

Hä amo.

---

\* **5:20:** Beba gowe dëdëi goda, Yamese hï helësësäleada, edoolaligi odoaea Godeie ado dofä amo digila asi amo hamogimolöie dëdëi gadoi galea.

## Age Yone Neala olelo oboba

Yone eda Yesuie damelē. Eda Yesu bēgēla aulo dolō giwilasi amogi. Hobeafalī ēdēi sali hamosalea ea ado go dēdēla Geleso sosogo nefolalo amolima ī. Dēdēla ī amoie mida gowe. Godea nili boba hamoi amo gadola, amase, niliāge udia dolō odoa boba hamomalola sāla dēdēi. Amase, ea elō sāhalea, Wāfalī sāsāla olelelo moholōmelē. Hedabola beaha namialola sāla dēdēi. Iliā sāhalea, Godeie malōda dolō namolō misi mademelēla sāmōlōmelēla Yonea beba gowe dēdēi. Ado Mala Hedabi Yone dēdēi amoge Yone eamu dēdēimelē.

### *Namolōi namolō Ado e ulufadigila misi*

<sup>1</sup> Nelebo sulubadela maadeia, nelo misi amoie ado nilia nabala, siia beala, naaboea diigilalahilā, nilia dilima namolōi namolō Ado e misi amoie sāla iahago. <sup>2</sup> Namolō dofā ulufadigi amo bealahilā, nilia meli amo dilima sāha. Namolōi namolō e siiba Eedobalā nelo ulufadigila misi amoie sāla iahago. <sup>3</sup> Dilia nilibalā dila namiāia nilia meli nabi amole dilima sāla iahago. Eedo, ie Efege Yesu Gelesolebalā nilia dila neamelē. <sup>4</sup> Dilimage nilimage obeāgilō nobamāia, nilia dilima beba dēdēla iasisago.

### *Gode eda yo digalo nea*

<sup>5</sup> Ea ado sāi amo nilia nabalahlilā, dilima sāla iahago. Gode eda yo digalo nea, gasimi sagalo gadoi nafade ema madefalimelē. <sup>6</sup> Nilia ebalā dila neala sāha nea, gasimi sagalo gadoi nafademu hamosa aligiseda, wāfalī sālo nea, dofā sālo made gaula neamelē. <sup>7</sup> E nafade baai made, yo digalo neebe amo gadola nili nafade baai made, yo digalomadi nawesa aligiseda, odoa neebe amolibalā dila neage, ie malō Yesuie healea nafade hamoi amo sulubadela hēsage neamelē. <sup>8</sup> Nilia sāhalea, Na nafade hamolo madela sāseda, nili nihili gadiabola sāha, dofā sālo nilile isogi made neamelē. <sup>9</sup> Amai gaso, nilia nafade hamoi amo sāla sisiaseda, Gode mogoi nea hēmolōmelēla sāi amo gadola hēmolōmelē. Nilia mala nafade hamoi amoge sulubadela hēsa maademolōmelē. <sup>10</sup> Nilia sāhalea, Na nafade hamoi madela sāseda, Gode eda wāfalī sālo neala sāloge, ie adoge niliāma mademelē.

## 2

### *Gelesoda nilile ugila negelo nea*

<sup>1</sup> Nīe malōla dili-e, nafade made hamomāia na dilima beba gowe dēdēla iasisago. Gasoda, nili afādēa nafade afādē hamoseda, nilile Ugila Negelo Eedobalā nea, Yesu Geleso e asigi mogoi neebe amo neamelē. <sup>2</sup> Nilile nafade hamoi amo hēmāia ea hile namolō amo odala iala baagoi. Nililemu hēmāia made, udia dolō sulubadelaie nafade hamoi amo hēmāia amala hamoi.

### *Gode dawadigi neebe ameada ie mala bēgēla hamosa neala sāi*

<sup>3</sup> Amaimo, nilia ea sāi dibe amo gadola hamosamu aligiseda, nilia e dawadigila helēsēsamelē. <sup>4</sup> Afādēa ea sāi amo gadola made hamosa nea sāhalea, E dawadigila sāseda, eda wāfalī sālo nea, dofā sālo ema mademelē. <sup>5</sup> Afādēa ea sāi dibe amo gadola hamoseda, Godema boba hamolo amo dofā fādāi neamelē. Nili ebalā dila neada gomalā helēsēdelā. <sup>6</sup> Afādēa ebalā dila neala sāseda, Yesuea hamosa nelo amo gadola hamosa namolōi galea. <sup>7</sup> Ne damelē obeāgilola dili-e, na dilima hamomalola sāla negei amo dēdēla iasise amoda hādamade negei made, siiba negei.\* Amoda mi gāwia amila dilo. Siiba negeila sāi amo dilia nabaha maadei. <sup>8</sup> Amai gaso, hamomalola sāla negei amo dēdēla iasisebegoda gāhemelē. Gelesoie namolōea hamoi amoge dilile namolōea hamoi amoge dofā gabula melēlo. Mida, gasimi sagalo amoda usila, yo digalo dofā amoda yo digaha neamelē. <sup>9</sup> Afādēa ie edooma bimolō habobala nea ea sāhalea, Yo digalo neebea ami neala sāseda, gasimi sagaia ami neamelē. <sup>10</sup> Afādēa ie edooma boba hamosa neebe amoda yo digalomadi nea. Ie isogi yo digalo neebe ameada nelebo afādēa e digalasimolōi mademelē. <sup>11</sup> Amai gasoda, afādēa ie edooma bimolō habobala nea galēda, gasimi sagaigi nea. Ami nawesa nea. Gasimi sagaloea ie si dofogasegi, idi gowegi awāhala helēsēla made, nagubaia nawesa nea.

<sup>12</sup> Malōla dili-e, dilile nafade hamoi amo Gelesoie ēigi hēla fisi amoie, na dilima dēdēla iahago.

<sup>13</sup> Asigi fādāi naadola dili-e, Afādē siibafalī siiba neamu nelo dilia dawadigi amoie, na dilima dēdēla iahago.

\* 2:7: Yone 13.34 gomalā sāla dēdēla negei dialea. Yesuea sāhalea, Na dili boba hamoi amo gadola dilia dihilimu boba hahamola namialola sāla dēdēla negei dialea.

Malisáfalié, dilia nafadelasiloie busa neebe amo nudula salolela baagila asi amoie, na dilima dëdëla iahago.

<sup>14</sup> Malöla dili-e, dilile Diado neebe amo dawadigi amoie na dilima dëdëla iahago. Asigi fädäi naadola dili-e, Afädë siibafali siiba neamu nelo dilia dawadigi amoie na dilima dëdëla iahago.

Malisáfali-e, dilia geloi amoiege, Godeie ado dilile isogi dibe amoiege, nafadelasiloie busa neebe amo nudula salolela baagila asi amoiege, na dilima dëdëla iahago.

*Nagadaia galu boba hamomabiola säi*

<sup>15</sup> Nagadaia galu amole nelebo nagadaia dibe amole boba hamola namiabio. Afädëa nagadaia galu dibe amo boba hamoseda, Naadoma boba hamolo amo ema mademelë.

<sup>16</sup> Nagadaia dibe amo sulubadela Naadomadila mulo made. Amoda gowe. Domaloea gelola hamelo amoge, siia beala gelola hamelo amoge, afädëa nelegei yafie negelo ameage hamoi hamolo ameage gugusäla bimäia hamolo. Amo sulubadela Naadomadila mulo made, nagadaia amila mulomelë. <sup>17</sup> Naga föige nagadaia hamelo amoge hogosa helesalea gaso, udia dolöea Godea hamese amo gadola hamolo amoli namolöi namolömelë.

*Gelesoie ado nii misi nea*

<sup>18</sup> Nie malöla dili-e, nilida hä segeyo aligila wagamolö fumadi neamelë. Dilia dafidi Gelesoie ado nii moholömelëla säi nabi amo waliöda hä odoa Gelesoie ado nii malei misi neamelë. Ameada nilida hä aligila wagamolö fumadi nea gabula helësëdelä. <sup>19</sup> Iliä nili digila bahila doadigila afiaha maadei. Amolia nilibalä dila made nelo. Dofä dila nelo galebeda nili gedola afädëfali neëgi, amalabio. Ili afiaha maadei amea ili sulubadela nilibalä dila made nelo amo oleimelë. <sup>20</sup> Amai gaso, dilima Gelesoea Godeie Gesami i. Dili sulubadela dafä sälo dawadigi nebegeo. <sup>21</sup> Dilia ado dofä amo dawadigi madela helësëla dëdësa maade. Dilia ado dofä amo dawadigi ameage wäfali sälo amo ado dofä amila mulo made amo dawadigi ameage na dilima dëdëla iasisago. <sup>22</sup> Wäfali sälo amoda nowë. Eada sähalea, Afädë Memeleida Yesu madela sälomelë. Efegele Eedolema baagi ilo amoda Gelesoie ado niimelë. <sup>23</sup> Efegema baagi ilo amobalä eedoda nea mademelë. Efegele amobalä eedoda nea mademelë. Efegele amobalä eedoda nea mademelë.

*Ado dofä Eleloi Gesamia olelesa nea*

<sup>24</sup> Mi gäwia amila nabi dilile isogi dibe amo amalasi namialo. Amalasi aligiseda, dili Efegele Eedolebalä namolömelë. <sup>25</sup> Ea niligali imolöla daiai amoda gowe. Namolöi namolö imolöla daiai. <sup>26</sup> Iliä dili dahila nimolö helësësa neebe amoie na dilima beba dëdëla iahago. <sup>27</sup> Amai gaso, dilima Gelesoea Godeie Gesami i amo nea. Ameada afädëa dili olelemolöi made. Gesamia nelebo sulubadela dili olelesaleada wäfali made, dofä sälo nea. Dilima olelei amo gadola, Gelesobalä dila namialo.

*Nilä Godeie malö nea*

<sup>28</sup> Amai gabugi, nie malöla dili-e, hi e ulufadigisolo amo gala ie siigi nili hewaloea bedäla made gelola namolöie ebalä dila namialo. <sup>29</sup> Amai dilia eda mogoi fali neebe amo helësësebe amea gomalä helësëmalö. Sulubadela mala mogoi hamosa neebe amolida Godeie malölali nefolaleala helësëmalö.

### 3

<sup>1</sup> Wae! Naado Godea nilima sähalea, Dili nie malölali nebegola säla abodo gadola boba hamosa neadu. Dofä gelola nilida ie malölali neebe amo. Nagadaia nafade hamolo neebe amolia Naado dawa made neebe amea nilige dawa made nea. <sup>2</sup> Ne damelë obeägilola dili-e, nili walio Godeie malölali neebe amo hobeä nili abodo gadoi namolödu dawa made nea gaso, nilia afädëfali helësësebe amoda gowe. Geleso ulufadigisolo amo gala, e abodo gadoi maase bimolödu, amo nilia siia beahalea, e neebe amo gadoi namolö gabula helësësamelë. <sup>3</sup> Ea nili hi e gadoi namolö gabula sulubadelaä asigia sisiläfüsa nefolalebe amolida nigime baai made, hi e nigime baai made neebe amo gadoi namolö gabula hehelësësa neamelë.

<sup>4</sup> Nafademu hamolo nefolalebe amoli sulubadelaä Godeie ado säla negei dibe amo neadigilo nea. Mala nafade dibe amea ie ado säla negei dibe amo neadigilomelë. <sup>5</sup> Nafade hëla fisimolöie e ulufadigila misi amoge ema nafade afädë baai made amoge dilia dawadigi.

<sup>6</sup> Amaimo, afädë ebalä dila neebe ameada nafade hamosamu aligilo mademelë. Afädëa nafade hamosamu neebe ameada e made beagolei, e dawa made nea. <sup>7</sup> Nie malöla dili-e, afädëa dili dahila neloea idihë namialo. E asigi mogoi neebe amo gadola afädëa mala mogoi hamolo neebe amoge asigi mogoi nea. <sup>8</sup> Siiba mi gäwilafali mugabe busaeada nafademu hamosa nelo. Amo gadola afädëa nafademu hamolo neebe amoge e sosogo nea. Ea nafademu hamosa nebegi, Godeie Malöea mugabe busaea hamoi amo haila digimolöie ulufadigila misi. <sup>9</sup> Amaimo, afädë Godeie malö neebe ameada nafade hamosamu aligilo

made nea. Amoie mida, ie namolöie gägä negela hi e gadoi bedefai nea. E Godeie malö neebe amea nafade hamosamu namolö uli nea. <sup>10</sup> Amo helësëlahilä, Godeie malö neebe amoge mugabe busaie malö neebe amoge nowëie walebelela mogela melëlomelë. Mala mogoi hamolo made neebe amoda Godeie malö made nea. Amase, ie edooma boba hamolo made neebe amoge Godeie malö made neamele.

<sup>11</sup> Mi gäwia amila ado säla i nilia nabi amoda gowe. Nilia nihilimu boba hahamosa namialola säla i. <sup>12</sup> Nafadelasilöie busaie sosogo nelo Geinia ie ëo baagomäia nufi. Nili e gadoi namiabio. Nufi amoda mi edogi. Mida, ie ëoea hedabimu hamosa nebegida, Geiniada nafademu hamosa nelo. <sup>13</sup> Amaimo, nie nedoola dili-e, nagadaia nafade hamolo neebe amolia dilima bimolö habobaseda, fudugimabio. <sup>14</sup> Nilia nilile nedoo nefolalebe amolibalä boba hamosa neebe amea nilia helësësaleada, nilida baagomolö dibeä amila namolöi namolöjadi dëgëla asi nefolaleala helësësa. Afädëä boba made hamoseda, eda baagomolö dibeä ami nea. <sup>15</sup> Afädëä hile edooma bimolö habobaha neebe amoda udia dolö baagomäia nufidelo nea. Baagomäia nufidelo neebe amolia namolöi namolö gaula made neebe amoda dilia dawadigi. <sup>16</sup> Gelesoea hile namolö amo niligali fisiga gala i amea, nilia boba hamolo amo helësësa nea. Amai gabugi, niliäge nilile nedoo nefolalebe amoligali nilile namolö amo fisiga gala imolöla. <sup>17</sup> Afädë nelegei negelo neebe amea ie edoo nelebo made neebe amo bealahilä made bobasësa, Godeie boba hamolo amo ebalä abeahäla neadu. <sup>18</sup> Nie malöla dili-e, nilia adoeamu boba hamolo gadoi namiabio. Dofä hamoi hamosa nea boba hamola namialo.

#### *Godeie siigi neebe amea gelola namolö*

<sup>19-20</sup> Amala hamolo amea nilida dofä säloie sosogo neala helësëmolömelë. Nafade hamosebe amoie së molö dialeala iso asigigi säla iäsa, ie siigi asigi sigi namialo. Mida, Godeä nilile iso asigi baagila awäla, ea sulubadela dawadigi amea amala sigi namolöla. <sup>21</sup> Ne damelë obeägilola dili-e, nilile iso asigigi së molö dialeala made säla iäsa, ie siigi bedäi made gelola neamele. <sup>22</sup> Elöda, nilia ea hamomalola säi amo gadola hamosebe ameage, e obeägmäia hamosebe ameage nilia ema afädë nabaseda, ea imolömelë. <sup>23</sup> Godeä hamomalola säi amoda gowe. Nilia ie malö Yesu Gelesoie ëigi asigi afädë negela nea, nihilimu boba hahamosa namolöla. Ea amala hamomalola säi. <sup>24</sup> Amaimo, afädëä ea hamomalola säi amo gadola bëgëla hamoseda, eda Godebalä dila nea. Amase, eege dolö amolibalä dila neamele. Godeä ie Gesami niligali i ameada nili Godebalä dila neala helësësamelë.

## 4

#### *Dofä sälo Gesamile wäfalä sälo gesamile mogemolö*

<sup>1</sup> Ne damelë obeägilola dili-e, wäfalä bea sälo yafie amoli sege sulubadelagi nawesa nea. Amai odoaea Gesami nema neala säsa, sulubadelaä dofä säsabela helësëmbio. Ili Godemadila walebelela bimolöie fedogola bimalo. <sup>2</sup> Ilima Godeie Gesami neebelela fädäla bimolö amoda gowe. Afädëä sähalea, Yesu Geleso eda dofä dolö domalola digaila säha neebe amomada Godeie Gesami nea. <sup>3</sup> Amaimo, afädëä sähalea, Yesu amala made digaila säha neebe amomada Godeie Gesami nea mademelë. Mala amoda Gelesoie ado niimadila misi dialea. Dafidi mala amo moholömelëla säi dilia nabi amoda walio hä nagadaia misi dialea. <sup>4</sup> Nie malöla dili-e, dilida Godeie malö nea. Wäfalä bea sälo neebe amoli nudula salolela baagila asi nebego. Mida, dilibalä dila neebe ameada nagadaia nafade hamolo amolibalä dila neebe amoda baagila asi neamele. <sup>5</sup> Amolida nagadaia dolö neebe amea ilia nagadaia galu säha neebe amoda nagadaia nafade hamolo amolia nabelo nea. <sup>6</sup> Amaimo, nili Godeie sosogo nefolalea. Ado nilia säsolo amo gala udia dolöea Gode dawadigi nefolalebe amolia nilile ado nabelo nea. Amai gaso, udia dolö Godeie sosogo made nefolalebe amolia nilile ado nabelo made neamele. Amo gadola dofä sälo Gesamige wäfalä sälo gesamige mogemolöi galea.

#### *Dolö afädëä Gode boba hamoi neebe ameada odoage boba hamomalola säi*

<sup>7</sup> Ne damelë obeägilola dili-e, boba hamolo amoda Godemadila mulo amea nilia nihilimu boba hahamosa namolöla. Afädëä odoä neebe amo boba hamosa neebe amoda Godeie malö nea, ea Gode dawadigi nea. <sup>8</sup> Amaimo, afädëä odoä boba made hamosa neebe amoda Gode dawadigi made nea. Mida, Gode eda boba hamolo nea. <sup>9</sup> Godeä ie Efege afädëfalä amo nagadaia digamalai. Ea amala hamoi amea nili namolöi namiäia amai. Amala digamalai ameada Godeä nili boba hamosa neebe amo olei. <sup>10</sup> Boba hamolo amoie mida gowe. Nilia edale boba hamoi made, eadale nili boba hamolahilä, nilia nafade hamoi amo hëmäia ie malöea hile namolö amo odala iala baagomäia e digamalai.

<sup>11</sup> Ne damelë obeägilola dili-e, Godeä nili amala boba hamoi amea nilia nihilimu boba hahamosa namolöla. <sup>12</sup> Afädëä Gode made meli nea gaso, nili nihilimu boba hahamosa

aligiseda, Gode eege nilibalä dila nea, nilile isogi ie boba hamolo amea hamese amo gadola hamosage neamelë. <sup>13</sup> Amaimo, Godea ie Gesami niligali i amea nilia ema dila neebe amoge, amase, ea nilima dila neebe amoge nilia dawadigimelë. <sup>14</sup> Naadoea ie malö nili sege foi sulubadelagi neebe amo sulubadelagali damula aulo namiäia fisiga idai. Fisiga idai amo nilia siia bealahilä, ulufadigila säla iahago. <sup>15</sup> Afädëa Yesu eda Godeie Efege neala säla ulufadigiseda, Godea ebalä dila nea, amase, eege Godebalä dila neamelë. <sup>16</sup> Amaimo, Godea nili dofä boba hamosa neala nilia dawadigi nea. Gode eda boba hamolo nea. Afädëa boba hahamosa aligiseda, e Godebalä dila nea, amase, Godege ebalä dila neamelë.

<sup>17</sup> Nilia amala aligiseda, nilile isogi ie boba hamolo amea hamese amo gadola hamosa nea. Amala hamosa neebe amea, nili nagadaia nea hi e gadoi aligilo amea, aligila wagala gudisolo amo gala nili bedämolö made, geloi namolömelë. <sup>18</sup> Afädëa boba hamomolöge bedämolöge balagula gaula namolöi mademelë. Boba hamolo dofä fädäi amea bedälo amo nesila digilo. Mida, së molömadi neebe amea bedälo. Afädë bedälo neebe amoda Godeie boba hamolo amea hamese amo gadola made hamosa neamelë. <sup>19</sup> Godea dafidi nilidale boba hamoi amea nilia boba hamosa nea. <sup>20</sup> Afädëa ie edooma bimolö habobaha nea sähalea, Na Godema boba hamosa neawela säsedä, eda wäfalä sälo nea. Ea ie edoo amoli siia bealahilä, ili boba made hamosa nea galëda, Gode made meli neebe amo ea boba hamomolö amo uli nea. <sup>21</sup> Ea nilia hamomalola säla i amoda gowe. Afädëa Godema boba hamosa nea ie edooma boba hamomolöi galeala säi.

## 5

### *Geleso sosogoea nafade sulubadela nufuda salelo nea*

<sup>1</sup> Afädë Memelei amo dofä Yesu e nealahilä asigi afädë negei neebe amoli sulubadelada Godeie malö nea. Eedo afädë amoma boba hamosa neebe amoli sulubadelaie ie malö amomage boba hamosa nea. <sup>2</sup> Nilia Gode boba hamolahilä ea hamomalola säla negei dibe amo nabala hamolo amea, nilia Godeie malölali neebe amo boba hamolo neala helësëmolö dialea. <sup>3</sup> Mida, Godema boba hamolo amoda gowe. Ea hamomalola säi amo nabala hamolo. Amoda iliawai made, hamomolöi dialea. <sup>4</sup> Mida, Godeie malö nefolalebe amoliada nagadaia nafade hamolo elö elöla dibe amo nudula salolela baagila aulo nea. Yesu Gelesoma asigi afädë negei neebe amea nagadaia nafade hamolo dibe amo nudula salolela baagila asimelë. <sup>5</sup> Nagadaia nafade hamolo dibe amo nudula salolela baagila aulo neebe amoda nowëa. Amoda gowe, Yesu e Godeie malö neala sälahilä, asigi afädë negei neebe ameamu baagila aulo nea.

### *Godea ie malömadila namolöi namolö i*

<sup>6</sup> Ödäeage healeage misi amoda Yesu Geleso.\* Ödäeamu made, ödäeage healeage misi. Gesamia dofä sälo amea dofä amala misi amo säla iaha nea. <sup>7</sup> Ohodoa ilia dofä amala misila säla iaha nea. <sup>8</sup> Gesamige, ödäge, healeage amolile adoda afädëdimu säla iaha nea. <sup>9</sup> Udia dolöea siia meli amo dofä säsebelä asigi afädë negelomelë. Amai gaso, Godeie ado dofä sälo dibe amea udia dolöie ado sälo amo baagila asi dialea. Mida, e Gode nea. Elöda, hile efegeie säsisä nea. <sup>10</sup> Amala säla i amo, afädëa Godeie malöma asigi afädë negei neebe amoe isogi ie malöea hamoi Eedoea säsisä neebe amo neala gaula nea. Amai gaso, elöea Godema asigi afädë made negei nea, Gode eda wäfalä sälo neala helësëlo nea. Mida gowe. Ie malöea hamoi säla i amo dofä gabula asigi afädë made negei amea. <sup>11</sup> Amaimo, ado säla i amoda gowe. Godea niligali namolöi namolö i. Ie malömadila namolöi namolö amo i. <sup>12</sup> Afädëa ie malöma dila neebe ameadä namolöi namolö amo gaula nea. Afädëa ie malöma dila made neebe ameadä namolöi namolö amo made gaula nea. <sup>13</sup> Godeie malöie eigi asigi afädë negei nefolalebela dili-e, dilia namolöi namolö gaula nebege dawadigimäia, na dilima ado gowe dëdëla iäsisago. <sup>14</sup> Nilia Godea helësëi dibe amo gadola ema adosa nea, nilia afädë nabaseda, ea nilia säi amo gadoi imolömelë. Ameadä nili ie siigi bedäla made gelola neamelë. <sup>15</sup> Nilia ema ado afädë nabasegi, ea nabalö gabula dawadigi nefolalebe amea ema nabi amo imolö gabula dawadigi nefolalea. <sup>16</sup> Afädëa ie edoea nafade hamosa neë beaseda, nafade amo gadoi hamose ameadä baagomolöi made galëda, Godema nabaseda, Godea ema namolö imolömelë. Amo säsebe amoda, nafade ameadä ili baagomolöie made säha nea. Amaimo, na gomalä säha, nafade hamose ameadä baagolo dialea. Nafade amoie dilia adolasimalola säha maade. <sup>17</sup> Asiala hamolo sulubadelada nafademu. Amai gasoda, nafade hamose ameadä baagolo made, nafade odoa amo gadoi dialea.

<sup>18</sup> Nilia helësësaleada, afädë Godeie malö neebe ameadä nafade hamosamu aligilo made neala helësësa. Mida, Godeie efegea e sigi neëgida, nafadelasilöie busa neebe ameadä e

\* **5:6:** Giligi adogida ulufadigila dëdëi made, ödä heale elemu säi. Dawadigi odoa neebe amoliada, ödäla säi amoda Yesu ödägi gei amo helësëi. Healela säi amoda Yesu baagoi amo helësëi.



diigimolöi made nea. <sup>19</sup> Niläda Godeie malö neebe amoda dawadigi. Nafadelasiloie busa amea nafade hamolo neebe amoli sulubadela beaha neebe amoge nilia dawadigi. <sup>20</sup> Godeie malö nagadaia digai amo nilia dawadigi nea. Nilia Gode dofä neebe amo dawadigimäia ea dawadigilo amo niligali i. Nilia dofä Gode neebe amoma dila, ie malö Yesu Gelesomage dila nefolalea. Gode eda dofä nea. Namolöi namolö amoda hi e gelola nea. <sup>21</sup> Nie malöla dili-e, wäfalä sälo gode neebe amo helësëlahilä, gasi gala sigola namialo. Hä amo.

## Agedu Yone Neala olelo oboba

Yonea beba agedu gowe dëdëi amoda ado holöbö obobala säi amo gowe. Geleso sosogo dihilimu boba hahamosa namolö dialeala säi. Amase elöda, wäfali säsäla olelelo neebe amolia dili neala golila dahila neloea, hedabola idihë namialola dëdëla i.

<sup>1</sup> Neda ëdëi sali dafidiloea udia Godea memelei ië malölalima dëdëla iahago.\* Na dili dofä boba hamosa neamelë. Namu made, ado dofä dawadigi ili sulubadelaeage dili boba hamosa nea. <sup>2</sup> Ado dofä nilile isogi dibe ameage amo nilibalä diamolöi dibe ameage dili boba hamosa nea. <sup>3</sup> Naado Godeage, ië malö Yesu Gelesoeage dofä nili boba hamola, elea ugila negela, nili bobasëla, aealasiloea nilile isogi gelolasimolömelë.

<sup>4</sup> Naadoea nilia hamomalola säi amo gadola die malö odoaea ado dofä amo bëgëla awähala säi amo nabalahlilä, na edefademalä obeägimelë. <sup>5</sup> Amaï gabugi, udia-o, nili nihilimu boba hamodi. Hamomalola säla negei dëdëla iasise amoda gähe made, mi gäwia amila nilibalä dilo amo. <sup>6</sup> Boba hamolo amoda gomalä. Ea hamomalola säla negei amo gadola bëgëla awäla hamolo. Ea hamomalola säla negei amoda gowe. Dilia mi gäwia amila nabi amo bëgëla hamomalo. <sup>7</sup> Mida, dahila nelo yafiea Yesu Gelesoda dolö domalola digai madela säsäla sege elö elögi afiaha maadei. Amolida dahila nelo, Gelesoie ado nii nea. <sup>8</sup> Amaï gabugi, dilia hamoi amoie bidi nimolö amo made neala dabadigiloea, idihë namialo. Bidi amo sulubadela nimolöie amala namialo. <sup>9</sup> Afädëa Gelesoea säla olelei amo hedabola gaula made, ado odoa balagula gaula neebe amoda medelala baagila asi neebe amobaläda Gode e nea made. Afädëa ea säla olelei amo hedabola gaula neebe amobaläda Efegele Eedole nea. <sup>10</sup> Afädëa dili neebee maala, Gelesoea säla olelei amo gadola made, elö gaula maaseda, e säla olela gausiala mosöa maala fimola sämabio. <sup>11</sup> Afädëa e säla olela gausiaseda, ië nafade hamosa neebe amo ebalä dila hamosa nea.

<sup>12</sup> Na dilima ado yafie säla imolö gaso, bebagi dëdëla iase amo dofea made. Ne dili neebee söfë mudulä. Maala nea dilile odagi beala säla idulä, nili obeägisa maademolöie. <sup>13</sup> Dilile dialifi memelei\* amoie malölali dilima ilia hawioila säsisago. Hä amo.

---

\* **1:1:** Udia Godea memelei amo gadoida Geleso sosogo.

\* **1:13:** Agedu Yone 1 bimalo.

## Osoda Yone Neala olelo oboba

Yonea beba osoda gowe dēdēi amoda udia dolō Godea wela ifosi amoli beaha aligilo ēi Gaiusama dēdēla ī. Dēdēla īahalea, Yonea Gaiusaea Geleso sosogo sigi nea ugila negesa nelo amoie nesegesamelēla sāla ī. Nesegealahilā sāhalea, Dolō afādē ēi Daiodelefsia asiala hamosebe amoie hedabola siia bealahilā, sigola namialola sāla dēdēla ī.

<sup>1</sup> Neda ēdēi sali dafidiloea, nīe damelē obeāgilo Gaiusa-o, na di dofā boba hamosa nea dima dēdēla īasisago. <sup>2</sup> Nīe damelē obeāgilo-o, nelebo dia hamosa nebebo hedabola hamosa namiāiage, di olola made hedabola namiāiage, die gesami hedabi neebe amo gadola namiāia helēsēsamelē. <sup>3</sup> Dofā sāmōlōmadi namolōi nelo amo gadola, asigi falagasei nea dofā sāmōlōmadi namolōi neamelēla nedoo odoa maalahlilā nema sāla ī amo nabalahlilā, na edefademalā obeāgimelē. <sup>4</sup> Afādēa sāhalea, Die malēsā dofā sāmōlōmadi asi namolōi neala sāse nabalahlilā, na edefademalā obeāgisa aligilo. Na obeāgilo ameada, obeāgilo sulubadela baagila asi dialea.

<sup>5</sup> Nīe damelē obeāgilo-o, di asigi falagasei nea. Didoalali ugila negela digi, odoa ilia di dawa made nefolalebe amoli ugila negela digisa nebegoda hedabola hamosa nebegola sāha. <sup>6</sup> Amolia udia dolō Godea wela ifosi yawe nefolalebe welima dia boba hamolo amo sāla īmelē. Amala sāla īlo amoli nelebo gaula nawesa namolō awāsebe amo gadola afiasebea ami Godea helēsēse amo gadola dia ili ugila negemalo. <sup>7</sup> Mīda, ili Yesuīe ēigi awāhalea, Godema asigi afādē negei made nefolalo amolile nelebo afādē iligali īmāiala made helēsēla, bahīla asi gabio. <sup>8</sup> Amala hamolo amoie nilīa ilibalā dofā sāloie hamoi gedola hamomolōie dia ili ugila negemolō dialea.\*

<sup>9</sup> Na beba dēdēla udia dolō Godea wela ifosi di neebea nefolalebe amolima ī. Amala ī gasoda, Daiodelefsia e busa namolōila helēsēlahilā, na ado sāi amo fisi gabio. <sup>10</sup> Ea nilīle ēi sāla udia dolō odoama ado nafadefalī nafadege wāfalī sāmōlōge sāha neebe amo ne dili neebea maalahlilā, ea nafade hamolo amo dīlia nabuāia na sāla ulufadigimolōmelē. Ea amomu hamolo made, edoolali odoa maasegige dili misigolela sāla obeāgilo mademelē. Amala hamolo made nea, udia dolō odoaea dili maase amoma mosōa fimāia fu īmolō helēsēi neebe dīlia udia dolō Godea wela ifosi odoabalā seēge ili segea doadigila mosāia eada nesila digimolōmu helēsēlomelē.

<sup>11</sup> Nīe damelē obeāgilo-o, nafade hamolo neebe amolia nafade hamolo amo gadola hamola oodo bibila hamola made, hedabi hamolo neebe amolia hedabi hamolo amo gadola hedabi hamola oodo bibila hamosa namialo. Udia dolō hedabi hamosa neebe amolida Godeie malō nea. Nafade hamosa neebe amoliada e melī made nea.

<sup>12</sup> Udia dolō sulubadelaea Demediliasa eda gowe gadoi neala sāha aligilomelē. Eada dofā sāmōlōmadi nea ea dofā sāmōlō gauī neebe amo gadoi neala olelo nea. Nilīage e siia bealahilā, eda gowe gadoi neala sālomelē. Dia nilīa sāsebeweda mogola sāsebela dawadigi.

<sup>13</sup> Ado sāmōlō yafie gaulea gaso, dima bebagimu dēdēla īmolō habosebemelē. <sup>14</sup> Holōfalī nelolahilā, halīgila odagi beaha nea sāmōlōie ne di neebea mudulā.

<sup>15</sup> Aealo dima dīamiāia hamesamelē. Damelē odoa amolia dima hawiosebegola sāsisago. Alīle damelē di neebea neebe amoli hīdo hīdolama hawioila sāila sāla īmalo. Hā amo.

\* 1:8: Dolō amolia Gode mala sāla īia wage nawesa namolō asi.

## Yudi Neala olelo oboba

Yudia dëdësaleada, Geleso sosogo nefolalebe dilia, ado mala dofä amobalä ado nii neebe amolile ado, made nabualola säla dëdëi. Amase, Godea ìe udia dolö amolima Ado Mala Hedabi säla ìaha maadei amoie, afädëa ìe ado mala bedefamolöi mademelë. Ado nii maase amolibalä gelola säla obëgëmäia, beba gowe dëdëla ìasisagola säla dëdëla negei dialea.

Beba gowegi dëdëi dibe amoda Agedu Fidagi dëdëi dibe amo gadoi dialeamelë.

### **Dilia Ado Mala Hedabibalä ado nii neebe amoie ado made nabala, auaula neada, dilile asigi afädë negei nebege idihe namialo**

<sup>1</sup> Neda Yudi, Yesu Gelesoie hamoi hamolasilo, Yameseie edoomelë. Naado Godea boba hamola, Yesu Gelesoea sigi neebe, udia dolö Godea wei dilima <sup>2</sup> bobasëloge, daluloge, boba hamologe, baula nobamäia hamesamelë.

*Sesigi ado mala dofä amobalä ado nii misi neala säi  
(Agedu Fida 2.1-18)*

<sup>3</sup> Ne damelë obeägülola dili-e, Godea dilige nege nili sulubadela damula asi amoie, na beba dëdëla ìmolöila gelola helësësamu nelo gaso, walioda fodolo dëdëmolöi dialeala helësësa neawe. Godeie udia dolö nefolalebe amolima mala hedabi säla ìaha maadei amoie, ado mala dofä amobalä ado nii neebe amolima dilia gelola säla obëgëmäia, beba gowe dëdëla ìasisago. <sup>4</sup> Mida, odoaea geleä musügä maalahlilä, dilibalä gegoala neamelë. Dolö amolida, Gode made helësëla baagi ìlo nea. Ìlia mala nafadefali nafade hamosebe amoda, dofea hamosala sämolöie, nilile Godeie ugila negelasilo dibe amo neala bedefalo nea. Amase, nilile Busa Dafidilo Geloï Yesu Geleso emu neebe amomada, ìlia oböla, habobalo nea. Amala hamosa neebe amolibalä gudila, asiala hamoila säla, së molömelëla siibafali dëdëla negei dilo amo dialeamelë.

<sup>5</sup> Galone goweda, dilia dawadigisa maadei. Dafidilo Geloïa ìe udia dolö damula awäla, Isibi segeala sigi doadigila asi gasoda, hobeala amoligi odoaea asigi afädë made negesebegi, nufudaha maadei amoda, na dilima bu oböla helësëlasisamu namolö asigisa. <sup>6</sup> Selesaia fii ìlima Godea hamoile geloïe ì amo hamosalea, hedabola aligila made, ìlile sege amo digila asi. Amasebegi, segeyo edefade besela galasolo amo gala, Dafidilo Geloïa ìlibalä gudimolöie, ìgi ëfë damumolö uli amea nafodolahilä, uli gasimi sagai dibeami aminegesi dialea. <sup>7</sup> Amo gadola wäla, Sodomo Gomola fii udia dolö amoliage, udia dolö gaamu ga madela difolalo amogi fii amoliage, domaloea nafade hamomolö amomu helësëla, gesami awäla nafade elö elöla hamosa nelo. Amala hamosa nebegi, Godea ìli së muäia, nulu wisamu neebeami ifosi nefolalea. Amoda nili sulubadela helësëmäia, ulufala negei dialea.

<sup>8</sup> Amase, amo gadola wäla, dolö dilibalä gegoala neebe amolia simasia melëlo ameadada, susugu hamola ìlile domalo nafadela nigime baaloge, sigi aligilo nefolalebe amolima auaula baagi ìloge, amase, yo digalo hido elöibalä aligilo nefolalebe amolima gagadeloge nea. <sup>9</sup> Gaso, selesaia fii nefolalebe amoie busa Maigolea mugabe busabalä Mosesie domalo nimolöie elewalosolo amo galada, ea ìe asigia gagadela, asiala hamoila made säla, Dafidilo Geloïa ìlila nemoäiala säimelë. <sup>10</sup> Dolö amoliada, nelebo dibe amo mi fädäla dawa made neada, nelebo ìlia dawa made amoma nafadela säla gagadelo nea. Ìlaba elö elöla helësësa amo gadoi hamolo amo gadola, dolö amolia helësësa amo gadoi hamose ameadada, hili ìli neala nafadesa neamelë. <sup>11</sup> Dolö amoli gadoi amogi asigii gabu. Ìlida Geini aulo idi amogi asimelë. Balamaea asiala hamoi amo gadola, ìlia muni nimolöie, ea asiala hamoimadi baluluia asimelë. Amase, Golaea Godele Mosesele ba beasebegi, nufudadigi amo gadola, ìliage ba beasebegi, nufudaha maademolömelë.

<sup>12</sup> Dilia gegedola Geleso sosogo odoama boba hamolo olemolöie, molö nasolo amo gala, dolö amoli maala ìlile mala hamolo ameadada, molö gegedola nulo amo holöbö nigime baai gadoi hamolo. Molö giai nulo segeyo edefadegi gabula helësëla hewala made neada, ìlia sugua sibi sigi aligilo hili ìlimu helësëla nulo nea. Gelë odoa sege gaula mulo made, foeda doala gaula aulo amo gadoida, dolö amoli nea. Amase, ì gägä negelo segeyogi gägä negelo made amo gadoige, ì soomo beselala fisi bausoi amo gadoige neebe amolida, bu äudäla baagoi gadoi neamelë. <sup>13</sup> Ìlida ödä edefadela aidagula mulo amo gadoi nea, mala nafade hewai hamose amolida, ödä södaia dibu ulufa negelo amo gadola ulufadigilo nea. Ìlida gasumili odoa muugi fudufuduia aulo neebe amo gadoi nea. Godea ìli sege nafadefali nafade, gasimi sagala fisi dibeami amolöi namiäia daiala negesi dialea.

<sup>14</sup>Inogo eda Adamaie yaua mi näba gifalädalü a mea, dolö nafade hamolo amolile siibafali bea säla negesaleada, Nabuö. Dafidilo Geloï e, ie selesaia fii dausini yafiebalä maala, <sup>15</sup>udia dolö sulubadelabalä gudila mogemolömelë. Gode made helësëlo amolia Gode made helësëla nafade humosa dilo amoïege, amase, Gode made helësëla asiala hamolo amolia ado nafade sulubadela ema säha nelo amoïege, ilibalä gudila mogemolömelëla bea säla negei dialea. <sup>16</sup>Dolö amolia segeyo sulubadelagi adoea elewalola säloge, gadiabola elö elöla säloge, amase, domaloea gelola hamelo amoïe idigi bëgëla auloge, ilia hili hamoi amo gugusäla bimäia, ado yafie gelola säloge, ilia helësëse amo bëgëla hamomäiaie, odoama säfe negela säloge nea.

*Gelola idihë namialola säi*

<sup>17</sup>Amai gaso, ne damelë obeägïlola dili-e, nilile Dafidilo Geloï Yesu Gelesoïe abosolo dolö amolia dafidi säla i amo helësëla obëgëmalo. <sup>18</sup>Ilia dilima säla iahaleada, segeyo aligila wagamolö ga madese gaalu, gadiabolo dolö amoliada domaloea gelola hamelo amoïe idigi bëgëla moholömelëla säi. <sup>19</sup>Dolö amoliada, udia dolö mogelasila, dolöfäie mala dibe amomu bëgësalea, Godeïe Gesamida ilima maademelë.

<sup>20</sup>Amai gaso, ne damelë obeägïlola dili-e, Eleloï Gesamïe geloigi nea, Godema adosa neada, dilia asigi afädë negela, Godeïe mala eleloï hedabifali amo gaula mogosa nebego, bäula edemäia neala dabilibaha namialo. <sup>21</sup>Amala hamosa neada, dili Dafidilo Geloï Yesu Gelesoïe bobsëla dilima namolöï namolö imäia beaha nebego neada, Godeïe boba hamolomadi namolöï namialo. <sup>22</sup>Udia dolö asigi afädë negei gaso, asigi äudä negela asusugai nefolalebe amoli, dilia bobsësä namialo. <sup>23</sup>Udia dolö odoa nulo gobeia neëda, aabela nabelela nimalo. Odoa bobsësäleada, dihili dilige bedäha nea, hamogisa namialo. Iliä mala nafade hamosa aligilo a mea, Godeïe siigi fagulo nigime baai gadoi salugala neebe ameada, fagulo amolima habobaha namialo.

*Nilia Godema nesegesa namolöla*

<sup>24</sup>Dili emo dauala digaloea, dili sigi namolöï neebe amomage, dili nigime baai made, obeägïsa nea, e mia ie yo digalomadi, dili neala ifosimolöï neebe amomage, <sup>25</sup>amase, nilile damula aulo afädëfali Gode neebe amomage, Yesu Geleso nilile Dafidilo Geloïie aulodaiäla, yo digalo hido elöige, ëi ilibia namolöge, geloige, busa nea sigi namolöge, mi gäwïafali amila, Gode hilemu dilo amo walio dibe wege, hobealage, amalasimu diamiaia.

Amala gelola hamomäiamelë.

Hä amo.